

LOGICA ELENCTICA

S I V E

S U M M A
CONTROVERSIARUM,
Quæ circa
Materiam, & Præcepta Logicæ,
agitari solent.

In qua etiam
NOVÆ aliquot QUÆSTIONES
tractantur.

Authore *THOMA GOVEANO*, M.A.
Verbi Divini Ministro.

D U B L I N I I,

Excudebat *Jos. Ray*, sumptibus ejusdem; prostant
venales apud *Eliph. Dobson*, ad Insignia Stationari-
orum in vico vulgò dicto *Castle Street*. 1683.

ch

310171



LECTORI

INGENUO & PERITO,
S.

UT ad mentes Tyronum Logicorum initiandas, & statuminandas, necessaria imprimis est Logica *Didactica*, in qua Præcepta hujus Artis, definitionibus, divisionibus, & Canonibus perspicuis, proponuntur, & exemplis illustrantur; ita etiam ad easdem exercendas, & perfectiori notitia imbuendas, necessaria proxime est *Elenctica*; in qua controversiæ tractantur, quæ minus recte ab aliis tradita sunt corriguntur, & difficultates quæ rectæ præcepto-

ceptorum intelligentiæ officiant, enodantur. Hanc igitur partem Priori succedere volui, ne quid eorum desiderent juvenes, quæ ad plenariam Logicæ Institutionem necessaria viderentur.

Et, cum in priori parte, hoc mihi incommodum accidit, ut multis sphalmatis, & erratis conspurcata prodiret, ex quibus nonnulla incogitantia & festinationi meæ, inscribendo, & recognoscendo, imputanda sunt; (nolim enim culpam meam in alium conjicere,) pleraque autem incuriæ Typographi, cum ipse à prelo longe abessem, nec (ut contigit) qui ei præesse, & inspicere posset, haberem; experientia licet serò edoctus, utique infortunio, in hac Editione, prævenire, totis viribus studui; hoc
est

Lectori, &c.

est majori cura, & diligentia, unumquodq; primum descripsi, & descriptum recastigavi; amicum etiam quendam peritum, & fidelem delegi, qui Typographiæ præesset; ut, favente Deo, quantum ingenii mei imbecillitas patitur, expectationi Lectorum melius responsura, quæ nunc evulgo, confidam.

In præsentis igitur opere, non omnes tractavi Quæstiones quæ hætenus circa Argumenta logica ventilari solent, sed quæ utilitatem aliquam habere videbantur. Nonnullas etiam novas proposui, & definivi, de quibusdam scilicet præceptis, quas Recentiores, præsertim Cartesiani, systemati logico addiderunt. E primariis autem finibus, quos in his Controversiis pro-

proposueram, unus fuit, fundamenta errorum in religione, præsertim illa quæ à Pontificiis posita sunt, convellere. Sæpius enim optaveram, ut integrum Philosophiæ Systema ab istiusmodi dogmatis, orthodoxus & peritus aliquis scriptor repurgaret. Et mecum fortasse alii reprehendendum judicabunt, quod, cū Pontificii, scripta philosophica, sine fine multiplicent, parum aut nihil ejus generis (nisi obiter in tractatibus theologicis) à nostris præstitum sit. Præter ea enim quæ Keckermannus, & Burgersdicius, didactice magis quam elenctice, ediderunt, nemo, quod sciam, integrum Cursum tractandū suscepit, unico Derodone excepto. Hic autē postquam Logicam, & Metaphysicam, & compendium quoddam

dam Physiologiæ perfecit, morte è terris translatus est. Cum igitur occasio mihi, per aliquot annos, de hujusmodi rebus cogitationes agitando, data sit, satius putavi à me, ut aliquid in hoc genere, quam à nemine, in his regnis, tentaretur. Nec enim convenit, ut solos Jesuitas, aliosq; Pontificios scriptores, de hisce Quæstionibus legendos, Juventus Logicæ & Philosophiæ studiosa haberet.

Quæ minoris momenti aut difficultatis visa sunt, paucis expedivi: quæ disputandi materiam aptiorem aut digniorem haberent, latius tractavi, & definitionem quæstionis cujusq; gravioris, Thesis tradidi. Ubique etiam brevitati studui, quantum materia pateretur. Unde factum est, ut sine terminorum præcogni-

cognitione, quasi ex abrupto, plerumq; ad statum quæstionis procedatur. Supponenda enim ubiq; ut præcognita, erant, quæ in Institutionibus jam tradideram. Cæterum ne in vestibulo Lectorem diutius teneam (licet nullo novitatis studio, aut singularis scientiæ affectatione ductus, virorum doctorum sententias nonnullas hic reprehenderim,) occasionem cogitandi ex his scriptis sumpsi, de vanitate scientiæ humanæ. Sicut enim nos, sæculo nostro, Antecessorum scripta castigandi libertate utimur, ita etiam posterī, nostra, jure, vel injuria, redarguent; & quæ nobis nunc placent, ætati sequenti displicebunt.



INDEX RERUM

E T

QUÆSTIONUM PRÆCIPUARUM.

Numerus paginam indicat.

A.

Adamus, an statim à creatione sua, cognitione Philosophica præditus. 42.

Analogia & Analogum, 315. sequi communis Analogorum definitio & divisio Examini subjicitur. 316, &c.

Apprehensionis objectum, interdum Ratio simplex 322. sæpius complexum quid. ibid. & 323. Interdum integra propositio, & discursus. 324, &c. In ea quando veritas & falsitas Logica. 330, 331. An & quatenus dirigibilis per præcepta Logica. 332.

Index Rerum

Ars cum Natura confertur. 26, 27.
Attributorum Ordines non minus quam rerum
in Logica proponendi, 83. *Attributa quomodo a*
se invicem & rebus distinguantur, 86. seq. *Attributa*
partium quando de Toto vere dici nequeant, 218,
 219. *An Attributum quod ex se universale est, uni-*
versalitatem retineat in propositione. 367. *De At-*
tributis Topicis, ut, vocantur. 44

C.

Causa in genere, quid 226. *semper quid actu*
existens. 228, *Quomodo prior Causato.* 230.
Causa per accidens, 232. *Remota ibid. & seq.*
De Categoriis variae sententiae examinantur, 68.
 & seq. *Quenam genuinae* 83, 84.
Cognitionis speculativae, & practicae objectum, 5,
 6. *Speculativa quo sensu per se expectibilis,* 6. *Ad*
practicam quousque potentia operandi requiratur,
 6, 7. *An quae ad praxin non applicatur, utilis* 7.
Cognitio inductiva ad praxin, an practica, 7, 8.
Cognitio rei jam factae, an practica, 8. *Idem quaeritur*
de cognitione plantarum in agricola & fanta-
tis in medico. 9. *An cognitio practica eorum sem-*
per sit, in quibus agendis, is in quo est errare, &
quae agere vel non agere potest pro arbitrio, 9, 10.
Cognitio speculativa evadere nequit practica nisi
per accidens. 16.
Conceptus objectivus improprie dicitur. 228
Convenientia quid, 260. *Ab Identitate & Uni-*
 tale

¶ *Quæstionum præcipuarum.*

tate ut differat, ibid. *Convenientia realis & Rationalis*, 261. *Essentialis*, 262, 264. *Convenientia quæ* tenus distincta à rebus quæ conveniunt, 265. An in eadem ratione consistere possit cum diversitate, 266. *Examinatur Effectum quæ conveniunt cum uno tertio, conveniunt inter se.* 264.

D.

Definitio an definiri possit, 380. Quo modo definienda 381, 382. An in simplici apprehensione consistat, 382, &c. Quo modo distincta à definito 384. An unius rei unica, 385. An ulla sit perfecta 386, &c. An semper tradenda per attributa intrinseca, 390.

Demonstratio quid, 449. præcognita ejus, 452. Subjectum, 453. Principia, 455. Medium præcipuum, 460. Quarumnam Propositionum sit, 454. An præmissæ in ea certiores sint conclusione, 464. Eiusdem divisio in *quod & propter quid* 470. Per causam remotam qualis, 473. De circulo in demonstrando. 474.

Denominationes & Denominativa quæ & quot, 320.

Differentia, an possit definiri, 207. Specifica quid requirat, 209, 212, 213.

Disciplina Theoreticæ artibus præstant, 36. cedunt Ethicæ, 37.

Distinctio rerum in quo consistat 178. *Distinctionis realis* criteria, 181. An separabilitas ex

Index Rerum

eorum numero sit, 182. *Distinctio Modalis*, 183, &c. *Rationis* 185. *Distinctio Rationis ratiocinantis*, 186. & *ex natura rei*, 187. *Distinctionum Genera secundum Scotistas*, 187.

Diversitas quid, 263. Quatenus à rebus quæ diversæ dicuntur, distincta sit, 265.

Divisio; an modus sciendi à reliquis distinctus, 392.

E.

Causa Efficiens, quid, 236. distinguitur ab effectu 237. & 242. *Mutua Efficientia* an sit, 239. An *Efficiens* manens eadem semper faciat idem, 240. *Emanativa*, an ulla sit, 243. *Effectus* unius efficientis an idem numero omni potuit ab alia, 241. An idem procedere possit à pluribus efficientibus totalibus, 246. *Efficiens principalis*, 248.

Ens, an communis aliqua ejus ratio sit, 102. An transcendat differentias, 105. An univocum ad sua inferiora, 106.

Non-Ens, an quid commune habeat cum Ente, 109. An inter *Ens* & non *Ens* aliquid sit medii, 111.

Ens Rationis an sit 112. seq. Non complectitur sub se Genus, Speciem, Subjectum, Prædicatum, &c. 61, 62.

Existentia, quid, 147. Quomodo distincta ab *Essentia*, 149.

Exemplar quid, 253, seq.

F.

& Quæstionum præcipuarum.

F.

Finis, causalitas ejus in quo consistat 255. seq.
Quomodo eam exerceat 256. Causatum finis
quid. 258.

Futurum, & *futuritio*, quid 133. an ab æter-
no, 134. Ejus causa seu ratio 137, seq. Res fu-
turæ an Deo præsentēs, 142.

G.

Genus. Definitio ejus explicatur 199, &c. Ex-
penditur definitio Porphyriana, 201. Quomodo
prædicetur de individuīs, 203. Remotum attri-
butum individuorum, quo sensu, 204.

H.

Homonymia quid denotent 309. Eorum defini-
tio vulgaris expenditur. 310.

I.

Idea rei in mente, quid, 326, &c. Quænam
clara, & obscura. 329.

Individuum quomodo prædicetur, 207. An
omnia individua specie differant 209. An quæ
ejusdem sunt speciei dissimilia sunt in Essentiis, 212.

Index Rerum

Aut inæqualia virtute essentiali. 213.

Instrumentum quid, & quomodo ad effectum concurrat, 248. seq. Divisio Instrumentorum in *conjuncta* & *separata* expenditur. 251.

Intelligentia, quædam pure apprehensiva. 12.

Non est *Habitus*, sed facultas naturalis. 18.

Interpretatio simplex. 294.

L.

Lingua quænam præstantior. 285.

Logica objectum, partim *Res*, 51. & seq. partim *voces*, & *oratio*, 59. præcipue verò operationes *Mentis*, 57. Neutrquam *Entia Rationis* proprie, 62. An, & quo sensu, *scientia*, 64. & c. partim *speculativa*, partim *practica*, 65. Est etiam *Ars*, *ibid.* Non tamen *Habitus instrumentarius* proprie, 66. Quatenus ad alias disciplinas necessaria, *ibid.*

Contraversiæ Logica, cur tractandæ, 49, 50.

Enigmata quid proprie, 186, & seq.

M.

Methodi quorumnam sit, 495. An *Methodus* sit *Instrumentum sciendi* à cæteris distinctum, 496. *Methodus Didascalica* quomodo procedat, 497. Divisio ejus in *Syntheticam* & *Analyticam* expenditur, 498, & c. An *doctrina de locis argumentorum* utilis sit, 502.

Modus

Et Quæstionum præcipuarum.

Modus differendi objectivus proprie nullus, 55.

N.

Natura quid, 26.

Nomen. Definitio ejus vulgaris expenditur 295.

De Nomine Infinito, 296. Et casibus nominum,

297. Differentia subjectivi & adjectivi, 298.

Non-Ens, vide Ens.

*Notiones primæ & secundæ, objectivæ & For-
males. 92. & seq.*

O.

*Objectum Attributionis nullum, 28, 29. Obje-
ctum directivum & motivum ut causent. 252.*

Opinio quosnam actus includit, 26.

Oppositio & opposita quæ, & quot, 266 & seq.

Orationis Definitio Aristotelica examinatur, 305.

*Quid proprie sit oratio, 306. An sola enunciati-
va verum vel falsum significet, 346.*

P.

*Paronyma, quæ; ubi definitio eorum vulgaris
expenditur, 310. Eorundem divisio, 321.*

*Philosophia perfecte definiri potest, 1. Variæ e-
jus definitiones examinantur, 2, 3. Non esse To-
tum Genericum sed collectivum, 4. Philosophia
objectiva nulla proprie, 4, 5.*

Philoso-

Index Rerum

Philosophorum sectæ, 43 & seq.

Possibile an in statu pure possibilitatis sit purum nihil, 119. Possibilitas an quid rebus intrinsicum, 122 & seq. Res in statu possibilitatis & existentie actualis, an eadem 131. Possibilium distinctio, 180.

Pradicabilia quæ, & quot, 98. & seq.

Prajudicia infantie nostræ, an acquisitioni scientie officiant, 39.

Præteritum, an idem numero redire possit, 153, & seq.

Praxis moralis & Artesciosa, ut differunt, 11.

Primum cognitum, singulare & Uuniversale, 12, & seq.

Principia cognitionis, quædam Inductione declarari possunt, 15. Principia absolute prima, an à quoquam negari possunt, 15, 16. Pleraq; ex principiis extra mentem nostram in rebus sunt, 16, 17.

Propositio, quid, 334. Nonnullæ illius definitiones expenduntur, ibid. & seq. Partes, 336. Quomodo discernendæ, 337. Non sunt Entia Rationis, 338. De copula 342. Divisiones quædam propositionis examinantur, 343. Propositiones infinitæ, 344. An omnis propositio sit vera vel falsa, 345. An una & eadem simul vera & falsa sit, 347, 357. Veritas & falsitas an propositioni intrinseca & essentialis, 348, & seq. An Propositio vera mutabilis sit in falsam, aut vicissim, 351, & seq. An una Propositio vera sit verior, aut falsa falsior altera, 358. De Propositionibus de futuro contingenti,

& Quaestionum præcipuarum.

genti, 361, & seq. Propositionis Divisio 365. De Indefinita, 366. De Modalibus, 371, & seq. Propositionum conversio, 374, & seq. De propositionibus contrariis, 376. Et contradictoriis, 377.

Propositiones *Probabiles*, quæ, 436. *Probabilitas* in quo consistat, 440, & seq.

Propria, an possint communicari, 214

Q.

Quaestiones Dialecticæ, 444

R.

Relatio realis an sit, 156. An sint etiam Relationes Rationis, 159. Realis quomodo distincta à Subjecto & Termino, 160, & seq. An sint relationes non mutuae, 170. Relata secundum dici & secundum esse, 171. Prædicamentalia & Transcendentalia, 172. An Terminus Relationis semper distinctus à subjecto, 174. An absolutum quid, 175, & seq.

S.

Scientia an sit, 19. objectum ejus, 20, & seq. Quo sensu rerum necessariorum, 64. Quanam demonstratione acquiratur, ibid. An cum fide & opinione in eodem Intellectu de eadem re, consistere possit. 24, & seq.

Scriptæ

Index Rerum

Scripta quid & quomodo significant, 288.
Seruari omnia an homini incommodum, 28.
Sensus non semper vere de rebus testari 30.
Non tamen semper nos fallere, 31, 32. Scien-
tiæ acquirendæ quomodo inserviant, 33, 34. Mag-
nam Scientiæ nostræ partem ab illis originem du-
cere, 34, 35.

Signum quid 221, 224. Signatum & potenti-
am perceptivam quomodo respiciat 224. & seq.
Quomodo agat, 223. An inter Adjuncta nume-
randum ibid.

De Similitudine. 265.

Sophisma quid & quotuplex 479. An doctri-
na de eo utilis sit 480. Sophisma in dictione 482.
Et extra dictionem, 484, 493. Sophisma accidentis,
486. Consequentis 490. Non causæ pro causa,
ibid. Processus à dicto simpliciter ad dictum secun-
dum quid an unquam legitimus, 491. & seq.

Species subijcibilis & prædicabilis, an recte à Por-
phyrio definiantur, 205. Subijcibilis qua talis an
universalis sit, 206.

Syllogismus in quo formaliter consistat, 394. &
seq. An præmissæ mentem necessario determinent ad
ascensum conclusionis, 398, & seq. An ex una præ-
missa concludere liceat, 401. An mens cum
conclusionem infert attendit actu ad præmissas,
402. An ascensus conclusionis intrinsece differt
ab assensu præmissarum 404. An objectum præ-
missarum attingat, 405, & seq. An sit Syllogis-
mus ex aperte falsis, 411.

Syllo-

¶ *Quæstionum præcipuarum.*

Syllogismorum Figuræ quot 412. Modi utiles,
415. E figuris *Syllogismorum*. quænam perfecti-
or, 422.

Syllogismorum distributio in Dialecticum, Apo-
dicticum, Pseudographicum, & Sophisticum &
definitiones eorum vulgares examinantur, 426, & seq.
Syllogismi in necessarium, probabilem & fallaciam
divisio defenditur, 430. An divisio hæc sit Ge-
neris in species, 432.

T.

Terminus propositionis, 341.
Theologia quousque evidenter discurrat, 3, 4.
Tota practica quo sensu, 8.

V.

Verbum in oratione quid significet, 299, &
seq. Quid extra orationem, 302. *verbum* Infanti-
tum, 303. *Substantivum*, 304.

Veritates per se evidentes, esse, 12.

Veritas vel falsitas an omni propositioni conve-
niat, 345. An Soli orationi Enunciativæ insit,
346. & seq. An eadem propositio vera simul
& falsa sit, 347. An veritas & falsitas propo-
sitionibus intrinsicæ & essentielles sint, 348, &
seq.

Univer-

Index Rerum, &c.

Universale quid 189. An à parte rei 190.
Quo conceptu apprehendi soleat 193, 198.

Voces quid significant, 273. & seq. Et quomodo 277, 291, & seq. Unde significationem habeant. 279. Vocum Autores 284. Communitas unde, 312, & seq.

Indicis Finis.

Admonitio ad Lectorem.

Cum omnem diligentiam ordinariè requisitam adhibuerim, quo hic Libellus ab omnibus erratis purissimus prodiret, exitus longe alius fuit ac speraveram. Utrum in Typographi incuriam, aut malam fidem, an in eum qui prælo præfuit, culpa conjicienda sit, nec mea nec tua (amice Lector) refert. Hoc me præcipue dolet, esse ullibi in hac imprecisione quod te offendat. Interim, cum malo aliter mederi non possim, hoc à te peto ut priusquam lectionem libri aggrediaris, Errata sequentia corrigas.

Pag. 9. l. 18. *ei*; ib. l. 22. *esse*; p. 29. l. 11. *quadam*; ib. l. 21. sit [.] p. 30. l. 23. *vita*; p. 31. l. 23. dele *videntes vero*, & repone *aut*; p. 38. l. 2. *theoriam*; p. 46. l. 2. dele [.] p. 57. l. 14. *definitivum*; p. 58. l. 21. *tractantur*; p. 64. l. 27. *quam*; ib. l. 17. *seipsam*; p. 65. l. 20. adde *est*; ib. l. 22. *esse*; p. 78. l. 6. pro (.) (,) p. 84. l. 15. *percipientis*; p. 93. l. 17. dele [;] p. 97. l. 9. XI. p. 103. l. 5, 6. *operosior probatio*; p. 107. l. 33. 4. p. 109. l. 16. [;] p. 110. l. 19. *est*; p. 122. dele *lineam* 17. p. 130. l. 8. adde *cum*; p. 140. l. 29. *quæres*; p. 152. l. 14. *essentia*; ib. l. ult. *ut*; p. 155. l. 21. dele *quoniam vix unquam idem denuo peragitur*; p. 158. l. 30. *cogitationem*; p. 161. l. penult. *intrinsece*; p. 190. l. 9. *una in*; ib. l. 31. *superadditas*; p. 210. l. 22. *est*; p. 225. l. 18. *ut*; p. 227. l. 25. *notius*; p. 230. l. 28. *exercentem*; ib. l. 32. *dignius*; p. 238. l. 4. post *vel*, dele *seipsum*; ib. l. 15. dele *sit*; p. 241. l. 5. *cum nunc*; p. 245. l. 26. dele [.] p. 250. l. 2. *seipsam*; p. 251. l. 16. XI. p. 257. l. 7. *cum*; ib. l. 19. *causa*; p. 260. l. 4. *multa*; p. 267. l. 2. *differunt*; p. 269. l. 23. *dissimilitudinem*; p. 273. l. 4. adde *quod*; ib. l. 5. dele *quæ*; p. 277. l. 3. *conceptus*; p. 284. l. 31. *artem*; p. 295. l. 7. 2. p. 298. l. 35. *rei*; p. 300. l. 28. dele *nam*; p. 313. l. 16. *rerum*; p. 314. l. 1. 2. *Univo-*
cum,

sum; ib. l. 34. adde *r.* p. 330. l. 16. *id*; p. 344. l. 7.
ille; p. 348. l. penult. *duo*; p. 351. l. 12. adde *si*; p.
 362. l. 10. dele *de*; ib. l. 16. *illa*; ib. l. 21. dele (,) post
hodie (;) p. 363. l. 26. lege *determinatura*; p. 415. l. 12.
illius; p. 436. l. 8. *docet*; p. 442. l. 22. *differentia*; p.
 443. l. 28. adde *an*; p. 445. l. 17. *simplicis*; ib. adde
fini; & l. 18. *infit*; p. 449. l. 22. *rales*; p. 460. l. 33.
appetitus; p. 466. l. 23. dele *aut evidentiam*; p. 474. l. 2.
doceat; p. 477. l. 19. *qua*; p. 479. l. 3. *medio*; ib. l. 8.
 adde *vel*; ib. l. 9. dele *vel*; p. 483. l. 25. dele [.] p.
 488. l. 15. dele (.) p. 495. l. 24. *inordinatione*; p. 499.
 l. 14. *communi*; p. 500. l. 19. *traduntur*.

In ELEMENTIS LOGICÆ,

Pag. 8. l. 29. post *medio* dele &.



ELENCTICA

Protheoriæ Philosophiæ.

DISPUTATIO PRIMA,

De ipsa Philosophia.

QUæstio I. *An Philosophia, unica definitione, perfecte, hoc est definitione Essentiali, definiri possit? Quidam negant; Nos affirmamus.* Ratio est, quia facile assignari possunt Genus illius proximum, scilicet quod sit collectio *Notitiarum*; in quo convenit cum Theologia supernaturali, & artibus ignobilioribus, quæ in Philosophiæ censum non admittuntur; & Differentia proxima Essentialis, quæ partim Objectum designat, scilicet *res scitu difficiles*, & digniores; quarum respectu ab Artibus Ignobilioribus distinguitur; partim originem, nempe principia, quæ vel menti per naturam inscripta sunt, vel per sensum & experientiam colliguntur; qua ratione differt à Theologia Supernaturali.

Obj. Philosophia est Aggregatum ex pluribus habitibus diversæ speciei, quæ unica definitione explicari

nequeunt. *Resp.* Licet Habitus illi, secundum rationes proprias, sigillatim unica definitione explicari nequeant; Prout tamen unum Totum conficiunt, satis perfecte explicantur, eo modo quo jam diximus. Sicut & omne compositum, qua tale, perfecte definiri censetur, si Genus illius, & differentia assignetur, licet partes, ut partes sunt, non, nisi quatenus omnes simul concurrunt ad Totum constituendum, explicantur. Ex. g. perfecta censetur Definitio hominis, cum dicitur *animal ratione praeeditum*, licet homo constet pluribus substantiis, diversae naturae, puta mente, & corpore.

Varie à variis definitur Philosophia. Ex Platone multi sic definiunt, *Cognitionem rerum Divinarum, & Humanarum, quatenus homo, per lumen Naturale, assequi potest.* Conimbricenses dicunt, esse *Cognitionem rerum prout sunt*, hoc est, ut ipsi explicant, *per suas causas.* Eustathius, *Comprehensionem eorum qua lumine naturali cognosci possunt.* E nostris, Kekermannus definit, *Compagem scientiae, & prudentiae.* Burgerldicius, notitiam ex principiis per se notis. Derodon denique, dicit Philosophiam considerari posse, vel ut Totum collectivum; & sic definit. *Collectionem habituum evidenter discursivorum*: vel ut totum Essentiale, & sic dicit, esse *Habitu evidenter discursivum.* Sit igitur,

Quaestio 2. *Quid de his definitionibus censendum sit?*

Resp. Prima, ex Platone desumpta, *Objectum Philosophiae Adequatum non exprimit.* Multa enim in Philosophia tractantur, quae proprie loquendo, nec sunt res Divinae, nec Humanae. Ut in Geometria, *anguli, circuli, &c.* in Physiologia, *ignes, nubes, lapides, plantae, bruta animalia, & Homines.*

Obj. Omnia opera Dei sunt res Divinae; & actiones ac opera hominum sunt res Humanae. Ista autem omnia comprehendunt quae in Philosophia exquiruntur. *Resp.* Per opera dei, vel intelliguntur ea quae à solo deo, & immediate, in initio facta sunt. Et haec quidem divina dici possent. Verum Philosophia contem-
platur

platur etiam opera illa, quæ à Causis Naturalibus fiunt. Quod si ista omnia Res Divinas appellare libet, possent etiam Res quædam Humanæ, ut sentire, intelligere, velle, & nolle, pariter Divinæ vocari: & sic duo illa rerum Genera, ex parte. coincidunt. Non igitur omnia quæ in Philosophia tractantur, satis commode, his vocibus significantur.

Definitio Conimbricensium, prout primo proponitur, *obscura est*; ut Explicatio subiecta fatetur. Complectitur etiam Historias, & Artes Serviles. Quia in his sæpe cognoscuntur res *ut sunt*, & per causas. Nec Philosophia ubique res concipit prout sunt, hoc est per causas: nec per causas solas, sed etiam per signa, & effecta, aliâque media. Deinde cognoscere res *prout sunt*, est vere eas cognoscere, sive per causas cognoscantur sive non.

Definitiones Eustathii, & Burgerisdicii, Artes serviles in Philosophiæ ambitum admittunt. Illæ enim ex lumine Naturali, & principiis per se notis procedunt.

Definitio Kekermanni, Theologiam supernaturalem Philosophiæ accenset. Illa enim est, secundum alteram partem sui, nempe illam quæ praxin dirigit, suprema Prudentia.

Utraque Definitio Derodonis reprehendenda est. 1. quia Philosophia non ubique evidenter discurrit, eo sensu quo *evidenter discurrere* à Derodone accipitur; scilicet pro discurrere ex sensu, aut ratione naturali necessaria. Sæpe enim ex solis probabilibus discurrere cogitur. 2. Quia etiam Theologia supernaturalis aliquatenus discurrit evidenter; scilicet ex principiis per se evidentibus. Hæc enim duo sunt principia prima ex quibus discurrit, *Quicquid Deus testatur est verum, & Deus testatur de se, & voluntate sua, in sacris literis.* Prius agnoscitur pro vero, ab omnibus qui sciunt quid voce Dei, vere significetur, nempe *Ens perfectissimum.* Sed & posterius per se evidens est, si, quid nomine sacræ Scripturæ veniat, satis perpendatur; nempe scrip-
tum

tum quod non nisi afflatu divino exarari potuit. Et proculdubio principium istud evidentius est, quam multa ex quibus, in pluribus Philosophiæ partibus, discutitur.

Obj. At omnes consentiunt discursus Theologicos esse inevidentes, licet certissimi sint. *Resp.* Sunt inevidentes, quatenus non procedunt ex principiis internis rerum de quibus concludunt. Et sic, quoad evidentiam, differunt à discursibus Philosophicis plane evidentibus. Non tamen sunt inevidentes simpliciter. Evidenter enim ex illis innotescit quod res ita se habeant, licet causa ignoretur. Nec sine omni evidentia, ulla certitudo subjectiva reperitur.

Posterior Definitio in eo peccat, quod supponit Philosophiam considerari posse ut Totum essentiale, seu Genus quoddam. Nec enim *Logica, Physica, Mathematica; & Ethica*, sunt species Philosophiæ, sed partes integrantes. Philosophia igitur, ad eas collata, Totum est, non Essentiale, hoc est Universale, (sic enim Totum Essentiale hic sumitur à Derodone), sed collectivum. Tota enim ratio Totius Universalis continetur in qualibet illius parte; ut *tota Humanitas* in Petro. At quis diceret totam rationem Philosophiæ in Mathematica, aut Astronomia contineri? Deinde vera Definitio rei, nisi singularis sit, debet esse Universalis: at hæc definitio talis non est. Non enim verum est omnem habitum evidenter discursivum esse Philosophiam, sed ad summum esse habitum Philosophicum, hoc est ad Philosophiam pertinere, ut pars integralis pertinet ad suam Totum.

Quæstio 3. *An vox Philosophiæ, Objectum ipsius unquam significet?* *Resp.* Affirmat Derodon, qui idcirco dividit Philosophiam, in *Habitua'em, Actua'em, & Objectivam*. Primam definit, ut supra, collectionem habituum evidenter discurrentium; Secundam, collectionem actuum cognoscendi evidentium: Tertiam collectionem rerum quæ per actus illos sciuntur.

Quæ.

Quæstio illa de voce est. In qua videtur Derodon voce *Philosophia* abuti, & novam quandam significationem ei pro libitu imponere. Est enim *Philosophia* *Sapientia Naturalis*. At vox *Sapientia* significat, primario quidem, *Habitu*, & secundario *actus*, quibus is generatur, & qui ab eo postmodum oriuntur; Non autem objecta, in quibus contemplandis occupatur.

Obj. Doctores in Scholis, dicuntur *Philosophiam* docere; hoc est res quæ in *Philosophia* tractantur. Ergo datur *Philosophia Objectiva*.

Resp. Non sequitur. Quia Doctores *Philosophiam* docent, quatenus media adhibent, quibus cognitio actualis rerum, & per eam *Habitus*, discipulis ingenerantur. Nec dicuntur docere res, puta *Materiam*, aut *Spiritum*, sed de rebus. Et licet docere dicantur quænam aut quales res sint, nihil tamen aliud phrasi istæ significatur, quam quod efficiant ut discipuli intelligant quæ & quales illæ sint.

DISPUTATIO II.

De Cognitione Speculativa & Practica.

Quæstio 1. An & quomodo verum sit, quod vulgo in Scholis tradi solet, *Cognitionem Speculativam esse Rerum necessariarum, Practicam vero esse Contingentium*.

Resp. Non esse stricte, & Universaliter verum. Si enim Objectum complexum harum Notitiarum, hoc est Conclusiones, quæ in illis sciuntur, consideremus, certum est utrobique esse & necessarias, & contingentes: Hoc est practice cognoscimus quasdam propositiones Necessarias; ut has, *Deus est colendus, virtus*

omni bono externo anteferenda est. Et speculative tantum cognoscimus quasdam contingentes, ex. g. illas quæ sunt de motibus spontaneis brutorum, præsertim qui à causis externis, ex accidenti aliquo, excitantur; & de effectis fortuitis agentium Naturalium. Deinde, si objectum incomplexum spectemus, certum etiam est, aliquam cognitionem practicam esse rerum necessariarum; practicè enim scimus amorem beatitudinis, qui tamen in nobis necessario oritur. Et aliquam Speculativam esse rerum contingentium; ut cognitio Monstrorum, quæ ab animalibus contingenter, & ex accidenti, procreantur. Ratio est quia Cognitio Speculativa, & Practica dicitur, præcisè ex eo, quod ad effectiorem sui objecti directiva, ex natura sua, sit, vel non, siue objectum illud contingenter oriatur ex suis causis, siue necessario.

Quæst. 2. An Cognitio Speculativa sit expetibilis propter se?

Resp. Illud communiter dici solet; sed non est absolute verum. Omnis enim Cognitio nostra, natura sua ordinatur ad operationem; ut scilicet bene, & recte vivamus. Et quæ ad hunc finem nullo modo utilis est, nulla ratione expetibilis est. Et si expeti jure posset, propter delectationem, quam mens in ea caperet, neque sic per se expetibilis est. Quin neque ipsa visio beatifica Dei, propter se expetibilis est, sed propter voluptatem quæ ex ea oritur, & propter amorem Dei, qui eam consequitur, utque mens ea cognitione illustrata, Deum creatorem suum celebret, & glorificet. Cognitio igitur Speculativa, expetibilis *propter se* dicitur, quatenus non est expetibilis propter effectiorem sui Objecti, ut Cognitio Practica.

Quæstio 3. An ulla Cognitio eorum qua facere non possumus, sit in nobis Practica? In Nobis dico, qua Cognitio ejusdem rei, quæ in nobis Speculativa est, in Angelo potest esse Practica. Respondemus cum distinctione. Cognitio eorum, qua nec possumus, Nec unquam possumus facere, nec Potentia eorum faciendorum, ex ordine naturæ nostræ,

fræ, nobis debetur, est pure Speculativa, nullatenus vero Practica. Non enim directiva est ullius operationis, quæ naturaliter nobis possibilis est. Sed Cognitio eorum quæ, licet jam facere non possumus, aliquando tamen facere potuimus, aut quorum potentia effectiva nobis, per naturam, debetur, Practica est per se : & si Speculativa dicenda sit, per accidens tantum talis dici debet. Unde cognitio cantandi, in eo qui mutus, aut raucus, ex accidenti aliquo, evasit, & cognitio saltandi, in eo qui claudus, aut pedibus infirmus factus est, Practica est. Hinc sequitur, non esse de Essentia Cognitionis Practicæ, ut is in quo est potentiam actu habeat operandi, multo minus ut actu operetur ; ut cognitio ædificandi in Architecto, qui non operatur, aut vim operandi amisit.

Quæstio 4. *An igitur inutilis sit Cognitio qua natura sua practica est, si ad praxin actu non applicetur?* Resp. Actum quidem inutilis est respectu finis proprii, qui est effectio sui objecti. Aptitudine tamen utilis est ad finem etiam proprium, quia ad eum acquirendum adhiberi potest, si velit is in quo est. Et actu utilis esse potest, ad alium finem. Per eam enim instructior est animus ad alia facienda. Ut qui musicæ peritus est, sed cantare non solet, instructior est, ad differendum de sonis. Et qui præcepta virtutum tenet, licet ipse male vivat, aptus aliquo modo est ad alios docendos. Non igitur simpliciter inutilis est Cognitio Practica, etiam cum ad praxin proprii objecti non usurpatur.

Quæstio 5. *An omnis Cognitio Inductiva ad Praxin Practica sit?* Inductiva vero ad Praxin illa cognitio est, quæ motiva recte operandi vel agendi, proponit.

Resp. Cognitio qua solum inducit aut excitat ad praxin, non est proprie Practica. Ratio est, quia sic omnis fere Cognitio Speculativa, Practica foret. Cognitio enim eorum quæ nullatenus sunt in nostrâ potestate, ut perfectionum Divinarum, & rerum Naturalium, pure Speculativa est, ut omnes agnoscunt ; inductiva tamen est, natura

sua, ad praxin: ut ad Deum amandum, & reverendum. Quia tamen nos non inducit, multo minus dirigit, ad res illas efficiendas, sed alias, ideo Practica non est. Cum igitur dicunt Theologi Cognitionem de Deo, & rebus Fidei, esse Practicam, late, & improprie sumunt Cognitionem Practicam, pro quavis Cognitione quæ ad Praxin refertur, sive inducendo, sive dirigendo, sive circa objectum suum, sive circa alienum.

Quæstio 6. *An igitur Cognitionis Speculativa, ullo modo ad praxin dirigit eum in quo est. Resp.* Remote saltem istud præstat; quatenus principia quædam suppeditat, ex quibus veritates strictè & immediate Practicæ, elici possint. Ut ex his principiis Theoreticis, *Dens est Spiritus, cordium scrutator, veritatis amans, simulationis inimicus*, inferri possunt hæ conclusiones, *Ergo colendus est in Spiritu, & veritate; abstinendum est ab omni furore, & dolo, &c.* Ex solutione hujus, & præcedentis Quæstionis, patet, non rectè definiri Cognitionem Practicam, quæ ad praxin vel operationem ordinatur. Quia omnis fere Cognitionis Theoretica, aliqua ratione ad praxin ordinatur, vel dirigendo, vel excitando, vel aliquo modo disponendo.

Quæstio 7. *An Cognitionis rei jam factæ, aut operationis alienæ, quæ cognitione regitur, Practica sit, an Speculativa?*

Resp. Non esse Practicam formaliter, & proprie; quia Cognitionis Practica, proprie & formaliter, est rei factibilis ab eo in quo est. At nec res jam facta, nec operatio aliena, factibilis amplius est.

Obj. In re jam facta potest esse vitium aliquod emendabile: sicut & res jam facta, & operatio aliena, dirigere possunt ad simile opus, aut similem operationem præstandam. *Resp.* Cognitionem de vitio, aut defectu, in re jam facta, emendando, esse practicam; sed emendatio illa non est res jam facta, sed factibilis. Vitium autem quod jam admissum est, non est denuo idem numero factibile. Quod vero res jam facta, aut operatio aliena, dirigere possit intuentem, ad simile faciendum, probat tantum hanc & illam esse causam exemplarem

plarem praxis, quatenus imprimere apta est ideam ali-
tis operis, aut operationis, ab intuen- te præstabilis; Non
vero Cognitionem earum esse Practicam, propter ra-
tionem datam.

Quæstio 8. *An Cognitione sanitatis, & morborum, in Me-
dico, Plantarum in Agricola, et ejusmodi, Practica sit?*

Resp. Negative. Ad Cognitionem enim Practicam,
ut supra dictum est, requiritur, ut Objectum ipsius fa-
ctibile sit, ab eo in quo ipsa est, aut saltem ut naturali-
ter in eo esse debeat potentia ipsum efficiendi. At nec
Medicus Sanitatem efficere potest, nec ex ordine na-
turæ exigit ut possit eam efficere. Similiter de Agricola
respectu Plantarum dicendum est. Occasiones enim
solummodo dant causis naturalibus, efficiendi sanita-
tem, & plantas. Unde in Medico, sola Cognitione Ad-
ministrandi medicamenta, & in Agricola Cognitione
colendi terram, semen debito modo, & tempore op-
portuno, & committendi, & istiusmodi actionum, qui-
bus agentia naturalia passivis applicantur, Practica est.

Quest. 9. *An Cognitione Practica semper sit eorum, in quibus
efficiendis, errare potest is in quo illa est?* Resp. Cognitionem
Practicam hominis, in hac vita, sæpius est rerum istius-
modi. Unde et plerumq; ad errores vitandos ordinatur.
Sed non universim talis est. Deus enim practicè novit sua
opera, in quibus tamen efficiendis absolute impossibile
est eum errare. Et beati in Cœlo, practicè norunt sua
officia, in quibus tamen præstandis non amplius errori
sunt obnoxii. Quin nec Artifex peritus, si materiam
idoneam, & Instrumenta apta nactus fuerit, & debi-
tam diligentiam adhibuerit, supposito concursu Dei
ordinario, in arte sua errare potest.

Quæstio 10. *An Cognitione Practica semper sit eorum, quæ
is in quo est, potest agere vel non, pro libitu?*

Resp. Cum Distinctione. Cognitione Practica, sem-
per est eorum, quæ is in quo est, (si potentiam ejus
absolute, seu secundum se, spectemus), potest non
tantum agere, sed etiam ab agendo abstinere aut
contra-

contrarium agere. Cognitio enim Practica est Spiritui rationali propria, in quo est voluntas libera, & secundum essentiam suam indifferens ad agendum, vel non agendum, vel contrarium agendum. At si voluntatem illius qui Cognitionem Practicam habet, ut certo modo dispositam, bene, vel male, consideremus non semper est eorum quæ potest velle agere vel non, aut contrarium agere. Sic beati in cælo, absolute habent potentiam cessandi ab officiis status glorificati, (quæ practice norunt) aut etiam male agendi. Non tamen velle possunt ab officio cessare, aut contra illud quidquam facere.

Quæstio II. An Cognitio Speculativa evadere possit Practica, aut vicissim. Resp. Cum Cognitio Speculativa sit eorum quæ nec sunt actu in nostra potestate, nec per naturam esse possunt, Practica autem contra, palam est neutram in alteram transmutari posse. Quod autem quis ob potentiam operandi amissam, aut debilitatam, operari non possit, aut potentiam illam recuperet, per accidens est ad Cognitionem Practicam.

Obj. Cognitio operum, quæ spiritualiter, (ut dici solet) bona sunt, in homine post lapsum, nec per gratiam restituto, Speculativa est. Nec enim opera istiusmodi præstare potest, nec per naturam exigit potentiam ea præstandi. Post regenerationem vero, cum potentiam novam acquirit, Cognitio illa evadit Practica.

Resp. Cognitio ejusmodi operum, etiam in irregénito, quousque debitum modum ea præstandi attingit, natura sua Practica est. Eorum enim, natura sua, directrix est. Quod autem irregénitus eam ad praxin non applicet, per accidens est, propter defectum (præcipuè) bonæ voluntatis. Potentia autem præstandi opera absolute bona, homini lapso moraliter quidem indebita est: quia per Apostasiam indignus evasit cui illa donetur: Naturæ tamen Humanæ debita est, & congrua; Sicut & ei in principio adfuit: & quod ea nunc destituatur per accidens est, propter peccatum.

Quæ-

Quæstio 12. *Quomodo differant Praxis Moralis & Artificialis ? Resp.* Duobus modis. Primo *Objectis*. Praxis enim Moralis, est eorum quæ Homo tenetur facere, vel per naturam, quatenus Homo est ; ut Deum colere, proximum diligere ; vel ex lege aliqua positiva, à Deo lata ; ut Diem septimum cultui Divino impendere. Artificialis vero versatur circa ea, quæ præcise utilia sunt, vel jucunda, de quibus præstandis, aut prosequendis, nulla lex particularis posita est, sed tantum Generalis quædam, quæ unumquemq; obligat ad ea omnia facienda, quibus faciendis cum idoneus sit, bono suo & publico, maxime inservire possit. Sic nemo tenetur esse Musicus, textor, Sartor, &c. aut ullam aliam artem determinate exercere ; Sed tantum aliquam indeterminate, hanc, vel illam, quæ genio & facultati suæ magis congruit. Secundo Differunt principiis. Nam praxis moralis, siue bona, siue mala, penes voluntatem, & propositum animi præcipue pensatur. Adeo ut bona requirat bonam voluntatem, per quam actio in bonum finem refertur, puta in Dei gloriam, & verum bonum nostrum, aut aliorum. Quæ autem eò non refertur, bona non est, licet omnia reliqua adsint. At praxis artificialis bona est, si juxta regulas artis instituatur ; quæcunque tandem sit intentio operantis. Unde Praxis Moralis mala, si ex ignorantia profecta sit, eatenus excusatur : Artificialis contra, si ex ignorantia procedat, vituperatur si autem quis, sciens, & volens, contra regulas operatus sit, vituperatur quidem operatio, & opus, quia regulis Artis non consentiunt ; non tamen reprehenditur is qui operatur, ut malus Artifex, nec etiam semper ut malus vir : Ut si quis ob finem aliquem bonum, ex proposito, contra regulas Grammaticæ scribat, aut loquatur.

DISPUTATIO III.

De Intelligentia & Principiis Cognoscendi.

Quæstio 1. *An sint veritates, per se, seu luce sua, mentibus nostris evidentes.*

Resp. Affirmativæ. Cum enim mens nostra, dum unam veritatem ex alia elicit, semper procedere debet ab evidentiori ad minus evidentem, nec progredi possit in infinitum, necesse est ut tandem in aliquo principio per se manifesto sistat; alioqui nulla erit cognitionis Humanæ certitudo: nec mens nostra unquam in veritate aliqua, tanquam satis evidenti, acquiesceret.

Quæstio 2. *An sit Intelligentia pure apprehensiva, sine judicio, explicito, vel implicito.* Intelligentiam pure apprehensivam vocamus eam, quæ est rerum aut modorum simplicium, quæ per se notæ, non possunt aut non debent per alias notiores declarari. Esse autem istiusmodi perceptionem, patet, Primo instantiis. Idæ nostræ de aliquid, & nihil esse, et non-esse, sunt per se evidentissimæ, nec per definitionem declarari possunt. Item primæ idæ quas formamus de rebus singularibus, quæ sub sensum Internum, vel Externum cadunt. Illæ enim non possunt per priores, adeoque nec per evidentiores explicari. Deinde Ratione. Quia, nisi esset ejusmodi Intelligentia, nunquam acquiesceret mens nostra in ullius rei explicatione. Siquidem omnis explicatio est à notiori.

Quæstio 3. *Quidnam sit Primum Cognitum, seu principium Cognitionis Humana?* Peripatetici communiter dicunt Primum Cognitum singulare, esse quod primò sub sensum cadit: Universale vero, esse aliquod ex principiis illis quæ vulgo Metaphysica vocantur; nempe hoc, *Nihil potest simul esse et non esse.* Cartesius vero, ejusque discipuli, dicunt Primum Cognitum singulare esse, *Ego Cogito*, Universale autem, *Quicquid cogitat existit.* Cum enim (inquiunt) de reliquis omnibus extra men-

mentem dubitare possimus. an tamen cogitemus dubitare non possumus. Nam ex eo quod dubitemus, manifeste sequitur nos cogitare. Similiter de altero, dubitare nemo potest, an id quod cogitat existat: aut an possibile sit, id quod cogitat esse nihil actu in rerum natura. Nos quid in controversia ista tenendum censemus, sequentibus thesibus definimus.

Thef. 1. *Quæ sensus externos, tactus, & auditus, afficiunt, primo omnium à nobis percipiuntur; Non autem nos cogitare.* Prior pars patet: quia, in utero, sensum tactus primo exercemus; & deinde auditus, postquam organum auris perfecte instruitur. Posterior vero, quia pueri per aliquot forte annos, nesciunt se cogitare. Nec enim sciunt quid sit cogitare: nec necesse est, ut mens, statim ac cogitat, cogitationem suam, per actum reflexum, percipiat

Thef. 2. *Primum Cognitum universale, ex quo magna pars cognitionis nostræ pendet, est aliquod ex illis principiis, quæ Metaphisica vulgo vocantur.* In aliquo enim ex his, discursus nostri sæpe definunt; suntque ex iis nonnulla quæ nec probari possunt, nec probatione indigent. In specie autem dicimus Prima Cognita Universalia esse duo illa Axiomata, *Nihil potest simul esse et non esse, et Quidlibet est vel non est.* Sunt enim per se evidentiæ, tum quoad omnes terminos simplices, ut *res, nihil, simul, esse, et non esse*: tum quoad connexionem attributi cum subiecto. Sensus enim prioris est, quod *esse et non esse* simpliciter, et *esse tale, ac non esse tale*, (ex. gratia, *esse album et non esse album*) maxime repugnent, adeo ut, eidem, secundum eandem partem, sub eadem ratione, et eodem tempore, convenire non possint. Posterioris vero, quod inter *esse et non esse* ejusdem rei, item inter *rem esse talem, et non esse talem*, nullum detur medium; seu quod nihil cogitari possit tertium, cui alterum ex his non conveniat: hoc est quod immediate sint opposita. Deinde omnia fere reliqua axiomata, ad quamcunque tandem disciplinam pertineant, in altero ex his fundatur; ut *Nihil est causa suiipsius, Totum*

tum est majus sua parte, &c. Nec alterum ex his per alterum probari potest, ut quidam putarunt : Quod lectori ipsi pensitandum relinquo.

Thef. 3. *Prima singularia qua certissime percipimus, & ex quorum cognitione ad cognitionem aliarum rerum deducimur, sunt illa omnia, qua per sensum quendam intellectualem, immediate, in nobismetipsis, percipimus : five, omnia illa, quorum nobis sumus conscii : ut Apprehensiones, judicia, ratiocinationes, dubitationes, confilia, affectus, amor, odium, gaudium, tristitia, &c. Licet enim de reliquis omnibus dubitemus, de his tamen, cum in nobis sunt, dubitare non possumus ; secus enim tolleretur omnis cognitionis nostrae certitudo. Nam si incerti simus utrum cogitemus an non, multo magis incerti erimus utrum illud de quo cogitamus, sit prout à nobis concipitur. Ad hoc enim necesse est ut certi simus, non tantum quod de ea concipiamus, sed etiam quod sub tali forma, seu idea, eam concipiamus. Et hactenus quidem recte ait Cartesius, *Primum Cognitum* (si singulare addas) esse Ego Cogito. Et ex his experimentis, magna cognitionis nostrae pars originem ducit : ut primo inde naturam, & facultates mentis nostrae intelligimus ; Deinde Deum Creatorem nostrum : cum certi simus nos ab alio esse, nec à nobismetipsis nec ab ullo Ente, nisi Omnipotente, & Sapientissimo, esse potuisse.*

Thef. 4. Non sola experimenta illa, verum etiam *qua per sensum externum percipimus, pro primis Cognitis habenda sunt.* Certum enim est, Nos multa per sensum externum percipere : nec aliam eorum rationem reddere posse, quam quod sic percipiamus : Deinde ex illis multa alia, per ratiocinationem, deducimus. Certum etiam est, sensus non semper nos fallere, & si quando fallant, fallaciam plerumque detegi posse, ut infra dicetur.

Thef. 5. *Hac veritas Quicquid cogitat existit, licet eatenus per se nota dicenda sit, quod apud eos, qui usum medio-*

mediocrem Rationis habent, nulla probatione indigeat, non tamen est simpliciter prima: Præsupponit enim alias priores: has scilicet, *Quicquid operatur*, seu exercet potentiam activam, *existit*: *Quicquid dat alteri existentiam existit*: *Non Ens non est causa efficiens entis*: Et per illas demonstrari potest, ut omnibus manifestum est: Non tamen opus est ut demonstretur; quia omnes facile, rationes quibus innititur, sine monitore, percipiunt.

Quæstio 4. *An, & quo sensu, verum sit, principia prima, licet demonstrari non possint, Inductione tamen declarari?* Respondemus Thesisibus sequentibus.

Thes. 1. *Principia illa quæ de singularibus loquuntur, ut ego cogito, volo, sol est lucidus, & istiusmodi, non possunt inductione illustrari*: quia subjectum in illis, singulare cum sit, non continet plura sub se inferiora, ex quibus fieri possit Inductio.

Thes. 2. *Principia Universalia, absolute prima, nullam ex Inductione lucem fenerantur*. Ex. g. hæc, *quidlibet est vel non est, nulla res simul est, et non est*. Ratio patet: Quia æque manifesta est, immediata, & summa repugnantia inter esse, & non esse in genere, quam inter esse & non esse hujus & illius rei singularis.

Thes. 3. *Reliquorum principiorum veritas, exemplis, Universalitas Inductione declarari potest, et apud Tyrones, ac iudicio infirmos, minusve attentos, declarari debet*. Qualia sunt illa, *Totum est majus sua parte, quæ equalia sunt eidem terrio, inter se equalia sunt*. Declarari enim possunt si dicamus, *Totum corpus nostrum esse majus capite, vel manu; totam domum esse majorem uno pariete: duæ ulnæ, si æquales sint eidem tertix, inter se æquales sunt*. Ratio est quia singularia notiora sunt Universalibus, (utpote in sensum incurrentia, adeoque sæpius menti obversantia); nisi universalia suprema fuerint, et termini per se evidentes, quales sunt Res, nihil, esse, et non-esse.

Quæstio 5. *An Principia absolute prima, possint, à quovis sana mentis, negari*. Resp. *Potest quilibet, voce tenus, ea negare*.

Hoc

Hoc est, potest voces formare quæ contradictionem eorum significant. Sed *mente*, seu iudicio interno, *nemo ea, cognita significatione terminorum unquam negat, aut negare potest: Quin nec assensum eorum cohibere*. Ratio est quia nemo dubitare potest de eo, quod evidenter percipit hoc vel illo modo esse. Et si dubitare non potest. neque assensum suspendere poterit, quamdiu ad illud oculos mentis intendit. Sicut nemo apertis oculis, & satis ad videndum instructis, objecto proposito, in debita distantia, visionem cohibere potest.

Quæst. 6. *Quidnam sint veritates per se evidentes; & ubinam existant?* Cartesius, cum sectatoribus, omne illud quod menti nostræ obversatur, ad tria capita referunt, scilicet *Rem, & Modum rei, & propositiones æterna veritatis*. Statuunt igitur, propositiones illas esse distinctas à Rebus, & rerum Modis: Et in sola mente, Divina, vel creata, existere. Nos his thesibus sic definimus.

Thef. 1. *Propositiones per se evidentes extra mentem nostram sunt*. Ratio est, quia in mente nostra nihil est, præter habitus & actus. Potentiæ enim illius naturales ab ea, non distinguuntur, nisi ratione. At veritates per se evidentes, nec sunt potentiæ, nec habitus, nec actus, seu conceptus. De potentiis mentis concedent Cartesiani. De Habitibus, & Actibus probatur. Veritates illæ nec sunt propensiones mentis ad assentiendum veritati, nec assensus ipse qui veritati datur, sed objecta assensus: nec enim assensus ille, sibiipso obiectum est; nec versatur circa aliquem actum, aut habitum mentis, reflexè; sed directè fertur in objecta extra mentem. Ut cum huic veritati assentimur, *nulla res potest simul esse & non esse*, assensus noster fertur in repugnantiam inter esse, & non esse, in omnibus rebus quæ sub intellectum nostrum cadere possunt.

Veritates igitur illæ non resident in Intellectu nostro, ut aiunt Cartesiani; quia sunt objecta conceptuum nostrorum, & eorum quidem, qui non reflexe feruntur in mentem ipsam, aut aliquid aliud quod in mente nostra

stra est, sed in res alias. Adeoque objective tantum in mente nostra sunt. Quod autem objective est in mente, nisi vel sit mens ipsa, vel habitus, aut actus mentis, aut purum nihil, habet esse aliquod reale extra mentem.

Thef. 2. Veritates illa, si objective spectentur, sunt ut ipsa, de quibus loquuntur. Nec distinguuntur ab illis omnibus simul sumptis. Neq; enim significant conceptus mentis, ut jam ostendimus; nec purum nihil, ut per se patet. Significant igitur res ipsas, earumque affectiones reales. Ex. g. *Totum est majus sua parte* significat attributum illud, scilicet *Majoritatem*, Toti convenire. *Majoritas* autem illa est ipsum *Totum*, prout plus includit quam pars. Idem de reliquis dicendum est. *Totum* autem est quævis res integre spectata, præsertim illa quæ ex pluribus Entibus coalescit.

Exsunt igitur Veritates illa in rebus ipsis: non autem in mente nostra, nisi objective, ut omnes etiam res quando à nobis concipiuntur. Et cur quæso in mente nostra residere dicendæ sunt, quæ, ut Cartesiani aiunt, æternæ veritatis sunt? Mentis enim nostræ non fuerunt ab æterno. Nec est major ratio, cur propositiones per se evidentes, & æternæ veritatis, in mente nostra resideant, quam cæteræ, quæ ex illis pendent, & innotescunt. Reliquæ enim sunt in mente nostra, quando de illis cogitamus.

Obj. Axiomata illa, quæ Prima Cognita Universalissima esse diximus, nusquam sunt, aut esse possunt, nisi in mente: Quod enim ad prius attinet, simul esse & non esse, & impossibile non est ulla res, sed purum non-res. Ad posterius vero, *esse vel non esse indeterminato*, nulli rei convenit; Quicquid enim est, determinate est; et quod non est, determinate non est.

Resp. Negatur Antecedens. Sunt enim ista in rebus, extra mentem, non minus quam reliquæ omnes propositiones veræ. Nam in priori, repugnantia, seu inconsistentia inter *esse et non esse*, cum ad idem conferuntur,

tur, nihil aliud sunt quam ipsum esse et non esse. Per se enim et ex natura sua, repugnantiam et incompatibilitatem habent, (ut Scholæ loquuntur), extra mentem. Sunt autem *esse* et *non esse* in rebus ipsis. In posteriori vero, sensus non est, *esse* vel *non esse* convenire rebus indeterminate, sed tantum *esse* vel *non esse* indeterminate conceptum, determinate omni rei convenire. Adeo ut tantum neget medium aut tertium statum, ulli rei convenire. Vere autem rebus ipsis convenit carentia istiusmodi tertii status, qui medius sit inter *esse*, et *non esse*.

Inst. At carentia ista non existit extra mentem.

Resp. Retorquendo: Carentia visus non existit extra mentem: est enim non ens. Sicut igitur male hinc Inferes, hanc propositionem *Homerus est cæcus*, non esse in rebus, sed tantum in mente, ita etiam de priori consequentia censendum est. Ratio est quia existentia non entis, est non-existentia entis: vere autem in omni re, est non-existentia omnis rei distinctæ.

Quæstio. 7. *An virtus mentis per quam primis Principiis assentimur, sit Habitus acquisitus, an facultas naturalis?* Pierique enim ex Aristotele, qui eam definiunt *Habitu principiorum*, *Habitu* esse volunt.

Thesis, *Virtus mentis per quam assentimur primis principis, non est Habitus, sed facultas naturalis.* Probatur. Omnis habitus mentis, præter eos qui supernaturales, seu infusi vocantur, discursu acquiritur. At virtus per quam primis principis assentimur, non acquiritur per discursum. Principia enim illa per se evidentia sunt, et discursu, per quem evidentia fiunt non indigent.

Obj. Virtus illa per cognitionem præviam terminorum acquiritur: assuetudine etiam assentiendi, facilius, et perfectius iis assentimur. Est igitur *Habitus*.

Resp. Ad prius, per præcognitionem terminorum
non

non acquiritur virtus illa, sed via paratur ad illius exercitium, sive ad actum assentiendi; ad quem cognitio illa est Conditiō necessaria, eo quod Judicium ferri nequit in incognitum. Posterius etiam, si de primis Principiis loquamur, falsum est. Æque enim notum est, *quidlibet est vel non est*, cum prima vice ipsum mente perpendimus, ac cum secunda, tertia aut centesima. Et cum primo sentimus nos cogitare, aut velle, æque certi sumus quod cogitemus, et velimus, ac multos post annos.

DISPUTATIO IV.

De Scientia, Fide, Opinione & Arte.

Quæstio. I. *An sit aliqua cognitio hominis in hac vita, (quæ viribus naturæ acquiritur,) certa, et evidens ex ratione intrinseca? Sive an detur ejusmodi cognitio quæ Scientia vocatur? Fama communis est, quosdam ex antiquis Philosophis, omnem Scientiam sustulisse. Et Academicos novos docuisse; nos, de omnibus rebus, opiniones tantum, seu conjecturas probabiles habere; Pyrrhonicos vero, ne hoc quidem concessisse. Non tamen putandum est, vel hos, vel illos, serio, et ex animo, ita sensitse, sed potius, propter magnam, et frequentem incertitudinem, præsertim in Physiologia (ubi ad species rerum deventum est,) opiniones illas affectasse. Estque proculdubio, vera Scientia rarior, inter ipsos literatos, et eruditos, quam multi reputarunt. Interim tamen, certum est, aliquam cognitionis nostræ partem esse Scientiam, hoc est, certam, et evidentem. Quasdam enim ve-*

C 2

ritates,

ritates, ex ejusmodi principiis evidenter deducimus, de quibus, ne vel minimam rationem dubitandi, habemus; quales sunt pleræque quæ in Logica, Mathematica, et Ethica, et plurimæ quæ in Pneumatica, et Somatica, traduntur.

Quæstio, 2 *An de omnibus rebus detur Scientia, an de aliquibus tantum, et quænam illæ sint.* Communia enim inter Philosophos effata fuerunt, de singularibus, de corruptibilibus, de contingentibus, nullam esse Scientiam.

Thes: 1. *De plurimis rebus non habemus veram, et solidam Scientiam, sed tantum opinionem quandam, seu verisimilitudinem.* Nempe primo de illis, quorum nulla suppetunt principia certa, et quorum causæ nos latent; ut in Physiologia, seu Somatica, de ventis, de fulgure, et tonitru, de fluxu et refluxu maris, de motu gravium et levium, et plurimis aliis istiusmodi. Item in Pneumatica, utrum Spiritus sit verè extensus, an instar puncti Mathematici. Deinde, de iis, quorum mens nostra non est capax, quales sunt quæstiones plurimæ de rebus infinitis, ut de æternitate, de divina omnipotentia; ex. g. an possibilis sit creatura ab æterno aut infinita perfectione, an possit esse corpus magnitudine infinitum, numerus infinitus, motus velocissimus item de compositione continui, de indivisilibus. Res enim maximæ cognitionem nostram superant, minimæ eandem fugiunt.

Thes. 2 *De singularibus creatis, quatenus sunt singularia, nulla est Scientia sed Experientia, aut Fides.* Prior pars hinc probatur. Quicquid de singularibus certo et evidenter cognosci potest, vel est essentialiale, vel accidentarium. Et quod accidentarium est, vel commune est, vel proprium. At Essentialia omnia Sciuntur per Scientiam speciei; et similiter accidentalia communia, si modo de illis detur Scientia; accidentia autem propria non percipiuntur per Scientiam. Nec enim de illis certitudinem habemus, nisi moralem; ex g. de his propositionibus, et similibus,

libus, *Socrates fuit filius Sophronisci, Alexander Macedo fuit everfor regni Persici.*

Posterior pars patet. Quia singularia, qua talia, vel percipimus per sensum, five internum, et intellectualem; ut mentes nostras, earumque actiones, et effectus; five externum; ut omnia quæ videmus, audimus, palpamus &c. Et istæ perceptiones *experientia* vocantur: vel per Testimonium aliorum, qui si homines sint, est fides Humana; si deus, vel qui ita a deo ducantur in testando, ut fallere non possint, est fides Divina.

Obj. 1. De singularibus, quatenus sunt singularia scimus quod sint incommunicabilia, quod dividi non possint in plura ejusdem rationis, et varia istiusmodi. Hæc enim conveniunt singularibus quatenus sunt singularia.

Resp. Ista quidem certo et evidenter percipimus. Sed non conveniunt singularibus quatenus sunt hæc et illa singularia, sed quatenus participant de communi ratione singularitatis; five ut propria sunt rei singulari in communi, non huic et illi singulari.

Obj. 2. De Sole, Luna et reliquis astris, item de Globo Terræ, multa certo sciuntur; ut magnitudo, motus, distantia, Figura, &c. Quæ omnia singularia sunt.

Resp. Attributa ista non sunt propria rerum illarum, sed communia aliis possibilibus: adeoque non sciuntur de illis quatenus sunt hæc singularia.

Obj. 3. Scimus proprias facultates et virtutes rerum singularium, tum per causas earum necessarias; ut, hunc aut illum hominem esse doctum, quia novimus eum ingenio pollere, & literis operam diu et sedulo dedisse; tum ex effectis; ut Maronem fuisse optimum Poetam, ex scriptis suis; Vandicium Hollandium esse insignem pictorem, quia

eum ipsi vidimus ingeniosissime pingentem.

Resp. Nihil horum omnium, et similium ita proprium esse huic aut illi singulari, quin aliis saltem possibilibus convenire potuerit, eadem enim specie eruditio potuit alii alicui convenire. Et eadem specie opera potuerunt ab alio fieri.

Thef. 3. De singularium attributis, quatenus de facto eorum propria sunt, datur Scientia. Ut si videamus causas in actu, quæ necessario inferent hæc vel illa effecta, in hoc aut illo singulari, quæ de facto illi propria sunt; aut si certo percipiamus effecta, hæc vel illa, ab hoc singulari producta, certo colligere possumus ex causis effecta, et ex effectis potentiam seu virtutem, quæ horum propria causa est. Exempla ex objectione præcedenti pete. Quanquam in his certitudo non est maxima. Siquidem possibile est absolute loquendo, eum qui ingenio præditus est, et diu literis vacavit, omnium oblitum esse: et qui optimam effigiem delineavit non esse pingendi peritum. Quia fieri potest, manum ipsius, non per artem in mente, sed per Genium aliquem directam fuisse.

Thef. 4. De Deo qui ex essentia sua unicus est, maxime datur Scientia. Multa enim ex perfectionibus ipsius, à posteriori, per effecta, nempe per opera Creationis & Gubernationis, evidenter, & certissime intelliguntur, ut affirmat Apostolus, ad Romanos, cap. i. v. 20. Et ex uno attributo aliud demonstratur, quasi à priori, per causam: ut Immensitas, per Omnipotentiam; Immutabilitas, per Supremitatem, & Sapientiam; esse adorandum, & omni obedientia prosequendum, quia est Creator, & Conservator noster; ut ex ratiocinationibus Theologicis patet.

Thef. 5. De illis qui actu non existunt, datur Scientia, non minus quam si existerent; ut de Rosa in hyeme. Unde Artifex, certo & evidenter, novit virtutes & effecta operis à se faciendi, aut quod ab alio fieri potest.

per

per Scientiam materiæ ex qua illud facere, & formæ quam materiæ isti addere statuit. Sublata enim re, eadem manet illius idea in mente. Et ex iis quæ existunt, vel extiterunt, iudicium facimus de similibus quæ existere posse novimus.

Obj. De non existentibus nulla attributa positiva affirmari possunt: ut in hyeme rosa non suaviter olet, non habet vim exiccantem, &c. Er. nihil de illis sciri potest.

Resp. Rebus non existentibus conveniunt omnia attributa existentium, non absolute, & simpliciter, sed ex hypothesi quod existerent.

Thes. 6. *Privationes sciuntur per causas, quibus habitus seu formæ tolluntur, & formas & habitus ipsos quos tollunt.* Clare enim percipimus non esse illius cujus esse percipimus: ut mortem per vitam, cæcitatem per visum. Et certi scimus eum cui caput abscinditur, aut in mari projicitur, nec enatare potuit, si nemo opem tulerit. mortuum esse.

Thes. 7. *De puris negationibus, & Impossibilibus, Scientiam aliquam habemus;* illam scilicet, per quam attributa negativa certo percipimus illis convenire: Quæ Scientia *negativa* dici potest. Positivam Scientiam habere non possumus: quia hujusmodi objectorum nulla sunt attributa positiva. Nec de illis aliqua Scientia particularis instituitur. Ridicula enim foret.

Thes. 8. *De rebus transeuntibus, & corruptibilibus, datur Scientia.* Transitionis, enim & corruptionis, causæ necessariæ esse possunt. Et licet res ipsæ corrumpantur, aut pereant, vera tamen est connexio attributorum, cum suis subjectis, & inter se, quæ idcirco certo, et evidenter percipi potest; ex hypothesi scilicet quod existant, seu quamdiu existunt.

Obj. Mutato objecto tollitur Scientia.

Resp. Mutato secundum naturam, & ortum ex causis, Scientia tollitur, seu falsa redditur. Verum mutatione

mutatione facta duntaxat in objecti existentia actuali, non tollitur.

Thef. 9. De rebus contingentibus, quatenus, habent attributa necessaria, sive absolute, sive ex hypothesi aliqua, datur Scientia, seu certo cognosci possunt secundum naturas suas, & modum contingentem in genere, quo e causis oriuntur. Ratio patet ex iis quæ jam dicta sunt. Eatenus enim propositiones quæ de illis fiunt, necessariae sunt & immutabiles. Quatenus vero attributa habent quæ mere contingenter ipsis conveniunt, eatenus ab intellectu creato, certo, & evidenter, cognosci non possunt. Sic sciri non possunt eventus futuri contingentes; ut exitus fortitionis; aut in quam partem voluntas petri circa res indifferentes sit inclinatura. Ratio est, quia ex huiusmodi causis pendent, quæ ex æquo possunt hunc effectum producere, ac alium disparatum, vel oppositum, vel etiam nullum. Credimus tamen ista omnia ab intellectu divino certo cognosci. Hinc, de propositionibus contingentibus, quatenus contingentes sunt, & de rebus fortuitis, ac casualibus, nulla est cognitio Humana, quæ certa & evidens sit, sed tantum Conjectura, vel probabilitas. Sicut omnis Scientia est propositionum quæ aliquo modo necessario veræ sunt, nempe vel absolute, vel ex hypothesi aliqua; Et per rationes quæ necessario inferunt, idque vi materiæ, nempe per causas necessarias, vel per signa & effecta necessaria.

Quæstio. 3 An Oïni, Fides, & Scientia, de eadem conclusionem, in eodem homine, eodem tempore esse possint. De diversis enim conclusionibus, & de eadem in diversis hominibus. & denique de eodem homine diversis temporibus primo intuitu certum est esse posse.

Thef. De eadem veritate, potest esse, in eodem homine, Fides, Opinio & Scientia simul, sive eodem tempore. Ponamus enim, quod facile contingere potest, eundem hominem, eodem tempore, tria genera ratio-
num

num pro hac vel illa conclusione, intueri, nempe Testimonium Fide dignum, rationem probabilem, & rationem necessariam, Assensus quatenus testimonio nititur, est actus Fidei, quatenus rationi quæ duntaxat probabilis est, Opinativus est; quatenus rationi necessariæ, est Scientia. Potest autem omnibus his tribus generibus mediorum simul niti: quid enim impedit, si modo mens ad quatuor objecta simul attendere possit? Sic intelligimus terram in medio universi consistere, per Fidem Humanam, quia sic testantur viri docti; per Fidem Divinam, quia idem testatur Scriptura, Per rationem vero ferme necessariam, quia videmus stellas circa eum moveri & fixas quidem eandem distantiam ad eam servare.

Obj. 1. Si verum illud sit, sequeretur intellectum de eadem propositione esse simul certum & incertum, quod repugnat.

Resp. Repugnat intellectum, de eadem propositione, esse simul certum, & incertum, per idem medium, seu per eandem rationem, sed non per diversas, potest enim essensus, per unam rationem, esse firmus, per aliam infirmus.

Obj. 2. Sequeretur intellectum posse simul assensum adhibere contradictoriis, nempe hanc vel illam conclusionem necessario esse veram, & non esse.

Resp. Non sequitur: quia non assentitur eam esse necessario veram, & non esse necessario veram absolute, sed tantum sic dicit, propter rationem certam agnosco esse necessario veram, propter aliam vero incertam, si nulla alia esset, agnosco non esse necessario veram.

Obj. 3. Assensus scientiæ absorbet & expellit assensum Opinioni; tollit enim omnem formidinem partis oppositæ: sicut major lux absorbet minorem.

Resp. Concedimus assensum Scientiæ assensum opinionis non necessarium reddere, non tamen eum plane expellit. Sicut lux major minorem non annihilat, sed tantum efficit ne percipiatur. Licet enim, per unum

unum medium, mens plane persuadeatur, hoc tamen non impedit quo minus aliud suum pondus habeat. Ad rationem in oppositum, concedimus mentem de eadem veritate non posse simul formidare & non formidare. Verum cum habet rationem necessariam veritatis. Assensus, quem eidem adhibet, propter rationem probabilem, non includit formidinem. Formido enim non est actus mentis ut intelligens est, sed ut appetens, nempe ut veritate delectatur, falsitatem vero fugit, ut malum. Unde potest Mens simul agnoscere pondus rationis probabilis, & necessariae.

Inst. At Assensus Opinionis dubitationem includit, assensus Scientiæ eandem excludit. Eidem autem actui mentis non potest simul inesse dubitatio, & dubitationis carentia.

Resp. Assensus Opinionis quando per se, & solus in mente est, dubitationem includit: sed non, quando unà de eadem re est Assensus Scientiæ. Opinio enim non est nuda dubitatio, sed duplicem actum mentis complectitur; unum, per quem Mens assensum remissum propositioni adhibet, propter rationis verisimilitudinem, seu quæ aliquid ponderis habet: alterum, per quem dubitat, quoniam satis ponderis non habet. Et prior cum scientia, eodem tempore consistere, quin & eidem numero actui convenire potest: posterior in præsentī casu abest per accidens, propterea quod Mens simul intuetur rationem necessariam.

Quæstio 4. *Utrum Ars, an Natura præstantior sit.* Per Naturam intelligimus virtutem agendi, & recipiendi, rebus creatis ingentam. Respondemus igitur ad quæstionem thesi sequenti.

Thef. *Natura, absolute loquendo, perfectior, & præstantior est Arte.* Probatur. 1. Quia Natura est Ministra dei, Ars hominis. 2. Natura dat vitam, Ars minime. 3. Natura agit per influxum & efficientiam realem; Ars tantum moraliter, & directive. 4. In Effectis, quæ à Natura per Artem adjuta, proficiuntur

tur, Natura est causa principalis, Ars causa secundaria, & subserviens. 5. Natura plerâque opera sua præstat sine Arte; at Ars nihil producit sine Natura.

Obj. 1. Ars est dux & regula Naturæ.

Resp. Quoad modum agendi duntaxat, non quoad actionem ipsam.

Obj. 2. Ars præstantiora efficit quam Natura: Ut dat recte loqui, harmonice sonos edere; cum Natura tantum præstat ut utcunque loquamur, & sonos formemus.

Resp. Ars cum Naturâ præstantiora quandoque efficit, quam Natura sine Arte. At non per se sola, sine Natura. Vel sic distinguas: Ars præstantiora efficit quoad modum operis, non autem quoad modum & substantiam simul, ut in exemplis memoratis.

Obj. 3. Ars operatur cum cognitione, Natura rarius sic operatur, nempe in iis lolis quæ cognitione pollent.

Resp. Præstantia tamen illa, perfectionibus Naturæ, quas recensuimus, superatur.

Obj. 4. Ars est principium operandi liberum, natura necessarium.

Resp. 1. Natura non semper operatur necessario, prout necessarium libero opponitur. ut in actionibus naturalibus Angelorum, & mentis nostræ, quarum, Natura sine Arte, principium est. 2. Ars est principium liberum operandi, non per se, sed propter libertatem animi cui inest. Hoc est Ars est principium Artificii quod in opere est; Natura vero est principium libertatis in eo producendo.

Obj. 5. Ars perficit Naturam.

Resp. Hinc non sequitur Artem esse præstantiorem, quia à minus præstanti potest perfectio aliqua præstantiori conciliari. Sic modi substantiarum substantiis ipsis ignobiliores sunt, eas tamen perficiunt.

DISPUTATIO V.

*De Objecto, Causis, & Proprietatibus
Disciplinarum.*

Quæstio 1. *An miserum sit omnia speculari & novisse?*

Resp. 1. Non per se, & natura sua. Deus enim omnia videt, & novit, qui tamen beatissimus est. Angeli etiam beati omnia genera rerum, & (ut longe probabilius est) omnes etiam species speculantur.

Resp. 2. Ex accidenti igitur homini aliunde misero, & miseræ obnoxio, incommodum est omnia scrutari, & speculari. Quatenus scilicet notitia quarundam rerum dolorem adfert; ut calamitatum quæ nos manent, vel vitiorum occultorum alterius: Aut in abusum trahitur; aut quia immensi laboris est, & hominem, nunc brevis vitæ, in nullo excellere permittit.

Quæstio 2. *An in omni, aut ulla Disciplina, sit Objectum quoddam, ad cuius cognitionem, omnia reliqua qua in ea tractantur, natura sua ordinantur, quod Objectum Attributionis multi appellant?* Affirmant plurimi, præfertim Pontificii. Nos sic statuimus.

Thef. 1. In multis disciplinis est aliquod Objectum primarium, cuius cognitio, vel productio, maxime intenditur: ut in Logica, Definitio, vel Demonstratio; de quibus utra sit præferenda, disputant Logici. In Ethica, Cognitio, & Acquisitio summi Boni; In Physiologia, cognitio nostri maxime expetenda est.

Thef. 2. Non potest, in omni Disciplina, ejusmodi Objectum assignari, cuius cognitio præcipue, & supra cognitionem omnium reliquorum, jure intenditur, seu
intendi

intendi debet. Quodnam enim erit objectum istiusmodi in Geometria ; planumne , an solidum ? Et si posterius dicant, attendere debent solidum plurima corporum Genera comprehendere , de quibus rursus quæritur, sitne Pyramis, an Cylindrus, an Cubus, an Sphæra ? Idem dici potest de Arithmetica. Et, si Artes respiciamus, quodnam erit Objectum Attributionis Rhetoricæ ? an Oratio demonstrativa, an deliberativa, an iudicialis ? In arte sutoria, an calceus, aut ocrea, chirotheca, tunica, &c ?

Thef. 3. In omnibus Disciplinis quidam tractantur quorum cognitio ad cognitionem aliorum ordinatur : ut in Grammatica, literæ, syllabæ, & singulæ voces ad notitiam Orationis. In Logica termini simplices, ut vocantur, ad notitiam propositionum, & syllogismorum. Cognitio enim unius objecti cognitioni alterius frequenter inservit. & cognitio unius ex cognitione alterius pendet : ut cognitio generum, partium, causarum, ad cognitionem specierum, totorum, effectuum, conducit ; & cognito uno oppositorum facilius cognoscitur alterum in Disciplinis etiam practicis, est unus aliquis finis, ad quem omnia earum præcepta respiciunt, ut in Medicina, Sanitas ; in Grammatica, rectitudo Sermonis.

Thef. 4. Non tamen assignari potest, in omni Discipline, objectum aliquod particulare, puta unum specie, ad cuius cognitionem omnium reliquorum cognitio natura sua ordinatur. Si enim esset ejusmodi Objectum, ex. g. in Physica, illud esset vel Homo, vel Angelus ; hæc enim præcipua illius Objecta sunt. At quomodo ostendi potest, cognitionem Lapidum, Metallorum, Maris, Lunæ, Solis, &c. ad cognitionem Hominis vel Angeli natura sua ordinari aut inservire. An non æque facile cognoscitur Natura Humana vel Angelica. ab eo qui naturam Lapidis, aut ferri ignorat, quam ab alio qui eam maxime novit ? Sexcentæ istius generis instantiæ produci possent.

Obj.

Obj. Si aliqua esset Disciplina, in qua nullum tale Objectum reperiretur, nullus etiam illius finis esset, aut scopus, in quem tenderet; Nulla partium connexio, & ordo; nulla denique unitas.

Resp. Verum, sine ratione ista omnia dicuntur. Nam in Disciplinis practicis, finis est acquisitio cuiusdam boni, non autem nuda illius cognitio. Et in speculativis, finis cum fine alicujus quæ practica sit, coincidit: omnium enim finis est hominis felicitas, quæ finis peculiaris Ethicæ est. Partium autem connexio in Practicis, ex subordinatione unius ad aliam, aut omnium ad finem ultimum; in speculativis vero, ex cognitione objectorum, non autem ex sola aptitudine unius notitiæ ad aliam acquirendam, oritur. Denique unitas Disciplinæ, per unitatem objecti formalis in speculativis, in Practicis vero, ex unitate finis, satis conservatur.

Questio 3. An & quatenus sensibus externis in prosecutione scientiæ fidendum sit?

Respondet Cartesius cum sectatoribus, *suspecta esse debere, & pro incertis ac falsis habenda omnia quæ sensus externi nobis offerunt*: quanquam regulam illam, non ad actiones vita extendant, sed ad solam veritatis inquisitionem. Nos sic statuimus.

Thef. 1. Sensus externi nos aliquando fallere possunt, si iudicium de rebus, juxta ideas, quas ipsi nobis proponunt, formemus. Unde pueri, rustici, & alii, qui minus cauti in judicando sunt, per eos decipiuntur. Ramus enim integer, partim in aqua, partim extra aquam positus, fractus apparet: turris quadrata à longe conspecta, rotunda videtur; sol non major disco putatur; Iris speciem arcus præbet, &c. sensus etiam Internus, seu Imaginatio, erroribus obnoxius est; idque non tantum in Somno, sed etiam cum vigilamus: ut, cum qui vertigine laborant, omnia quæ circumjacent corpora, in orbem ferri existimant: aut cum ebrii, & melancholici, varia copuscula ante oculos volitare autumant.

tumant. Unde nemo qui compos rationis est, in ea sententia esse solet, ut existimet res semper vere ita esse, prout à sensibus repræsentantur.

Thef. 2. Sicut plurimæ res sunt, quæ nullatenus sensu percipiuntur, ut omnes res spirituales, & multæ etiam materiales, illæ scilicet omnes, quæ propter exiguitatem, organa sensuum non afficiunt; Ita etiam earum, quæ sensu percipiuntur compositio, seu textura, situs partium, figura, motus, &c. per sensum sæpe non deprehenduntur. Quis enim adeo lynceis oculis est, ut visu percipiat, quomodo partes ligni, aut lapidis, cohæreant? *Sensus igitur ad omnes res, etiam materiales & quæ quotidie nobis occurrunt, dijudicandas non valent.* Et hæc concedimus Cartesio.

Thef. 3. *Non tamen putandum est sensus res semper falso nobis repræsentare, nec suspicandum est eos semper nos decipere.* patet,

1. Quia ministerio sensuum multa percipimus esse, quæ alioquin nunquam mediis naturalibus, perciperemus, tactu enim multa apprehendimus, ut lapides, ligna, aquam, aerem ipsum & ventum; Visu percipimus res distantes plurimas, quas cæci non percipiunt, videntes vero valde imperfecte; quatenus scilicet voces, quæ res similes significant, eas per auditum menti exhibent.

Resp. *Le Grand Instit. Philos. Part. 1. Cap. 2. Sensus nos duntaxat instruere quod res illa sint, non autem docere quid sint, seu qualem naturam & essentiam habeant.*

Resp. Concedimus quidem, totam naturam seu essentiam rerum istarum, per ideas illas quæ sensibus ingeruntur, non percipi; sicut nec tota per mentem intelligitur; aliquid tamen essentielle in rebus istiusmodi per sensus intelligimus: ut duritiem in lapide, ligno, ferro; mollitiem & fluiditatem aquæ, lucem corporum natura sua lucentium &c. Deinde licet essentias rerum, sensus, nulla ex parte, mentibus nostris exhiberent, multa tamen accidentia vere propo-

proponunt, ut figuras, motus, distantias, &c. quibus cognitis mens multa alia ipsarum attributa exquirat & adinvenit. Annon igitur per sensum certi sumus solem esse lucidum, ignem esse calidum, glaciem esse frigidam, licet per eum, quid sit lux, calor, & frigus. nonnisi imperfecte percipiamus?

2. Si Sensibus nunquam esset fidendum, corrueret magna pars Physiologiae. Nam notitia nostra de rebus materialibus tota à sensibus incipit. Unde si omnia iudicia quæ ex sensibus fiunt, incerta essent, lubrico niteretur fundamento maxima pars istiusmodi notitiæ. Annon enim per sensum certo percipimus res materiales extensas esse, quod fundamenti loco ponunt Cartesiani in sua Somatologia?

3. Si sensibus nunquam esset fidendum, in prosecutione scientiæ, suspicandum esset Deum ita nos condidisse, ut in erroribus innumeris perpetuò versari nos oporteat: Quod sapientiæ & bonitati ejus minime congruit. Quorsum enim istiusmodi creaturas conderet, præsertim quæ alioqui ratione præditæ sunt.

4. Non essemus certi quod sensus nos aliquando fallant, nisi etiam certi essemus quod aliquando non fallant. Ut scire non possemus visum falso representare baculum, in aqua, ut curvum, nisi per visum, vel tactum, sciremus eum extra aquam, rectum esse. Nec enim falsitas, in rebus quæ sub sensum cadunt, aliter quam ex veritate oppositâ, innotescit.

Obijciunt Cartesius, & Cartesiani, 1. Nunquam illis fidendum est, qui nobis vel semel deceperunt. Tunc enim existimare debemus fieri posse ut nos semper decipiant. At sensus sæpe nos fallunt.

Resp. Regula illa, nunquam fidere illis qui vel *semel* nos fefellerunt, nimis stricta est. Fieri enim potest ut quos novimus nos prius decipisse, dispositione ad decipiendum jam vacare: ut cum quis, è mendaci & doloso, verax & ingenuus factus est. Similiter,

liter, licet satis novimus sensus nos aliquando decipere, circumstantiis tamen mutatis, certi esse possumus vera eos testari. Ideo enim sensus nos fallere solent, vel quia objectum longius distat; ut cum turris quadrata, eminus conspecta, rotunda apparet; vel quia objectum, nimia propinquitate, sensum obruit, & impedit, quod tamen in solo visu contingit; vel nimia sensibilitate organum lædit; ut cum sonus vehementior auditum obtundit, ut distincte eum percipere non possit; vel ob parvitatem sensum fugiat; vel quia medium ineptum est; ut cum per vitrum rubedine tinctum, omnia videntur rubra; vel deniq; quia organum sensus male affectum est; ut cum Ictericis pleraq; flava apparent, Ebriis unum objectum duplex videtur. Verum si objectum debitæ magnitudinis sit, ut sensum nostrum vivide afficere, nec tamen obruere possit, si in debita distantia constituatur, si medium purum, & expeditum sit et organum integrum fuerit, putandum non est sensus nos decipere, quousq; objecta repræsentant. Possumus autem certo distinguere inter casus istos: Unde et errores sensuum detegimus.

Obj. 2. Sensus nobis à Naturâ concessi sunt, non ad veritatem eruendam, seu ad principia rerum contemplanda; sed ad indicandum quænam vitæ nostræ corporeæ commoda sint et noxia. Plurima enim eorum quæ in scientiis tractantur, nulla specie corporea nobis offeruntur. Rerum autem corporearum, non tantum initia, sed etiam figuræ, sensus fugiunt, nec revera quales sunt per eos repræsentantur.

Resp. Negatur Antecedens, propter rationes supra adductas. Probationes nihil aliud concludunt, quam solo sensu nullam scientiam comparari; quod conceditur. Ad priorem igitur dicimus, per cognitionem eorum quæ sensus nobis proponunt, ad ea contemplanda ducimur quæ sub sensum minime cadunt. Primo enim, sensu percipimus, in rebus corporeis,

extensionem, & partes majores. Et inde, per rationem colligimus partes illas aliis partibus constare: Et, quæ adeo exiguæ sunt, ut sensum nostrum fugiant, vel constare aliquot aliis, quæ minimæ sunt, nec ulterius dividi possunt, vel divisibiles esse in infinitum. Beneficio etiam idearum rerum quæ majoris sunt quantitatis, percipimus res similes, quæ propter parvitatem sensu percipi nequeunt: ut ex idea sphaeræ cujus diameter digitus est, ad Globulos cælestes (si modo sint) intelligendas. Deinde ex intuitu rerum corporearum, & motuum, ac mutationum, quæ in illis contingere observamus, ad existentiam & naturam spiritualium; ut Dei ipsius, Angelorum, & mentium quæ in aliis hominibus sunt agnoscendam affurimus. Ad posteriorem probationem dicimus, licet initia, seu principia rerum corporearum, sensu non detegamus, ex illis tamen quæ sensu detegimus, ad principia, per rationem, progredimur. Quod autem ad figuras attinet, illæ, si sensum fugiant rarius per Rationem deteguntur. Dicant enim nobis Cartesiani, an figuræ guttarum, quæ è nubibus cadunt, sint exactæ rotundæ, aut an superficies ullius rei five naturalis, five per artem levigatæ, sit exacte plana, sine omni cavitate, & extuberatione.

Quæst. 4. An & quatenus verum sit, *Quicquid est in Intellectu prius fuit in sensu*? Dictum illud exagitant Cartesiani. Et fatendum est, non esse verum in sensu proprio. Quoniam multa mente intelliguntur, quæ sub sensum non cadunt; ut Deus, mens nostra, earumque virtutes, & actus; Angeli; res materiales quæ quantitate minores sunt, quam ut sensus nostros ferire possunt. Item omnes res universales, quatenus tales sunt. Sensus igitur hujus Effati est, Cognitionem nostram non quidem totam, sed magna, si non etiam maxima ex parte, à cognitione quæ per sensus habetur originem ducere, & pendere. Quod verissimum est: ut ex illis quæ in
supe.

superiore quæstione dicta sunt, satis apparet. Utique ex mundo hoc aspectabili, agnoscitur Deus, ex motibus corporum, agnoscuntur animæ quæ ea movent. Per ideam Hominis quam ex nobismetipsis accipimus, cognoscuntur omnes alii homines, a nobis nunquam visi. Per res etiam corporeas, cognoscimus, tanquam per opposita, incorporeas. Per singularem cognitionem, formamus ideas Universales, quæ eandem, hoc est similem naturam in omnibus repræsentant.

Quæst. 5. *An omnes Homines, per naturam Scientiam expetant.*

Resp. Affirmative. Quod vel ex curiositate Sciendi, quâ communiter aguntur, satis liquet. Ratio a priori est, quia omnes appetunt quod sibi bonum videtur. Interim tamen non omnes appetunt Scientias Philosophicas, appetitu efficaci. Quidam enim Scientias negligunt; vel quia nimis difficiles videntur; vel quia aliis studiis animos jam addixerunt. Omnes tamen per appetitum simplicis Complacentiæ, in Scientiam feruntur; vellentque si fieri posset, omnia scire.

Obj. 1. Quicquid naturale est, perpetuum est: at Desiderium Sciendi non est perpetuum, sed Scientia acquisita, cessat.

Resp. Etiam cum Scientia acquiritur, manet appetitus tum complacentiæ, per quam in ea acquiescimus tum desiderii de ea retinenda, & augenda.

Obj. 2. Fratres ignorantæ, (ut vocantur,) inter Pontificios, nihil se scire velle profitentur, præter Christum, Virginem Mariam, & St. Franciscum

Resp. Illud ex supersticiosa, & simulata affectatione singularis pietatis oritur, non ex contemptu Scientiæ, absolute & in se spectatæ.

Quæst. 6. *Sintne præstantiores, Disciplina Theoretica, an Practica.* Plerique Theoreticas præferunt. Nos his Thesisibus litem definimus.

Thef. 1. Disciplina Theoretica præstant Practicis illis, quæ Artes vulgo vocantur.

1. Ratione Objectorum : Illæ enim agunt de Deo ipso, & rebus Naturalibus, quæ à solo Deo fieri possunt : Hæ de solis operibus Humanis, quæ longe inferiora sunt operibus Divinis.

2. Ratione Finis. Disciplina Theoreticæ, ad optimam Hominis partem, nempe Mentem perficiendam, ordinantur, & ad Foelicitatem illius magis conducunt, nempe ad pie & honeste vivendum, instructiorem etiam Hominem reddunt, ad veritatem coelestem, contra adversarios, tuendam. Artes vero ad vitæ hujus terrenæ commodum, & jucunditatem, proxime spectant. Grammatica autem, & Logica, in specie, ad omnes Disciplinas acquirendas inserviunt, adeoque ad illas rationem habent medii ad finem.

3. Ratione Subjecti, & causæ proximæ. Disciplina enim Theoreticæ, non nisi ab illis, qui præstantiori ingenio pollent, in gradu insigni acquiri possunt. Artes vero à quibusvis addiscuntur.

Thef. 2. Disciplina Theoreticæ, ratione objecti, præstant omnibus practicis, etiam Ethicis. Ratio est, quia agunt de Natura & perfectionibus Dei, & de præstantissimis è rebus creatis. Practicæ vero etiam ipsæ Ethicæ, de solis actionibus Humanis, ad rectitudinem Moralem dirigendis, & foelicitate quæ ex ea sequitur.

Obj. Ethica agit de Deo & summo Hominis bono. Theologiæ igitur Naturali, ratione Objecti æquiparatur.

Resp. Ethica non agit de Deo secundam Naturam spectato, nisi indirecte, quatenus, ex principiis Theologiæ Naturalis, demonstrat eum esse Beatitudinem nostram Objectivam, & finem ultimum. Disecte enim agit de sola fruitione, Dei, & mediis quibus ad eam pervenitur, juxta primævum statum creaturæ rationalis.

Thef.

Thef. 3. *Quædam ex Disciplinis practicis, nempe Ethica, ratione finis, omnibus Theoreticis præstant.* Patet quia finem ultimum Hominis explicant, & media ad eum perveniendi, ex primævo Hominis statu, proxima, et unice necessaria, proponunt. Cum Theoreticæ media tantum remotiora complectantur, nempe varia motiva ad prosecutionem finis ultimi. Adeoque non ordinantur ad finem illum, proxime, ut Ethica, sed remote tantum.

Obj. 1. Disciplinæ Theoreticæ sunt sui gratia; Practicæ propter operationem. Ergo præstantiores sunt.

Resp. Sensus Antecedentis tantum est, Disciplinas Theoreticas non ordinari ad effectiorem objectorum suorum, nec immediate spectare ad operationem, ut Practicæ: Absolute enim loquendo ad operationem ordinantur, nempe ad praxin. præsertim moralem, dirigendam, & excitandam.

Obj. 2. Disciplinæ Theoreticæ, per se. Hominem perficiunt: practicæ non nisi auxilio virtutis.

Resp. negatur Anteced. Nam etiam Disciplinæ Practicæ, per se, & sine virtute, hominem aliquatenus perficiunt; nempe prout mentem imbuunt cognitione finis ultimi, et mediorum quæ ad eum tendunt.

Obj. 3. Disciplinæ Theoreticæ perficiunt hominem, per assimilationem ad Deum, & Angelos beatos, felicitate contemplativa: Practicæ, solum in ordine ad societatem Humanam, felicitate activa.

Resp. Neque hinc sequitur Disciplinas Theoreticas esse præstantiores: partim, quia assimilatio illa Hominis ad Deum, & Angelos, quæ in nuda cognitione veritatis consistit, longe minor perfectio est, quam illa quæ in pietate, & iustitia consistit, de qua differit Ethica. Per illam enim, sola si fuerit, homo miser est. Partim quia Ethica non perficit hominem, in ordine duntaxat ad societatem Humanam, sed etiam in ordine ad societatem Divinam, si peccatum non obstarat.

Obj. 4. Appetitus mentis nostræ magis fertur in Theoricam, quam praxin.

Resp. De appetitu ordinato verum non est : ex appetitu autem vitiatō nihil sequitur.

Obj. 5. Disciplinæ practicæ sunt minus certæ.

Resp. Negatur istud. Nituntur enim principiis certissimis, & evidentissimis, qualia sunt *Deus est colendus, & omni obedientia prosequendus, quod tibi fieri non vis, id alteri non facias, & istiusmodi.*

Inst. Facilius dubitamus de principiis practicis quam de Theoreticis.

Resp. Contingit istud propter inordinationem voluntatis Humanæ, quæ principiis practicis non facile se regi patitur, & mentem ad dubitandum inducit de illis quæ non amat : non propter incertitudinem, & inevidentiam principiorum Practicorum in se.

Obj. 6. Objectum Disciplinarum Theoreticarum sunt res necessariæ, & immutabiles; practicarum vero, res contingentes, & mutabiles.

Resp. Si de objectis complexis loquamur, veritates practicæ non minus necessariæ sunt, & immutabiles, quam dogmata Theoretica, si debita comparatio instituitur. Nam præcepta legis Naturalis sunt absolute, & necessario vera; ut *solum Deum, cultu à se probato, reverenter, & sincero animo, colere.* Quæ autem legis positivæ sunt, necessario etiam vera sunt, ex hypothesi legis positæ : & quædam dogmata Theoretica non aliter necessario vera sunt nisi ex hypothēsi. Si autem de objectis in complexis loquamur, concessimus illorum ratione disciplinas Theoreticas esse præstantiores. Illa tamen præstantia superatur à quibusdam practicis nempe Ethicis, ratione finis proprii qui in illis supremus est.

Quæst. 7. Unde sit, quod tot errores, in Disciplinis Philosophicis, prout à multis traduntur, locum habeant?

Respondet Cartesius, cum Discipulis, oriri istud ex

eo quod homines in Infantia, & pueritia, multos errores imbibunt, quos postea non facile deponere possunt: ut solem esse minorem jugero agri; astra non esse majora flamma candela; plus materia plumbo, aut lapidi inesse, quam igni, aut aeri; nihil esse corporeum nisi quod sensibile est: Et hinc omnia immaterialia ad modum rerum sensibilibus concipiunt. Sic Le Grand Instit. Philos. Part. I. cap. 1.

Resp. Concedimus homines, in infantia, & pueritia, varios errores imbibere, eo quod in multis dijudicandis, sensu magis ducantur, quam ratione. Et, ex erroribus istis nonnullos mentibus adulatorum adhærere. Interim tamen, (& sit Thesis) parum aut nihil præjudicia ista scientiarum acquisitioni efficiunt. Ratio est, quia adeo plerumque crassa sunt, & rationi dissona, ut in matura ætate, facile ab iis exuuntur, qui de mente excolenda solliciti sunt. hoc est serio scientiarum studio eam applicant. Quod vel hinc patet, quòd, apud neminem Philosophorum, præjudicia infantiae & pueritiae, pro dogmatis veritatis defendantur, nisi forte ex affectatione singularis cujusdam opinionis; quales fuerunt ex Antiquis, qui solem bipedalem tenuisse perhibentur. Quis enim putet, vere illos, & ex animo, ita sensitse? cum quotidie observârent unamquamque rem, quæ oculo cernitur, pro majori distantia, minorem apparere. Adeo ut mirum sit, *Le grandium* huic sententiae fidem adhibuisse. Adde quod nullum ex omnibus infantiae præjudiciis, quæ Cartesiani proferunt, apud Peripateticos pro vero dogmate recipiatur: Quos tamen plurimum in Physiologia errare autumant. Aliunde igitur sunt errores in Physiologia, quam ab istiusmodi præjudiciis.

Quæst. 8. An Philosophia Theologia Christiana sit contraria. Sive, An quidquam in Theologia verum sit, quod in Philosophia est falsum. Quidam affirmant, Nos negamus: sit igitur

Thes. Vera Philosophia Theologia supernaturali, seu

Religioni Christiana, nullatenus adversatur.

Probatur, quia utraque est Dei donum; utraque veritas; altera Naturæ lumine, altera revelatione Divina, homini communicata. Dona autem Dei, inter se non pugnant, nec veritas veritati unquam contradicit.

Obj. 1. Monet Apostolus, ut Christiani à Philosophia, tanquam à vana deceptione caveant, Epist. ad Coloss. cap. 2. v. 8. Ergo mala est, & fidei Christianæ contraria.

Resp. Monet Apostolus ut caveant à falsis, & corruptis Philosophorum Ethnicorum dogmatis, seu à Pseudosophia; non autem à vera & genuina Philosophia.

Obj. 2. Sapientia carnis, qualis est Philosophia, est inimicitia adversus Deum, ut idem Apostolus testatur, ad Rom. 8. 7.

Resp. Per sapientiam carnis, Apostolus non intelligit veram Philosophiam, sed vitiosam naturæ Humanæ, per lapsum depravatæ, propensionem, & appetitionem.

Obj. 3. Humana cum divinis pugnant.

Resp. Verum est duntaxat de vitiis Humanis: non de donis, & beneficiis, quæ Deus in Homines, per industriam naturæ, confert.

Obj. 4. Philosophia dicit mundum fuisse ab æterno, & in æternum duraturum, ex nihilo nihil fieri, Virginem non parere. idem non esse trinum & unum. neminem justitia aliena justum esse; per actiones virtutum ad Beatitudinem perveniri; & multa istiusmodi, quibus Theologia supernaturalis contradicit. Hæc enim affirmat Deum, in principio temporis, omnia è nihilo creasse; mundum hunc aspectabilem, die novissimo, igne abolendum; Virginem Mariam, dum virgo fuit, Salvatorem mundi peperisse; Deum esse unum & trinum; justitiam Christi imputari peccatoribus credentibus, in justificationem;

ficationem ; per opera legis neminem ad vitam pervenire.

Resp. Non sequitur ; Vera enim Philosophia non dicit mundum fuisse ab æterno. Quippe an potuerit ab æterno esse, ambigit, & graves rationes in partem oppositam urget. ut in Tractatu de mundo ostendetur. Nec negat mundum dissolutum iri, sed dubitat : Et merito quidem : quoniam ex altera parte, certum est, Deum mundum dissolvere posse ; ex altera, per rationem naturalem incertum est an velit. Nihil ex nihilo non fieri asserit quidem, sed per vires naturæ, non absolute : Deum enim agnoscit esse omnipotentem. Virginem parere negat, sed ex ordine naturæ tantum, non per potentiam Divinam. Dicit fides Christiana Deum esse trinum & unum, sed non *secundum idem, sed secundum aliud & aliud* ; Unum Essentiâ, Trinum Subsistentia. Hominem vero justitia aliena imputata, justum esse ignorat quidem Philosophia, non negat. Agnoscit enim transactionem tum meriti, tum demeriti, ab una persona in aliam, ex pacto, aut lege : ut cum posteri majorum privilegiis fruuntur, aut eorundem damnis obnoxii sunt. Denique Philosophia, per actiones virtutis, ad Beatitudinem, seu fruitionem summi Boni perveniri, non ut plane certum pronunciat, nisi de homine integro ; sed tantum dicit nullam aliam viam homini per lumen Naturale innotescere. De Homine autem integro, & vitii experte, idem asserit Theologia Supernaturalis, quod Philosophia ; scil. perfectam & perpetuam adhæSIONem ad Deum in hoc sæculo esse unicam viam ad Beatitudinem æternam.

APPENDIX.

De Variis, Familiis & Sectis Philosophorum.

QUoniam in Philosophia Elenctica, seu Critica, nomina & sectæ Philosophorum, tam veterum quàm recentiorum frequenter occurrunt, idcirco ne de plane ignotis cum Tyronibus loquamur, operæ pretium erit, hic, non procul ab initio, aliquid semel de iisdixisse.

Principio Quæritur an primus Homo, statim à creatione, præditus fuerit Habitibus Disciplinarum. Simile quid affirmant Conimbricenses in proæmialibus Logicæ. Agnoscimus nos primum Hominem, in statu innocentiae, facultates omnes naturales mentis suæ integras habuisse, & perfectas; adeo ut omnia actu cognoverit, quæ ad statum beatum cognitu erant necessaria: et plurima alia facultatum suarum exercitio detegere potuerit. *Sed non constat eum Habitibus omnium Disciplinarum instructum fuisse.* Ratio est, quia sacra Scriptura hoc solum affirmat, quod in imagine Dei, et rectus factus fuerit, hoc est sanctus, iustus, et beatus, sine peccato, et miseria: ad istiusmodi vero statum, Habitus omnium Disciplinarum non erant necessarii. Ita igitur conditus est, ut in cognitione proficere potuit, sicut et Christus ipse secundus Adamus profecit. Lucæ 2. ult. Et Scientia Angelorum incrementa capit.

Obj. Ignorantia est pars quædam Miseriæ, et dolorem adfert.

Resp.

Resp. Verum istud est de sola ignorantia eorum quæ ad Fælicitatem Hominis. icitu necessaria sunt. Alioqui Adamus, ut esset beatus debuit esse omniscius, quod falsum est. Quid vero miseriæ in eo fuisset, si Adamus, compositionem continui, aut causam fluxus & refluxus maris, ignorasset? Quod igitur dicunt Conimbricenses, Ingenuas Artes, à Deo, tanquam primo fonte emanasse, nisi intelligant, Deum homini. per naturam, facultates istiusmodi dedisse, quibus ipse, deo concurrente, ingenuas Artes invenire potuit, falsum est. Nec enim putandum est, Deum, per Immediatam revelationem, cognitionem Artium homini communicasse.

Sed utcunque res ista fuerit, certum est Hominem per lapsum multum de solertia, & perspicacia primæva, non tamen totam perdidisse. Unde plerisque sæculis reperti sunt, qui cognitione rerum, supra modum vulgarem, claruerunt. Ut Assyriorum & Persarum Magi, Ægyptiorum Sacerdotes, Bactrianorum Semanaci, Indorum Brachmanes, & Gymnosophistæ, Gallorum Druides, Græcorum Sapientes, Latinorum Doctores, &c. Rationi tamen consentaneum est ut putemus, Disciplinas & artes omnes, primo fuisse valde imperfectas; & prout à pluribus, per nova experimenta excolebantur, gradatim incrementa cepisse. Unde illud in Axioma abiit, *Nihil simul inventum & perfectum.* Et in hunc usque diem, ad ætatem virilem non pervenerunt. Quoniam vero acquisitio veritatis Difficilis est, & homines ingenio Disparēs, non eandem, in ea exquirenda, viam instituerunt, Hinc maxima opinandi diversitas. & variæ sectæ inter Philosophos fuerunt.

Et, post Egyptiorum & Assyriorum Magos, quorum mentio in sacris literis fit, Duas præcipue Sectas prodit Historia. *Italicam, & Ionicam.* Italicæ Sectæ caput fuit *Pythagoras*, cui ordine successerunt *Thelanges, Zenophanes, Parmenides, Zeno Eleates, Leucippus,*

pus, Democritus, &c. qui à Magistro Pythagorici dicti sunt. Ionicæ auctor fuit *Thales Milesius*, è septem Sapientium primus, Philosophiæ Naturalis Inventor habitus. Hunc ordine secuti sunt, *Anaximander*, *Anaximenes*, & *Anaxagoras Claromenius*, qui, ex Ionia, scholam Athenas traduxit; & successorem habuit *Archelaum*, Socratis præceptorem; Socratem vero excepit *Plato*, divinus appellatus, eo quod de Deo multa differere solitus sit. Auditores illius Academici à loco ubi docuit, nempe suburbano, quod mille passus ab Athenis distabat, *Academia* nomine, appellabantur. Successores habuit, *Xenocratem*, *Palamonem*, *Crantorem*, *Cratetem*, quibus placuit dissimulare scientiam, & nulli rei pugnaciter adhærere. Cratetem secutus est *Arcesilaus*, novæ Academiæ institutor, Ignorantiæ Magister à Lactantio dictus, eo quod primus palam negaverit quicquam esse quod sciri posset. Fuit & Athenis alia Secta, *Stoica* dicta, à *Stoâ*, hoc est porticu insigni, quo Stoici ad Disputandum convenerunt. Hujus Autor fuit *Zeno Citticus*. Post eum insigniores fuerunt, *Cyranthes*, *Diogenes Babylonicus*, *Chrysippus*, *Panætius*, *Epictetus*, & *Seneca*.

Inter alios Platonis Discipulos, celeberrimus fuit *Aristoteles*, quem, multis jam sæculis, maxima, aut saltem doctissima pars orbis Christianæ, in Philosophando secuta est. Hic Peripateticorum princeps fuit, (à *Peripatetîn*, sic dicti, quoniam inter docendum deambulare solebant) ingenii mirabilis vir, qui de multis rebus, præsertim Logicis, & Physicis, longe perfectius, & accuratius omnibus qui eum antegressi sunt, scripsit. Ei successerunt, præter alios, *Theophrastus*, *Sirato Lampiscenus*, *Demetrius Phalerius*, *Hieronimus*, *Cratippus*, *Boetius*, &c. Scripta ipsius interpretati sunt (converso enim sermone, adeoque sæpe obscuro scripsit)

plis) *Alexander Aphrodisæus*, *Porphyrus*, *Themistius*, *Ammonius*, *Plutarchus*, & *Philoponus*; & ex Latinis *Boetius*, & *Averroes*.

Sectæ igitur veterum Philosophorum variis nominibus appellatæ: ut à Gymnasio, seu loco in quo docebant, *Academici* & *Stoici*; à deambulatione inter docendum, *Peripatetici*; ab autoribus *Pythagorici*, *Platonici*, *Aristotelici*, *Epicurei*; à genere vitæ *Cynici*, inter quos insignis fuit *Diogenes Hæmerobius* dictus, quoniam, præter ea quæ quotidianis necessitatibus sufficiebant, nihil quærebat. *Cynici* vocati sunt, quod mordacibus dictis vitia reprehenderunt. Quidam à præcipuo dogmate, quo à reliquis distinguebantur, nomina sortiebantur; ut *Hedonici*, ab *Hedonè* voluptate; quia in ea summum hominis bonum locabant. Horum caput fuit *Epicurus*, à quo *Epicurei* dicti sunt; Alii à modo judicandi *Ephæctici*, id est *inhibitores* ab *epēchein*, & *Sceptici*, à *sceptomai* inspicio, quoniam in quærendo, & considerando, semper versabantur, & de illis quæ alii definiverant iudicium inhibuerunt: Non autem ut apud multos audiunt, quod de nulla re statuerint.

Et hæc de Antiquioribus Philosophorum Sectis. Sequitur ut de recentioribus, præsertim hodiernis, aliquid subijciam; à temporibus *Alberti Magni*, & *Thomæ Aquinatis*, cæptum est in scholis, strictius, & curiosius, de omnibus disputari. Quamquam in quæstionibus parum aut minime utilibus ventilandis, operam nimis locarunt; & *Aristoteli* nimis adhæserunt, tanquam nihil ab eo perperam traditum, nihil, ad rerum intelligentiam requisitum, omissum fuerit. Nec, ut olim ipse, quid suopte ingenio, adhibito priorum scriptorum adminiculo, possent, sobrie et prudenter tentarunt. Et licet *Aristotelem* nonnunquam deseruerunt, ut de *existentia Mundi* ab æterno,
in

in aliis tamen, cum ipsi varios errores in fide, invalescente. Apostasia Antichristiana, imbibissent, eundem errantem & deceptionis suæ patronum secuti sunt; ut in iis quæ ad liberum Arbitrium, & de Beatitude ex operibus virtutis spectant. Duæ autem temporum illorum sectæ fuerunt celebriores; altera *Thomistarum*, qui Thomam Aquinatem; altera *Scotistarum*, qui Johannem Scotum secuti sunt. Utraque scholas, non tantum Pontificiorum, sed etiam Orthodoxorum, postquam à Synagoga Romana secessio facta est, occupavit. Inter Pontificios celebriores sunt Jesuitæ, præsertim *Vasquez*, *Suarez*, *Hurtado*, & post eos *Rodericus Arriaga*, *Comptonus*, & plurimi alii. Hi omnes in eo multum operæ suæ locant, quo dogmata Philosophica cudant, aut inflectant, ad errores Ecclesiæ Romanæ statuminandos; ut in sequentibus ostenderetur.

Sectæ hodiernæ præcipue sunt *Aristotelici*, qui Aristoteli & rationi philosophandi præteritis aliquot sæculis usitatæ, mordicus adhærescunt; (quanquam hi quotidie decrescere videntur.) Et *Cartesiani*, qui *Renatum Des Cartes*, hominem certe ingeniosum, qui aliquot ab hinc annis, Universam fere Physiologiam immutavit, & rejectis principiis Aristotelicis, nova fundamenta jecit, vel potius antiquis, Democriti & Anaxagoræ, licet pluribus mutatis, & additis, inædificavit. Hujus Doctrinam plurimi avide hauriunt, & totam defendendam suscipiunt. adeo ut metuentum sit, (si modo id metuere debemus) ne omnis honos Aristoteli decedat, & in Cartesium transferatur; Et sic in illud ipsum vitium incidant illius discipuli, quod in viris doctis superiorum sæculorum reprehendunt; hoc est, ut libertate philosophandi prodita, in Cartesii Magistri verba juraverint. Sunt tamen qui rectius, omnia dogmata Cartesii nec spernant ut pertinaces Aristotelis admiratores, nec omnia deglutiunt, sed delectu habito, in utriusque doctrina

doctrina amplectuntur quod veritati magis consentaneum videtur. Reliqua quæ ad hunc locum pertinent, in Proæmio Physiologiæ Elencticæ, deo favente, dicentur. Nunc ad Quæstiones Logicas pergamus.

Logica

THE HISTORY OF THE
CITY OF BOSTON
FROM THE FIRST SETTLEMENT
TO THE PRESENT TIME
BY NATHANIEL BENTLEY
VOLUME I
PUBLISHED BY J. B. BENTLEY
1822

LOGICA

ELENCTICA:

S I V E

Synopsis Controversiarum, quæ
circa Dogmata, & Præcepta
Logicalia, agitantur.

Logica Elenctica controversias;
circa illa quæ in Didactica tra-
duntur, proponit, & definit. Ad
singula enim fere capita controversiæ
quædam agitantur, quas ideo nunc (sed
breviter) tractabimus, 1. Ne à consu-
etudine recepta plane discedamus, eas-
ve superciliose contemnere videamur.

E

2. Quia

2. Quia Logico ignominiosum vulgò ducitur, eas planè ignorasse.

3. Quia ad ea, quæ in parte Didactica tradidimus, intelligenda, & confirmanda, nonnihil conducunt.

4. Denique quia ad ingenia Tyronum exercenda, & acuenda, utiles sunt. Ab illis autem quæ ad Naturam ipsius Logicæ spectant, incipimus.

DISPU.

LOGICA ELENCTICA.

DISPUTATIO I.

De Objecto, Genere, & Necessitate Logicæ.

Quæst. 1.

Quidnam sit Objectum Logica? Mira hic est sententiarum diversitas. Alii enim *res extra mentem*; Alii *iplas mentis operationes*, seu actus; Alii sola *Nomina*, seu voces, (Nominales ob id vocati;) Alii *Entia Rationis* statuunt. Nos Theſibus ſequentibus, quid veriſimilius ſit ſtatuemus.

Theſis 1. *Logica aliqua ratione agit, & agere debet, de rebus præter operationes mentis, Voces, & Orationem.*

1. Quia omnium conſenſu, Summa Genera rerum, quæ ab Ariſtotelicis *Categoriæ* vocantur, in Logica proponenda ſunt: Quodque id fieri debeat ratio ſuadet. Etenim ad claram & diſtinctam rerum perceptionem, multum conducit Genealogiam, ſeu ordines Generales rerum ipſarum, mente tenere: ita ut uno quaſi intuitu, perluiſtrare poſſis totam rerum Univerſitatem, incipiendo à Generaliſſimis, deſinendo in ſpeciebus infimis, aut ſaltem eo uſque deſcendendo, ut cujuſvis rei Genus, non valde Remotum habeas. Nec enim ad omnes ſpecies infimas deſcendere licet: Partim, quia plurimæ nobis ignotæ ſunt: partim, quia ſi eoſque deſcenderemus,

ut omnes quæ notæ sunt complecteremur, longior esset series quam ut memoriæ facile mandari posset. Multum certe ad res cognoscendas confert, ad quem ordinem substantiarum aut modorum pertineant, cum quibusnam aliis conveniant, à quibus differant, internoscere. Utile enim illud erit ad res definiendas, distribuendas, & explicandas.

2. Omnes etiam fatentur, Attributa rerum communissima, qualia sunt Essentia, & Accidens, Genus, Species, Differentia, Causa, Causatum, & reliqua istiusmodi, quæ in Didacticis tradidimus, in Logica esse proponenda, & explicanda. Nullibi autem, tanta opportunitate, quam in Disciplina illa quæ Regimini mentis præest, & januam ad reliquas aperit: præsertim cum eorum, tam in Logica, quam in reliquis Disciplinis, frequens sit mentio, & Usus.

Respondent multi, *ista omnia in Metaphysicâ esse tractanda; in Logica vero tantum prælibanda.*

Resp. Licet constitutio & ambitus Disciplinarum, magna ex parte, arbitrarius sit; Incommodum tamen est ista alibi quam in Logica tractare. Si enim in Metaphysicâ explicanda sint, necesse est Logicam mutilatam esse & imperfectam, quæ tamen omni eorum notitia carere non potest; vel ut indecora & superflua repetitione eadem bis tractentur; ut à plerisque diu factum est. Deinde non constat inter Philosophos an statuenda sit Metaphysica aliqua à Pneumatica diversa: nec ulla ratio postulat ut statuatur.

Alii respondent; *Logicam non agere de istis rerum attributis, puta de ipso Genere, Specie, Differentia, &c. Sed tantum de eorum conceptibus.* Ut, cum in ea dicitur, Genus esse aliquid commune pluribus, quæ Essentia differunt, sensum esse *Cum-vis concipere Genus, concipe id quod commune est pluribus istiusmodi*, & sic de reliquis.

Resp.

Resp. Falsum istud.

1. Quia si verum sit, utique verum etiam esset, nullam Disciplinam, agere de rebus ipsis extra mentem, sed tantum de earundem conceptibus. Ut, cum *Physica* dicit materiam esse quaquaversum extensam; aut *Mathematica*, Triangulum esse superficiem quæ tribus lineis comprehenditur, sensus esset, cum vis concipere materiam, vel Triangulum res istiusmodi concipe. Nulla enim disparitas ostendi potest.

Instantia. Genus & species non sunt in rebus ipsis, sed in sola mente.

Resp. At cur Genus & Species in communi minus in rebus sunt, quam materia, aut Triangulus in communi?

2. Responsio ista ridiculos facit Logicæ inventores, quasi nomina Generis, Speciei, Causæ, Causati, subjecti, et adjuncti, & similibus, conceptibus mentis imposuissent, cum ad res & earum attributa designanda communiter adhibeantur.

3. Multa dicuntur de Genere, Specie, &c. quæ non, nisi per vim, ad conceptus mentis trahi possunt. Ut quod Genus affirmari possit de pluribus Speciebus, Species de pluribus individuis: quod Differentia cum Genere, speciem constituat. Quod accidens sit additamentum rei in Essentia constitutæ; & plurima alia, quæ non de conceptibus, sed de rebus ipsis veritatem obtinent.

4. Cum, conformiter ad ideas affectionum istarum communium, res apprehendere conamur, non ad earum conceptus, (nisi quatenus res repræsentant,) sed ad res ipsas mentem convertimus. Ut cum intelligere volumus, an attributum rei quod menti nostræ obversatur, sit Genus, an non, ad ipsam naturam Genericam, quæ in rebus est, respicimus, non autem ad illius conceptum.

Obj. 1. Res sunt objecta aliarum Disciplinarum. Ergo, non sunt in Logica tractandæ.

Resp. Logicam non instituere plenariam rerum tractationem, sed tantum ordines illarum Generales, & Attributorum Locos communes proponere: Specialem vero horum & illarum tractationem cæteris Disciplinis relinquere.

Obj. 2. Logica solos conceptus mentis, & Sermonem externum dirigit. De his igitur solis, non de rebus tractat.

Resp. Contrarium sequitur. Quia enim Logica conceptus & Sermonem dirigit, de omnibus mediis necessariis ad finem illum agere debet. Ex quibus unum est, Rerum Genealogiam, & Attributorum capita tenere.

Thes. 2. *Logica non agit de solis rebus; ut quidam affirmant, quorum sententiã ingenioſe depingit, & tuetur Derodon, in proæmio Logicæ. Objectum Logica (inquit) sunt modi differendi. Modus autem differendi duplex est, Objectivus & Formalis. Objectivus est Res una manifestans aliam: ut vestigium leporis illius transitum. Estque præcipue triplex, Definitio, Divisio, & Argumentatio. Definitio objectiva est res una explicans aliam; ut Animal rationale, Hominem. Divisio objectiva, est res dividens, scilicet partes quæ dividunt totum; ut Corpus & anima, Hominem. Argumentatio objectiva alia est simplex, scilicet, res probans, sive Antecedens, ex quo infertur conclusio: Alia composita, nempe complexio rei probantis & probata, antecedentis scilicet & consequentis: ut ignis urit, ergo est calidus. Modus differendi formalis est conceptus, quo modus differendi objectivus concipitur. Prior est objectum Logicæ primarium, Posterior secundarium tantum, & indirectum, sive per accidens. Sententia ista ab ingenio pertinaci, non sine specie rationis, defendi potest. Scilicet, si quis, mutatis terminis, contendere velit, Objectum Logicæ in genere esse Logous, sive rationes rerum generales, adeoque Definitionem esse attributa quibus res explicatur; Divisionem esse partes rei, vel species, & quæcunque*

que in ea distingui possunt; Propositionem affirmantem, esse identitatem rei & attributorum suorum; negantem, esse rerum diversitatem, seu distinctionem; Argumentationem esse connexionem propositionum, quoad veritatem, & falsitatem; Methodum denique esse ordinem rerum, & Attributorum, propositionum, & Argumentationum. De his enim omnibus agit Logica. Nihilominus varie peccat ista sententia.

1. Quod, si terminos à Derodone usurpatos retineamus, vim inferat vocibus, sive coactas locutiones adhibeat. Licet enim *logoi*, seu Rationes Rerum Generales, media differendi sint; quandoquidem mens, ex earum intuitu, ad recte differendum dirigitur; modi tamen differendi, non, nisi per Catachresin satis duram, dici possunt. Siquidem modi differendi proprie, sunt modi conceptuum, & sermonis externi; non autem rerum. Unde & formales tantum sunt, non autem objectivi; sicut modus videndi, aut audiendi, non est in objecto, sed in visu, & auditu. Improprie etiam dicitur una res definire aliam. Nam Definitio objectiva, uti in scholis vocatur, non definit aliam rem, sed unaquæque res seipsum definit per sua attributa; similiter nec divisio proprie est res dividens, sed, (si ulla divisio *objectiva* dici debeat.) Res dividentes. Nec Argumentatio ipsa, sed medium in argumentatione, est res probans. Sicut nulla Argumentatio objectiva, si esset aliqua quæ sic appellanda sit, est simplex, sed complexio trium terminorum aut propositionum.

2. Quibuscunque tandem terminis efferatur sententia illa, in veritatem ipsam peccat. Multa enim ex præceptis Logicæ, de solis conceptibus mentis, & sermone externo, loquuntur. non autem de rebus extra mentem, & sermonem. Ut quod Definitio sit *explicatio essentiae*; quod Divisio sit *Enumeratio partium vel specierum*; quod Definitio debeat esse *clara* &

quantum fieri potest *brevis*: Cum res non sint explicatio Essentiæ, Enumeratio partium; nec in illis est claritas, aut obscuritas, brevitatis, aut prolixitas. Sensus igitur illorum præceptorum est, quod definitio sit conceptus vel oratio explicans essentiam, hoc est evolvens & aperiens attributa rei essentialia, quod conceptus de re clarus, vel oratio clara sit: quod Divisio sit conceptus partium distinctus, seu oratio distincta, qua illæ significantur. Similiter dicit Logica propositionem esse affirmantem, vel negantem, veram, vel falsam; Cum tamen res nec negant, nec affirmant. Et licet veræ vel falsæ sint, non tamen sensu Logico. Siquidem in Logica propositio dicitur vera, quoniam res est prout ipsa exprimit, & falsa quoniam res aliter est. At res sibiipsi nec conformis, nec difformis est. Veritas igitur & falsitas propositionis est veritas, & falsitas conceptus, & sermonis. Præterea, propositio disjunctiva est, in qua è pluribus, unum indeterminate statuitur: at in rebus nihil est, hoc sensu, indeterminatum. Nam ex his, *Petrus nunc currit, vel non currit*, alterum determinate in re est: at à propositione alterum indeterminate tantum statuitur. Propositio igitur illa non est res, sed conceptus vel oratio. Figuræ etiam & modi syllogismorum, non sunt res, aut modi rerum, sed conceptuum, & sermonis. Nam ex iisdem plane terminis, possunt diversæ propositiones, & syllogismi diversarum figurarum, & modorum, fieri, cum res significatæ, manent immutatæ. Multa alia hujus Generis produci possent.

Obj. Plurima ex præceptis Logicæ, de solis rebus aperte loquuntur; ut quod *Definitio reciprocari debeat, cum re definita, quod Divisionis membra debeant esse opposita, & toti adæquata; Propositionem necessariam esse, in qua connexio terminorum est immutabilis, contingentem in qua mutabilis est*. Et cæterorum eadem ratio est, licet de conceptibus aut oratione loqui videantur.

Resp.

Resp. 1. Concedimus in Logica agi de rebus; Quin & ubi de operationibus mentis dirigendis dī recte agitur, rerum alicubi mentio fit: ut exemplis hic adductis. Perinde enim aliquando est, ad mentem dirigendam, sive objectum monstremus, circa quod actus rectus exercetur, sive actum, qui ad illud terminari debeat. Sed negamus omnium præceptorum eandem esse rationem, propter ea quæ jam dicta sunt.

2. Sicut Autores hujus sententiæ, omnia Logicæ præcepta de rebus verificare student; ita etiam dici potest, hæc & similia, de conceptibus præcipue esse intelligenda. Adeo ut sensus sit, conceptum definitum ea attributa sumere debere, quæ cum re definienda reciprocantur; Divisivum vero, ea membra, quæ opposita sunt, & toti æqualia. In conceptu de veritate necessaria, subjectum & attributum immutabiliter cohærere; de veritate contingente mutabiliter. Quanquam fatendum sit, in his postremis exemplis de solis objectis seu de rebus sermonem esse. Nec enim actus judicii, circa materiam necessariam, semper necessarius est, sed sæpius contingens. Plerique enim actus mentis nostræ contingentes sunt, & voluntatis imperio, quoad exercitum, subjiciuntur. Et qui circa materiam contingentem exercetur, potest esse æque necessarius, ac alius qui circa necessariam versatur.

Thesis 3. *Objectum Logica primarium sunt conceptus seu operationes mentis.* Et Logicæ quidem Geneticæ objectum sunt operationes mentis recte eliciendæ, seu ut dirigendæ, ad faciliorem, certiore, uberio-remque consecutionem veritatis. Analyticæ vero, sunt eadem operationes, ut jam elicitæ, sive bene, sive male.

Probatur 1. Quia omnis Disciplinæ practicæ objectum primarium est praxis, seu operatio quam dirigit:

dirigit : ut in Grammatica, sermo externus ; in Ethica, actiones humanæ, quatenus dirigendæ ad honestatem, & finem ultimum ; & sic in reliquis. Logica autem, quoad primariam sui partem, practica est.

2. Præcipua Logicæ præcepta ; seu quæ primario intenduntur, veritatem obtinent de conceptibus mentis ; ut præcepta de propositione, Definitione, Divisione, Discursu, & Methodo, quæ primario significant actus judicandi in mente, & enunciandi in ore ; rarius autem objecta, nisi figurate, per Metonymiam. Hinc recte Logica circa modos sciendi versari dicitur. Modum enim quendam inducit in actus mentis nostræ ; sicut omnis Ars in suam Materiam.

Obj. 1. Operationes mentis esse considerationis Physicæ & Ethicæ, non igitur Logicæ.

Resp. Non sequitur : quia eadem res objectum esse potest plurium Disciplinarum, sub diversa ratione : quod & de operationibus mentis verum est. Siquidem illæ secundum naturam spectatæ, in Physiologia, nempe in ea illius parte, quæ Psychologia vocatur : in Ethica etiam de iisdem agitur, quatenus legibus pietatis et iustitiæ conformes, aut repugnantes esse possunt : sed in Logica considerantur ut rectæ, vel vitiosæ, in ordine ad veritatem, ubique, quoad fieri potest, attingendam.

Obj. 2. Operationes mentis sunt res transeuntes, adeoque si vitiosæ sint, non permanent dum correctionem accipiant : si vero rectæ fuerint, nulla directione indigent.

Resp. Si vitiosæ sint, non manent quidem dum corrigi possint, eadem individua ; nec Logica docet quomodo eadem singulares operationes vitiosæ, evadant rectæ : possunt tamen loco earum quæ vitiosæ sunt, aliæ substitui, quæ recte procedunt. Potest etiam vitiosa actuum mentis formatio caveri. Qua ratione utrumlibet fiat, illud est quod docet Logica.

Logica. Deinde ubi operationes mentis rectæ sunt, licet directione non indigeant, opus tamen est regulis quibus de earum rectitudine certi simus. Illæ autem eædem sunt, quæ ostendunt qua ratione recte elici, & formari possint.

Obj. 3. Rectitudo actuum mentis est finis Logicæ, ad quem consequendum considerantur. in Logica, res, sub rationibus Generalissimis, nempe quænam attributa essentiam rei ostendant, quænam sint partes & species, & varias connexiones attributorum cum subjectis, ac veritatum inter se. His autem cognitis facile percipimus quinam actus mentis nostræ veri & recti sint, prout scilicet rebus conformes, vel diffformes fuerint. Ergo rectitudo actuum non est Logicæ objectum.

Resp. 1. Rectitudo actuum mentis in particulari, seu prout ipsi versantur circa materiam particularem, quemadmodum in reliquis disciplinis fit, est quidem finis Logicæ. Finis enim ejus est, ut in scientiis, mens nostra recte procedat. Interim tamen rectitudo actuum in communi, est illius objectum.

2. Consideratio rationum illarum Generalium, quæ in rebus ipsis sunt, est medium quidem ad finem Logicæ; Verum non Unicum, nec etiam primum. Ut enim mens in reliquis scientiis, recte procedat, opus est non tantum cognitione aliqua Generali rerum, sed etiam ut modum recte procedendi, in ipsis actibus mentis, prospectum habeamus.

Thef. 4. *Logica aliquatenus agit de vocibus & Sermonem externo.*

Patet. 1. Quia communiter, cum de rebus meditatur, eas consideramus prout vocibus subsunt, hoc est prout per eas significantur, præsertim ubi res sub sensum non cadunt. Animi enim nostri conceptus, per signa externa, communicare solemus, quæ plerumque

rumque voces sunt. Hinc res menti nostræ obversari solent, ut vocibus alligatæ. Unde quia non semper eodem modo illis subsunt, indeq; periculum errandioritur, necessariæ sunt regulæ quædam ad illud vitandum.

2. Quia finis Logicæ est, non tantum ut ipsi recte sciamus, sed etiam ut conceptus nostros recte interpretando, & res proponendo, alios instruamus, ut in Didactica præscribitur. Item ut aliorum dicta, & scripta, tum intelligamus, tum aliis intelligenda exponamus, prout in Analytica, præsertim Hermeneutica, docetur. Ista autem ut rectius præstemus, præcepta quædam de vocibus, & sermone externo, necessaria sunt.

Respondet Arriaga, sic *Logicam supplere defectum Grammaticæ*. Sed replicamus; multa, in Logica traduntur de vocibus, & sermone, quæ fini Grammaticæ extranea sunt. Ut cum agit de phrasium æquipollentia in propositionibus: cum præcipit ut à vocibus, & locutionibus obscuris, & figuratis in Scientiis Philosophicis tradendis, abstineamus; utq; vocum delectum istiusmodi faciamus, easq; ita ordinemus, quo res simplici modo, & luculenter menti audientis exhibeant. Grammatica autem nil majus curare debet, quam regulas congruitatis seu idiomata cujusque linguæ tradere.

Thesis 5. *An ulla eorum quæ in Logica traduntur, Entia rationis sint*, Hoc est an tali nomine appellanda sint. Logomachia est: Certum enim est, Logicam non agere de figmentis, quæ communiter Entia Rationis vocantur: nec istud volunt qui Entia Rationis objectum Logicæ faciunt, ut immerito iis imputat Comptonus, & alii. Certum etiam est Logicam agere de illis rationibus communibus rerum, quæ rebus tribuntur ex nostro modo concipiendi, ut de subjecto, & attributo, antecedente & consequente, de majori & minori extremo, & medio in syllogismo, sæpe enim aliquid ideo subjectum potius quam prædicatum est, quia in conceptu & sermone nostro, primum locum obtinet: sæpe propositio antecedens est, quia ex ea aliquid

aliquid inferimus, cum tamen consequens esse potest, seu ex alia inferri. Idem de terminis in syllogismo statuendum est. Oriuntur igitur istæ affectiones objectorum mentis nostræ, ex nostro modo concipiendi. An vero vocandæ sint Entia rationis, quæstio est de voce. Si enim illa sola Entia rationis vocari debent, quæ pura sunt figmenta, affectiones istæ non erunt Entia rationis, quia non finguntur à mente nostra, sed oriuntur in rebus à modo quo mens ea concipit. Si vero Entia rationis appellare libeat omnia quæ pendent à Ratione nostra, tum Entia Rationis vocandæ sunt.

Obj. Illa sunt Entia Rationis, quæ tantum existunt objective in intellectu: ex quibus nonnulla mere fictitia sunt, & impossibilia: alia habent fundamentum in rebus; formaliter tamen nusquam sunt, nisi objective in intellectu: ut *genus, species, subjectum, predicatum, definitio, definitum, divisio, divisum, syllogismus* objective consideratus. At de his agit Logica. Ergo agit de Entibus Rationis.

Resp. Negandum est ista existere solum objective in mente nostra. Sunt enim *res*, prout cognitioni subjacent, sive tali modo conceptæ. Adeoque duo denotant, scilicet res ipsas, & modum quo cognoscuntur. Utrumq; autem est quid reale. & existunt sive de illis cogitemus sive non; licet posterius, nempe modus cogitandi, sine cogitatione non existit. Et res quidem existunt extra mentem: modus autem cogitandi est in ipsa cogitatione, ut in subjecto. Exempli gratia. Genus est natura communis plurium specierum, & species plurium singularium, concepta ut una, hoc est uno conceptu. Subjectum est res concepta ut habens aliquid quod ei convenit; Prædicatum est res ut alicui convenit. Definitum est res ut explicata per sua attributa; Definitio vero objective sumpta, est illa ipsa attributa, distincte cognita. Divisum est ipsa res quæ habet partes, aut species, concepta ut eas habet. Divisio obiectiva sunt partes et species illæ, distincte conceptæ

Ante-

Antecedens, ut partem discursus denotat, est propositio aliqua prius cognita quam alia, & ad assensum aliis mentem inducens. Consequens est alia propositio, post, & per aliam agnita Syllogismus objective sumptus, est complexum quid ex tribus propositionibus, & tribus terminis. Propositio vero objective sumpta si affirmans sit, est identitas rei cum seipsa, alio & alio modo considerata; vel conjunctio unius rei cum alia, ut partis cum parte in composito, modi cum subiecto in concreto. Si vero negans sit, tum est plures res nec identificatæ, nec conjunctæ sed distinctæ, vel etiam separatæ. Termini autem vel sunt res diversæ, vel plura attributa ejusdem rei, vel res cum suis attributis. Attributa denique rei vel sunt res, aut modi, ut aliis adjunguntur, vel res ipsa ut alias respicit, aut negationes aliarum connotat. Exempla tibi ipsi excogitanda, aut à peritiori suggerenda, brevitatis causa relinquo. In his igitur omnibus nihil est non reale.

Inst. At res tali modo à nobis cognoscuntur, tanquam aliquid ipsis conveniret, quod revera non convenit: ut cum genus concipitur ut una & eadem Natura in pluribus speciebus, illisque superior; species vero ut inferior generi; subiectum universum ut sustinens aliud; Attributum ut sustentatum ab alio, eique adjacens. Modi etiam substantiarum abstracte considerari solent, tanquam per se subsisterent, instar substantiarum. Rebus igitur alienas seu extraneas formas, mens nostra affingit, & eas ut ejusmodi formis affectas, considerat Logica;

Resp. Distinguendum est Antecedens. Res ita à nobis cognoscuntur, tanquam aliquid ipsis conveniret; quod *proprie* illis non convenit, verum est, ut Generi esse superius speciei, speciei esse inferiorem Generi &c. conceditur. Quod nullo modo convenit, negamus. Nam sub vocibus illis, Metaphoricæ, seu

seu analogicæ significationis, aliquid innuitur quod proprie rebus convenit. Ut cum Genus concipitur ut una natura, & ut superius specie; hoc tantum intelligitur, quod sit ipsa natura specierum in quantum conveniunt in Essentiis, & quod plura comprehendat quam quævis species sigillatim. Cum subjectum consideratur ut sustinens, Attributum ut sustentatum, & Adjacens, intelligitur Analogiam quandam gerere ad sustinens, & sustentatum proprie, nempe ad substantiam & modum, quæ Analogia in eo sita est, quod sicut Substantia, quæ proprie subjectum sustinens est, concipi potest, cum modus non concipitur, modus autem concipi nequit, quin aliquod subjectum sustinens concipiatur, saltem indeterminate, & confuse, ita & subjectum prædicationis concipi potest, sine hoc vel illo attributo, quod de eo efferri potest; sed nullum attributum concipi potest nisi ut conveniens alicui subjecto. Quod autem ad conceptum Abstractivum attinet, per eum non consideratur forma, aut modus, ut per se subsistens, sed tantum concipitur secundum se, ita ut subjectum cui inest, directe non concipiatur, ut in conceptu concreti, sed tantum indirecte, cum scimus esse modum; aut non omnino concipiatur, cum nescimus utrum sit modus, an non.

Quæstio 2. *Ad quodnam Genus virtutis intellectualis Logica referenda sit.* Quidam enim scientiis, alii artibus annumerant; alii *Habitus Organicum*, seu instrumentarium appellare malunt. Quæ hic disputantur majori ex parte de nomine sunt: Dum alii *scientiam*, pro sola cognitione speculativa accipiunt: alii ad practicam extendunt: Alii nomine *Artis* ejusmodi *Habitus* intelligunt, qui circa materiam corpoream exercetur; alii qui circa quamlibet rem factibilem, in qua ratio honesti aut turpis non reperitur. Sit igitur in ista Quæstione.

Thesis 1. *Si vocem Scientiæ accipiamus pro quavis cogniti-*

cognitione discursiva ex principiis evidentibus, (quæ acceptio usitatio est) Logica inter scientias numeranda est. Patet, quia ex principiis certis et evidentibus præcepta sua demonstrat; ut definitionem recipiari cum Definito, quia est Essentia Definiti explicata. Membra divisionis cum re divisa consentire, quia partes aut species illius sunt. Syllogismum simplicem tribus terminis constare, quia duorum unum est vinculum, seu medium. Conclusionem Syllogismi demonstrativi certam esse, quia inferitur ex principiis certis; & plurima istiusmodi. Et si Logica non esset certa, nulla esset certitudo reliquarum disciplinarum. Illæ enim veritate præceptorum Logicorum nituntur.

Obj. 1. Logica ordinatur, ad omnes scientias dirigendas. Ipsa igitur non est scientia: sic enim seipsum dirigeret, quod absurdum est.

Resp. Logica ordinatur præcipue ad alias disciplinas dirigendas; seipsam etiam dirigit, non quidem tota totam, sed una pars aliam, ut præcepta definiendi, et dividendi, ad syllogismos recte definiendos et dividendos.

Obj. 2. Scientia demonstratione acquiritur: at non sic Logica, quia est omni demonstratione prior: quippe rationem illius efficiendæ docet.

Resp. Scientia acquiritur demonstratione, vel naturali, quum mens sine ope præceptorum format, vel artificiali, quæ beneficio artis fit, priori acquiritur Logica. Hanc enim non docet, nec eâ prior, sed posterior est.

Obj. 3. Scientia est rerum necessariarum; at Logica contingentium; nempe actuum mentis, qui contingenter à nobis eliciuntur, et multis modis variari possunt.

Resp. Scientia est rerum necessariarum, hoc est propositionum necessariarum, vel absolute vel ex hypothesi aliqua; non autem semper rerum incomplexarum

quæ

quæ necessariae sunt. Conclusiones autem Logicae necessariae sunt : ut definitio necessario reciproca est, divisio necessario fit per membra immediate opposita : scilicet ex hypothese quod recte fiant, seu ad finem accommodentur ; & sic de reliquis. Licet ipsi actus definiendi, & dividendi, contingenter plerumque eliciantur à mente, & absolute considerati, possunt aliter se habere.

Thef. 2. Si Scientiæ vox, pro sola cognitione speculativa accipiat, Logica partim Scientia est, partim non. Scientia erit, quatenus agit de summis Generibus Rerum, & communissimis earum affectionibus seu Attributis, quæ in potestate nostra non sunt. Non erit Scientia quatenus agit de operationibus mentis, & sermone externo dirigendis. Est enim Logica pro diversis istis partibus sui, partim speculativa, partim practica. Verum sic vox Scientiæ nimis restringitur, sine ratione. Non enim ex eo quod objectum sit à nobis factibile, vel non sit, Scientia metienda, sed ex eo quod sit cognitio certa simul & evidens, aliunde deducta. Dicendum igitur est, Totam Logicam est Scientiam : & absolute practicam. Partim, quia tum major illius pars, tum illa quæ præcipue intenditur, & proxime inservit menti dirigendæ, practica est, stricte & formaliter : partim quia residuum, quod ex se speculative procedit, ad praxin proxime ordinatur.

Thef. 3. Si vox Artis accipiat, pro habitu practico, ab Ethica distincto, (prout communiter accipi solet,) Logica, ex parte, & quidem præcipua, erit Ars. Est enim habitus practicus, circa ea in quibus per se, nulla est ratio honesti aut inhonesti. Modum enim recte sciendi, hoc est definiendi, dividendi, & ratiocinandi, tradit. Si vero vox Artis restringatur ad ejusmodi habitum practicum significandum, qui circa materiam extrinsecam

extrinsecam ei in quo est, et cujus operatio opus sensibile post se relinquit, tum non erit Ars. Sed sine ratione vox *artis* sic restringitur. Ad Artem enim nihil refert, circa qualem materiam verletur, modo sit Habitus practicus, circa ea quæ ex se, nec honesta sunt, nec in honesta.

Thef. 4. *Logica, proprie loquendo, non est habitus organicus, seu Instrumentarius.* Ratio est quia illa quæ efficienda præcipit, scilicet Definitio, Divisio, Syllogismus, et Methodus, non sunt proprie Instrumenta, sed tantum per Analogiam quandam, seu per Metaphoram. Instrumenta enim proprie dicta concurrunt physice, cum causa principali; ut malleus cum fabro, calamus cum scriptore. Logica vero non sic concurrat cum Intellectu, in productione Scientiæ, (quæ ejus effectus proprius est,) sed ad modum exemplaris, ut et reliquæ Artes: Ideas scilicet proponendo, bonæ Definitionis, Divisionis, Ratiocinationis, et debiti ordinis; ad quas intellectus respiciens, similes facit in particulari materia; aut Definitiones, Divisiones, &c. in hac vel illa materia examinat. et probat, vel damnat.

Quæst. 3. *An, & quatenus necessaria sit Logica, ad cognitionem rerum acquirendam.* Ad dubium istud solvendum, sit

Thefis 1. *Logica non est absolute necessaria, ad cognitionem rerum acquirendam.* Hoc est non est ita necessaria, quasi sine ea, cognitio rerum quæ in Philosophia investigantur, acquiri non posset. Patet 1. Quia multi, ante inventam Logicam, ex solo lumine et industria naturali, varias Artes, et Scientias invenerunt. Et, licet prima scientiarum fundamenta imperfecta fuerint, id ipsum tamen evenisset, etiam si operam Logicæ adhibuissent. Nec enim illa est causa præcipua scientiæ acquirendæ, sed felix ingenium, et sedula contemplatio. 2. Quidam etiam hodie, qui Logicæ imperiti, aut præceptorum ip-

fius pene obliti sunt, varias scientias callent. 3. Logica ipsa, per vim naturalem mentis, nempe observatione modi quo intellectus procedit, in recta, et solida rerum cognitione, sine regulis inventa est. Cur autem difficilius est reliquas scientias acquirere, sine Logica, quam Logicam ipsam? Sola igitur Logica Naturalis, hoc est vis et Lumen Rationis, absolute necessaria est ad scientias acquirendas: sicut et utcumque sufficit ut eas acquiramus.

Thes. 2. *Utilis tamen est Logica Artificialis.* Adeo ut sine illa, mens in suis operationibus, minori cum facilitate, et certitudine procederet, et imperfectiorem rerum notitiam acquireret.

1. Quia experientia constat, minus copiose, et minus accurate, de rebus, communiter, disserere illos qui Logicæ imperiti sunt: presertim de iis, quæ in disciplinis difficilioribus tractantur: Et maxime omnium in controversiis agitandis. Licet aliunde, multi plenius et accuratius disserere possint, quam qui maxime sunt Logici.

2. Logica, si perfectam hactenus esse concedamus, (et in paucis certe, aut nullo deficit,) omnes modos proponit, quibus mens nostra utitur in cognitione acquirenda. Ostendit enim quomodo unaquæque res tractanda sit: hoc est quomodo definienda, & explicanda, quomodo dividenda, quomodo veritas confirmanda, falsa refutanda, objectiones contra veritatem, et argumenta sophistica ad defendendum quod falsum est instituta enodanda sint: Quo ordine in singulis exercitiis procedendum sit; hoc est quid primo, quid deinceps, quid ultimo in loco tradendum sit.

3. Licet nec ingenium conferat, quod quisque a natura, vel potius à Deo mentis parente, habet, nec principia suppeditet, occasionem tamen menti præbet, multa considerandi, quæ sine illa præteriret. Ut, cum in tractatione Genetica, præcipit ut expendatur rei Nomen, Natura, proprietates eam conse-

quentes, Partes, Species, Causæ, Effecta, Subjectum, (si sit,) adjuncta, &c.

4. Logica rationem nostram exercet. Et idcirco fieri non potest, quin eam perfectiorem reddat, hoc est efficiat, ut majori promptitudine res apprehendat, majori subtilitate eas pensitet, &c. Quæ enim ratio esse potest, cur Ars loquendi, nempe Grammatica loquelam perficeret, nihil autem emolumenti ad Rationem, per Logicam accederet? Errant igitur, ex altera parte, qui immodicis laudibus Logicam extollunt, quasi per eam omnes morbi Intellectuales, ignorantia, error, dubitatio, obscuritas, confusio, & inordinatio curari possent. Ex altera qui eam nimis deprimunt, quasi parum aut nihil utilis esset ad Scientiarum acquisitionem.

DISPUTATIO II.

De Ordinibus Rerum qui Categoriae vulgo vocantur.

Ordines rerum, Græci *Categorias*, à *Catagoreisthai*, hoc est à prædicando, seu enunciando, Latini *Predicamenta* appellârunt. In unoquoque enim ordine, est series attributorum, quæ omnia de singularibus sibi subjectis prædicantur. Unde *Categoria* definitur, *Series Rerum, sub uno summo Genere, gradatim dispositarum.* Hoc est, quarum singulæ ascendendo, ad sequentes, inferiores sunt, seu
minus

minus late patent; descendendo vero, *superiores*, seu latius patent. Ascensus autem in serie, vel linea Categorica, est, à singularibus ad Universalia, & à minus Universalibus ad Universaliora; dum tandem ad Universalissimum in illa serie, deventum sit; quod *summum Genus* dicitur. Descensus contra, est à Genere supremo ad minus Universalia, dum ad singularia ventum sit. Ut in ordine substantiarum, descendendo, sunt *Corpus, vivens, Animal, Homo, Socrates*, & sic in reliquis.

De numero Categoriarum varie statuerunt Philosophi. Unam Categoriā omnium rerum à *Platone* constitutam aiunt *Conimbricenses*, nempe *Ens*. At is proculdubio unum illud in plures divisit. *Xenocrates*, qui ei in *Academia* successit, duos posuit, *Substantiam*, & *Accidens*. Nec dubium est quin & ille, utrumque in plures ordines distribuerit. *Stoici* quatuor posuerunt, *Substantiam, Qualitatem, Modum, & Relationem*. Valla tres posuit, *Substantiam, Qualitatem, & Actionem*: sed immerito *Relationem* omisit, quæ ad nullum ex his tribus revocari potest, nisi ad aliquem ex ordinibus *Attributorum* ab ordinibus rerum distinctis, re-tulerit.

Sed, ante hos omnes, *Archytas Tarentinus*, *Pythagoræ* discipulus, Decem statuerat, *Substantiam, Quantitatem, Relationem, Qualitatem, Actionem, Passi-onem, Ubi, Quando, Situm, & Habitum*. Hunc numerum amplexus est *Aristoteles*: & partim propter antiquitatem, partim ob auctoritatem tanti Philo-sophi, plerique sequentium Logicorum retinue-runt. Desumptum esse aiunt *Recentiores* à quæ-stionibus quæ fieri possunt de primis substantiis, id est, singularibus. Ut si quæreretur *Quid, Quantus, Qualis sit Socrates*, responderetur per *Substantiam* esse *Hominem*; per *quantitatem*, esse *sex pedibus altum*; per *Qualitatem* esse *doctum, & probum, &c.*

Ut autem omnia de quibus in Disciplinis agitur, locum aliquem in hisce decem classibus inveniant, Quidam quinque modis res in illis esse volunt; nempe alias *directe*, alias *analogice*, alias *collateraliter*, alias *eductivus*, alias denique *per accidens*. Sic Keckermannus alios secutus, *Syst. Log. Majori lib. 1 cap. 2.*

Burgesdicius vero duobus modis contentus est, adeo ut omnia in illis sint, vel *directe*, vel *indirecte*. Et quod *directe* in illis ponitur, ait debere esse.

1. *Ens finitum*. Unde in Categoriis excluditur Deus.

2. *Verum, ac Positivum*. Et hinc excludi vult, non tantum ficta, ut *Chimæram Centaurum*; Entia apparentia, ex g. *Iridem, Spectra*, & privationes; verum etiam Genus, & Speciem in communi, & ejusmodi, quæ Entia Rationis vocat.

3. *Complectum, & perfectum*. Et sic excluduntur principia Rerum, ut *unitas, momentum*; partes omnes, Entia imperfecta; ut *Embryo, motus, modi*, & complementa aliorum Entium. Et dicit ista omnia in Categoriis esse *concomitanter*, hoc est una cum illis quorum principia, partes, & modi sunt; exceptis tamen differentiis, quæ *collateraliter* sunt in Categoriis suarum specierum, quarum partes quædam sunt. Quod enim in recta linea Categorica reperitur, est Genus, vel species, vel individuum.

4. *Unum per se*. Et sic excluduntur res complexæ; ut *Homo currens*; concreta, ut *albus*; & Aggregata, ut *acervus, exercitus*. Hæc per accidens pertinere ait ad Categorias earum rerum ex quibus coaluerunt.

5. Denique *Universale*. Et hac conditione excludi dicit, primo Transcendentia, quæ sua communitate omnes Categoriarum Gradus superant; Deinde singularia, quæ quia naturaliter non prædicantur, sed subjiciuntur, non sunt in Categoriis, sed *infra* eas, ut basis.

Communiter etiam docent omnes hujus sententiarum Patroni, unam & eandem rem, ad diversas Categorias

rias pertinere, licet sub diversa ratione. Ut eundem motum, quatenus per eum aliquid producit, ad actionem; quatenus in re mota recipitur, ad Passionem; Quatenus partes habet extra partes, ad Quantitatem. Denique aiunt, in Categoriis, prout in Logica traduntur, non considerari res secundum naturas, sed secundum diversum modum prædicandi.

Cartesiani duas Categorias constituunt, Unam *Rem*, hoc est, Substantiarum, (solas enim illas *Res* appellare volunt, & proculdubio res præcipue sunt;) aliam *Modorum*, seu *Attributorum*: *Attributum*, enim & modum rei, pro eodem fere accipiunt. Sed tum res, tum Modos dividunt, in sua Gênera. Ut substantiam in *Extensam*, & *Cogitantem*, sive in *Materiam*, & *Mentem*: non autem in *Corpus*, & *Spiritum*; quia spiritualement substantiam nullam agnoscunt præter *Mentem*, hoc est, intelligentem. Deinde, quia vox *spiritus* quandoque significat *Materiam* subtilem. Utrumque porro dividunt, juxta suæ Philosophiæ placita. Ut *Rem* cogitantem seu *Mentem* in *Infinitam*, quæ *Deus*; & *Finitam*, quæ *Mens* creata est. Et hanc rursus in *Angelicam*, & *Humanam*. Nec enim alias species substantiæ immaterialis agnoscunt. Verum alii substantiam dividunt in *Spiritum*, & *Materiam*: *Spiritum* in *Infinitem*, & *Finitum*. *Finitum* in *vegetantem*, *sentientem*, & *intelligentem*; *Intelligentem* in *mentem Humanam*, & *Angelum*. Et hi extensionem non materiæ propriam, sed communem ei cum spiritu faciunt.

Corpus dividunt Cartesiani, in *Elementum*, & id quod ex *Elementis* constat. *Elementum* triplex esse volunt, *Materiam* subtilem, ex qua *fidera*; *Globulos* cælestes, ex quibus *Cælum*, seu *aer*; *particulas* crassiores, ex quibus *Cometæ*, & *Planetæ*; (*Planetis* vero *Globum Terræ*, & *Maris* accensent;) Quod ex *Elementis* constat: distribuunt in *Non-vivens*, & *Vivens*. *Non vivens* rursus, in id quod simplicius est,

est, ut fidera, & Coelum: & id quod magis compositum est; quod vel sublimius, ut Cometæ, Planetæ; vel Humilius, ut ignis, aer, aqua, terra, & ex his orta, ut Meteora, ex g. Vapores, venti, pluvia, nix, grando, fulmen, &c. & fossilia, Metalla, & lapides. Vivens dividunt in Vegetabile, Sentiens, & Rationale. Modos Rerum dividunt in Generales, & Speciales. Generales vocant illos, qui omnibus rebus conveniunt. Ex quibus *Le Grand Instit. Log. cap. 8.* sex tantum enumerat, nempe *Unitatem, Veritatem, Bonitatem, Perfectionem, Localitatem, & Durationem.* Sed rectius *Claubergius, Log. Genet. cap. 6.* Communissima rerum attributa, quæ aliter *Modos* nuncupat, dividit primo in illa quæ conveniunt rebus absolute spectatis, sive singulis seorsim; qualia sunt *Essentia, Existentia, Perfectio, Unitas*; sive pluribus conjunctim, ut *Multitudo, seu Numerus.* Et in illa quæ rebus conveniunt ad seinvicem relatis; sive illative referantur; ut *Principium, Causa, Principiatum & Causatum*; sive negative; ut *Distincta, Diversa, opposita, Priora, & Posteriora*; sive denique affirmative; ut *Idem, Subjectum, Adjunctum, Signum, Signatum, Pars, Totum.*

Speciales modos dividunt, pro Divisione Rerum. Alii enim sunt *Rei Cogitantis*; ut, *intellectio, volitio, potestas agendi ex se, autocinesia.* Alii *Rei extensæ*; ut *Quantitas, Figura, Situs, Quies, & motus.* Ad hos enim reduci existimant omnes modos materiæ. Alii sunt substantiæ compositæ ex *Materia, & Mente*, qualis est *Homo*; ut *appetitus, sensus externi, interni, & Passiones, ut Amor, Odium, Gaudium, Dolor, Spes, Metus, &c.* *Attributorum* tres species statuit *Claubergius, Accidens, Modum, & Qualitatem.* Per *Accidens*, intelligit id quod *Substantiæ Essentiam* non constituit. Per *Modum* id quod rem variat, & distinguit, sive à seipsa, sive ab alia: ut *Figura* ceram. Per *Qualitatem*, id à quo res talis denominatur, ut *mollis, dura, alba, nigra,*

nigra, &c. Hæc summa eorum est, quæ de Categoriis traduntur, de quibus fit.

Quæst. I. *Quid de his Distributionibus Rerum censendum sit?*

Resp. In omnibus aliquatenus erratum est. Et in Distributione Archytæ, quæ Aristotelica dicitur, hæc observanda sunt.

I. Supponit ut verum, pro diversis quæstionibus quæ fieri possunt de prima substantia, numerum Categoriarum esse constituendum, quod tamen nulla ratione defendi potest. Si enim pro quæstionibus istiusmodi, Categoriæ distinctæ ponendæ sint, cur non etiam pro iis quæ fieri possunt de Substantiis secundis, & accidentibus, sive singularibus, sive universalibus.

De his enim nonnullæ fieri possunt, quæ de substantia singulari fieri nequeunt. Nam de accidentibus quæri potest, cuinam inhæreant subjecto, seu cuinam accidant? De Universalibus autem, tum substantiis, tum accidentibus, quam late, pateant, seu quænam in extensione eorum sint inferiora? Deinde multæ quæstiones fieri possunt de rebus, quibus per nullum ex decem hisce generibus responderi potest; ut A Quo, Ex qua Materia, Cujus gratia sint? quæ de causis fiunt. Quænam eis opposita sint, Quænam cognata. Quem ordinem prioris aut posterioris ad alias habeat, & aliæ non paucæ. Quarum pleræque non minus utiliter in Disciplinis agitantur, quam decem illæ ex quibus numerum illum denarium desumptum volunt Peripatetici. Si igitur juxta numerum quæstionum, etiam Generalium & utilium constitui deberent Categoriæ, longe plures erant constituendæ.

II. In variis modis assignandis, quibus omnia quæ sub cogitationem nostram cadunt, in Categoriis esse volunt, varie peccarunt. I. Modos *directe* & *Analogice* ut oppositos posuerunt. Cum *ro*
directe

Cum *directe* opponitur *indirecte*, & *Analogice*, *proprie*. Similiter modum *reductive* ab omnibus reliquis distinctum faciunt; cum reliquos omnes comprehendat, præter modum *directe*. Unde rectius Burgerſidicius omnes indirectos vocat. 2. Excludunt Deum ex Categoriis. Fatemur quidem Deum non esse in Categoriis rerum creatarum. At cur non erit Categoria aliqua rerum Divinarum, ab his distincta? Deinde satis recte Deus continetur sub communi Idea substantiæ. Is enim maxime omnium *Rerum* per se subsistit. Quæ in oppositam partem obijciuntur exigui sunt momenti. Quod enim dicunt, Quæ hac Categoria *directe* collocantur, substant accidentibus; et nullum esse genus proprie dictum rei finitæ & infinitæ; non concludunt. Ad prius enim facile respondebitur, subsistere accidentibus non esse de essentia substantiæ, sed tantum subsistere per se. Ad posterius, falsum esse quod nullum sit Genus proprie dictum rei finitæ & infinitæ. An non enim *Aliquid Reale*, est Genus ad utrumque? Nisi admittere velimus, nihil finitum esse reale, seu omne finitum esse nihil, vel fictum. Differentia quidem inter Deum & omnes creaturas infinita est: in hoc tamen communi attributo proprie conveniunt, quod hæ non minus quam ille sint aliquid reale positivum. Et quædam ex illis non minus independentes sunt à subje.to inhæſionis, quam Deus, licet alio modo plane dependentes sint. 3. Male è Categoriis excluduntur. Genus, Species, & reliqua quæ Notiones secundæ vocantur. Nec enim illæ Entia rationis sunt, sed veræ rerum affectiones, quæ nullo modo pendent à nostra cogitatione, multo minus ab ea fiuntur, ut inferius ostendetur. Et, quod ad Genus & speciem attinet, quæ præcipue hic exemplorum loco ponuntur, palam est ea esse veras rerum convenientias in essentiis, seu plures res prout sic conveniunt: ut *Animal* in communi, denotat naturas omnium

nium animalium, quatenus in virtute sentiendi conveniunt; & *Genus* in communi omnia Genera, quatenus conveniunt in Genereitate. 4. Male etiam excluduntur partes, ubi Tota includuntur. Siquidem totum nihil aliud est quam omnes partes cum Unione. Dicendum igitur fuit, ubi res quæ partes habent. in Categoria aliqua ponuntur, intelligendas esse una cum partibus. 5. Sed absurde plane excluduntur Modi Rerum. Sic enim excludenda esset Figura, Actio, Situs & Habitus. Hæc enim pro Modis à Peripateticis habentur. Et omnes Pontificii, qui Modos distinguunt à reliquis accidentibus, Actionem inter modos referunt. Plerique etiam Habitu qui Decima Categoria constituitur, definiunt, *modum quo aliquid alicui extrinsecus apponitur*, ut Vestis, aut instar vestis. 6. Si complexa & concreta omnia per accidens tantum in Categoriis sint, cur non etiam partes corporis, aut cujusvis rei compositæ; ut corpus organicum & Mens, in Categoria substantiæ? At (inquier) multæ partes faciunt unum per se; ut membra corporis humani; Radix, truncus, & Rami arboris. Verum merito rogabit quis, quid intelligant per hanc phrasin, Unum per se. An quod partes per solas Entitates suas unum conficiant? An unum sunt per unionem distinctam. An quod unam aliquam speciem constituent? & ex potentia & actu consistant? At sic *homo currens* non minus est species rei motæ, aut se moventis, quam corpus organicum, & mens cum unione. sunt species Animalis: sicut enim *Corpus* & *Mens* sunt Potentia & actus, in constitutione hominis, ita etiam *Homo*, & *cursus*, in constitutione Hominis currentis. Et sicut *Homo* est per se species quædam Animalis, sine cursu, ita etiam corpus organicum est species quædam corporis, sine anima. Satiùs igitur fuit, unam Categoriā Rerum simplicium, aliam compositarum constituisse, prout rerum ipsarum natura postulat. 7. In quinta conditione

ditione quam *Burgesdicius* adfert, mirum est id quod directe in Categoriis ponitur, debere esse Universale, & tamen Transcendentia è Categoriis abesse, cum tamen hæc sint Universalissima. At (inquit) omnes Categoriarum ordines sua communitate superant.

Resp. Omnes quidem Categorias Aristotelicas superant? An idcirco debebant è Categoriis, hoc est ex ordinibus Rerum & attributorum, excludi? præsertim cum major eorum usus sit in Logica, quam plerorumque ex iis quæ in decem hinc ordinibus locantur. Ad Transcendentia enim pertinent *Essentia, Accidens, Causa, Totum, Pars, Subjectum, Adjunctum, Genus, Species, Differentia & proprium* in Communi; quibus incognitis, præcepta Logicæ intelligi & observari nequeunt. Horum igitur ordo aliquis constitui debuit. 8. Singularia non ideo excludenda sunt è Categoriis, quia non prædicantur. Sic enim propter eandem rationem, excluderentur omnes species, quatenus sunt subiecta suorum Generum. Deinde nulla ratione è Categoria tollitur basis; Sic enim totum ædificium rueret. Denique, si singularia non sint in Categoriis, eo quod illarum fundamenta & bases sint, neque summa Genera in eisdem sunt, quia sunt earum capita.

III. Sunt & alia in hac distributione errata non pauca, ut, 1. Quod non sit immediata, seu proxima. Adeoque multas alias divisiones tanquam priores præsupponat. Ut divisionem Entis in Substantiam & Modum Substantiæ; vel in Rem, et Attributum Rei. Et quasdam etiam Divisiones Modorum ac Attributorum. 2. Quod supponat Res omnes dividi posse in ordines substantiarum et Accidentium. Cum Accidens non substantiæ, sed essentiæ, immediate, oppositum sit. Unde Substantia Rationem accidentis obtinet, quoties alteri Substantiæ unitur,

unitur, præcipue cum ei extrinsecus adhæret; ut annulus, vestis; aut circumjacet; ut arbores, fluuius, campi amæni, domum. 3. Quædam ex attributis Rerum communissimis assumit, ut Relationem, Qualitatem, Quantitatem, (si modo illa in tota sua latitudine accipiat, pro quavis extensione,) reliqua vero ejusdem ordinis prætermittit, ut Causam, et Causatum, Subjectum, et Adjunctum, Convenientiam, Diversitatem, et Oppositionem. 4. Quantitatem et Qualitatem, pro accidentibus habet, à substantia reipsa distinctis. Cum tamen Quantitas continua substantiæ non sit distincta ab ipsa substantia, nisi ratione. Id ipsum verum est de qualitate; ut de potentia intelligendi, et volendi, quæ non distinguuntur realiter ab ipsa mente, cujus qualitates esse dicuntur. 5. Sufficere innuit distinctionem rationis, ad diversas Categorias constituendas. At quæ Genere differunt, quales esse dicuntur decem Categoriarum, per differentias oppositas dividuntur, et idcirco plus quam ratione differre debent.

Obj. *Burgersdicius Instit. lib. I. cap. 3. Numerum denarium Categoriarum esse antiquitate venerabilem; & non contemnendis rationibus confirmari posse: præsertim in Logica, qua in Categoriis (ut loquitur Aristoteles) non tam considerat modum quo res sint, quam formam predicationis. In Metaphysicis non est eadem ratio.*

Resp. I. Non omne Antiquum venerabile est.

II. Logica non tantum considerat modum seu formam prædicandi, sed etiam modum essendi in ipsis rebus. Considerat enim diversos modos quibus attributa conveniunt suis subjectis, seu varias rerum connexiones: ut quod quædam necessariam habeant connexionem; aliæ contingentem; quædam de essentia aliarum sint, quædam non: quædam subjectis in tota sua latitudine conveniant, quædam non. Et cum modus prædicandi modum essendi sequatur, ut omnes concedunt, non potest ille intelligi quin hic consideretur.

Dein-

Deinde per modum vel formam prædicandi, vel intelligitur modus judicandi in mente, vel enunciandi in sermone externo, vel modus quo unum alteri convenit. Primus & secundus, ut quod clarus sit, vel obscurus, firmus, aut vacillans, absolutus, vel limitatus, aut conditionalis, &c. Ad constitutionem Categoriarum nihil faciunt; tertius autem est in rebus ipsis.

3. Si detur quod hic asseritur, non tamen inde colligitur denarius numerus Categoriarum. Quomodo enim ostendi poterit modos seu formas prædicandi, quocunque modo sumantur, esse decem, nec plures, nec pauciores?

Ad Distributionem Cartesianam veniamus; Quæ in eo laudanda est, quod naturam rerum ipsarum sequatur saltem in primis & præcipuis divisionibus. In ea enim primo dividitur *Ens* seu *aliquid*, in *Substantiam* & *modum* substantiæ, quæ divisio prima est, & adæquata. Omne enim reale positivum, vel existit per se, hoc est, non dependet à subjecto; vel existit in alio, quod subjectum ejus est, à quo dependet. Recte igitur Una omnium Rerum Categoria, seu series Generalis statuitur, cujus supremum Genus est *Ens*. Licet illa plures ordines particulares sub se comprehendat. Quæ contra objiciuntur nullius sunt momenti. Ea tamen breviter proponemus & diluemus.

1. *Ens aut Res* (inquit Burgerjiscus Instit. Log. lib. 1. cap. 3.) nullam solvit questionem, præter eam qua quaeritur an *Res* sit.

Resp. 1. Neque per decem Categorias Aristotelis, (ut vocantur) ad omnes quæstiones quæ in Disciplinis occurrunt, responderi potest, ut supra ostendimus.

2. Per *Ens* non respondetur tantum ad Quæstionem an *res* sit, sed etiam ad quid, aut qualis sit. Si enim quaeratur de luce, sitne aliquid an nihil recte respondetur, esse *aliquid reale positivum*, seu *Ens* strictè, & absolute. Et per illam responsionem ostenditur

ostenditur quid aut qualis sit, licet imperfecte.

3. Licet supremum Genus, nempe Ens, nullam aliam quæstionem solveret, quam quæstionem an sit, per membra tamen divisionum inferiorum, ad plurimas alias responderetur: & quidem ad omnes quibus per decem hæc Categorias responderi potest, & plures alias.

Obj. 2. *Ens inæqualiter convenit substantiæ, & accidentibus. Nam substantia est ens per se: accidentia non sunt Entia, nisi quatenus sunt aliquid substantiæ; & parum distant à non-entibus, ut ait Aristoteles.*

Resp. 1. Falsum est præcisam rationem Entis, inæqualiter convenire substantiæ, et accidentibus. Hæc enim nihil significat quam aliquid reale positivum, quod accidentibus non minus quam substantiæ convenit. Et tota inæqualitas est penes differentias quibus Ens dividitur, ut in Objectione tacite conceditur.

2. Accidentia dicuntur parum distare à Non-ente, comparate tantum ad substantiam. Absolute enim multum ab eo distant.

Obj. 3. *Genus dividitur in species, per differentias: at Ens nullas habet differentias divisivas. Differentia enim non est particeps sui Generis, hoc est de eo non prædicatur: utique non est verum, rationalitas est animal. At nihil est de quo Ens non possit prædicari.*

Resp. Negando minorem. Ens enim dividitur per *existere per se*, et *existere in alio*, quæ differentiæ sunt divisivæ substantiæ, et Accidentis. Ad probationem dicimus, differentiam non participare de suo Genere, in sensu formali; in reali tamen sæpe. An non enim substantia est genus, ad mentem, et materiam? Et tamen differentia essentialis mentis, nempe virtus perceptiva, seu intellectiva, est Substantia. Siquidem mens intellectiva est per se, non per accidens seu modum superadditum. Unde in sensu reali, verum est, virtus intellectiva est substantia: Licet non in sensu formali:

formali ; quia formalis ratio virtutis perceptivæ non est formalis ratio Substantiæ ; Siquidem diversa habent connotata, ut per se patet. Et similiter, formalis ratio Substantiæ, aut Accidentis, non est formalis ratio entis : hæc enim latius patet, et connotat solam aptitudinem existendi, aut negationem nihili. At formalis ratio substantiæ, licet hæc connotet, non tamen ea sola connotat, ut per se evidens est. Exemplum, quod adducitur, perperam confert differentiam in abstracto, cum suo Genere in concreto. Licet enim verum non sit rationalitatem, seu virtutem ratiocinandi, esse animal, (quia idea animalis includit materiam) verum tamen est, in sensu reali, *rationale* (si hominem denotet) *esse animal*. Licet formalis ratio *animalis*, non sit formalis ratio *rationalis*.

Ex his liquet, falsum esse effatum illud, inter Peripateticos decantatum, *Decem summa Genera*, quæ Categoriarum capita sunt, *esse primo diversa*, et in nullo reali et intrinseco convenire. Solum enim Ens et Non-Ens, sic differunt. Et, si substantia et accidens non convenirent Univoco (ut loquuntur) in Ente; mirum tamen est, quod nolint actionem et Situm non convenire in Accidente seu modo. Recte igitur *Ens*, vel *Aliquid reale positivum*, Genus statuitur, ad substantiam et modum : Et eatenus quidem recte Cartesiani.

Nec reprehendimus quod in subdivisionibus Substantiarum et Modorum, ad Philosophiæ suæ placita, se accommodent : sed tantum quod in eâ, incerta et falsa quædam immisceant. Ut cum substantiam dividunt in Extensam, et Cogitantem. Incertum enim saltem est, an sola Substantia materialis sit extensa. Et quod omnis Substantia spiritualis cogitet, hoc est intellectiva sit, procul omni dubio falsum est. Similiter quæ de tribus Elementis tradunt incerta sunt.

Sunt

Sunt tamen alia quædam minus recte tradita, quæ aliter institui poterant, sine omni Philosophiæ suæ dispendio. Ut,

1. Quod Attributa seu Rationes Rerum Generalissimas, inter modos recenseant; nec à modis Physicis distinguant. Modos enim dividunt in Generales, & Speciales: Et per Generales, intelligunt Rationes rerum communissimas; per Speciales, modos Physicos; ut unionem, figuram, situm, &c. At neque omnes illæ Rationes Communissimæ, modi dici possunt; ut habere propriam essentiam, identitas rei cum seipsa, distinctio rei ab omni alia, esse causam, Totum, & aliæ istiusmodi, quæ non concipiuntur ut afficientes res alias. Deinde quæ alias res afficiunt, & eatenus modi dici possunt, ut existentia actualis, Relatio, convenientia, esse partem alterius, & ejusmodi, longè differunt à modis physicis. Hi enim realiter distinguuntur à subjectis suis, licet distinctio qua distinguuntur modalis dici soleat. At illi non distinguuntur à subjectis suis, nisi ratione. Distinguendum igitur fuit, primo inter puras rationes rerum, & modos. Et inter modos Logicos (vel si mavis metaphysicos appellare), & Physicos.

2. Hinc male confundunt modos cum attributis. Varia enim sunt attributa, quæ modi dici non possunt. Ut attributum commune est omnium rerum, *habere essentiam propriam*, nec tamen illud modus rei dici potest; quia est ipsa res, considerata secundum ea quæ à re neutiquam abesse possunt, & sine quibus concipi nequit. Deinde modi in abstracto, non sunt attributa proprie. & Logica. Nec enim sic affirmari possunt, de subjectis quorum modi sunt: ut Relatio de Relato, aut figura de substantia extensa. Licet attributa physica dici possunt; qua ratione perfectiones divinæ, ut æternitas, immensitas, &c. Attributa vocantur.

3. *Antonius le Grand*, dum *Attributa Generalia* Rerum enumerare proficitur, plurima omittit: nec ejusmodi capita recenset, quibus reliqua contineri dicantur.

4. Nec patet veritas divisionis *Attributorum* quæ rebus conveniunt prout ad seinvicem referuntur, à *Claubergio* traditæ, scilicet, quod quædam *illative*, quædam *negative*, & quædam *affirmative*, referantur. Membra enim coincidunt. Nam quæ *illative* referri ad se invicem dicit, ut principium, & principiatum, *Causa* & *Causatum*, *affirmative* etiam referuntur, non minus quam illa quæ solum *affirmative* referri dicit, ut *subjectum*, *adjunctum*, *signum*, *signatum*, &c. Nam referri *affirmative* non est ita referri, ut unum de altero sensu proprio affirmari possit. Nec enim *subjectum* de *adjuncto*, aut *signum* de *signato* affirmari potest, nisi per *Metonymiam*; nec pars de toto, nisi per *synecdochen*, &c. Referri autem ut terminus affirmans, vel positivus, convenit illis quæ *illative* referri dicit. Deinde, quæ *affirmative* referri vult, ut *subjectum*, & *adjunctum*, non minus *illative* referuntur, quam quæ tantum *illative* referri putat, ut *Causa* & *Causatum*. Nam sicut *adjunctum*, infert *subjectum*, licet non reciproce, ita *Causatum* infert *Causam*, sed non reciproce. Quin & omnia quæ ad seinvicem referuntur, *illative* quodammodo referuntur. Omne enim *relatum* infert *correlatum*, & vicissim. Contendere etiam quis poterit, nihil referri *negative* ad aliud: ipsa enim *negatio* rei est non res, vel illius *carentia*. Adeo ut termini hic nimis obscuri, & inepti videantur.

5. Recte in eo quidem *Claubergius*. quod *Modum* ab *Attributo*, tanquam minus late patentem, distinguit. Sed male *Accidens*, *Modum*, & *Qualitatem*, tres species *Attributorum* posuit. Siquidem potest unum & idem esse, *Attributum*, *Accidens*, *Modus*, & *Qualitas* ex gr. figura. Sunt igitur illa *Accidens*, *Modus*,

Modus, & Qualitas, diversæ tantum rationes rerum, non species Attributorum.

Quæstio. II. Cum igitur Classes seu Ordines rerum, ab aliis constituti, reprehensioni obnoxii sint, *Quinam sint pro veris & genuinis habendi?*

Respondemus, Illi, in quibus, omnia quæ sub conceptum nostrum cadunt, directe comprehenduntur, saltem in suis generibus, & in quibus nihil positum de cujus existentia merito dubitetur. Quod enim ejusmodi est, in reliquis disciplinis definiri debet. Nec ulterius in subdivisionibus progrediendum est, quam ubi ad præcipuarum disciplinarum objecta devenit. Si enim hic terminus figendus non sit, ratio postulabit ut ad infimas species omnium Generum descendamus; Quod longiorem seriem exhibebit, quam ut à Tyronibus memoriæ mandari possit. Juxta has igitur Regulas, ordines eorum quæ sub conceptum nostrum cadunt, sic constituendos censemus. Quicquid cadit sub conceptum nostrum, vel est *simpliciter nihil*, vel *Aliquid*. Quod simpliciter nihil est, *impossibile* dicitur, in cujus Idea contradictio involvitur. Aliter vocatur *fictum*, dum ut possibile apprehenditur.

Quod *Aliquid* est, vel tale est secundum quid tantum; & complectitur pure possibilia. præterita & futura: vel absolute; & complectitur omnia quæ de facto existunt.

Utrumque rursus, si secundum naturam suam spectetur, vel est *simplex*, vel *compositum*. Si simplex sit, vel existit per se, sine dependentia à subjecto; & vocatur *substantia*, & *Res* simpliciter; vel existit in Subjecto à quo dependet, & vocatur à Peripateticis, *Accidens*, à Cartesianis, *Modus*.

Substantia rursus vel est *Infinita*, nempe Deus Opt. Maximus, de qua agitur in Theologia: vel *Finita*; & hæc vel est *Materialis*, de qua in Somatica; vel *Immaterialis*, de qua in Pneumatica.

Substantia Immaterialis, alia est quæ juxta ordinem naturæ, Societatem corporis terreni exigit, quæ quoruplex sit, five an alia sit quam mens humana, ambigitur; De ea agitur in Psychologia. Alia ab omni corpore, aut saltem terreno immunis est; ut Dæmones boni, et mali, de quibus in Dæmonologia.

Substantia materialis simplex, vel est *particula* aut *Atomus* indivisibilis, saltem physice; vel divisibilis quidem, sed *Hemogenea*, cujus omnes partes sensibiles sunt ejusdem naturæ. Utraque nomine *Elementi* venire solet; et in Somatica tractantur. Et hi sunt ordines Substantiarum simplicium.

Quod ad modos simplices attinet, Substantiam extensam sequitur *Figura*, de qua in Geometria: Cuius vero competit *Motus*, et *Quies*. Sed percipientes modi sunt *percipere*, *appetere*, et *semetipsam movere*, et de perceptionibus rationalibus dirigendis instituitur Logica; de appetitionibus, et actibus sequentibus, Ethica.

Compositum præcipue est, vel ex substantia, et modo, quod *Concretum* dicitur; ut *figuratum*, *Cogitans*; vel ex pluribus modis; ut *pulchritudo* ex figura, et colore; vel ex pluribus substantiis diversi generis: Quæ vel omnes materiales sunt; ut *corpora mixta*; vel una materialis est, altera immaterialis; ut *Homo*. Et, in omnibus substantiis compositis, unus est modus manifestus, nempe *unio* partium: in compositis ex diversis, quæ materiales sunt, alius; nempe *Situs*, vel positio, et ordo partium inter se; In compositis denique, ex una materiali et altera immateriali, *Vox*, quæ in homine loquela dicitur, de qua Grammatica et Rhetorica. De his ordinibus Rerum nulla poterit esse rationalis dissensio.

DISPUTATIO III.

De Attributis Rerum, & Notionibus secundis, in Genere.

Quæst. I. **A**N ordines Attributorum, diversi ab ordinibus rerum, in Logica statuendi sint.

Respondemus affirmative. Et hi potiori jure *Categoriz* dicerentur, quam ordines Rerum. *Categoria* enim (ut ipsa vox innuit) est series *Categorematum*, prædicatorum, seu Attributorum, potius quam Subjectorum. Ratio affirmationis nostræ est: Quia sunt ordines Attributorum longe diversi. Et longe conducibilius est ad institutum Logicæ, hoc est, ad mentem dirigendam, & adjuvandam, in scientiæ prosecutione, eos tenere, quam Ordines Rerum, ut Rerum sunt. Res enim, quæ subjecta sunt cognoscenda, facilius mentibus nostris occurrunt: at attributa invenire quibus cognoscantur, & ea à se invicem rite distinguere, hoc opus, hic labor est.

Obj. Unum & idem, diversis vicibus, solet esse & Res, (seu Subjectum) & Attributum; & quod Attributum unius est, Subjectum est alterius. Quin nullum fere Attributum est, quod Subjectum esse nequit. Omnes enim Modi rerum, quos Cartesiani Attributa vocant, Subjectorum Rationem induunt; idque non tantum in abstracto, ubi ad modum substantiarum, seu rerum per se stantium considerantur, sed etiam in concreto; quoties scilicet ipsi explicantur. Unde igitur constabit, quænam sint res, quænam attributa?

Resp. Vera sunt ista omnia. Non tamen ex iis concluditur, nullos esse ordines attributorum, ab ordinibus Rerum diversos.

1. Quia plurima sunt, quæ frequentius subjecta & Res, quam Attributa sunt; ut omnia illa quæ tractantur & explicantur in Disciplinis. Et plurima frequentius Attributa sunt, quam Subjecta; ut illa omnia quibus subjecta, in Disciplinis, explicantur. Ut Species, & individua, frequentius subjecta sunt; Differentiæ vero, proprietates, modi, & accidentia, frequentius sunt attributa. Et species infimæ rarius Attributa sunt; Individua vero rarissime, quia maxime per se stant, aut tanquam per se stantia considerantur. Suprema etiam Genera, & Affectiones rerum communissimæ, rarius sunt subjecta, nempe in sola Logica, vel (ut quidem volunt) in Metaphysica, in qua explicantur.

2. Licet omnia, ex æquo, apta essent ad rationem subjecti, & Attributi, induendam, quod tamen verum non est, debent rationes illæ, nihilominus distinguere à se invicem, & ad certa capita reduci, ut qualitas cujusque Attributi & modus connexionis cum subjecto appareat.

Unde dividenda sunt Attributa, in Positiva & Negativa, in Essentialia & non-Essentialia, in absoluta & Limitata in propria & communia, & hæc in communissima & minus communia, &c. ut in Institutionibus fecimus.

Quæstio II. *Quomodo distinguantur Attributa Rerum à suis subjectis, & à se invicem.* Præcipue agitur quæstio ista de Attributis essentialibus; et quidem ut sunt attributa ejusdem Rei. Et restringi solet in scholis, ad naturam, et singularitatem; ad essentiam, et existentiam; ad Genus, et Differentiam, et omnes gradus essentiae, (ut vocantur;) et ad Ens in communi, cum suis attributis reciprocis; qualia sunt *unitas, veritas, bonitas, &c.* Difficilius enim est definire, quomo-

do ista à se invicem distinguantur. Verum, cum mens nostra scire cupiat, quomodo quælibet Attributa à subjectis suis, & à se invicem distincta sint, & omnium notitia utilis, et necessaria sit, idcirco quæstio ad omnia Attributorum Genera extendenda est.

Scotistæ *Distinctionem* dividunt, in eam quæ est ex *natura Rei*, & eam quæ est *per intellectum*. Priorem dividunt in *Realem*, (qualis est inter duos homines, aut inter Hominem & Scientiam qua præditus est;) & *Formalem*, qualem esse volunt inter Relationem, & Fundamentum; Quantitatem & Figuram. Dicunt igitur, Attributa *Essentialia* distingui à subjectis, & à se invicem, distinctione formali; ex *Natura Rei*. Thomistæ vero dicunt distingui sola ratione, seu distinctione virtuali, quam per solum intellectum fieri dicunt; Licet ex fundamento aliquo in re ipsa. Hunc enim, in eadem simplici Entitate, distinguere, & dividere plura prædicata, seu plures formalitates, per conceptus inadæquatos; eo quod, propter imperfectionem suam, & limitatam naturam, non possit totam perfectionem rei, uno conceptu exhaustire: sive, ut quidam dicunt, propter subtilitatem suam, et fecunditatem objecti. Fundamentum vero esse, quod una et eadem res, plures negationes aliarum rerum, et plures habitudines, seu respectus ad alias connotet. Et propter diversa illa *connotata*, mentem attributa diversa, in eadem simplici Entitate, distinguere. Sit igitur in hac quæstione.

Thesis I. Attributa quæcunque diversarum rerum, realiter distinguuntur; ut animal prout est Attributum hominis, et animal, prout est Attributum bestię.

Thesis II. Omnia Attributa affirmata, in concreto inadæquate saltem, sunt idem realiter, cum suis subjectis: nempe secundum id quod directe significant. Ut albus, directe significat aliquid affectum albedine; in-

directe vero *albedinem* ipsam : & cum affirmatur de cygno, secundum prius illud, idem cum eo est : siquidem cygnus est aliquid affectum albedine. Ratio est, quia quod prorsus diversum est à re, non potest de ea vere affirmari.

Thefis III. Nullum Attributum, nisi in propositione identica, majorem identitatem habere potest cum subiecto suo, quam inadæquatam. Sive, Attributum semper est aliquo modo diversum à subiecto, nisi in casu prædicto : ut cum rationale attribuitur Homini, Homo denotare potest solum aliquid, quod voce Homo appellatur, aut quod tali figura præditum est, aut aliquo alio accidente : at Rationale significat id quod potest ratiocinari. Identitas autem inter duo ista, est tantum inadæquata. Homo enim aliquid significat, quod rationale non significat.

Thefis IIII. Attributa negata, secundum id quod directe significant, distinguuntur adæquate, & realiter, à suis subiectis. Sed hic intelligenda sunt Attributa negata secundum se, sine negatione. Nam si sumantur cum negatione, sunt realiter idem cum subiectis : ut in his, Angelus non est mortalis. Angelus est invisibilis, immortale & invisibile, (hoc est non-visibile) idem sunt cum Angelo, sed mortale & visibile sunt adæquate diversa. Ratio est quia si attributa istiusmodi, secundum id quod directe denotant, non distinguerentur adæquate à subiectis, essent, saltem inadæquate, idem cum illis : & sic non possent, secundum id quod directe significant, vere de illis negari.

Thefis V. Attributa accidentalia, secundum id quod in obliquo, seu indirecte significant, distinguuntur realiter à suis subiectis. Patet, quia attributa ista, sicut directe significant subiectum aliquod quod in vera attributione idipsum est cui illa tribuuntur, ita indirecte significant aliquod accidens, ab eo realiter,
vel

vel modaliter distinctum : ut *albus* albedinem, *vestitus* vestem, *cæcus* cæcitatem.

Theſis VI. *Attributa etiam quæ essentialia sunt, distinguuntur sæpe realiter, licet inadæquate à subjectis suis & à se invicem.* Ex. gr. *Animal & Intellectivum*, in Homine. Patet, quia ubi plures res concurrunt, ad unam Essentiam compositam constituendam, potest unum attributum, unam ex iis significare, aliud aliam. Nam attributum *Animal* significat animam cum organis corporeis sentiendi; *Intellectivum* vero, solam animam quatenus actus intelligendi exercere potest : ad hoc enim non necessaria sunt organa corporea. *Animal* igitur significat aliquid diversum ab *Intellectivo*. Unde & quædam attributa essentialia possunt separari; illa scilicet quæ à partibus essentialibus realiter diversis desumuntur. Mirum igitur est quod Comptonus dixerit, *Certum esse animal & rationale, in homine, esse realiter idem.* Nam animal corpus includit, rationale minime. Et si quis de exemplis datis contendat, (ut quidam docuerunt animam ratiocinari dependenter à Phantasmatis corporeis,) nemo tamen dubitare potest, *corporeum, & intellectivum*, in homine, realiter distinguui, saltem inadæquate. Nam *corporeum* est id quod corpore constat; intellectivum vero non necessario constat corpore, modo verum sit mentem separatam à corpore intellectivam esse.

Theſis VII. *Omnia Attributa Essentialia, sive rerum simplicium sint, sive compositarum, si à tota rei Entitate desumantur, (quod in rebus stricte simplicibus necessarium est) sola ratione distinguuntur, à subjectis suis, & à se invicem.* Nempe per Negationes, aut habitudines diversas. Sint, pro exemplo, hæc duo Attributa puncti *Materiæ*, esse *aliquid substantia, & indivisibile* : prius realiter est ipsum punctum, prout respicit Substantiam materialem, ut pars totum : posterius est idem punctum, ut connotat
nega-

negationem divisibilitatis. Similiter in Angelo, *Intellectivum*, quod unum attributum essentiale ipsius est, denotat totam substantiam angeli, prout respicit seu connotat actus intelligendi; *volitivum*, quod aliud est attributum essentiale, denotat totam eandem Entitatem, prout respicit actus volendi. Siquidem, tota substantia angeli est et intellectiva, et volitiva, seu principium actuum tum intelligendi tum volendi. Adeo ut distinguantur tantum penes *habitudines* diversas. Sic etiam esse *unum* et esse *compositum*, cum homini tribuuntur, totam entitatem Hominis denotant: sed prius, ut negationem pluralitatis ejusdem rationis connotat; posterius, ut partes et unionem. De rebus simplicibus patet Thesis: Quia, in illis, non est aliud et aliud, realiter diversum, unde attributa realiter diversa oriri possint. De compositis vero; quoniam si unum aliquod attributum essentiale totam earum entitatem denotat, nullam aliud sumi potest quod totam non denotat, sed tantum quod totam denotat sub nova aliqua connotatione.

Obj. I. Attributis Essentialibus rerum etiam simplicissimarum, contradictoria conveniunt: ut *Substantia*, in Angelo, est similis substantiæ in lapide; *intelligentia* vero est dissimilis. Et per substantiam, Angelus convenit cum lapide; per intelligentiam ab eo differt. Attributa igitur illa realiter distinguuntur.

Resp. Non sequitur; quia propter diversas rationes, possunt *contradictoria* attributis illis convenire. Una enim earum non est alia: ut in angelo, negatio dependentiæ à subjecto, quæ est formalis ratio substantiæ, non est respectus ad actus intelligendi, quæ formalis ratio est *intellectivi*.

Inst. Differunt igitur attributa illa, per rationes reales diversas, adeoque differentia reali.

Resp. Differunt per rationes diversas reales, id est, quæ factæ non sunt. Non tamen differunt ut diversæ substantiæ, aut ut diversi modi physici; neque ut substantiæ.

substantia, et modus physicus. Et idcirco ratione tantum differre dicuntur, non realiter.

Obj. II. Omnia Attributa rerum habent diversas definitiones, adeoque diversas essentias: aliter enim definitur *intellectivum* in angelo, aliter *volitivum*. Nam prius est principium intelligendi, posterius volendi.

Resp. Non sequitur. Quia propter diversas rationes formales, eidem entitati etiam simplici, diversæ definitiones convenire possunt. Adeo enim exacta est mens nostra, in ideis propriis cujusque objecti formandis, ut pro tantilla in eo diversitate, diversas ideas formare soleat; prout et debet. Nec habent attributa illa Essentias physicas diversas, sed tantum rationes diversas.

Inst. At rationes illæ, cum revera diversæ sint, Essentias habent diversas.

Resp. Habent diversas Essentias Rationum, non Rerum. Eo modo quo *cæcitas* in animali, et *Carentia visus* in lapide habent diversas essentias negationum, non rerum.

Obj. III. Potest & solet mens, unum ex ejusmodi Attributis concipere, alio non concepto. Ergo realiter distinguuntur.

Resp. Disting. Antecedens, solet mens unum ex illis Attributis concipere, non concepto alio, secundum rationem suam formalem, conceditur: Nullo modo concepto alio, negatur. Cum enim omnia attributa istiusmodi, directe, significant eandem simplicem entitatem, aut compositam secundum se totam, impossibile est concipere unum eorum in concreto, quin et reliqua, secundum id quod directe significant, simul concipiantur. Quia tamen reliqua, diversas rationes formales connotant, non concipiuntur secundum illas rationes: ut cum concipio *intellectivum* in angelo, concipio etiam id quod *volitivum* est; quia illud intellectivum est etiam volitivum. Solum autem non concipio ut volitivum,
seu

seu ordinem quem substantia angeli connotat ad volitionem, hoc est volitiones ab eo producibiles minime concipio.

Obj. III. Possunt Attributa illa de se invicem negari; ut, in Angelo, *intellectus* non est voluntas; in Deo, *Miserecordia* non est *Iustitia*. Ergo realiter distinguuntur.

Resp. Possunt de se negari, in sensu tantum formali; hoc est quatenus formalis ratio unius non est formalis ratio alterius: at non in sensu reali; quia sic sunt una & eadem res.

Quaestio III. *Quid sit Notio secunda?* Hujus enim frequens in Icriptis doctorum, mentio fit; nec tamen perspicue definitum reperio, quid ea significet; neque etiam quænam præcise sint, quæ hoc nomine vocanda sunt. Et cum secunda Notio primam supponat, de illa etiam inquirendum est.

Primam notionem vocat *Burgersdicius*, (*Institut. Log. lib. I. cap. 2.*) quæ rem ut in se est, immediate repræsentat; ut cum mens, ope sensuum, concipit rem aliquam; puta naturam humanam. Secundam, quæ collatis notionibus primis, modum repræsentat quo mens Rem aliquam intelligit, aut intellectam aliis interpretatur. Ut cum observat Naturam humanam singulis hominibus inesse, format notionem secundam, quam exprimit voce speciei. Atque hæc notio non repræsentat Humanam Naturam, sed modum quo mens eam concipit, quique omnibus rebus accommodari potest, qui plura individua sub se continent. Præterea, cum mens observat quid vox Homo, in sermone communi, significet, format notionem primam; cum vero porro observat vocem illam significare sine tempore, format notionem secundam, quam Nomen appellat.

Qui è Pontificiis Logici sunt, Notiones vulgo intentiones vocant, eo quod, (ut ait *Comptonus*, *Disp. Log. 17. Sect. 3.*) mens per eas in objecta tendit, seu iis attendit.

attendit. Dividunt vero in *formales*, et *Objectivas*. *Formales* vocant, ipsos actus mentis; *objectivas*, eorum objecta. Ambas porro dividunt in *Primas*, & *Secundas*. *Intentiones formales primæ*, (ait idem Comptonus,) sunt actus mentis directi, qui ita tendunt in objecta, ut alios priores non supponant; Et sic primo in ea tendunt. Et objectum hoc modo cognitum est intentio prima objectiva, quia primo actum terminat. *Intentiones formales secundæ* sunt actus reflexi, tendentes in aliquem actum priorem: ut cum mens confert naturam abstractam cum suis inferioribus: *Objectivæ* vero sunt eorum objecta.

Arriaga Disput. 2. Logica, Sect. 2. dicit rem esse definitam, divisam, Genus, Speciem, &c. esse denominationes Extrinsicæ, ab actibus mentis quibus res cognoscuntur. Unde & frequenter dicunt Genus, & Speciem, pro materiali, dicere naturas Rerum; pro formali, cognitionem per quam Naturæ; vel objective præscinduntur à suis inferioribus, ut Thomistæ volunt, vel confuse concipiuntur, non conceptis expresse inferioribus, ut Nominales. Sed in his omnibus varii errores occurrunt: Quos ut perspicias, & quæstionis solutionem habeas, Notentur quæ sequuntur.

I. Notio à Noscendo, ut Noema à Noēn, proprie conceptum Mentis denotat. Sed per Metonymiam transfertur ad objecta significanda; Licet ut conceptibus subsunt. Hinc orta est distinctio Notionis, & conceptus, in Formalem & Objectivum.

II. Notio Formalis prima & secunda dicitur, ad ordinem generationis suæ indicandum: Ut prima sit, quæ primo à mente formatur; secunda, quæ secundā, vel sequente vice. Sicut & objectiva prima dicitur, quia primo concipitur; secunda, quia postea.

III. Non tamen soli primi conceptus nostri, absolute Loquendo, sunt Notiones primæ formales, nec eorum objecta,

objecta, prima objectiva. Nam primo omnium concipimus Res singulares; nec tamen illæ solæ, aut earum conceptus, sunt notiones primæ; sed etiam Res Universales, et particulares; ut *Homo* indefinite, et *aliquis homo* singularis, indeterminate. Et prius cognoscuntur principia per Intelligentiam, ex iisdem vero postea inferuntur conclusiones, per discursum. Nec tamen illa sola cum suis conceptibus, sunt Notiones primæ, nec hæ, aut conceptus earum, sunt Notiones secundæ. Ex quibus manifestum est, voces *Notionis prima & secunda*, non satis quadrare rebus quibus indigitandis adhibentur. Multæ enim sunt Notiones quæ primæ vocantur, nec tamen sunt primi conceptus nostri, eorumve objecta.

IV. *Notiones igitur secunda objectiva sunt, primario quidem, affectiones rerum communissimæ*; ut *Essentia* Accidens, *Subjectum*, *Adjunctum*, *Genus*, *Species*, *Differentia*, *Unitas*, *Veritas*, *Bonitas*, *esse* *Causam*, & *Causatum*, *Convenientia*, *diversitas*, *oppositio*, *Ordo* prioris et Posterioris, et reliquæ istiusmodi, quædam enim ex hisce, ut *Genus*, *Species*, *Differentia*, *Universale*, *Individuum*, pro Notionibus secundis ab omnibus Logicis habentur. Cur autem reliquæ non habendæ sint, nulla ratio adferri potest. Ex. g. *Unitas* in *Genere*, non potest esse notio prima, quia Notiones quasdam secundas sub se continet, ut primo et Magis immediate *Universale*, deinde ac remotius, *Genus*, ac *Speciem* in *communi*. At notiones primæ non continent secundas sub se, sed secundæ primas. Cur igitur non etiam *veritas* & *Bonitas* secundæ Notiones sunt? et sic de reliquis.

V. *Hinc Notiones prima sunt Res omnes, quatenus considerantur ut Res, & earum affectiones, seu attributa minus communia*: ut *Res*, *Substantia*, *Modus* *Materia*, *Spiritus*, eorumque *Genera*, *Species*, et *individua*.

VI. *Et primæ vocantur, non quod omnes primo concipiuntur* (de paucis enim earum verum illud est) *sed quod,*
qua

qua primo nobis concipienda occurrunt, ejusmodi sint. Prius enim apprehendimus aliquo modo res, quam rerum affectiones. Res utique considerantur ut per se stantes, affectiones ut adjacentes rebus; Et prius concipimus affectiones minus communes, et rerum particularium, quam communissimas, quæ omnibus Rerum Generibus conveniunt. Hinc Affectiones supremæ, secundæ notiones vocantur, eo quod, post conceptus rerum, et affectionum particularium, concipi soleant. Mens enim prius ascendit à singularibus ad Universalia, et à minus Universalibus ad Universaliora, quam descendit ab Universalissimis ad Inferiora. Et licet plurimas Notiones secundas mens concipere possit, priusquam multas è primis detegat, nullam tamen è secundis concipit ante omnes primas. At aliquam primam concipit ante omnes secundas.

VII. Interim tamen, quia voces istæ *Notio prima*, et *secunda*, non nisi per accommodam explicationem rebus, quæ per eas intenduntur, significandis congruunt, idcirco præstaret eas exautorare, et aptiores loco earum sufficere. Ut, si quæ secundæ Notiones vocantur, *affectiones Rerum Universalissimas* appellemus; quæ vero primæ appellantur, *Res*, et *affectiones Rerum proprias*, aut *minus Universales*.

VIII. Ex his, si modo vera sint, liquet, quid de communi doctrina sentiendum. Et concedendum ei primo est, quædam ex iis, quæ Notiones secundæ vocari solent, quodam sensu, convenire rebus per Intellectum. Ut *Definitum*, et *Definitio*, *Divisum* et *Divisio*; *Subjectum* et *Predicatum* in propositione; *Antecedens* et *Consequens* in Syllogismo. *Definitum* enim est res, prout explicatur per sua attributa. Explicatur autem primario à mente; sicut et secundario vocibus, ut signis. Et definitio est complexum quid, ex attributis rei distincte conceptis. Similiter de diviso, et divisione. Res enim *divisa* dicitur, quatenus partes illius,

lius, vel species distincte concipiuntur; partes vero & species illæ, sic conceptæ, *divisio objectiva* nuncupantur. In propositione, Res dicitur *Subiectum*, quatenus de eo aliquid statuitur; *Predicatum* quatenus de aliquo dicitur. Unaque & eadem Res nunc *Subiectum*, nunc *prædicatum* est. Adeoque quod hic & nunc *Subiectum* sit, a sola mente, aut voce est. Simili ratione, eadem propositio interdum antecedens est, interdum consequens; & quod hoc potius quam illud actu sit a sola mente, aut ratione est. Unde illud dandum *Arriagæ* est, *definitum, devisum, subiectum, prædicatum Antecedens & consequens*, esse tantum denominationes extrinsecas a modo concipiendi desumptas. Interim tamen, quod res sint definibiles, aut divisibiles, per mentem, subijcibiles aut prædicabiles; quodque propositiones aptæ sint inferre, aut inferri, ex seipsis, & natura sua habent, non a mente aut oratione.

IX. Recte etiam innuit *Burgersdicius*, Notiones secundas alias esse Reales, qua rebus conveniunt; alias vocales, quæ vocibus & orationi. Et ex his aliæ Grammaticæ sunt; ut *Nomen, Verbum declinatio, Conjugatio, Syntaxis* &c. Aliæ Rhetoricæ, ut *Tropi & Figura*. Adeo ut varii modi significandi, & compositionis, in vocibus & oratione Notiones secundæ sint. Prius enim intelligitur significatio, quam significandi modus.

X. Pleraque tamen ex notionibus secundis Realibus, conveniunt rebus ut sunt in se; adeoque ante operationem intellectus. De individuo, Toto & Parte, subiecto inhæsionis, & Adjuncto, causa & causato, convenientia, diversitate, oppositione & ordine concedent ut opinor, Autores doctrinæ quam nunc examinamus. Sed de Universalis, genere & specie, negant: quia Universalis per intellectum fieri volunt. Verum quis, si serio, ac sine præjudicio, perpendere velit, negare potest, naturam Humanam,

aut animale, esse in se, & natura sua communicabilem pluribus Hominibus, & animalibus; & actu esse communem seu communicatam? quod autem communicabile pluribus est, ita ut multiplex in illis sit, est universale aptitudine; quod vero actu commune est pluribus, & multiplex in illis, est universale actu. Quæ contra obijciuntur, in disputatione de Universalibus diluentur.

II. Hinc sequitur *Notiones secundas representare Res, ut sunt in se, non minus quam primas.* Nec opus esse sensu, ut Notiones primæ fiant. Fiunt enim de rebus quæ sub sensu non cadunt non minus quam de sensibilibus. Item *Notiones secundas nec semper nec plerumque, modum quo mens primas concipit, representare.* Utique Genus representat solam convenientiam Rerum essentiis differentium, in aliqua ratione, vel natura communi. Nec cum Genus concipimus, conceptum aliquem priorem reflexe concipimus, sed tantum illam convenientiam, quæ in rebus ipsis est. Adeoque esse Genus, & Speciem, (& idem de reliquis dicendum est), non sunt denominationes extrinsecæ à cognitione nostra provenientes, sed intrinsecæ à rebus ipsis desumptæ. Denique *non semper verum est notiones secundas fieri collatis notionibus primis.* Nam affectiones universales rerum, quæ Absolutæ sunt, ut Existencia, Essentia, Unitas, Veritas, Individuum, seu singulare, &c. non oriuntur ex collatione rerum inter se. Deinde ex collatione, non tantum primarum, sed etiam secundarum notionum, fiunt notiones secundæ: ut ex collatione omnium generum, fit notio secunda Generis in communi, & vocatur species universalis, & prædicabilis.

Obj. I. Species cum de humana natura dicitur, non representat naturam humanam: Ergo solum modum representat, quo illa à nobis concipitur. Et sic de cæteris.

Resp. Non representat Naturam Humanam, secundum

cundum essentiam propriam, neque secundum aliquid essentiae commune, quod certo alicui ordini Rerum, puta substantiarum, aut modorum, restringitur: repræsentat tamen secundum aliquid essentialè communissimum, nempe convenientiam omnium hominum ut homines sunt, quæ certe essentialis est.

Obj. II. Notiones secundæ vocales oriuntur, ex modo conceptus nostros interpretandi. Ergo Reales pariter, ex modo concipiendi.

Resp. Notiones secundæ formales, modos peculiariter concipiendi connotant. At objectivæ non à modo concipiendi oriuntur, sed modum essendi, in ipsis rebus, denotant. A notionibus autem vocalibus ad Reales, sequela nulla est. Quia voces, totam naturam significativam, ab usu & placito hominum sortiuntur. At Affectiones, & *Habitudines Rerum*, à nobis non pendent. Ut *Homo* nomen est, *quomodo* adverbium, quia sic *Linguae Latinæ Auctoribus* placuit: At *animal*, five velimus, five nolimus, Genus est: &c.

Quæst. IV. *Quid de quinario numero Attributorum, vulgo quinque predicabilium, scilicet Genere, Specie, Differentia, proprio, et Accidente, censendum sit.* Sola enim illa capita Attributorum, in Logica vulgari traduntur: nec tamen ad illa omnia Attributorum genera revocare volunt. Prædicabilia utique esse dicunt, quæ de pluribus *vere, proprie, naturaliter, atque immediate affirmantur*. Unde è censu prædicabilium excludunt Attributa negantia, tropica, mediata, et quæ de uno solo affirmantur: quædam etiam contra naturam affirmari putant, quæ tamen vere et proprie affirmantur. Sic *Bugersdicius*, alio sequutus *Instit. Log. lib. 1. cap. 20. De Doctrina* ista fit.

Thesis I. *Omnia Attributa simplicia ad quatuor ex his referri possunt. Quod sic demonstratur. Quicquid a-*
licul

licui vere attribuitur, vel est de illius Essentia, vel non. Si non sit de Essentia, *Accidens* est; si de Essentia sit, vel denotat totam Essentiam confuse, & est *Species* infima, ut cum *Homo* affirmatur de Socrate, vel partem tantum: Et tum rursus pars illa vel est communis rei cui tribuitur cum aliis, & dicitur *Genus*; vel propria, & *Differentia* appellatur. Diximus autem *Attributa simplicia*, quia plurima sunt complexa, nempe ex varia horum combinatione conflata, quæ idcirco ad nullum unum ex illis revocari possunt, nisi forte ad accidens. Quandoque enim *Genus* & *Differentia* simul, affirmantur de re aliqua; ut in definitione; quandoque *Genus*, aut *Species*, cum *Accidente*; ut si *Socrates* dicatur *animal doctum*, aut *Homo doctus*, &c.

Thesis 2. *Variis tamen nominibus reprehendenda est ista Attributorum distributio, prout vulgo traditur, & limitata-
tur.* Et,

1. *Attributa complexa plane negligit, quorum tamen usus in Disciplinis omnibus frequens est.*

2. *Attributa omnia negata considerationi Logicæ eximit. Cum tamen rerum negativarum, ex gr. privationum, attributa alia non sint, quam negantia; ut cum tenebræ definiuntur Carentia lucis in corpore illuminabili.*

Deinde res positivæ quatenus privatione aliqua affectæ sunt, per *Attributa negantia* explicantur; ut cum *homo mancus*, definitur *qui manu*, una, vel utraque, *privatur*. Et ipsa differentia specifica rei positivæ, sæpius est *Attributum negativum*; ut cum *Deus* definitur à quibusdam Theologis *spiritus infinitus*, vel *independens*, aut cum *spiritus* in genere dicitur *Substantia immaterialis*.

Obj. *Attributa negata infinita sunt: nec explicant quid aut qualis res sit, sed tantum quid aut qualis non sit.*

Resp. *Fatemur Attributa positiva rei positivæ,
H 2 præcipue*

præcipue esse quærenda. Est tamen usus aliquis negantium. Periculum enim sæpe est, ne res distinctas confundamus, & unam pro alia accipiamus; quod per attributum negans cavetur. Et licet attributa istiusmodi infinita sint, eorum tamen quæ in discursu adhibentur, certa & finita capita assignari possint. Quod autem solum ostendant quid aut qualis non sit res, probat tantum esse minus utilia, non autem plane inutilia, aut minime necessaria.

III. Excludit Attributiones omnes rerum & Attributorum *singularium*. Unde pleræque prædicationes de Deo, ablegantur à Directione Logicæ: ut cum dicitur *Sermo erat Deus, omne adorandum est Deus. Deitas est omnisca, omnipotens: Unicus mediator est Christus Jesus*. Multæ etiam de rebus creatis: ut, *Eversor Regni Persici fuit Alexander Magnus*.

Obj. Individuum de seipso tantum affirmatur, idque affirmatione identica; ideoque non facit ad alterius rei explicationem.

Resp. Concedimus quidem Attributiones, quæ identicæ appellantur, è choro prædicabilium excludendas esse, quia non sunt Didacticæ. At tales non sunt Attributiones individuorum. Illa enim non minus quam species, sub diversa ratione sibiipsis tribuuntur, in propositione formali, seu Didactica, ut jam ostendimus.

IV. Falsum etiam est, Attributa mediata, è ratione prædicabilium esse removenda. Nam subjectorum naturam & qualitatem declarant, licet minus perspicue quam immediata. Unde per Genus remotum definire permittunt Logici, cum proximum non occurrit.

Obj. Hæc prædicatio *Homo sentit*, ad nullum prædicabile revocari potest, quia homo non est subiectum proximum sensus, sed animal.

Resp. Mirum est talia è calamo viri tantæ eruditio-

ditionis, ac fuit Burgerfdicius, cadere potuisse. Nam sentire actu est accidens hominis commune. Quod si in propositione data intelligatur virtus sentiendi, prædicatio est Generis de specie, & hunc habet sensum Homo est aliquid sentiens, id est sentiendi virtute præditum.

V. Supponit vere rebus tribui posse quæ tamen naturaliter tribui nequeunt, seu non sunt naturalia attributa. Concedimus quidem nonnulla frequentius subjecta esse propositionum; alia frequentius Attributa. Interim tamen nihil fere est, quod natura sua aptum non est alicui attribui; sicut quidvis fere subjecti rationem interdum sortitur, præter aliquid & non-nihil.

Obj. Prædicatio contra naturam, est cum aut inferius de superiori prædicatur; ut Homo de animali; aut Substantia de Accidente; ut Flavum est Mel: aut denique abstractum de concreto; ut jucundum est voluptas.

Resp. Prædicationes istæ, quo sensu veræ sunt, non sunt contra naturam terminorum. Ut in prima, si animal sumatur in tota extensione sua, aut in sensu formali, falsa est prædicatio. Nec enim animal formaliter, & ut Animal, est Homo. Sed si accipiat pro aliquo animali, ut accipi debet, est prædicatio speciei de seipsa sub diversa ratione, aut de individuo. Potest enim aliquod animal vel Hominem in communi, vel aliquem hominem singularem, sub ratione animalis, significare. Idem dicendum de tertio exemplo. Ad secundum quod attinet, Substantia nunquam vere prædicatur de accidente inhærente seu de modo. Et in exemplo dato subjectum non est accidens inhærens, seu modus, sed concretum ex substantia et modo. Unde satis naturaliter dicere licet, quoddam flavum, (hoc est quædam substantia flava) est mel.

6. Male etiam proprium, prædicabile diversum & Differentia Specifica ponitur. Omnis enim differentia, quæ rem perfecte, et ab omnibus aliis distinguit, Propria est. Satis scimus vocem proprii stricte hic usurpari: verum sine necessitate illud fit. Pro ea enim adhiberi potuit alia, ab ambiguitate libera, puta *differentia secunda*, aut *consequens*. Falso etiam inter modos proprii numeratur, quod convenit omni, sed non soli, ut per se patet.

Satius igitur fuit distributionem prædicabilium instituisse, primo in positiva, et Negative. Deinde in simplicia, et complexa; tertio in propria, et communia; Quarto in Essentialia, et accidentaria. Et tum rursus dividi potuit Attributum Essentiale, in Genus, Speciem, et Differentiam; Differentia in primam, et non-primam. seu consequentem, vel connexam: Accidens in necessarium, et Contingens. Et sic nihil opus fuisset tot restrictionibus; et omnia prædicatorum Genera comprehenderentur.

DISPUTATIO. IV.

De Ente, et Non-ente, in Genere; Ubi & De Ente Rationis.

Quæst. I. **A**N sit aliqua Ratio entis, communis substantiæ & modo, seu Accidenti, (ut vulgo loquuntur) quæ per actum mentis abstrahi possit ab utroque. Quidam negant, nos affirmamus. Sit igitur.

Thesis. Est Ratio quadam Entis communis substantiæ & modis omnibus, seu omnibus rerum Generibus; nempe non repugnantia existendi, nonnihil, seu aliquid reale positivum.

um. Illæ enim rationes nec substantiis aut modis figillatim, nec utrisque simul propriæ sunt; omnibus autem conveniunt. Sunt igitur vere & proprie communes. Ac propterea verum est, Substantiam esse ens, & modum esse ens. Nec necessaria est operosiori hujus veritatis probatione.

Obj. I. Modus non est stricte et proprie Ens, sed aliquid Entis.

Resp. Modus non est illud ens cujus est modus, esto. Neutiquam est ens, negatur. Quid enim prohibet unum ens esse aliquid alterius? An non modus actu existit, et quidem existentia propria, ab existentia substantiæ distincta? Sæpe enim, manente substantia, non existit idem modus qui eam afficiebat.

Obj. II. Substantia et modus, et omnia entia realia differunt in ente, seu in ratione entis. Non enim differunt in nihilo, seu in ratione non-entis. Ergo, non conveniunt in ratione entis.

Resp. I. Per Retorsionem: Materia & spiritus differunt, (si de differentia essentiali loquamur, ut loquitur objectio), in ratione substantiæ: non enim differunt in ratione modi, aut accidentis. Ergo in ratione substantiæ non conveniunt. Conclusio est contra adversarios; hi enim admittunt Substantiam esse verum Genus ad materiam & spiritum; tenentur igitur nodum hunc dissolvere, non minus quam alii.

II. Dicendum igitur, Substantiam & modum differre in ratione aliqua entis, sed non in omni. Adeoque differentiam quæ inter ea est, non esse omnimodam, quæ omnem convenientiam excludit: Hoc est, non differunt in ratione entis præcise, ut est ratio entis, sed tantum in aliqua ratione entis particulari, nempe in independentia, & dependentia à subiecto.

Obj. III. Sequeretur summa Genera Rerum esse composita metaphysice, seu Logice, ex ratione Generica, & Differentiali, quod absurdum.

Resp. An Substantia & modus sunt summa Genera, est id quod, quæritur. Nos dicimus ens esse superius, & summum Genus omnium Rerum.

Obj. IV. Si Ratio Entis abstrahi posset à Substantia & modo, totum quod in illis est reale abstraheretur; siquidem totum quod in illis inveniri potest, est ens, vel Ratio entis: Et sic nulla erit abstractio: cum in ea totum summi non possit.

Resp. Totum sub una ratione abstrahitur, hoc est abstracte concipitur; scilicet sub ratione non-re-pugnantiae existendi, aut existentis actu: & totum sub alia ratione relinquitur, nempe sub ratione independentiæ aut dependentiæ à subiecto.

Obj. V. Abstrahamus, quantum possumus, Rationem entis à substantiis & modis, adhuc in illis manebit ratio entis, vel redigentur in nihilum, in nostro conceptu.

Resp. Manet quidem in illis Ratio Entis à parte rei: abstractio enim nostra non immutat naturas rerum. At non manet in nostro conceptu. Non enim tunc consideramus illa ut Entia, seu sub ratione Entis. Quin multa concipimus ut substantia per se, de quibus dubitamus an sint entia: Ut materiam quæ seipsam moveat, spiritum extensum.

Obj. VI. Omnis ratio entis vel est ratio Substantiæ, vel ratio modi: nulla igitur est abstracta ab utraque.

Resp: Omnis ratio entis vel est ratio substantiæ vel ratio modi communis vel propria, conceditur: propria, negatur.

Obj. VII. Sequeretur substantiam & modum abstrahi posse ab ente, seu à ratione entis, quod impossibile. Nam ens est de ipsa idea seu Essentia substantiæ, & modi, licet non reciproce; sicut animal potest

potest abstrahi ab homine, at homo non potest abstrahi ab animali.

Resp. Comptonus non sequi: quia *præcisio*, seu *abstractio Entis à substantia, & modo, est non-mutua*. Sed contra-dicimus omnem præcisionem esse mutuam; quia præcisio est separatio mentalis unius rationis ab alia: omnis autem separatio mutua est. Ut si *A* separatur à *B*, etiam *B* separatur ab *A*. Exemplum animalis nihil probat. Nam Animal à quo Homo abstrahi nequit, non est animal in communi, quod ab Homine abstrahitur, sed Animal Particulare, nempe illud quod est in Homine. Et sicut Homo ab hoc animali abstrahi nequit, ita neque hoc abstrahi potest ab Homine, dum ipse juxta integram ideam essentialem consideratur.

Resp. Igitur, sicut animal, qua animal, seu in communi, abstrahi potest ab homine, & homo ab animali, qua animal, seu in communi, (siquidem negari potest de homine, & vicissim; homo enim non est animal, qua animal, seu animal in communi, nec vice versa), sic etiam abstrahi potest ratio entis à ratione substantiæ, & ratio substantiæ à ratione entis in communi, & possumus alteram concipere, altera non concepta; possunt etiam mutuo de se negari ut patet.

Quæst. II. *An Ratio Entis transcendat omnes suas differentias; puta rationes substantiæ, & modi: hoc est an in illis formaliter includatur.* (In terminis hujus quæstionis sic propositæ, reprehendendus est abusus vocis *transcendere*. Quod enim in aliquo formaliter includitur, ordine potius æquale est quam transcendens). Multi affirmant. Nos, cum Arriaga negamus, sitque,

Thesis.

Thesis. *Ratio entis non includitur formaliter, in suis differentiis*, magis quam aliarum rationes Genericarum rerum simplicium; puta ratio substantiarum in differentiis essentialibus materiarum, & Spiritus, aut ratio Spiritus, in mente Humana, & Angelo; licet in illis realiter includatur, eo quod cum illis realiter idem sit. Patet ex dictis præcedenti quæstione, quæ huic affinis est. Quod enim formaliter includitur in aliquo, de eo, ne quidem in sensu formali, negari potest. At ratio entis, de Differentiis entis, in sensu formali, negari potest, & vicissim. Sicut enim Ratio entis, ut sic, non est Ratio substantiarum, aut modi, ita neque Ratio substantiarum, aut modi, est ratio entis, ut sic. Nam ratio entis, ut sic, est communis substantiarum, & modo; at Ratio Substantiarum non est communis substantiarum, & modo, sed substantiarum propria: similiter de ratione modi statuendum est.

Obj. *Perseitas*, quæ est differentia substantiarum, est aliquid oppositum non enti. Ergo est formaliter ens.

Resp. Non sequitur: quia inter ens in concreto, & non-ens, seu purum nihil datur medium; scilicet Ratio aliqua entis abstracta, qualis est Differentia substantiarum aut Accidentis; quæ idcirco, in sensu formali, non est ens, sed aliquid entis.

Instantia. Saltem igitur Ratio Entis abstracta, formaliter includitur in differentia substantiarum.

Resp. De aliqua ratione entis conceditur; at non de abstracta ratione entis in communi.

Quæst. III. *Sitne Ratio Entis in communi; Univoca, an Analoga, ad Substantiam, & modum*, seu Accidens inherens. Plerique affirmant, non solum Peripatetici, sed Cartesiani, Nos negamus. Sit igitur.

Thesis. *Ratio Entis in communi, non est Analoga, sed univoca, ad Substantiam, & modum*; adeoque ad omnia genera entis. Patet

I. Quia nomen entis est utrique commune, ut concedunt omnes. Et ratio nomine illo significata,
utro-

utrobique eadem seu similis est. Nulla enim est diversitas inter rationem entis in substantia, & rationem entis in modo, seu Accidente, si utraque precise consideretur. ut pura Ratio entis, uti considerari debet. Siquidem utraque est non-repugnantia ad existendum, seu aliquid reale, non purum nihil, nec plus nec minus. Et tota diversitas in differentiis exercetur.

2. Ratio entis, vere, proprie, & æqualiter, convenit substantiæ, & modo Univoca igitur est. *Vere* convenit; quia modus non est ens apparens, aut fictum. *Proprie*, quia non est tropice ens, ut animas prati est tropice risus. *Proprie* enim existit, & quidem existentia peculiari, ab existentia substantiæ distincta. *Æqualiter* denique, quia nihil est magis aut minus ens: unumquodque enim vel est ens, vel non-ens.

3. Ratio Analogæ, alteri ex inferioribus proprie convenit, alteri tropice; nempe Synecdochice, si Analogæ attributionis sit, ut cum *sanum* tribuitur animali. medicinæ & urinæ, *Caput*, parti corporis animalis superiori, & homini; vel per Metaphoram, si Analogæ proportionis sit; ut cum *caput* tribuitur animali & flumini; materia ligno ex quo fit mensa, & terminis ex quibus propositio constat. At ratio entis, nullo ex his modis convenit Substantiæ, & modo. Non substantiæ, ut conceditur; neque modo, quia modus licet adjunctum substantiæ semper sit, & effectus, causa, & signum illius esse possit, non tamen propterea ens dicitur, sed quia ei non repugnat existere, quod autem adjunctum substantiæ sit, ad differentiam ipsius duntaxat pertinet.

Ratio Analogæ, per se sumpta, sine adjecto, stat pro famosiori analogato, ut loquuntur: Scilicet *risus*, pro risu humano; *Sanum*, pro animali; *Materia*, pro substantia virtutis perceptivæ experte. At ratio entis, per se prolata, non ita. Nec enim prolata voce
entis,

Entis, audiens magis cogitat de Substantia, quam de modo, seu Accidente, sed tantum de alterutro indeterminate.

Obj. I. Ratio Entis participatur à substantia, & modo per prius, et posterius. Nam prius naturà substantia est Ens, tum possibile, tum actu existens, quam modus: ideo enim modus possibilis est, quia possibilis est substantia in qua existere possit; & ideo actu existit modus, quia actu existit substantia, cui modus inexistit, non autem vicissim. At species univocæ ejusdem generis, sunt simul natura. Eodem tendit argumentum, à dependentia modi ex substantia. Hæc enim est Ens, independenter ab omni subjecto sustentationis: Modus vero Ens est dependenter à substantia. Et hæc ratio Adversariis palmaria est.

Resp. I. Ad primum Antecedens. Ratio Entis particularis, seu propria substantiæ, prius convenit substantiæ, quam ratio Entis modi propria, modo convenit, adeo ut diversitas in solis differentiis exerceatur: Non autem Ratio Entis, ut sic.

II. Species univocæ sunt simul natura, quatenus participant de eadem ratione Generica; at non semper secundum naturas suas particulares, & proprias. Ex. gr. *Habitus*, & *actus* qui ab eo proficiscitur, Univoco conveniunt in ratione communi *modi*; & tamen *Habitus*, natura sua particulari, seu qua habitus, est prior quam actus. Approximatio patientis ad agens, est prior natura quam actio: Univoco tamen conveniunt in communi ratione modi. Unde & prioritas illa substantiæ respectu modi, ad differentiam illius pertinet, in ratione vero Entis non continetur. Idem dicendum de dependentia modi à substantia.

Replicat Derodon, Dependentiam quidem accidentalem unius ex inferioribus ab alio, non impedire Univocationem Rationis superioris; talem autem esse

esse dependentiam actus ab Habitu, & actionis ab approximatione. Potuit enim actus aliunde oriri, nempe à potentia naturali, vel supernaturali auxilio primæ causæ, sine habitu. At dependentia essentialis, qualis est accidentis à substantia, Univocationem tollit; & Analogiam constituit.

Resp. Gratis istud dicitur. Nec sic ulla ratio comparitatis, inter dependentiam essentialem, & Accidentalem, quoad Univocationem adducitur. Supponit etiam responsio nullum modum, seu Accidens, essentialiter dependere ab alio, quod verum non est. An non enim actio creaturæ transiens, essentialiter dependet ab approximatione, figura hujus vel illius corporis, ab unionem particularum, ex quibus illud constat? & in mente nostra, judicium pendet ex apprehensione simplici judicium de consequente ex judicio prævio Antecedentis, volitio ab intellectione, &c.

Obj. II. Ratio, quæ sub nomine communi, partim eadem est, partim diversa, Analoga est. At ratio Entis in substantia, & modo, partim est eadem, quia in ratione Entis conveniunt; partim diversa, quia in eadem differunt. Unde & ratio Entis transcendit rationes proprias substantiæ, & modi, hoc est in illis formaliter includitur. Propter transcendentiam igitur Analoga est.

Resp. Substantia & modus non differunt in ratione Entis ut sic, sed in rationibus Entis particularibus: Unde nec ratio Entis præcise considerata, in rationibus particularibus Entium formaliter includitur. Utrumque supra ostensum fuit.

Quæstio IV. An sit Ratio aliqua communis Enti & non-Enti, seu puro nihilo.

Resp. Thesis. Nulla est ratio communis intrinseca Enti, & pure non-Enti, sed tantum extrinseca. Prior pars sic ostenditur. Ens & purum nihil sunt maxime diversa, & in nullo conveniunt. Nec enim in aliquo reali conveniunt: sic enim id quod purum nihil est,
non

non esset purum nihil, sed aliquid includeret reale: Nec in aliquo non reali conveniunt, tanquam communi intrinseco; quia totum quod est in ente est reale. Posterior pars patet, quia utrumque concipitur, & concipi potest: Utrumque etiam aliquando est objectum volitionis: volumus enim interdum impossibilia, putantes esse possibilia; & scientes esse impossibilia, vellemus esse possibilia. Conveniunt igitur in eo quod utrumque sit objectum, tum intellectus nostri, tum voluntatis. At esse objectum est illis extrinsecum, quia actus quorum ratione objecta dicuntur, iisdem extrinseci sunt.

Obj. Non-Ens, quandoquidem objectum intellectus nostri esse potest, habet intrinsecam aptitudinem actum aliquem illius terminandi, non minus quam Ens, secus enim nullo modo concipi posset. Quomodo enim conciperetur id quod non est conceptibile?

Resp. Res ista nullius momenti, difficilis tamen. Ex altera enim parte aptitudo intrinseca terminandi actum mentis nostræ, videtur esse aliquid reale, quod non Enti convenire nequit. Ex altera vero, id quod intrinsece ineptum est concipi, non videtur posse ullo modo concipi. Nec te expedies dicendo, non-Ens non esse per se conceptibile, sed tantum per & propter conceptibilitatem Entis, quod per se conceptibile est: quia licet nullum Non-Ens particulare concipi possit, quin simul indirecte concipiatur Ens cuius est negatio, concipimus tamen ipsam negationem, per quam negamus aut removemus Ens. Nec solves nodum, si dicas, non-Ens dici conceptibile, per denominationem extrinsecam, quæ ex possibilitate actus mentis, ad ipsum terminabilis, provenit; non autem ex ulla aptitudine intrinseca: adeoque ex sola virtute & subtilitate mentis esse, quod concipi possit: Quia adhuc quæret adversarius, quomodo mens concipere possit id quod non est

se conceptibile? Hanc ego difficultatem, alicui ex Doctoribus Pontificiis, aut nugaei alii ingenio, expediendam commendo.

Quæst. V. *An inter Ens, & purum non-Ens, aliquid sit medii.* Affirmat Scotus, Burgesdicius, & alii. Instantiarum loco adducunt modos entium, Relationes, Denominationes extrinsecas, differentias immediatas entis, ut *esse per se*, & *esse in alio*. Et attributa rerum communissima, ut *Unitatem, Veritatem* &c.

Respondemus breviter, 1. Inter Reale & non Reale, nullum potest esse medium, quia termini isti sunt contradictorii. Unde si per Ens, intelligitur quicquid est reale, inter ipsum & purum nihil nullum erit medium.

2. Inter Ens in communi, qua tale est, & purum non-ens, datur medium; nempe aliquod Ens particulare: quod tamen inadæquate distinguitur ab Ente in communi, in quo includitur.

3. Hinc etiam inter Ens concrete consideratum, ut compositum quid ex seipso & ratione aliqua formali, & non-Ens, medium aliquod statuendum est: Ut ipsa *non-repugnantia* existendi, nec est purum nihil, quia constituit Ens; nec est ipsum Ens in concreto, sed ratio aliqua Entis. Idem dicendum est de differentiis immediatis Entis, substantiæ & modi Physici, & omnibus affectionibus essentialibus rerum, quæ vel relationes quædam, vel negationes sunt. Impossibile enim est res concipere sine ejusmodi rationibus, ut aliquo modo à rebus distinctis. Nec tamen putandum est mentem nostram eas fingere, sed in rebus invenire.

4. Negandum est, modos rerum physicos esse puras Rationes, ut illæ quas jam diximus. Quis enim credat Habitus, & actus mentis nostræ, non magis differre ab ipsa mentis substantia, quam non-repugnantia, Unitas, Veritas, Bonitas, ab Ente hoc est quam *habitudines* et *negationes*, à rebus quibus

CONVE-

conveniunt? sed de modis Logicis concedendum est.

5. Perperam etiam memorantur denominationes extrinsecæ, tanquam à relationibus distinctæ. Sunt enim relationes, inter rem denominantem, & denominatam: ut esse *cognitum*, est esse objectum actus cognitionis, quod est mera relatio.

Obj. Rationes illæ rerum vel possunt existere, & sic sunt Entia; vel non possunt existere, adeoque sunt non-Entia.

Resp. Possunt existere, & actu existunt, non existentia realiter distincta à rebus quarum sunt rationes, sed consequenter ad earum existentiam, ut existit relatio per existentiam subjecti, fundamenti, & termini; et negationes existunt, quatenus non existunt res negatæ: adeoque dicuntur *existere negative*, non *positive*, quod est *improprie existere*, ex. gr. immaterialitas Angeli existere dicitur, quia non existit ulla materia identificata cum substantia Angeli.

Quæst. VI. *An sit Ens Rationis*: hoc est, *quod solum est objective in intellectu*. Seu an mens nostra ullum conceptum formare possit de eo quod nec existit, nec existere potest, nempe de re impossibili. Affirmant fere omnes Philosophi. Singularis est sententia Derodonis, hominis aliàs acuti et docti, qui multis contendit impossibilia nec concipi à nobis nec concipi posse.

Thesis. *Impossibilia possunt à nobis concipi. & actu sepe concipiuntur*. Adeoque existere possunt, et actu existunt, *objective in intellectu*. Proinde datur in nostro conceptu, id quod *Ens Rationis fictum* communiter vocatur. Res ista adeo manifesta est, ut mirum sit, quenquam repertum fuisse qui serio eam neget. Nec in illius demonstratione immorabimur.

Patet exemplis. I. Alius Deus potest apprehendi; et apprehendebatur à Davide, Ps. 16. v. 3. cum dixit
multiplic-

multiplicabuntur dolores eorum, qui alium Deum sequuntur, hoc est, qui pro Deo fingunt & colunt quod deus non est.

II. Apprehenderunt etiam *Tritheita*, veteres Hæretici, tres Deitates distinctas, quarum singulas singulis personis S. S. Trinitatis assignabant: apprehenderunt & *Orthodoxi*, qui eos refutarunt. Nec enim refutare poterant quod non apprehenderunt. At alius Deus est quid impossibile, & impossibile est esse tres Essentias Divinas.

III. Et qua fronte negari potest, mentem nostram apprehendere posse materiam quæ seipsam moveat? Peripatetici enim talem de facto esse docent; *Cartesiani* autem judicant esse impossibile: apprehendunt igitur id quod putant esse impossibile, adeoque saltem apprehendunt impossibile in communi.

IV. Quin & apprehendere possumus materiam cogitantem: ut aerem, vel materiam aliquam subtilem, quæ intelligat & ratiocinetur. Quidam enim finxerunt animam rationalem hominis, esse materiam quandam puram & tenuem; ut plurimi ex antiquis pseudosophis, & nostro sæculo *Hobbius*.

V. *Cartesiani* existimant nihil extensum cogitare seu intelligere: Ex adverso D. *Henricus Morus Cantabrigienfis*, homo ingeniosissimus, putat nihil inextensum posse cogitare, seu intelligere; quippe omne inextensum pro non-Ente habet. At vel possibile est extensum cogitans, vel impossibile; & similiter vel possibile est inextensum cogitans, vel impossibile. Vel igitur *Cartesiani*, qui apprehendunt inextensum cogitans, cum reliquis fere omnibus philosophis, vel D. *Morus*, qui extensum cogitans, apprehenderunt impossibile.

VI. *Athei* opinantur non esse Deum, aut saltem dubitant an sit, & omnes Dei osiores vellent, si fieri posset, Deum non esse; ut *Diaboli* & *damnati*: apprehendunt igitur *non-esse* Dei, quod simpliciter impossibile est.

VII. Sociniani negant in unica Essentia Divina, tres esse Hypostascs: apprehendunt igitur tres hypostascs divinas non esse, quod tamen impossibile est. Innumeræ istiusmodi Instantiæ produci possent.

Ad Instantiam plurium Deorum Respondet *Derodon*, Ethnicos non agnovisse plures Deos, sed tantum Unius Dei virtutes plurimas, cumque variis nominibus appellasse, ut ait *Augustinus*. Vel cum plures Deos finxerunt, non apprehendisse verum Deum, sed alia Entia possibilia, Deo in quibusdam similia.

Sed replicamus, 1. Licet *Ethnici* per plures Deos quos finxerunt, plures unius Dei virtutes duntaxat intellexissent, apprehenderunt tamen virtutes illas ut divisas in pluribus, quos Deos, & Deas vocabant, quod est impossibile.

2. Perfectiones Deo soli proprias, creaturis tribuerunt, ut aperte docet Apostolus, ad Rom. 1. At impossibile est perfectiones incommunicabiles Dei, ullo modo creaturæ convenire, apprehenderunt igitur impossibile.

3. *Trisheitæ*, professione tenus Christiani, per tres Deos, non intellexerunt plures perfectiones Unius Dei, sed tres Deitates, seu Divinas Essentias.

4. *Ethnici* quidem plures Deos fingendo, non apprehenderunt verum Deum, nec tamen creaturas possibiles Deo in quibusdam similes, sed figmenta impossibilia; nempe ea quibus perfectiones divinarum incommunicabiles convenire putabant, quibus tamen non convenerunt.

Ad Instantiam Damnatorum, negat *Derodon* eos velle Deum non esse, quia cum existentia sit de Essentia Dei, sic apprehenderent Deum ut non-Deum.

Resp. I. Contra omnem rationem affirmat damnatos non velle Deum non esse. Cum nimis multi in hoc sæculo illud vellent.

II. Licet

II. Licet judicare non possunt Deum non existere, apprehendere tamen possunt negationem existentiae ipsius. Non enim difficilius est eam apprehendere quam negationem existentiae rei creatae, quam existere certo intelligimus. Quin Theologi dum probant Deum esse, contra Atheos, ex absurdis quæ impiam Atheorum sententiam comitantur, supponunt Deum non esse; ut cum arguunt, *si Deus non esset. Mentes Humana fuissent vel à seipsis, vel à nullo, idque ab æterno. & necessario; Systema mundi ordine illo pulcherimo, qui omnibus conspicuus est, coherere non posset.* Ubi apprehendunt Deum non esse, quod tamen norunt esse maxime impossibile. An non enim apprehendunt hypothesein illam ex qua arguunt?

III. Qui apprehendit Deum non esse, apprehendit, Deum, ut non Deum, non expresse sed consequenter tantum. Existentia enim non primo intuitu, sed ex discursu, apparet esse de Essentia Dei. Sicut qui negat *trianguli angulos omnes esse aequales duobus angulis rectis*, non nisi ex consequenti, apprehendit triangulum, ut non triangulum. Multa enim rebus repugnant, quæ per se seu prima fronte, non videntur repugnare. Quæ idcirco antequam repugnantia eorum apparet, eadem facilitate apprehendi possunt rebus convenire, qua apprehenduntur illa quæ revera conveniunt. Satis igitur liquet pure impossibilia à mente nostra apprehendi posse. Plurima alia in hujus rei confirmationem addi possent, si operæ pretium esset in iis proponendis immorari.

Ex his quæ proxime dicta sunt, quæret forte aliquis, *an apprehendere possimus id quod evidenter apparet esse impossibile; ut Hominem non Hominem, quadratum rotundum, & ejusmodi.* Inter ista enim quæ aperte sunt impossibilia, & alia quorum impossibilitas latet, non distinguit Derodon, nec quisquam alius quantum accepimus.

Resp. I. Manifestum est impossibile in communi,

quod semper apparet impossibile, sæpius apprehendi. Qua enim ratione distingueremus inter possibile in communi, & impossibile, nisi utriusque ideam aliquam formemus? An non apprehendimus Rem impossibilem esse, cujus una pars ideæ alteram evertit, eive contradicit. Cum igitur eam definiamus, necesse est ut etiam apprehendamus.

II. Per imaginationem non possumus percipere res impossibiles particulares: ut *sedentem-stantem*, *lucidum-tenebrosum*, *quadratum-rotundum*. Ejusmodi enim objecta talia sunt, ut imago unius partis penitus impediatur, ne alteram quæ ei repugnat, imaginemur.

III. Utrum autem per intellectum, qui subtilior et penetrantior est omni imaginatione, istiusmodi objecta apprehendere possimus, an vero cum de illis loquimur, solam repugnantiam partium apprehendamus, non autem identitatem fictam, aliàs disputandum relinquo. Sed ad Ens Rationis defendendum, satis erit si ostendere possumus, mentem sæpe apprehendere impossibilia latentia, seu quorum impossibilitas non apparet. Illud autem ostendi posse, ex supra dictis manifestum est. Sed præcipua Dero- donis Argumenta expendamus.

Arg. I. Impossibile est purum nihil: at nemo potest concipere purum nihil. Nam qui concipit aliquid, habet vel format imaginem illius in mente, & potest reflectere supra eam, & cogitare seu dicere apud se, *hac pars imaginis repræsentat hanc partem objecti, & hac pars aliam*; ut cum quis format imaginem asini, percipit unam partem imaginis repræsentare aures, aliam pedes, &c.

Resp. Mirum est tanti ingenii virum huic argumento credidisse. Nam,

I. Retorqueri potest sic: apprehendimus res quæ nullas habent partes; ut puncta indivisibilia, momentum, negationem latitudinis in linea &c. Quorum proinde

proinde imagines non sunt compositæ. Unde nec dicere possumus, unam illius partem hanc partem objecti repræsentare, aliam hanc, &c.

2. Si per imagines hic, ideas, quæ res materiales repræsentant, & à phantasia formantur, intelligit, falsum est omnem conceptum nostrum in earum formatione consistere; longe enim plura sunt quæ sine ejusmodi imaginibus, concipimus: scilicet omnia quæ sub sensum non cadunt. Si vero intelligat quilibet ideas, tum falsum est nos semper reflexe cogitare posse, aut dicere quomodo imago objecti se habeat; ex.g. cum concipimus chiliogonum, hoc est figuram mille angulis, et totidem lateribus constantem, dicere non possumus quomodo imago se habeat, seu quænam pars hunc angulum, quænam alium repræsentet. Per imaginationem enim nullum angulum in ejusmodi figura, percipere possumus. Formamus etiam idæas actuum mentis nostræ, puta intellectionis, et volitionis: Nemo tamen reflexe cogitare potest, aut dicere quomodo se habeant illæ idææ, quoad partes.

Arg. II. Omne cognoscibile est verum; sicut omne appetibile est bonum. Verum enim explicatur per intelligibile. At Ens Rationis non est verum. Ergo nec intelligibile.

Resp. Est & Argumentum istud elumbe.

1. Quia verum & intelligibile non reciprocantur: Sic enim falsum nullatenus intelligibile esset. Sicut omne appetibile (nisi per appetibile intelligamus quod jure, & ex ratione, tale est) non est verum bonum: appetuntur enim quæ vere mala sunt sub specie boni.

2. Quia dici potest Ens Rationis habere suam veritatem; hoc est, esse *vere* nihil; non autem fingi, aut solum dici nihil, cum aliquid sit.

Arg. III. Tunc tantum fit Ens Rationis, cum vel apprehenditur unum Ens ut aliud, puta *Homo* tan-

quam *asinus* ; vel cum apprehenditur impossibile aut non-Ens, per modum possibilis, aut Entis ; puta tenebræ ad modum nigredinis. Sed neutrum fieri potest : quia, in illo casu, non apprehenditur Res quæ prærenditur, sed aliqua alia : ut qui concipere putatur hominem tanquam asinum, non concipit hominem, sed Asinum : & qui concipere dicitur tenebras, ut nigredinem, non concipit tenebras, sed solam nigredinem.

Resp. Negando minorem. Potest enim, per errorem, rei alicui tribui, quod ei plane repugnat : & tum, implicite, ac per consequentiam, concipitur aliquid impossibile. Ut cum Epicurei conceperunt Deum, tanquam qui res inferiores, & Humanas non curet : vel cum Sociniani eum concipiunt ut ignarum futurorum contingentium : Sic enim id in Deo concipitur quod ei prorsus repugnat. Ad confirmationem dicimus. Cum una res concipitur ut omnimode alia, ex. g. *Homo* ut *Asinus*, non concipitur res quæ concipi putatur, sed alia : at non sic se res habet, cum res ex parte recte concipitur, ex parte falso, affingendo ei aliquid repugnans. Sic Sociniani cum concipiunt Deum non scire futura contingentia, recte ex parte eum concipiunt : concipiunt enim ut Ens necessarium, æternum, independens ; ex parte vero falso concipiunt, & affingunt ei quod ipsi repugnat. Unde implicite tantum, & per consequens, concipiunt aliam rem, nempe Deum falsum.

DISPU.

DISPUTATIO. V.

De Rerum Possibilitate.

Quæst. I. **A**N Res in statu possibilitatis sit purum nihil. Negant quidam, è quibus etiam est Derodon. Dicunt enim rem possibilem habere esse quoddam reale, licet diminutum. Nos sic statuimus.

Thef. I. Si per esse reale, intelligamus esse possibile, seu Potestativum, sic res in statu possibili habent esse reale, per quod distinguuntur à rebus impossibilibus Adeoque non sunt purum nihil simpliciter, & omnimode, sed tantum purum nihil actu.

Thef. II. Si vero per esse Reale, intelligamus esse actuale, sic nullum esse habent, quantumvis diminutum: sed æque sunt nihil, ac res impossibiles. Probatur, Quia si esse istiusmodi haberent, illud vel esset à Deo vel non. Si non à Deo, tum aliquid actuale fuit ab æterno, (& quidem necessario) præter Deum. Siquidem omne possibile, ab æterno, & necessario, fuit possibile. Si esse illud actuale diminutum fuit à Deo, tum falsum esset Deum omnia in principio è nihilo creasse. Habuissent enim res omnes, existentiam aliquam actualem, ab æterno. Deinde explicare non possunt Autores hujus esse diminuti, quidnam illud sit, seu in quo consistat. Quod enim quidam dicunt, res in statu possibilis habere esse intelligibile, Derodon vero, habere aptitudinem terminandi actionem efficientis, seu esse producibile, nec explicat illud esse actuale nec probat: nam purum nihil actu, est tum intelligibile, tum producibile. Attributa enim

nim ista sunt tantum respectus quidam potentiae intellectivæ, & productivæ, ad ea quæ actu quidem nihil sunt, sed possunt per eas intelligi, & produci. Potest autem res actu existens *respectum* connotare ad id quod actu non existit; ut & hi Autores fateri cogentur. Nam fatebuntur res possibiles in statu possibili; non habere totum illud esse quod habent in statu existentiae actualis. Hoc autem quod non habent, est intelligibile, & producibile, & tamen est purum nihil actu. Respicietur itaque à potentia intellectiva, & effectiva. Denique, si res in statu possibili, non habent totum esse quod habent cum actu existunt per actionem efficientis, necesse est ut secundum aliquam & quidem majorem partem sui, sint purum nihil actu.

Objicit *Derodon*, I. Purum nihil est prorsus impossibile, atque adeo pro omni tempore est improducibile; & nunquam potest terminare actionem efficientis.

Resp. Purum nihil, actu quidem non terminat actionem efficientis, quamdiu est nihil; at potest eam terminare. Illud autem posse, nihil aliud est quam *habitus* quædam ad potentiam effectivam, quæ producere potest terminum suæ actionis. Negatur igitur omne purum nihil esse impossibile. Non enim necesse est ut terminus actionis præexistat, etiam secundum entitatem diminutam. Quin impossibile est ut præexistat; quia sic produceretur per actionem id quod prius extitit.

Objicit II. Si res possibilis est, in se, purum nihil, non differret ab impossibili. Nam inter duo pura nihila nulla est differentia.

Resp. Inter duo quæ nihil sunt, nulla est differentia intrinseca, & absoluta; est tamen aliqua extrinseca, & respectiva; quatenus diversas negationes, aut habitudines connotant. Ut cæcitas & surditas sunt duo nihila in se; altera tamen oculum respicit, ex quo visum tollit, altera aurem ex qua auditum. Similiter res impossibilis connotat negationem potentiae, quæ
se

se producat, possibilis vero habitudinem connotat ad istiusmodi potentiam.

Instat *Derodon*. Si possibile & impossibile, absolute, & in se, non differunt, hoc est sunt idem, nulla ratio reddi potest cur alterum connotet respectum ad Potentiam Dei, & in ea contineatur, alterum non. Nam potentia Dei æqualiter respicit ea quæ sunt realiter idem.

Resp. Peccatur hic per ignorationem Elenchi. Non enim dicimus possibile & impossibile esse realiter idem : sed tantum esse prorsus similia quoad non-esse actuale. Neutrum enim est quid actu. Unde nihil contra sententiam nostram concluditur. At (inquit) si non sunt idem nihil, utrumque non est purum nihil.

Resp. Licet non sint idem nihil, utrumque tamen est purum nihil actu : hoc est, utrumque est totalis carentia actualis existentiae.

Obj. III Quod, ex se, & in se, est nihil, non potest non-esse nihil : sed possibile potest non esse nihil ; scilicet per productionem sui : Ergo : ex se, & in se, non est nihil.

Resp. Negamus majorem. Similiter enim arguere licet. Quod ex se & in se non loquitur, ambulat &c. non potest loqui aut ambulare. At homo possibilis, seu nondum natus, nec loquitur nec ambulat : Ergo nec loqui nec ambulare potest. Vel, quod ex se et in se est futurum non potest non esse futurum. At Petrus, proximo anno nasciturus, ex se et in se est futurus : Ergo non potest non esse futurus, scilicet etiam cum actu existit. Vel distinguenda est major : Quod in se est nihil non potest non esse nihil, quamdiu est nihil, esto : absolute non potest non esse nihil, negatur. Sic autem possibile licet in statu possibili, ex se, et in se, nihil sit actu, potest tamen esse aliquid actu, per causam suam productivam.

Instantia. Quod in se est nihil, ex essentia sua est nihil: quod autem ex Essentia sua est nihil, non potest non esse nihil; ut homo qui ex Essentia sua est rationalis, non potest non esse rationalis. At res possibilis potest non esse nihil. Ergo ex Essentia sua non est nihil: Adeoque licet existentia ipsius sit nihil, essentia est aliquid.

Resp. Idem argumentum fieri potest de existentia rei possibilis: Hæc enim in se est nihil ut fatentur adversarii, adeoque ex essentia sua est nihil, & sic nunquam potest fieri aliquid, quod non admittent. Respondendum igitur ad utrumque, quod ex essentia sua est nihil, non potest non esse nihil, secundum esse quod habet, conceditur, secundum esse quod habere potest, negatur. Vel non potest non esse nihil, seu esse aliquid in sensu composito; hoc est illud ipsum nihil, seu esse aliquid in sensu composito; hoc est illud ipsum nihil, manens nihil, non potest esse aliquid; loco tamen illius potest esse non-nihil, seu aliquid. Sicut loco hominis, qui de essentia suæ est rationalis, potest esse non rationale, scilicet si homo annihilaretur.

Quæst. II. *An ulla res sit intrinsece, seu in se, possibilis se posita ratione primæ causæ, seu omnipotentis divinæ.* Jesuitæ communiter affirmant; distinguunt enim possibilitatem in intrinsecam & extrinsecam. Priorem appellant per quam res in se possibilis est, id est ejusmodi attributa habet, quæ non implicant contradictionem, seu quorum unum non evertit alterum, ut in impossibili fit. Posteriores dicunt esse denominationem extrinsecam, ortam à virtute productiva causarum, præsertim causæ primæ, à qua reliquæ omnes pendent. Assentiuntur etiam quidam è nostris; licet quæstio à paucis, & propter distinctionem quandam omissam, perplexe, & confuse tractetur; nos sic statuimus.

Thef. I. *Si per possibilitatem rei, intelligamus præcise*
non

non-repugnantiam attributorum qua in idea ipsius continentur, certum est esse quandam possibilitatem rei intrinsecam. Nam attributa Dei, sine respectu ad omnipotentiam ipsius, intrinsece conspirant, seu non repugnant. Et attributa creaturæ, licet à prima causa dependeant, in se & natura sua, sibiinvicem non repugnant. Si igitur per possibilitatem intrinsecam intelligere velimus naturalem seu essentialem concordiam attributorum rei, etiam creaturæ, certum est eam esse intrinsece & in se possibilem. Sed quæstio est de non repugnantia existendi, aut producendi, quæ proprie possibilitas est, & possibilitas Physica, sicut prior Logica, à quibusdam vocatur: Utrum scilicet rei conveniat ex se, & natura sua, an vero ex eo quod sit causa quæ ei existentiam conciliare, seu producere possit. Adeoque an ideo, hoc sensu, res sint possibles, quia Deus est omnipotens, easve producere potest; an vero ideo eas producere potest, quia sunt in se producibiles, & existentiaæ capaces. Et, si de non-repugnantia attributorum essentialium rei loquamur, utrum res ex se solis eam habeant, an ex sola potentia Dei, an (ut quosdam affirmasse memini) ex utraque. De qua fit

Theſ. II. *Non repugnantia existendi, seu producibilitas, ex eo duntaxat est, quod sint causa sufficientes, actu existentes, vel possibles, per quas res existere & produci possunt:* præcipue ex eo quod Deus sit, sive quod omnipotens sit. Rationes quæ nos à communi sententia discedere movent, sunt quæ sequuntur.

1. Si ulla res creabilis esset, in se, seu intrinsece, possibilis, sequeretur aliquam ejusmodi rem existere posse, etiam si Deus non existeret. Quod enim in se, & intrinsece, possibile est, secluso omni extrinseco, potest existere.

Ad hoc aut simile argumentum, non neminem respondisse memini, duo ad possibilitatem rei constituendam requiri, scilicet non-repugnantiam, seu producibili-

producibilitatem ex parte sui, & omnipotentiam ex parte Dei. Ex quibus prius rei intrinsecum est, posterius extrinsecum. Unde, ut supra audivimus, distinguunt communiter duplicem rei possibilitatem, intrinsecam, & extrinsecam. Juxta hanc Doctrinam dicere debent, etiam si Deus non esset, omnes res quæ de facto possibiles sunt, fore in se possibiles, & extrinsece tantum fore impossibiles, seu per accidens, propter non-existentiam causæ quæ sufficientis virtutis sit ad eas producendas. Verum intrinsecam non-repugnantiam, seu producibilitatem, requisitam esse ad possibilitatem rerum, est *id quod quaritur*; & à nobis negatur. Partim quia, ut res sit possibilis, sufficit quod sit aliqua causa actu existens, vel possibilis, quæ eam producat. Sic enim res illa evadit producibilis, nec necessaria est producibilitas intrinseca. Partim quia non constat, nec probari potest, possibilitatem esse compositam ex duplici non-repugnantia, seu producibilitate, alia interna, alia externa. Præcipue vero, quia ex hypothesi illa quod Deus non esset, nulla, res quæ nunc possibilis est, esset ullo modo possibilis, sive extrinsece, sive intrinsece. Simpliciter enim repugnat, ex. gr. hominem existere sine Deo. Sic enim esset Ens independens, nec tamen esset Deus, quod omnimodo est impossibile. Et rationes sequentes distinctionem illam penitus confodiunt.

II. Prius est Deum esse omnipotentem, quam ullam aliam rem esse possibilem, sive extrinsece, sive intrinsece. Ergo causa & ratio suprema, cur res, præter Deum, possibiles sunt, est quod Deus sit. Et quod res illæ, quæ non nisi à solo Deo fieri possunt, possibiles sint, Existencia Entis omnipotentis est unica ratio. Sicut & eorum quæ non nisi à creatura fieri possunt, Deo concurrente, ut peccare, mentiri, resipiscentiam agere, ratio Deo subordinata, est possibilitas creaturæ, quæ ea facere potest. Ratio autem illa suprema est rebus creatis extrinseca.

Tota

Tota igitur possibilitas rerum à Deo pendet, adeoque ab extrinseco pendet.

III. Omnis denominatio intrinseca oritur ab aliqua forma, aut quasi forma intrinseca. At rei possibili, quamdiu est pure possibilis, nihil potest esse intrinsecum. In statu enim possibili, est purum nihil actu. Denominatio igitur per quam res dicitur possibilis, est unice ab extrinseco, scilicet à virtute primæ causæ.

Dices, in re possibili esse intrinsecam non-repugnantiam seu consistentiam prædicatorum, propter quam est & dicitur possibilis.

Resp. Nulla est absolute & actu in re possibili, quamdiu in statu puræ possibilitatis manet, non-repugnantia, seu consensio prædicatorum; sed tantum potestate, & ex hypothesi quod existeret. Nulla enim prædicata positiva et propria ei in eo statu conveniunt. Ut *homo* in statu possibili non est animal rationale, (nec enim sentire aut ratiocinari potest), nisi potestate: Est enim non-ens, seu non-existens. Ubi autem prædicata nulla sunt, nulla etiam est prædicatorum consensio.

IV. Si creaturæ essent in se possibiles, sine respectu ad causam primam, esset aliqua ratio extra eam, cur potest eas producere; nempe intrinseca illa, quæ supponitur, non-repugnantia, et producibilitas. At posterius est falsum. Est enim ipsa perfectio Dei unica ratio cur potest quidlibet producere. Nec potentia illius pendet ab ulla ratione in rebus extra se, quia est simpliciter independens.

Obj. I. Si creaturæ non sunt intrinsece possibiles, sunt intrinsece non-possibiles, id est, impossibiles. At posterius est falsum.

Resp. Si per *intrinsece* intelligas *seclusa habitudine ad Deum*, concedimus sub illa ratione omnes creaturas esse impossibiles, ut et supra ostendimus.

Obj.

Obj. II. Sequeretur Deum non posse eas producere. Siquidem Deus nihil producere potest nisi quod in se est producibile.

Resp. Negatur sequela. Quia ut Deus possit res producere, satis est quod Deus sit, seu quod omnipotens sit. Probatio non concludit, quia quod sine Deo est impossibile, id possibile est ex eo quod Deus sit : nec alium sensum verum habet quam quod Deus nihil producere potest nisi quod propter perfectionem Dei est producibile.

Obj. III. Si creaturæ non essent intrinsece possibiles, nulla ratio reddi potest, cur homo sit res possibilis, potius quam Chimæra. Potentia enim Dei ad omnia ex æquo extenditur. Adeoque ratio Differentiæ, ex ea unice non oritur.

Resp. I. Quærimus cur Homo possibilis sit, potius quam Chimæra ? Respondebis, quia natura humana talis est, ut terminare possit actionem efficientis, non autem Natura Chimærica. At rursus rogamus, unde sit quod homo sit talis naturæ, non autem Chimæra ? An ex se talis est ? Nos vero contendimus creaturam ex se nihil habere, sive actu sive potestate, sed omnia quæ illius sunt, aut esse possunt, oriri à primo Ente. Quod & omnem Hominem Christianum asserere decet.

II. Respondemus igitur Deum ideo posse producere Hominem, non autem Chimæram, quia est Ens perfectissimum : adeoque non potest operari frustra sine effectu. Si enim per operationem suam Chimæram produceret, per eam purum nihil produceret.

Inst. Si igitur Chimæra intrinsece repugnat à Deo produci, ex lege contrariorum, sequetur hominem intrinsece non repugnare.

Resp. Nec illud sequetur. Quia Homo, cum potestate aliquid sit, pendere potest à causa reali, eamque requirit ut possit existere : at Chimæra, quia
fim-

simpliciter nihil est, non potest ab ulla causa pendere, nec ullam requirit ut sit simpliciter nihil.

Obj. IV. Cum Theologi dicunt Deum omnia facere posse quæ non repugnant fieri, insinuant quædam natura sua repugnare ut fiant, quædam non.

Resp. Non sequitur; quia illa dicuntur non repugnare ut fiant, quæ in idea sua non implicant contradictionem: & hæc non-implicantia (si ita loqui fas sit) signum est congruere perfectioni Divinæ res istiusmodi producere. Non autem quod natura sua producibiles, aut possibiles sint, seclusa ratione primæ causæ.

Thef. III. *Nonnulla possibilia sunt ex parte, ob conditionem creaturarum: seu quia ab illis solis fieri possunt, Deo concurrente; Non autem Unice quia Deus est omnipotens.* Hujus Generis sunt,

1. Peccata; quæ partim ideo possibilia sunt, quia Deus potest producere, & in agendo sustentare creaturas, quæ non tantum bene, sed etiam male agere possunt. Adeo ut possibilitas peccati ex defectibilitate creaturæ rationalis in agendo, oriatur, licet non ex ea sola.

2. Illa quæ imperfectionem agentis necessario arguant; ut credere, pænitere, timere, &c.

3. Omnia illa quæ à creaturis fiunt, aut fieri possunt, quatenus ab illis procedunt, modo sibi proprio agentibus. Potest quidem Deus per se, sine creatura, omnia facere, quæ ipse proprie facere potest per eam, ut civitates comburere sine igne; hoc est potest eas immediate in flammam convertere. Et tamen etiam in effectis ejusmodi, quando ministerio creaturarum fiunt, modus quidam operandi ipsis peculiaris est; ut quod operentur cum dependentia à superiori causa; quod agant sine cognitione, & semper quando ac quantum possunt, aut cognitione sibi propria.

Ex decisione hujus quæstionis, duo inferri possunt corrolaria.

1. Numerum rerum possibilium esse infinitum. Potentia enim Divina, ex qua oritur rerum possibilitas, infinita est. At ex opinione opposita de possibilitate intrinseca, non constat de numero possibilium, sitne finitus an infinitus.

2. Omne possibile esse necessario possibile. Ratio est quia Deus necessario est omnipotens.

Quæst. III. Unde sit impossibilitas in rebus impossibilibus. Communis sententia dicit, res impossibiles esse in se, seu ex se, impossibiles. Antonius le Grand ideo impossibiles dici existimat, quia non possunt à nobis distincte concipi, *Instit. Philos. parte 4. cap. 2.*

Thef. I. Impossibilia, quæ absolute talia sunt, à perfectione Dei ultimo oriuntur: vel ex primo impossibili, Deum non esse, aut non esse perfectissimum: ut quadratum rotundum impossibile est, quia nulla est causa quæ possit illud producere. Ideo autem Deus non potest, quia est perfectissimus, nec potest operari & nihil efficere.

Obj. Ideo res impossibiles sunt, quia opposita sunt possibilia, vel necessaria. Adeoque Quadratum rotundum est impossibile, quia quadratum non rotundum, aut rotundum non quadratum est possibile.

Resp. Hæc quidem ratio impossibilitatis dici potest. Verum cum possibilitas in virtute divina fundetur, in ea etiam ultimate fundatur impossibilitas quæ ex oppositorum possibilitate oritur.

Thef. II. Impossibilitas Hypothetica ultima resolvenda est in voluntatem Divinam, ut impossibile est Electos seduci, quia Deus decrevit eos à seductione conservare. Et, licet ratio proxima impossibilitatis esse possit, quod oppositum vel actu sit, vel futurum sit, (ut ideo sedentem stare in sensu composito impossibile est, quia supponitur eum jam sedere), quia tamen ex voluntate & providentia divina est, quod res existat

existat actu, vel futura sit, idcirco in eam refundenda est impossibilitas opposita.

Thef. III. Creaturæ hoc vel illud est impossibile, ut Homini vel angelo totum Universum de loco suo pellere; propter virtutis activæ vel passivæ limitationem: vel propter defectum aliquem privativum, sive culpabilem, sive non. Sic impossibile est cæcum videre, quamdiu cæcus est. Aut irregnitum præstare opera spiritualiter bona.

Corrolarium, I. Licet ex hypothese illa abominanda, Deum non esse, nihil esset possibile, ut in questione secunda statuimus, non tamen ex ea sequetur nihil etiam esse impossibile, ut contendit Rhetor fortis noster, Disquis. Metaph. quæst. 5. Quin ex adverso sequeretur omnia esse impossibilia. Primo enim impossibile esset Deum esse, quia impossibile est id quod non est, acquirere ut sit, sine aliquo efficiente. Deinde impossibile esset ullam creaturam esse, quia nullus esset Creator.

Obj. Si nullum esset possibile, nullum esset impossibile quod ei repugnaret, aut ipsum negaret, sive quod esset illius negatio: nec enim esset aliquod possibile increatum, ex hypothese; nec creatum, quia nihil esset quod illud produceret. Si nulla esset affirmatio prior, omnis posterior negatio esset impossibilis; & si tollas omne Ens, tollas necesse est non-Ens.

Resp. Mira est ista ratiocinatio; in qua non semel supponitur id ipsum quod impugnatur. Si enim ex hypothese facta, omnis negatio foret impossibilis, an non aliquid esset impossibile? Et, si sublato omni Ente, tollitur omne non-Ens, vel necessario tollitur, vel non. Si non necessario, tum possibile foret purum non-Ens, seu impossibile. Si necessario: tum non-Ens esset impossibile. Deinde contrarium manifeste concluditur ex medio quod hic adhibetur. Nam si nihil esset possibile, omnia essent non-possibilia, hoc est omnia essent impossibilia. Si nulla esset affirmatio, omnes negationes

essent ; si nullum esset ens actu, vel potestate, omnia essent simpliciter non-entia. Quin si nullum esset possibile, id ipsum quod nunc est possibile esset impossibile, & repugnaret sibi ipsi, seu seipsum negaret, hoc est esset suiipsius negatio. Ad argumentum igitur respondetur, omne impossibile negat ali-quod quod nunc est possibile, adeoque cui nunc repugnat, esto ; quod est possibile, etiam ponitur illius negatio, ut in hypothefi, negatur. Ex ea enim, ut jam diximus, id quod nunc est possibile, esset sui ipsius negatio, seu impossibile.

Corrolarium II. Non ideo res impossibiles sunt, aut dicuntur, quod non possint à nobis distincte concipi.

1. Quia nonnulla impossibilia satis distincte concipiuntur : ut negatio plurium substantiarum in Unica Divina Essentia, distincte concipitur, tum ab Antitrinitariis qui eam asserunt, tum ab Orthodoxis qui eam ex Scripturis impugnant.

2. Quia licet quædam possibilia nequeant distincte concipi, (ut illa quorum impossibilitas ex immediata significatione terminorum manifesta est, ex.g. *quadratum-rotundum, effectus independens*), aliunde tamen habent quod impossibilia sint, scilicet quod à nulla causa produci possint.

3. Quia non constat omnia possibilia à nobis distincte concipi posse : Aut capacitatem mentis nostræ, & possibilitatem rerum, ac potentiam Divinam, commensurari. Ex. gr. numerus creaturarum infinitus forte possibilis est, (nec enim eo concessio sequeretur Deum nullam aliam creaturam producere posse ; posset enim alium numerum finitum vel infinitum producere) nec tamen numerus infinitus à nobis distincte concipi potest. Quin & nonnulla actu existunt, quæ distincte à nobis concipi nequeunt ; ut omnipotentia, & immensitas Dei, Unio animæ & corporis, cogitationes & volitiones nostræ.

Quæst.

Quæst. IV. *An res possibilis & actu existens sint realiter idem.* v. g. Petrus in statu possibili, & Petrus in statu existentiae actualis. Affirmant communiter, sed cum distinctione. Dicunt enim rem possibilem esse concretum quoddam; Et pro materiali, seu in recto, dicere ipsam entitatem rei quæ existere potest; pro formali vero, seu in obliquo, carentiam existentiae actualis, cum non-repugnantia ad eam habendam: sic *Derodon. 1. part. Metaph. sect. 16. 17. Arriaga tamen Disp. Metaph. 2. sect. 1.* dicit Entitatem quam res possibilis, pro materiali, seu in recto significat, esse illam quam res in statu possibili, non quidem actu habet, sed haberet si existeret: Et eandem esse cum re actu existente, non pro eo tempore quo possibilis est, sed pro eo quo actu existit. Sit in hac quæstione,

Thef. I. *Eadem est res in conceptu nostro, siue possibilis tantum sit, siue futura, siue actu existat.* Ut Homo, antequam existit, & postquam natus est. Ratio est, quia concipimus res per Attributa sua propria; adeoque abstracte ab earum possibilitate, futuritione, & existentia actuali. Tum quia illa omnia sunt affectiones rerum communissimæ; tum etiam, quia quævis ex iis determinate, ex accidenti rebus convenit. Unde idem conceptus quo rem existentem concipimus, ad eandem, ut quæ fuit prius possibilis, aut futura, concipiendam inservit, & vicissim Architectus enim eandem ideam habet domus extruendæ, & extructæ. Et in quovis statu, Unica est idea propria cujusque rei, nec aliam veram formare possumus.

Thef. II. *Res in statu possibili, nullo modo est realiter idem cum re actu existente: scilicet nec pro materiali, aut in recto; nec pro formali, seu in obliquo sed tantum potestate; & in conceptu nostro.* Ratio est, quia id quod non existit, nullo alio modo idem esse potest cum eo quod existit. At tota res in statu possibili non existit.

Obj. Idem Petrus qui fuit possibilis, nunc existit, non autem alius.

Resp. I. Petrus possibilis nec fuit idem cum Petro nunc existente, nec alius positive; sed non ens, seu nihil actu.

II. Sensus igitur hujus effati, *idem Petrus qui fuit possibilis, actu existit*, hic est, vice Petri qui fuit nihil, & esse potuit, nunc est Petrus actu existens.

Instantia. Cum producitur res aliqua, illa ipsa producitur quæ prius produci potuit, seu quæ fuit producibilis, non autem alia quæ non fuit producibilis. Non igitur verum est, aliquid duntaxat vice illius produci.

Resp. Cum producitur res, nec producitur illa quæ non fuit producibilis, nec omnis quæ fuit producibilis, sed aliqua quæ fuit producibilis. Cujus tamen verus sensus tantum est, produci id quod denominabatur producibile, ex virtute causarum quæ eam producere valebant; non autem, quod antequam producebatur, idem fuit cum eo quod postea fuit productum: Sive causam producere aliquid quod producere potuit. Unde & cum aliquid producitur, manifestum est vice nihil aliquid produci, & vice illius quod nunc productum est, fuisse nihil.

Thef. III. *Res possibilis non est eadem Entitas, quam ipsa haberet si existeret.* Ratio est manifesta, quia Entitas, quam res possibilis haberet si existeret, est Entitas actualis. At res possibilis non est Entitas aliqua actualis. Dices non est Entitas actualis absolute; est tamen ex hypothese quod existeret.

Resp. Responsio ista est nugatoria, nec quidquam aliud significat, quam rem possibilem postquam existit, esse Entitatem actualem seu existere. Deinde etiam res impossibilis, ex hypothese quod existeret, esset eadem cum Entitate aliqua actuali. Assertio igitur illa Arriagæ nihil facit ad naturam rei possibilis explicandam.

DISPUTATIO. VI.

De Rebus Futuris & Futuritione.

Quæst. I. **Q**uid sit Futuritio, seu rem aliquam esse futuram?

Resp. Comptonus, Log. Disp. 46.

sect. I. Rem non ideo dici futuram, quasi jam existeret aliqua illius Futuritio, sed mere ex eo quod aliquando erit. Est proinde Futuritio rei, existentia illius in tempore aliquo sequenti, connotando negationem existentiae in instanti presenti. Et probat illud Hericæ, Antichristus est futurus, si omnes voces proprie sumantur falsum est. Perinde enim sonat, ac Antichristus est erit. Verbum enim est notat aliquid de presenti; Participium vero futurus hoc totum negat. Strangius de vol. Dei circa pec. l. 3. c. 9. Dicit futuritionem non esse Ens simplex, sed complexam sententiam, nempe aliquid esse futurum.

Thef. I. Futuritio non est sententia complexa, seu propositio sed aliquid simplex. Non enim constat subiecto & prædicato, sed est affectio quædam simplex, & abstracta rei quæ futura est, ut per se patet. Nec est vera vel falsa Logicè, ut propositio omnis, sed Metaphysicè. Unde nec verum est nihil aliud esse quam aliquid esse futurum. Nam aliquid esse futurum notat rem futuram & Futuritionem simul. At Futuritio per se minus notat. Si vero per aliquid esse futurum, intelligamus esse futurum, seu esse quod futurum est, nec verum erit hoc esse ipsam futuritionem. Nam esse quod est futurum, est esse actuale rei existentis. At Futuritio non est ejusmodi esse. Est enim Attributum rei nondum existentis.

Thef. II. *Futuritio rei non est existentia illius in tempore sequenti, connotando negationem ejusdem in presenti.*

1. Quia Futuritio rei non est futura. At existentia rei in tempore sequenti, est futura : & quidnam sit illius futuritio, est id quod quæritur.

2. Res futura habitura est existentiam tempore sequenti ; at non est habitura futuritionem tempore sequenti siquidem illam jam habet de præsentis.

Obj. Futuritio rei non existit de præsentis : Est enim affectio quædam rei non existentis.

Resp. Non existit ut res absoluta & positiva concedimus : ut negatio & *Habitus* quædam negatur. Solent autem ipsæ negationes & habitudines rerum dici existere, & esse, suo modo ; ut cum dicimus ante quam existit res positiva, existere & esse illius negationem : & destructa forma è subjecto, existere, & esse dicitur illius privatio.

Thef. III, *Est igitur Futuritio, denominatio extrinseca, afficiens id quod actu quidem nihil est, nemperem quæ nunc non est, sed erit, orta ex existentia illius in tempore sequenti.* Adeoque partim includit negationem existentia, partim denominationem illam per quam res exitura dicitur : utrumque autem de præsentis, & quovis instanti antequam res existit actu. Hinc futuritio est determinatio quædam rei possibilis ad existentiam habendam in tempore sequenti. Cum res ut pure possibilis, sit indifferens, & indeterminata ad existendum, vel non.

Hinc etiam, licet verum non sit *Antichristus est futurus*, quia jam multis sæculis in Ecclesia Romana dominatus est, ex hypothesi tamen quod esset futurus, verum esset eum esse futurum. Nec propositio illa perinde sonat, ac *Antichristus est erit*. Hoc enim nullum sensum facit, nec verum nec falsum.

Quæst. II. *An futuritio rerum sit ab aeterno.* Negat D. Strangius loco proxime citato. *Futuritio* (inquit)

quit) *rei futura non est ab æterno, sed in tempore.* Concedimus quidem existentiam rei futuræ esse in tempore. At (sitque Thesis)

Futuritio omnis rei Futuræ est ab æterno: & omne futurum ab æterno fuit futurum. Patet, Quia si futuritio rei incipiat in tempore, vel in eo solo tempore in quo res primo existit, vel citius. Si prius, sequitur nihil unquam fuisse, aut nunc esse futurum. Nam in eo instanti quo res incipit existere, non est amplius futura simpliciter, (licet porro duratura sit), sed præsens. Si posterius, rogamus quando id quod futurum est, cæpit esse futurum? Si mille annos ante quam exitit actu, cur non duo millia, aut centum, & sic porro in æternum à parte ante? Nec major ratio est, cur iudicium extremum nunc sit futurum, quam quod semper fuit futurum.

Objicit *Strangius I. Omne Futurum est in tempore futurum.*

Resp. Omne Futurum quando actu existit, est in tempore: at non quando & quamdiu est pure futurum.

Obj. II. *Si fuit aliqua Futuritio rei ab æterno, ubinam existeret? vel enim fuit in Deo, vel extra Deum. Si in Deo, vel in scientia Dei, vel in illius voluntate, seu decreto. Non in Scientia: Quia prius res est futura, quam scitur à Deo esse futura. Non in voluntate; quia Deus non voluit omne futurum esse futurum; ut lapsum Adam, peccatum in Spiritum sanctum. Non extra Deum, quia ab æterno nihil fuit extra Deum.*

Resp. I. Retorquendo argumentum. Si possibilitas rerum fuit ab æterno, ubinam fuit? Non extra Deum, quia nihil extra eum fuit ab æterno. Non in Deo; nec enim in scientia illius fuit, quia prius res sunt possibiles quam sciuntur esse possibiles; nec in voluntate quia Deus non vult omnia possibilia existere; nec denique in potentia, nisi virtualiter, hoc est, fuit in Deo virtus productiva

omnium possibilium : at formaliter in illa non fuit.

II. Dicimus igitur, Futuritionem ut notat negationem existentiae, nullibi fuisse positive, ubique tamen negative. Ut autem denotat denominationem extrinsecam, & *habitudinem* quandam rei nondum existentis, ad Dei voluntatem, vel effectivam, vel permissivam, fuisse, ut omnis habitudo & relatio, in suis terminis relatis, partim scilicet in re possibili, partim in Dei voluntate, in qua res ipsa quæ futura erat, esse objectivum habuit, sicut res possibles in divina potentia, & scientia ; ad quam, licet non existant, *habitudinem*, quandam connotant.

Obj. III. Futuritio illa ab æterno, nec fuit Deus, nec creatura : Ergo nullo modo fuit.

Resp. I. Judicium extremum *nunc* nec est Deus, nec creatura. An igitur nulla nunc est judicii illius Futuritio ?

II. Omnis res absoluta, & positiva, vel est Deus, vel creatura, non autem omnis negatio, aut denominatio, ut ex antedictis liquet.

Inst. At difficile est percipere illam *habitudinem* in qua futuritionem locas.

Resp. At longe difficilius est percipere, rem futuram non esse futuram, antequam existit actu.

Obj. IV. Futuritio rei ab æterno nihil aliud est quam veram ab æterno fuisse hanc propositionem, *hoc est futurum*.

Resp. At sic datur id quod quæritur. Si enim vera fuit ab æterno illa propositio, scilicet in mente divina, (alias enim non potuit esse vera Logice), palam est objectum fuisse ab æterno ipsi conforme : Adeoque fuit aliquid futurum ab æterno : futurum autem sine futuritione esse nequit.

Corrolarium. Omne Futurum est necessario Futurum ; non quidem absolute, sed ex hypothese aliqua, scilicet quod causa rei vel jam determinata sit, vel determinanda, ad illius productionem. Unde & futurum eodem

eodem modo necessario est futurum, quo res existens actu necessario existit: nempe ex hypothefi quod fit Futurum. Absolute enim loquendo, potuit Deus à quo omnia futura pendent, statuiffe nihil esse futurum. Siquidem non necessario operatur, aut opera sua decernit, sed libere.

Obj. Si omnia futura necessario sint futura, tollitur contingentia eventuum, & libertas creaturarum rationalium. Per fatalem enim necessitatem rei futuræ, ad unam partem alligantur.

Resp. Negatur consequentia; quia futurum contingens dicitur, non quia nulla ratione necessario evenit, sed quia futurum est per causas contingenter operaturas: Unde sicut ex hypothefi quod futurum fit, necessario evenit, ita etiam necesse est ut contingenter eveniat. Nec necessitas hypothetica rei futuræ tollit libertatem agentium rationalium. Licet enim illa, ex hypothefi quod unam partem electura sint, necessario eam eligent; libere tamen eandem eligent, & ita ut alteram eligere possent si vellent, possentque etiam alteram velle. Ponamus ex. g. Petrum cras disputaturum, non minus libere actionem illam decernit, & ad eam se determinat, quam si nec futurum esset ut disputet, nec non futurum.

Quæst. III. *An sit aliqua causa cur res futura sit, & quænam?*

Respondet Strangius de Vol. Dei circa Pecc. lib. 3. cap. 9. Non esse absurdum dicere aliquid esse futurum, cujus nulla est causa proprie loquendo; ut defectum, & peccatum formaliter sumptum. Addit, tamen easdem esse causas rei, in quacunque temporis Differentia consideratur. Unde sequetur easdem esse causas rei futuræ, ac præsentis. In specie autem de actionibus malis, quatenus sunt tales, dicit causam cur futura sint, esse voluntatem creatam. Pleriq; à nostris asserere videntur causam cur res sunt futuræ, esse voluntatem vel decretum Dei, quo voluit res evenire, se vel efficiente, vel permittente. Jesuitæ contra

contra affirmant, quædam esse futura saltem conditionate, ante omne decretum Dei de eorum futuritione. In quæstione hac satis quidem difficili sit.

Thes. I. *Si proprie & striete, de causa loquamur, nulla est causa rei futura, quatenus est futura.* Ratio est, quia non-Entis nulla proprie est causa, præsertim efficiens, de qua in quæstione præsentis præcipue agitur. At res futura, quatenus & quamdiu est futura, est non-ens actu.

Thes. II. *Datur tamen ratio aliqua cur res futura sint, potius quam pure possibiles: seu cur è statu puræ possibilitatis transeant quasi in statum futuritionis, & determinationem accipiant ad existendum tempore aliquo sequenti.* Nec enim ista rerum conditio, qualiscunque tandem sit, omni ratione carere, aut suiipsius ratio esse potest. Sic enim natura sua res essent futuræ. Et ratio illa causa dici potest, latiori acceptatione, cur futuræ sint; eo modo quo medium in Syllogismo est causa conclusionis.

Thes. III. *Cum multa sint rationes & causæ, diversi ordinis, cur res sint futuræ, Causa & ratio proxima est illa ipsa quæ efficit ut res actu existat.* Ut causa proxima lucis futuræ est corpus lucidum futurum: Causa proxima Domus futuræ, est actio ædificatoris futura. Certum igitur est ideo res esse futuras quia futuræ sunt causæ in actu, seu actiones causarum, per quas sunt producendæ, & extituræ.

Obj. At causæ proximæ in actu non sunt: ergo non possunt esse causæ rei futuræ.

Resp. Non possunt quidem, quamdiu non existunt aut non agunt, causare ut res actu existant. Possunt tamen si futuræ sint in actu, esse causæ cur res sint futuræ. Sicut causa possibilis licet actu nihil sit, effectum reddit possibilem.

Thes. IV. Verum, cum causæ proximæ rerum futurarum, ipsæ futuræ sint, adeoq; de illis etiam procedat

cedat quæstio, dispiciendum est, an sit aliqua causa seu ratio suprema, cur res quædam futuræ sint, ac non maneant, cum aliis ejusdem ordinis, in censu pure possibilem. Dicimus igitur, *Omnium Futurorum, præter peccatum quæ peccatum est, seu anomiam creaturarum rationalium, causam & rationem supremam esse Voluntatem Dei.* Hoc est ideo res ejusmodi esse futuras, quia Deus voluit esse futuras.

Patet *Thesis*, primo de iis quæ deus ipse operaturus est, aut fuit, sine societate (si ita loqui fas sit) creaturarum, ut de mundo creando. Voluntas enim Dei applicans potentiam suam, (ut ita loquamur) ad agendum, est causa cur res istiusmodi existant: Ergo eadem voluntas, prius quam potentiam exeruit, fuit causa cur erant futuræ.

Patet etiam de iis quæ futura erant, aut sunt, per causas secundas, Deo concurrente. Voluntas enim Dei est suprema causa, & ratio, cur causæ secundæ exituræ, & operaturæ sint. Cum igitur, per voluntatem & Decretum Dei, omnes causæ creatæ, seu secundæ præparentur, manifestum est, illam esse supremam rationem cur res per causas illas sint futuræ. Quocirca, ut potentia, vel potius existentia Dei, est ratio suprema cur aliquid sit possibile, ita etiam voluntas, seu Decretum, est causa, seu ratio, cur futura sint illa omnia quæ eveniunt in tempore, modo non sint moraliter mala.

At *consentaneum est* (inquit Strangius) *ut rei futura statuatur causa futura.*

Resp. Licet quædam causæ rei futuræ, nempe quæ internæ, aut efficientes proximæ, statuendæ sint futuræ, consentaneum tamen esse nequit, ut de omnibus ita statuatur. Causa enim suprema est voluntas primæ causæ, ut jam ostendimus: illa autem nec est nec unquam fuit, proprie, & pure, futura, sed semper præsens. Urget Strangius. *Causam rei præteritam, esse præteritam: Ergo etiam causa rei futuræ, est futura.*

Resp.

Resp. Neg. conseq. ob rationem disparem. Res enim præterita jam facta est : adeoq; necesse est causas illius omnes requisitas præcessisse in actu. At res futura nondum facta est : potest autem aliqua ex causis rei esse tempore prior effectui, licet omnes non possint.

Hinc illud ejusdem viri docti & acuti, *eadem sunt causa rerum, in quacunq; temporis differentia spectentur*, verum quidem est, si de generibus causarum loquamur; ut Deus & ignis sunt causæ combustionis, futuræ, præsentis, & præteritæ. At si de conditionibus causarum loqui velimus, ut scilicet futuræ, præsentis, aut præteritæ sunt, potest id quod præsens est, esse causa rei futuræ, qua talis. Sicut aliquid præteritum solet esse causa moralis effectûs; tum futuri tum præsentis; ex. g. culpa dudum commissæ, est causa poenæ futuræ & præsentis.

Thef. V. Mali moralis qua talis, nulla causa per se assignari potest, cur futurum sit, præter ipsam determinationem futuram voluntatis creata, per quam se determinat, ad actum, vel defectum indebitum, in tempore. Nec enim dicendum est voluntatem Divinam, etiam permissivam esse causam peccati futuri; licet sine illa nullum peccatum eveniat. Sic enim esset etiam causa, seu ratio cur peccatum in tempore committitur, quod falsum est. Voluntas enim Dei, non aliter est causa rei futuræ, nisi quatenus vel ipsa determinatur, aut determinatura est potentiam, ad eam efficaciter procurandam, aut efficiendam in tempore.

Sed quæ res porro, cum determinatio illa voluntatis sit etiam futura, quænam illius causa aut ratio sit?

Resp. Plures rationes & causæ assignari possunt, diversi ordinis. Ut causæ & rationes objectivæ sunt omnia motiva futura quæ voluntatem inclinaturæ sunt, ad actum, aut omissionem culpabilem : Causa non impediens est voluntas Dei permissiva. Sed nulla ex his, vel quibuslibet aliis, seclusa voluntate creaturæ, est

est, causa aut ratio necessaria peccati futuri: nec omnes simul causam aut rationem adæquatam constituunt, licet omnes ad ipsum quadantenus concurrant. Causa autem occasionum peccandi, quæ per se bonæ sunt, est Deus, reliquorum quæ moraliter mala sunt, causa primaria est ipsa voluntas creaturæ. Cur autem se determinatura sit ad malum, nulla est causa præter voluntatem ipsam, libertate propriâ abutentem, & sponte sua convertentem ad malum. Ex eo igitur quod, concurrentibus causis supra memoratis, sponte se conversura sit ad malum, verum est peccatum esse futurum.

Obj. I. Nihil temporarium potest esse causa ejus quod est ab æterno. Omnis enim causa est prior effectu, vel tempore vel natura: & prout est in actu, semper est tempore simul. At futuritio mali moralis fuit ab æterno: determinatio vero voluntatis ad peccandum est in tempore. Ergo,

Resp. Non dicimus determinationem illam voluntatis in tempore, esse causam proprie peccati futuri, sed tantum rationem quandam cur futurum sit. Futuritio autem illa non est res aliqua absoluta, actu existens ab æterno, sed tantum denominatio quædam extrinseca, ut supra diximus; cujus idcirco aliquid in tempore existens ratio esse potest: sicut, quod res aliqua hodie desinat existere, ratio est cur denominatur præterita in æternum. Ratio enim denominationis, aut relationis alicujus, posterior sæpe tempore est quam denominatio ipsa: ut in causis quibusdam moralibus patet: illis scilicet: quæ effectu posteriores tempore sunt; ex. g. in promissis, & contractibus.

Obj. II. Deus vult non tantum permittere peccatum, seu permissionem suam, sed etiam peccatum ipsum evenire, ut ex eo bonum eliciat. Voluntas igitur ipsius est ratio suprema cur peccatum eveniat. Posita enim voluntate illa, quæ frustrari nequit, necessario evenit peccatum. Sic multi è nostris arguunt.

Respondent

Respondent alii, Deum nullo modo velle peccatum ipsum; sed tantum suam permissionem, & bonam quæ ex peccato elicit. Hæc responsio prima quidem fronte plausibilis est. Sed reclamare multis in locis videtur sacra pagina. Reclamat & ratio. Si enim Deus peccato utitur ad fines quosdam insignes procurandos, possetque ipsum impedire si velit, palam est eum aliquo modo velle peccatum evenire licet ipsum ex se nullo modo amet, aut probet. Interim tamen minime sequitur, voluntatem ipsius esse causam, aut rationem necessariam, aut in ullo alio genere, quam quod non impediatur, aut occasiones ex se innoxias creaturæ obiciat, aut merentem deserui deferat, cur peccatum vel futurum sit, vel in tempore eveniat. Vult enim peccatum evenire per suas causas, quæ aliæ per se esse nequeunt, quam spontanea deflexio voluntatis creaturæ: Dicit etiam potest Deum non velle peccatum evenire, nisi quod eventurum prævidet: si casum excipias in quo peccatum, peccato punire vult.

Inst. Voluntas Dei est causa suprema omnis boni futuri: cur non igitur etiam mali.

Resp. Quia Deus omnis boni quod in tempore evenit, Autor est; vel ipse solus efficiendo, vel causas secundas movendo ut efficiant. At mali moralis Autor in tempore esse nequit, adeoque nec velle potest: nec creaturas racionales movet, incitat, aut impellit ad malum, nec efficit ut illæ male agant. Verum de re Theologica hic nimis diximus, nisi quod quæstio illa non potuit aliter, nisi valde mutilate, tractari.

Quæst. IV. An omnia futura Deo præsentia fuerint, ab æterno? Affirmârunt multi ex Patribus antiquis. Hinc inter Scholasticos mota est controversia, de modo hujus præsentia. *Aquinas*, cum sectatoribus, dicunt futura esse Deo præsentia, etiam secundum esse reale: *Scorus* vero, solum secundum esse objectivum. *Thomistis*, è nostris nonnulli adstipulantur,

lantur, inter quos est *Strangius De Vol. Dei circa pecc.*
lib. 2. cap. 7.

Thef. I. *Futura omnia*, etiam quæ maxime contingentia sunt, à Deo non minus certo & perfecte præsciebantur, quam si ipsi præsentia fuissent secundum esse reale. Nec credibile est patres antiquos, per præsentiam futurorum apud Deum, aliud intellexisse! sed Thefin hanc Theologis probandam, & contra Socinianos tuendam relinquimus. Nobis in præsentia argumentum satis efficax est pro illius veritate, quod Scientia Dei perfectissima sit.

Thef. II. *Res tamen futurae, secundum esse reale, nullo modo Deo præsentis fuerunt, ab æterno.* Contraria assertio adeo inconsulta est, & ab omni captu humano remota, ut in ea refutanda supervacaneum sit immorari. Si enim futura Deo præsentia fuerunt ab æterno, secundum esse reale, necesse est ut existentiam actualem habuerint ab æterno, seu quod æternitati coextiterint, ut nonnulli è Scholasticis insulse affirmant. Sic autem nullum futurum unquam fuit futurum, nec ulla fuisset eorum præscientia, in Deo.

Respondent adversarii, nihil esse futurum respectu Dei, sed tantum respectu temporis sequentis.

Replicamus nihil quidem esse post Deum, eo sensu quo una res dicitur posterior tempore, ad aliam quæ non amplius existit. Existunt tamen actu res, quæ ab æterno erant futuræ, nonnisi infinito intervallo temporis (ut ita loquamur) postquam extitit Deus, adeoque etiam ad eum, dici possunt futuræ fuisse. ut per se patet. Deinde si res fuerunt futuræ, ratione temporis secuturi, hoc est quoniam in eo primo erant extituræ, & tempus illud non coextitit Deo ab æterno, non fuerunt ei ab æterno præsentis: Extituræ enim erant in certo illo temporis articulo, & ad eum prima earum existentia fuit allegata, nec ante fuerunt præsentis.

Repliat

Replicat Strangius. "Non ita absurdi erant Thomæ, & Thomistæ, ut existimarent res futuras extitisse, secundum reales suas existentias, ab æterno, vel antequam existerent : Sed hoc volunt, æternitatem cum sit tota simul permanens, & omne tempus complectatur, attingere etiam rerum futurarum actualem existentiam. Adeo ut quod est præteritum, aut præsens, non prius occurrat æternitati, quam id quod est futurum ; quoniam, ratione æternitatis, nihil est prius, aut posterius.

Resp. I. Verum est Thomistas non dicere expresse, res futuras extitisse actu, antequam extiterunt actu : per consequens tamen idipsum dicunt : idipsum etiam dicit Strangius, cum affirmat pag. 598. *Futura contingentia, secundum realem, & actualem suam existentiam, esse Deo ab æterno præsentia.* Quid illud aliud est, quam quod actu existerent cum Deo ab æterno, seu quod præsentia ei fuerint per totam æternitatem.

II. Effatum illud *æternitatem esse totam simul*, seu unum instans indivisibile, à nemine potest intelligi, aut explicari : nec concludunt rationes, quæ in confirmationem illius adducuntur ; sunt vero in oppositam rationes quibus nihil solide responderi possit. Sic enim æternitas non esset longior unico momento temporis : Omnia quæ existunt in tempore coexisterent ; & nihil esset prius, aut posterius in tempore. Siquidem quæ coexistunt eidem tertio singulari, sibimetipsis etiam coexistunt.

III. Dum æternitas dicitur *tota simul permanens*, innuitur & conceditur in eo divisibilitas quædam, quod enim semper manet, continuam habet durationem. Continuitas autem sine partibus concepi nequit.

IV. *Æternitas* quidem *complectitur omne tempus*, ut totam suas partes : sed non complectitur omne tempus in unico indivisibili momento, ut contraria sententia

tentia insinuat; nec omnis pars temporis coexistit seu præsens est toti æternitati. Sic enim dies hot-diernus esset æternitati æqualis; nec ullæ euen temporis differentia. Omne igitur tempus est pars æternitatis.

V. *Æternitas*, secundum partem aliquam sui, *attin-*
git existentiam rerum futurarum, sed non secundum se
totam. Sic enim existentia rerum futurarum esset
ab æterno. Nec prius occurrit toti æternitati *preteri-*
tum, aut *præsens*, quam futurum, quia nullum ex his
toti unquam occurrit: prius tamen occurrit parti a-
licui æternitatis, id quod prius existit, quam id quod
posterius: alioqui præsens & futurum simul existe-
rent.

VI. *Ratione æternitatis nihil est prius, aut posterius*;
hoc est nihil existit ante totam æternitatem, nihil
totâ exactâ, existit, concedimus: in ipsa æternitate
non potest esse duratio prior, & posterior, nega-
mus. Quin è contra, in æternitate à parte ante,
est prius, & prius, in infinitum; & in eadem à par-
te post, est posterius, & posterius, in infinitum.
An non enim spatium quod a principio mundi excur-
rit, est pars quædam æternitatis? in illo autem est
prius, & posterius. Alioqui omnes creaturæ om-
nibus sæculis coexistissent, & nulla fuisset successio.

Objicitur porro, *Deum Scientia intuitiva cognoscere*
res futuras, secundum existentias reales: Sunt igitur ei
præsentes.

Resp. Argumentum debile. Et eodem medio con-
tendere possent Thomistæ omnes res possibles, secun-
dum existentias reales, esse Deo, præsentes. Deus enim
non minus intuitive novit & videt omnes res possibi-
les, seu existentias earum possibles, quam existentias
futuras rerum futurarum. Ex perfectione igitur divinæ
scientiæ, non colligitur præsentia realis rerum non-
dum existentium ad Deum: novit enim perfectissime
cogitationes hominum à longinquo, Psal. 139. Et quod
omnia fu-

futura intuitive cognoscat, indicat tantum eum non minus perfecte scire quæ longissime absunt, quam si realiter essent præsentia, hoc est actu existerent.

Quæstio V. Cum distinguant Scholaſtici, præsertim Jesuitæ, Futura, in *Absoluta*, & *Conditionata*, & hæc rurſus in *Neceſſaria*, & *contingentia*; (neceſſaria autem vocant, quæ sunt in materia neceſſaria, cum ſcilicet conditio habet neceſſariam connexionem cum re, quæ ex ea pendet; ut *ſi Sol orietur dies erit*: *Contingentia*, cum conditio non habet neceſſariam, aut infallibilem connexionem cum re; ut, *ſi Petrus cras incidet in tales ſocios, peccabit*); *Quæritur* inquam, *quid de ejuſmodi futuris conditionatis contingentibus ſentendum ſit.*

Theſis I. Si ponamus, futuras eſſe omnes conditiones requiſitas ut res aliqua exiſtat, licet poſitis illis non neceſſario, ſed contingententer tantum ſequatur, poteſt res illa eſſe futura, & ſæpe futura eſt. Ut ſi Petrus in ebrietatem pronus ſit, & in alios incidet ebrietati deditos, qui & illum una ad immodicæ potandum pellecturi ſint, & Deus animum illius ad reſiſtendum tentationi efficaciter non inclinaverit, futurum eſſe poteſt, ut conſentiat: ſæpius etiam, ſi non ſemper, futurum eſt. Licet contingententer & libere conſentiat. Sic futurum fuit, ut primi noſtri parentes à ſerpente ſeducti, Deo non impediante, de fructu vetito comederent. Et Deus ab æterno præſcivit, poſita tali tentatione, & ſe non impediante, fore ut conſentirent.

Theſis II. Res tamen non eſt, etiam conditionate, futura, ex una aliqua conditione, licet talis ſit quæ aliquid conferat ad illius eventum; niſi reliquæ conditiones neceſſariæ ponantur. Ut Petrum, ſi congruenter rogabitur, daturum eleemoſynam; Si incidet in tales ſocios, peccaturum. Vera enim iſta non ſunt, niſi ſuppoſitis reliquis conditionibus requiſitis. Si enim egenus, aut minime liberalis ſit, ſi perſonam petentem ode-

rit, &c. non daturus est eleemosynam : si ad peccatum illud ad quod tentabitur, nullam habeat propensionem specialem, aut animo averso, ex accidenti aliquo sit ; scilicet ex avaritia forte, vel superbia, vel metu amicorum, aut superiorum ; & imprimis, Si Deus, ex gratia sua, animum illius, adversus tentationem obfirmaverit, non consentiet. Unica igitur ex conditionibus requisitis posita, non sequitur aliquid esse futurum. Quin neque possibile. Nam possibile non est effectum sequi, nisi positis omnibus causis, & conditionibus requisitis : Nihil enim esse potest, nisi per causas sufficientes, si modo per ulla causas esse possit.

Thesis III. Multo minus futurum est aliquid conditionate ex conditionibus quæ non sunt ponendæ seu futuræ, (ut Antichristum salvatum iri si in gratia decesserit). Sed tantum esset futurum. Quod autem solum esset futurum, non est futurum, sed ad summum possibile. Nec in hisce demonstrandis opus est immorari, cum ex paucis illis quæ diximus, cuivis intellectui bene disposito satis sint manifesta.

DISPUTATIO VII.

De Essentia & Existentia : ubi & de re Præterita.

Quæst. I. **Q**uid sit existentia? Communiter respondetur Existentiam esse, per quam res formaliter ponitur extra suas causas efficientes. Dicunt autem Causas efficientes, quia extra causas internas, materialem & formalem, nihil esse potest,

quod ejusmodi causis constat. Dicunt etiam *formaliter*, quia per actionem, res ponuntur *efficienter* extra causas suas efficientes, & denominantur productæ. Sed *productum esse*, & *existere*, non sunt formaliter idem. Ideo autem per existentiam, res dicuntur *formaliter* poni extra causas efficientes, quia priusquam existunt, seu in statu possibili, in virtute causarum latere dicuntur.

Thesis. Mala est illa definitio existentia.

1. Quia non convenit omni existentia, puta non existentia Dei, sed tantum creaturæ. Deus enim non est extra virtutem suæ causæ, quia causa ipsius nulla est.

2. Quia res quæ perierunt, sunt extra virtutem suarum causarum efficientium; (non enim redeunt in virtutem illam, nec semper eadem singulares reproduci possunt); Non tamen existunt.

3. Formaliter poni extra suas causas, nihil aliud est quam in virtute earum non contineri: at quædam quæ existunt actu, in virtute causarum suarum continentur: ut omnia illa quæ jam producta sunt, & possunt destitui, & denuo produci; de quibus in quæstione tertia hujus Disputationis.

4. Poni extra causas non est notius, sed obscurius, quam esse seu existere.

Alii dicunt Existentiam esse, *per quam res est simpliciter extra nihil*, seu extra statum puræ possibilitatis. Sed hoc nihil aliud est, quam si dixissent, *Existentia est per quam res non est nihil simpliciter*, hoc est aliquid reale positivum, aut ens actu, vel ens simpliciter. Quod non est notius quam existere in rerum natura.

Addit Derodon existentiam explicari per *coexistentiam cum tempore præsentis*. Sed contra.

1. Quia rem coexistere cum tempore præsentis, præsupponit eam existere: adeoque sic explicatur existentia per seipsam.

2. Co-

2. Coexistere cum tempore præsentī, est attributum respectivum, habitudinem dicens ad tempus: at existentia est affectio rerum absoluta.

3. Coexistere cum tempore præsentī, nihil aliud est quam esse præsens, oppositè ad præteritum, & futurum: adeoque est species quædam *esse in tempore*. At esse in tempore, & esse simpliciter, seu existere, non sunt idem. Prius enim naturā res existit, quam est in tempore. Nam existentia positiva pertinet ad formalem rationem Entis, estque prima illius differentia: Esse vero in tempore quocunque, est differentia consequens.

Cedo igitur, inquires, meliorem definitionem?

Resp. Iniquum est postulatum. Quia quædam sunt affectiones rerum per se evidentes, seu quæ per attributa notiora declarari non tantum non indigent, sed nec possunt. Ut *aliquid, nihil, esse, & non esse*. An igitur *esse & existere* sunt idem?

Resp. *Esse* absolute, et sine adjecto, idem est ac existere, vel positive, vel negative. Ut *Dies est, cæcitas est in oculo*, idem est, ac *Dies* (hoc est lux diurna, vel tempus in quo lux illa esse solet), *existit, cæcitas existit*. Esse autem cum attributo, quod directe affirmatur, ut cæcitas est privatio, solam identitatem terminorum denotat, adæquatam. aut inadæquatam. Hinc ulterius quæres, an negationes et privationes existant.

Resp. Eo modo quo sunt, existunt; scilicet negative, non positive. Quia *non esse* entis, est *esse* non-entis.

Quæst. II. *An existentia realiter distinguatur ab Essentia, in eadem re* (in diversis enim manifestum est realiter distinguī; ut existentia Socratis nullo modo est essentia lapidis): Affirmat Derodon. dicit enim Essentiam & Existentiam distinguī *realiter extrinsece*. Nullam utique distinctionem rationis agnoscit, quæ non sit realis. Revera tamen cum communi sententia convenit. Et quam reliqui fere omnes

distinctionem rationis appellant, distinctionem realem extrinsecam vocat : de quo infra. Sed plurimi pro parte affirmante citantur à Comptono, Metaph. disp. 5. sect. 1.

Thes. I. Existencia non distinguitur ab Essentia, ut res, aut modus rei. à re ; adeoque nullo modo realiter.

Pater, 1. Quia si existencia esset res, aut modus distinctus ab Essentia, haberet etiam suam existentiam distinctam, quandoquidem esset ens actu, ab Essentia distinctum.

2. Sequeretur etiam essentiam, ut distinctam ab existencia, habere existentiam : adeoq; existere sine existencia.

3. Sequeretur etiam essentiam & existentiam rerum creatarum, posse à se invicem separari, ita ut altera esset in rerum natura sine altera. In creatis enim realiter aut modaliter distinctis, non sequetur contradictio si uno pereunte aliud permaneat.

4. Per existentiam res est absolute Ens : at nihil potest esse ens, per aliquid realiter à se distinctum. Ergo essentia non est ens absolute, per aliquid distinctum, sed per seipsam.

5. Non sunt multiplicanda entitates sine necessitate. At nulla est necessitas adstruendi existentiam distinctam ab essentia ; ut ex solutione objectionum patebit.

Obj. I. Solius Dei proprium est, existere per Essentiam : Er. omnis creatura existit per existentiam, ab Essentia sua distinctam.

Resp. Solius Dei proprium est existere per Essentiam, hoc est necessario, & immutabiliter existere, conceditur : sine existentia realiter distincta, negatur. Commune enim est omni enti actuali, existere per essentiam ; hoc est sine existentia realiter distincta. Et hoc sensu creatura, licet possit non existere, quamdiu tamen existit, per essentiam existit.

Inst. Quicquid convenit rei per Essentiam, non potest ei non convenire. At existentia potest creaturæ non convenire. Ergo,

Resp.

Resp. Non potest ei non convenire, quamdiu essentia ei convenit; verum. Simpliciter non potest, nempe quando ipsa essentia non convenit, nego.

Instant. Essentia rei non potest ei non convenire. Nihil enim esse aut concipi potest sine essentia propria.

Resp. Essentia non potest rei non convenire ex hypothesi quod res existat, esto. Absolute non potest, negatur. Quando enim perit res, perit etiam Essentia: & antequam existit res, Essentia ejus est nihil.

Obj. III. Essentia rei est ab æterno, est ingenerabilis, & incorruptibilis: non sic existentia. Distinguuntur igitur realiter.

Resp. I. Negamus ullam essentiam, præterquam divinam esse, aut fuisse ab æterno. Fuit quidem omnis essentia creaturæ possibilis ab æterno; sic autem & existentia.

II. Essentia est ingenerabilis, & incorruptibilis, non simpliciter, & proprie (nam essentia ignis, & animalis, quotidie generatur, & corrumpitur;) sed secundum quid, (ut quidam dicunt) in statu possibili; quia semper fuit possibilis, & nunquam potest esse simpliciter impossibilis. Vel potius, quia partēs illius habent connexionem necessariam; adeo ut nihil quod illis contrarium est, possit rei convenire: quod tamen intelligendum est, ex hypothesi quod res sit. Ut *Homo* immutabiliter est animal rationale, ex hypothesi quod sit. Unde etiam Essentiæ rerum semper eadem sunt in nostro conceptu.

Obj. IV. Alia est existentia rei heri, alia hodie: eadem tamen essentia: distinguuntur igitur realiter.

Resp. Negatur existentiam rei hesternam & hodiernam, esse diversas. Eadem enim semper est existentia cujusque rei, licet in diversis temporibus constituta. Cur enim res singulis momentis, mutare debet existentiam? An non sic res in æternum du-

rantes, novas ac distinctas existentias acquirerent, in infinitum?

Inst. Alia est prima existentia, quam habet res in primo instanti suæ productionis; alia est existentia continuata, quam in sequentibus habet instantibus: Essentia tamen eadem.

Resp. Similiter posset quis dicere aliam esse primam essentiam, aliam essentiam continuatam. Dicimus igitur, existentiam primam, & continuatam, sola ratione distingui; quatenus cum diversis partibus temporis conjuncta est, Et similiter de essentia prima, & continuata.

Obj. V. Omnis creatura est composita ex *esse* & essentia. Ergo *esse*, quod idem est ac *existere*, distinguitur realiter ab essentia.

Resp. Non sequitur: quia compositio illa non est realis, sed tantum in nostro concipiendi modo; quatenus possumus concipere connexionem attributorum rei, cum novimus eam non existere.

Obj. VI. Existentia est accidens Essentia.

Resp. Est accidens in nostro tantum conceptu. Cum enim concipimus essentias rerum præsertim creaturarum, non necessario concipimus res existere actu, sed tantum, (ut jam diximus) habere talia attributa immutabilia, ex hypothesi quod existerent. At non est verum, & proprie accidens. Unde accidens Metaphysicum, & Logicum, a philosophis dicitur; non Physicum.

Obj. VII. Quod est idem cum essentia rei, non potest res sine illo concipi: seu de essentia, non potest vere negari. At essentia concipi potest sine existentia; potest est hæc de illa negari: ut essentia rosæ in hyeme concipitur, cum rosa non existit.

Resp. I. Potest res concipi sine aliquo essentiali, licet non sine omni. Adeoque potest concipi conceptu præcisivo, sine eo quod est idem cum illa; ut cum concipimus Deum & creatorem, aut ut omni-
poten-

potentem, non concepta illius immensitate, æternitate, &c.

II. Quod est realiter idem cum re, non potest vere, in sensu reali, de eo negari. Sic misericordia, & justitia, in Deo, propter realem identitatem, non possunt de se invicem negari, secundum id quod important in recto. In sensu formali, negatur: ut in exemplo dato. Ubi enim est tantilla diversitas rationum formalium, illic unum de alio in sensu formali recte negatur.

Thesis II. *Essentia & Existencia distinguuntur ratione, non autem fide aut pro libitu nostro.*

Patet 1. Quia sæpe concipimus essentiam rei, cum de existentia illius dubitamus. Ut facile formare licet ideas animalium in Luna degentium: merito tamen dubitant omnes qui sobrie philosophantur, an sint in Luna ulla animalia: Ex adverso, certi sæpe sumus de existentia rei, cujus essentiam propriam ignoramus. Ut quid certius est quam esse Lucem? At quid sit Lux, nemo hucusque clare potuit definire.

2. Essentia præbet fundamentum conceptuum quorundam, quos non possumus formare de existentia, seu de re quatenus existit; nam essentia est complexio quædam attributorum, quorum nullum, sine contradictione, potest de re negari. Existencia vero est una simplex rei affectio. Essentia includit aliquid cuique speciei proprium. At existentia est quid commune omnibus rebus. Per essentiam præcise, res non est ens simpliciter, sed tantum secundum quid; per existentiam additam essentiæ, (sic enim à nobis concipitur), est ens simpliciter. Denique existentia est per se nota; at essentia sæpe occulta.

Quæst. III. *An res præterita, id est quæ fuit, sed nunc non est, potest eadem numero redire, seu reproduci.* An enim alia prorsus similis produci possit, nulla esse potest dubitatio. Plerique negari videntur,

tur, præsertim de rebus successivis, ut de tempore, motu, actione.

Thesis I. Eadem res singularis permanens, hoc est quod non essentialiter includit successionem, destruita, potest reproduci, & sæpe reproducitur. Et primo quidem, ubi solum destruitur forma, aut modus aliquis rei, qui de essentia illius est, facile potest idem numero modus, aut forma reparari; ut cum omnes partes mensæ, aut cathedræ, solutis compagibus, separantur, non amplius est mensa, vel cathedra; possunt tamen, & solent omnes reuniri. Estque unio, postquam partes compinguntur, eadem prorsus quæ fuit: quia omnes partes eandem sortiuntur positionem, seu situm quem ante habuerunt. Cur enim putemus novam unionem, licet prorsus similem, non autem eandem produci? Deinde, si Deus annihilaret Angelum, aut Lapidem, quis negaret eum non posse eundem singularem ad esse reducere? Sicut probabile est eandem fore unionem animæ, saltem cum aliqua parte materiæ corporis, in resurrectione, quæ fuit in hoc sæculo.

Obj. I. Unio illa secunda seu restaurata, est terminus aliûs numero actionis. Ergo est novum individuum. Nam cum actio essentialiter sit productio termini, pro multiplicatione actionum, termini producti multiplicabuntur.

Resp. Negatur consequentia. Ad probationem dicimus, actionem essentialiter esse productionem alicujus termini, qui in priori instanti non fuit: Non tamen necesse est, ubi actio est nova, nec unquam ante fuit, terminum etiam esse novum individuum. Sicut pro multiplicatione actionum transeuntium, quæ essentialiter requirunt subjectum extraneum, non necesse est multiplicari subjecta. Quia unum numero sufficit ad terminandas plures actiones. Non igitur ut idem individuum redeat, necesse est eandem numero actionem redire.

Obj. II.

Obj. II. Si eadem individua res posset reproduci, posset etiam habere plures existentias interruptas; unam hodie, nullam cras, secundam postridie, adeoque si essentia sit idem realiter cum existentia, plures essentias,

Resp. Non sequitur rem habituram distinctas existentias, sed tantum unam interruptam. Nec enim probari potest existentiam omnem rei permanentis esse continuam, sine omni interruptione aut oportere ut conficiat duas, aut plures existentias, si interrumpatur.

Thesis II. Licet eadem pars temporis semel elapsi, redire nequeat, (secus enim posset tempus non fluere per partes diversas, aut contrahi posset sæculum ad unam horam) non tamen *video cur idem singulis motus localis non possit denuo redire*. Idem enim motus omnino videtur, qui est ejusdem mobilis, ab eodem principio, & eodem termino, per idem medium, ad eundem terminum. At licet forte nullus ejusmodi motus corporis sit, qui semel absolutus, idem denuo peragitur, quoniam vix unquam idem denuo peragitur, quoniam vix unquam idem plane est medium, propterea quod corpora, per quæ fit motus hac hora, non retinebunt eundem situm hora sequenti: Ponamus tamen Angelum, ab eodem termino, ad eundem, per eandem plane viam, bis se movere, ut ab una extremitate trabis ad alteram, (hic enim quia corpora media non pellit, sed penetrat, medium non mutabit, nec aliunde mutabitur) cur dicemus motus illos esse numero diversos?

Obj. Motus illi fient diversis temporibus. Non igitur erunt idem numero.

Resp. Non sequitur. Est enim tempus motui extrinsecum: adeoque individuationem illius, non magis quam rerum permanentium, variare potest. Sicut non sequitur, res existit per tres horas, vel dies; ergo singulis horis, vel diebus, est alia res. Quod autem
tem

tem in media hora, aut die, non extitit, quid ad pluritatem rei magis confert, quam si in prima aut tertia non extitisset.

DISPUTATIO. VIII.

De Relatione.

CUm res, per mutuas ad se invicem relationes, ubique fere, atque adeo in ipsa Logica, explicentur, consentaneum est, ut non procul ab initio de illis dicamus. Id in Didacticis præstitimus. Eundem ordinem nunc in Elencticis servabimus.

Quæst. I. *An sint Relationes reales.* Negant Cartesiani. *Relatio vocatur*, (inquit Claubergius, Ontosophiæ Sect. 12.) *cum intellectus noster rem unam confert cum alia, propter certam utriusque proprietatem, vel actum, aut aliam quamcunque rationem.* Itaque Relatio omnis, per se nihil aliud est quam operatio mentis. Et Antonius Le Grand, *Instit. Philosoph. part. 1. cap. 7.* Relatio, uti & cetera attributa Substantiæ, non nisi est modus intellectus nostri, rem unam cum alia comparantis. Et alibi dicunt Relationes nihil esse nisi diversos modos cogitandi. Sed mirum est, quod eas inter Attributa substantiarum recenseat Le Grand, cum communes sint substantiarum, & modorum. Quis enim dubitet duas figuras esse invicem similes, aut dissimiles? Magis vero mirandum est, quod omnia substantiæ attributa modos intellectus nostri finxerit. Præpotentes certe illi Philosophi

philosophi sunt, qui substantias, omnibus suis attributis spoliare possunt pro libitu, cessando de iis cogitare; eademque denuo, cogitatione restituere.

Sed missis istis, sit Thesis I. *Relationes intellectus nostri & conceptuum ipsius, ad objecta, & alia quæcunque ad quæ refertur, sunt modi intellectus, & cogitationum ejus.* Omnis enim relatio est modus quidam. Hoc Cartesianis concedendum.

Thesis II. *Non omnes, quin paucissima relationes sunt modi cogitandi; seu actuum mentis, unam rem cum alia conferentis.* Plures enim ex iis sunt affectiones rerum extra mentem. Quin & cogitationes nostræ realiter referuntur ad sua objecta, & voluntatem, ac appetitum quæ movent, etiam tum cum de illis non cogitamus reflexe.

Patet I. Exemplis. Personæ S. S. Trinitatis referuntur ad se invicem, nemine nostrum cogitante. Contrarium asserere est error in fide, non levis. Si autem Cartesiani, de solis relationibus rerum creaturarum loquantur, an non *qui alium genuit*, est ejusdem Genitor, hac est, *Pater*; & quod se habet ut aliud, est ei *simile*, aut æquale, aut aliqua ratione cum eo convenit, sive cogitemus sive non? Et cum *Antonius Le Grand* dicit mentem nostram referre Patrem ad filium, quia enim genuit, an actus generandi est tantum modus cogitandi? Si sic, potest Cartesianus aliquis cogitatione quemlibet hominem gignere. Si non sit, datur relatio independens à cogitatione nostra: Siquidem actus generandi, ex essentia sua, relationem connotat ad rem genitam. Oscitanter igitur hic philosophantur Cartesiani, nec sibi constant.

2. Ex absurdo. Sequeretur enim mentem cum res inter se confert ut cognatas, vel oppositas, &c. non invenire eas, ita erga se realiter affectas, adeoque fingere, et falso concipire. Dices, esse in rebus fundamentum quoddam, cujus ratione mens confert res ad se invicem; adeoque non fingit.

Resp.

Resp. Si per fundamentum illud, res ad se invicem mutuo affectæ sint, tum in se, & priusquam eas conferamus, sunt relatæ: Si non sint, necesse est mentem vel non referre eas ad se invicem, vel fingere ut ad seinvicem affectas, cum non sint.

3. Quædam res essentialiter dicunt ordinem ad alias: ut *Causa* ad *Causatum*, *Pars* ad *Totum*, seu ad partes socias, *Consentaneum* & *Dissentaneum*, ad ea cum quibus consentiunt, & à quibus discrepant, prius ad posterius. Suntque res causæ, partes, cognatæ, oppositæ, priores, &c. antequam ad alias conferantur. Ex essentiis igitur relatæ sunt.

Objicit Claubergius, I. *Res per mentem nostram ad se invicem referuntur.* Ergo ex se non sunt relatæ.

Resp. Contrarium potius sequitur, ut ex secunda ratione patet. Mentem enim referre unam ad aliam, vel est fingere, vel vere ad aliam effectam concipere, hoc est relatam.

Objicit. II. *Relatio est respectus: At res ipsa invicem non respiciunt: cum pleraque earum oculis careant. Sed nos mentis oculo rem hanc & illam adspicimus.*

Resp. I. Puerilis hic lusus est, in Metaphorâ respectus. Res enim dicuntur sic se respicere, non quia oculos habent; sed quia ut oculus rerum aspectu, erga eas certo modo affici solet, ita pleræque rerum erga se invicem, aliquo modo affectæ sunt: Ita ut una sit aliquid alterius, ut pars totius; vel ad esse illius aliquid conferat, ut causa, vel cognitionem essendi cum ea habeat, ut similia, æqualia &c. Et hinc est, quod mens nostra non possit res, ut sic ad invicem affectæ sunt, adspicere, nisi hunc & illud uno intuitu adspiciat.

II. An vero ideo res ad se invicem relatæ sunt, quod nos, mentis oculo, hanc & illam intueamur; ut hic innuit Claubergius? An intuitus noster efficiere

cere potest ut quæ reipsa ab omni relatione immunes sunt, ad se mutuo referantur?

Objicit. III. *Relatio vocatur Habitudo, Gr. schesis. At cum ovum apud nos existens dicitur se habere ad ovum in India, ut simile ad simile, nullus in nostro ovo revera habitus est: sed homo utrumq; ovum in mente habet.*

Resp. Negatur minor. Est enim in ovo, quod apud nos, certa quantitas, figura, color, & qualitas substantiæ, quæ ejusmodi habitum, seu conditionem essendi conficiunt, per quam simile est alteri in India existenti, siye nos de iis cogitemus, siye non. Nec quia utrumque in mente habemus, (licet non ipsa ova in mente, sed solas eorum ideas habeamus) idcirco alterum habitudine ad alterum affectum est, sed ex naturis suis. Vere enim alterum est ut alterum, nemine cogitante. Sed Cartesiani, dum omnia evidenter explicare tentarunt, Relationem, cuius natura exilis omnibus negotium faceffit, potius negare consultum duxerunt, quam explicationem illius suscipere.

Quæst. II. *An sint Relationes Rationis; id est quæ à solo nostro concipiendi modo pendent; & quænam pro talibus habendæ sint?* multi enim hoc nomine comprehendunt, relationes *Generis ad speciem, Subjecti ad prædicatum* in propositione, *Antecedentis ad consequens* in Ratiocinatione: Item *dextrum & sinistrum, ante & post, in Cælo; identitatem rei cum seipsa, &c.* sic ex aliis *Burgersdicius, Instit. Log. lib. I. cap. 7.*

Thesis. *Sunt Relationes quæ dici possunt Rationis. Ut*

1. Illæ, in quibus subjectum & terminus, sunt pura non-entia. Ex. gr. cum duæ Chimære apprehenduntur ut sibi similes, Chimæra vero, & Hirco-cervus, ut dissimiles: Quo referri etiam possent similitudines, & dissimilitudines privationum.

2. Illæ in quibus subjectum, & terminus non distinguuntur, nisi ratione; ut cum *Socrates heri, & hodie*

hodie, dicitur sibi similis: Cum *Humanitas* dicitur hominis humanitas. Nec Relationes istæ cum apprehenduntur, sunt falsæ, aut plane fictæ, (ut si quis putaret solem esse causam procreantem animæ rationalis;) sed analogiam quandam habent ad Relationes reales.

Quod ad exempla à *Burgersdicio* memorata attinet; Genus refertur ad speciem, ejusmodi Relatione quam habet major numerus ad minorem, seu pars ad Totum. Est enim revera Genus major multitudine singularium; species minor, ut exempla animalis & Hominis indicant. Relationes *ante & post, dextri et sinistri* in Cœlo, sunt reales Relationes ad partes corporis nostri. Et variari quidem possunt, prout situm illius ad has vel illas plagas mundi variamus; conveniunt tamen rebus, (sicut priores Generis et Speciei), sive de iis cogitemus, sive non. Fatemur quidem à sola mente, et sermone nostro esse, quod hoc vel illud, hic et nunc sit subjectum vel prædicatum: siquidem potest unum et idem utriusque rationem induere. Sed quod subjicibile, aut prædicabile sit, ex seipso habet. Sicut etiam subjicibile, et prædicabile, nomina Relatorum. Denique, cum res dicitur eadem sibiipsi, nulla proprie in ea oritur Relatio ad seipsam. Omnis enim Relatio aliquid ad aliud refert in obliquo, ut cum Pater dicitur Filii Pater, simile, simili simile: non autem in recto; ut sit cum eadem res cum seipsa comparatur. Cum igitur res concipitur esse eadem sibiipsi, solum concipitur esse illa ipsa quæ est, non autem alia: adeoque non apprehenditur ut relata ad seipsam, sed ut distincta à seipsa.

Quæst. III. *An Relatio Realis realiter distincta sit à fundamento & termino*; hoc est an sit modus quidam physicus, ab his reipsa distinctus, ut *figura à corpore*. Pro Affirmativa multis contendit *Comptonus*, et multos citat in suam sententiam, *Metaph. Disp. 11. Sect.*

7, 8, &c. Negantem amplexi sunt *Hurtado Arriaga*, *Oviedo*, & alii, qui & *Suarium* pro se stare existimant. Sed inter se non plane consentiunt. Quidam enim, inter quos *Suarium*, sentire videntur totam Relationem consistere in Fundamento, connotare tamen extrinsece terminum: Alii vero formaliter includere utrumque, ut *Arriaga Log. Disp. 12. Sect. 8, 9.* Alii aliis terminis utuntur, ut videre est apud *Comptonum*, supra loco citato. Sed nihil ab his diversum, quod consideratione dignum est, intelligere videntur. Questio hæc omnium difficilima est in præsentī Argumento. Sit igitur in ea.

Thesis I. *Relatio accidentalis qua talis est, semper distinguitur realiter à subjecto, cui accidit.* Ut relatio Patris ad Filium, Domini ad Servum. Ratio est; relatio ejusmodi semper nititur fundamento, quod est modus quidam distinctus à subjecto, aut aliud quoddam accidens reale: Ut Relatio Patris actioni generandi filium; Relatio Domini, actioni, emendi, capiendi, aut conducendi servum: Relatio similitudinis inter duos parietes albos, albedini.

Diximus quatenus *accidentalis est*, quia una eademque Relatio, si ad diversa subjecta conferatur, nempe ad proximum & remotum, respectu unius essentialis est, respectu alterius accidentaria. Sic actio generandi filium, essentialiter respicit filium, adeoque relatio ipsius ad filium est essentialis, licet ad patrem, sicut & ipsa actio generandi accidentalis sit. Et similitudo unius albedinis ad aliam, posita illa alia, est ei essentialis, licet similitudo in albedine, sicut albedo ipsa parieti accidentalis sit. Unde inferes omnem relationem esse proximo subjecto seu fundamento essentialem, & necessariam.

Thesis II. *Totum quod extrinsece constituit Relationem non est fundamentum, ut Suarez statuere videtur;*

Sed *ad eam etiam concurrir Terminus* : Albedo enim per se, sine alia albedine, non est actu, & formaliter similis. Nec actio generandi paternitas est, sine filio. Utrum autem Relatio terminum includat ut partem, an ut conditionem necessariam, quæstio est de voce. In qua minus recte loqui videtur Arriaga, qui partem vocat. Nam ipsa actio generandi filium, posito filio est paternitas : at filius non est pars actionis istius, adeoque nec paternitatis, sed terminus. Et ipsa entitas albedinis A, est similitudo ejusdem ab Albedinem B, si modo hæc existat. At Albedo B, non est pars Albedinis A ; adeoque nec similitudinis ejus ad Albedinem B, sed illius terminus. Interim tamen quia terminus, licet extrinsecus sit subjecto & fundamento, est aliquo modo de Essentia Relationis, si quis partem esse contendat, de eo non est litigandum.

Thesis III. Relatio non eodem modo includit fundamentum, & terminum. Nam importat fundamentum directe, & præcipue ; Terminum vero connotat indirecte, & in obliquo, ac secundario. Ut *Paternitas* directe significat actionem generandi filium ; indirecte vero filium genitum. Et æqualitas lineæ A ad aliam B, directe significat Longitudinem lineæ A, indirecte vero lineam B. Ratio est, quia id quod in Relatione fundamentum, vel subjectum proximum vocatur, potest affirmari de illa, in recto, seu in nominativo casu : at Terminus non sic. Ut vere dicitur, Paternitas est Generatio filii activa ; æqualitas lineæ A, ad alteram B, est ipsius Longitudo, & Entitas ; (per se enim est æqualis, posita altera ejusdem conditionis ;) At falsum est filium esse paternitatem ; aut æqualitatem lineæ A, ad alteram B, esse lineam B.

Thesis IV. Relatio nihil est realiter distinctum à fundamento, & termino, simul sumptis. Licet inadæquate distincta sit ab alterutro sigillatim. Concedunt qui
contra

contra sentiunt, de Relatione essentiali, ut videre licet apud *Comptonum* supra Sect. 2. sed verum est de omnibus, quod sic ostenditur.

1. Cum nihil ad aliud referri possit, quin hoc rursus ad illud referatur, si Relatio esset aliqua Entitas realiter distincta à fundamento proximo, & termino, simul sumptis, sequeretur, producta, vel minima Entitate, puta unâ atomo materiæ, mutationem realem, seu physicam, statim fieri, in omnibus partibus Universi. Omnes enim statim evadent atomo isti similes, vel dissimiles, equales, vel inequales. Et ex adverso, si atomus illa interiret, in singulis partibus universi, fieret alia mutatio Physica, pereuntibus, ex singulis illis, aliquot entitatibus realibus distinctis. At utrumque plane absurdum est. Nulla enim causa excogitari potest, cur ex ortu vel interitu unius atomi, tot Entitates, seu modi Physici, orirentur aut interirent; Et quidem ea necessitate, quæ ne divinitus impediri potest.

Resp. *Comptonus*, supra Sect. 10. Oriri modos illos per resultantiam, & emanationem quandam, ex ipsis partibus universi. Ea enim omnibus rebus innata est vis, ut posito termino, producant in se Relationes.

Resp. Sed hoc totum reclamante ratione dicitur. Si enim producta albedine Romæ, (ut exemplum à Comptono adhibitum sumamus,) omnis alia per totam terram, producat in se similitudinem ad eam, cur nec citius, nec serius illam producit? Et si rationi consentaneum esset, albedinem posse producere in se modum physicum, quod evidenter absurdum est, (nemo enim dixerit colores esse operativas physice) quid ad illam productionem conferre posset existentia albedinis Romæ? An hæc excitat virtutem productivam modorum ejusmodi. in omni albedine, per totum orbem terrarum? Aut an gnaræ sunt reliquæ omnes albedines, productam esse hoc instanti albedinem Romæ, ut in actus illos erumpant?

pant? Et cur quælo, pereunte albedine Romæ, pereunt tot Entitates physicae, ubiq; in reliquis? An ipsæ entitates illas statim enecant? At nihil molitur imminutionum suæ perfectionis. An vero Entitates illæ pendent ab albedine quæ est Romæ? An hæc illas sustentat, ut ea pereunte pereant? At illæ non minus sustentant similitudinem illius ad se, quam vicissim. Longum esset omnes absurditates hujus doctrinæ describere. Reliquas igitur lectori pensandas relinquemus.

II. Quæ realiter distinguuntur, in creatis, possunt separari: At Relatio non potest separari à fundamento, & termino. Si enim existant duæ albedines, non possunt non esse similes: & repugnat aliquem genuisse alium, qui non sit illius pater.

Respondet Comptonus, primo, negando majorem: & duplicem instantiam opponit. Primo, *Ubicatio*, inquit, *distinguitur à re ubicata; nulla tamen res existere potest, sine omni ubicatione.* Deinde, *dua minima partes continui existere nequeunt sine unione; distinguuntur tamen realiter, tum à se invicem, tum ab unione.*

Resp. Major certa est; quia, in creatis, in quibus nulla est absoluta necessitas existendi, ut in divinis, ubi una res realiter non est alia, nunquam sequitur contradictio, si altera existat sine altera. Nec ulla res creata, essentialiter requirit aliam determinatam, realiter distinctam, sibi coexistere. Ad priorem igitur instantiam dicimus, nullam rem existere posse, sine omni ubicatione; requirit enim hanc vel illam indeterminate: potest tamen existere sine quavis determinata. Quæstio autem est de pluribus rebus determinatis realiter distinctis. Deinde ubicatio non distinguitur à re ubicata, & relatione præsentis ad aliquam partem spatii: & de relatione illa procedit quæstio. Ad posteriorem instantiam, negamus ulla partes continui esse adeo exiguas, quin existere possint seorsim ab aliis. Ad minorem respondet, distinguen-

stinguendo : duas albedines existere simul posse, sine similitudine formali, licet non sine fundamentali. Sed hæc responsio plane frivola est. Nam similia sunt formalissime quorum unum est ut aliud. At ex hypothesi quod duæ albedines coexistent, modo veræ sint albedines, sublatis omnibus aliis, altera erit ut altera. Habebunt enim Entitates albedinum, ut supponimus : utraque habebit similitudinem fundamentalem, & carebit formali, ut ait Responsio ; utraque denique apta erit producere in se similitudinem formalem, ad alteram, ut prius asseruit *Comptonius*. Quadruplici igitur nomine erunt formaliter similes.

Plurima alia argumenta adferri possent, contra absurdam illam sententiam. Sed hæc in præsentī sufficiant. Quin sufficere posset commune illud quod contra plurimos alios modos, à Scholasticis Pontificiis confictos, militat ; nempe, quod non sint multiplicandæ Entitates sine ratione efficaci, quæ hic nulla est, ut ex solutione objectionum patebit.

Thesis V. Quinimo, ne vel ratione distinguitur Relatio, à fundamento proximo, & termino, simul sumptis, sed tantum ab alterutro seorsim. Quæcunque enim ratione distinguuntur, vel per relationem distinguuntur, vel per negationem, ut supra monuimus, Disp. 3. Quæst. 2. Thes. 7. At relatio non distinguitur à fundamento, & termino per negationem. Non enim est affectio negativa : nec assignari potest negatio, per quam distinguatur. Nec per relationem ; quia sic illa etiam relatio distingui deberet, à fundamento & termino suo, & daretur progressus in infinitum. Denique, mens non potest distinguere unum ab alio, sine fictione, nisi ubi aliquam distinctionem positivam, vel negativam invenit.

At inter relationem Patris, & actionem generandi filium, nullam distinctionem aut fundamentum distinguendi, invenit. Idem verum est de similitudine, et duabus rebus similibus, de æqualitate, & rebus æqualibus. Est enim actio generandi filium, posito filio, Paternitas; Et Entitas albedinis A. posita albedine B. est similitudo ad eam. Nec quidquam aliud mens nostra per Paternitatem, & similitudinem apprehendit.

Obj. I. Accidens realiter distinguitur à subjecto: At Relatio contingens & separabilis, (ut Paternitas, similitudo) est accidens subjecti relati.

Resp. Relationes ejusmodi sunt accidentia subjecti remoti, ut Paternitas, hominis qui est Pater; at non sunt accidentia subjecti proximi, quod fundamentum vocatur: ut respicere filium genitum, non est accidens actionis generandi: Actio enim essentialiter terminum respicit. Ideo autem Pater refertur ad filium, quia actio generandi ad illum refertur.

Obj. II. Si similitudo duarum albedinum non distingueretur ab utraque, sequeretur eandem esse similitudinem prioris ad posteriorem, ac posterioris ad priorem, quod falsum est.

Resp. Non sequetur: quia licet utraque similitudo utramque albedinem complectatur, non tamen eodem modo complectitur; ut *Thesi 3. declaravimus.*

Obj. III. Quæ separari possunt, realiter distinguuntur: At relatio paternitatis separari potest, tum ab homine qui est Pater, per mortem filii; tum à fundamento, nempe actione generandi, qua transacta & cessante, adhuc homo dicitur Pater, quamdiu existit filius.

Resp. Argumentum istud tantum probat relationem separari posse à subjecto remoto & fundamento seorsim, quod non est quæsitum.

Inst. At probat Paternitatem non esse actionem generandi, & filium genitum

Resp. Nec istud probat. Quia ad Paternitatem, non requiritur ut actio generandi, & filius simul sint tempore; sed tantum ut aliquando extiterit actio illa, & ut filius existat de præsentī. Unde ab actione generandi præterita, & filio existente de præsentī, homo est pater. Et in his consistit ipsa Paternitas. Quanquam aliæ sint Relationes, quæ requirunt ut Fundamentum & terminus perseverent, seu in tempore coexistent; ut similitudo æqualitas, &c.

Obj. IV. Sequeretur Relationes filiorum Dei ad Deum ut Patrem, & ad Christum ut fratrem, sponsum, caput &c. nihil esse distinctum à gratia justificante, ac sanctificante, & ipsis fidelibus; quod falsum. Est enim Adoptio beneficium distinctum à justificatione, & sanctificatione. Præter ista enim beneficia, et omnia reliqua quæ in illis continentur, habent jus reale in Deo, & Christo, ut Deo, patre, & salvatore suo: jus autem istud est peculiaris quædam Relatio.

Resp. Negando minorem. Ad probationem dicimus, Adoptionem, & jus illud peculiare in Deo, vel ad eum, esse distinctum inadæquate quidem à justificatione, & sanctificatione, seorsim sumptis; item à sanctificatione ut præcise denotat renovationem peccatoris; et a justificatione, ut præcise notat absolutionem à reatu, et imputationem justitiæ Mediatoris Christi: possent enim illa, sic considerata, esse sine Adoptione integre spectata, et ut de facto se habet in justificatis et sanctificatis. Non tamen distinguitur ab istis beneficiis, si sumantur cum omnibus quæ ea comitantur, nempe sententia Fæderis Gratiæ, per quam adjudicantur iis maxima privilegia, tum in hoc sæculo, tum in futuro, illa scilicet quæ enumerantur Confessione Fid. Britannica cap. 12. Estque illa sententia, una cum supernaturalibus qualitatibus quæ ipsis ingenerantur, fundamentum

Relationis, quæ in Adoptione & jure illo ad Deum continetur. Nec distinguitur Adoptio ab illo fundamento & ipsis fidelibus, seu regenitis simul sumptis.

Obj. V. Si terminus esset intrinsecus Relationi, filius esset de Essentia Patris.

Resp. De Essentia patris quatenus est pater, hoc est paternitatis conceditur : nec absurdum est. Est enim Relatio essentialiter complexum quid, ex fundamento & termino.

Inst. I. Si filius esset de Essentia paternitatis, etiam Pater esset de Essentia filiationis. Unde sequetur filium qua filius est, ex parte saltem esse patrem.

Resp. Negatur prior consequentia. Ratio disparitatis est, quia filius, qua filius, essentialiter est terminus actionis generativæ patris ; at Pater non est terminus illius actionis, sed origo. Unde Paternitas non includit intrinsece Entitatem hominis, qui est pater ; ut filiatio includit Entitatem hominis qui est filius, (est enim filius essentialiter Homo dependens, & originatus ab homine), sed includitur in Patre, qua Pater in concreto.

Inst. II. At saltem, si similitudo albedinis A, ad alteram B, includat essentialiter illam alteram, & similitudo illius alterius, includat essentialiter ptiozem, tum duæ illæ similitudines se invicem includent.

Resp. Inadæquate quidem, & diversimode se mutuo includunt ; ut explicavimus supra Thef. 3. nec illud absurdum est. Et hinc respondebis ad argumentum illud palmare Comptoni, sup Sect. 4. *Esse Patrem*, in nostra sententia, nihil aliud est quam duo homines & generatio. Et *esse filium* est prorsus idem. Utrunque enim sunt hæ tres Entitates. Ergo, in nostra sententia, idem est *esse patrem* & *esse filium*. Nam, licet utrinque nihil aliud sit quam duo homines, & generatio, ex altera tamen parte est homo generationem causans, qui est pater, ex altera est homo generationem non causans, sed terminans, seu per
cam

eam causatus, quæ longe sunt diversa.

Obj VI. Tota ratio Relationis posita est in respectu ad aliud. At iste respectus tenet se ex parte solius subjecti, & fundamenti.

1. Quia *Respicientia*, quæ est totaliter Relatio, est in solo subjecto, propter fundamentum.

2. Quia illa sola subjectum denominat ut respiciens; non autem terminum: hic enim denominatur *respectus*, non respiciens.

Resp. Negatur minor. Ad priorem confirmationem, negamus respicientiam esse in solo subjecto relato. Essentialiter enim connotat terminum, qui in subjecto non est. Ad posteriorem, negatur sequela; Quæ enim extrinseca sunt alicui, possunt ipsum denominari, Quod & hic contingit. Siquidem non solum actio generandi, sed unà etiam filius, denominant hominem patrem. Et ad denominandam unam albedinem similem alteri, altera concurrit. Quanquam & falsum sit, proprie loquendo, Relationem esse in subjecto Relato, nisi remotiori. Ideo autem ei inesse dicitur, quia fundamentum ei inest: ut albedo in Pariete, per quam paries dicitur similis alteri albo. Sed si subjectum proximum respiciamus, relatio de eo quidem affirmatur, et eatenus inesse concedimus; non tamen ei proprie inest, sed cum eo identificatur, licet inadæquate.

Obj. VII. Relatio est forma quædam abstracta, et simplex: non igitur est complexum quid, ex fundamento, et termino.

Resp. Non omne abstractum est quid simplex; ut *Multitudo*, *Trinitas*, *quaternio*. Hæ enim voces significant plures unitates, prout unum numerum conficiunt. Nec multitudo, ullo modo distinguitur à multis unitatibus, simul sumptis.

Inst. Concipimus Relationem; ut quid intercedens inter Relatum, et Correlatum.

Resp.

Resp. Si de subjecto remotiori loquamur, verum illud est. Actio enim generandi intercedit inter Patrem & Filium. Sin de subjecto proximo, non video quomodo verum sit. Et si verum esset, non inferret Relationem distingui ratione à fundamento & termino simul. Aliud enim est concipere res per formas alienas, aliud eas distinguere à seipsis. Sed de his nimis.

Quæst IV. *An sint Relationes non mutua*: hoc est in quibus una res ad aliam refertur, sed non reciprocè. Affirmat Comptonus, *Metaph. Disp. 11. Sect. 14.* Est, que communis sententia inter Pontificios, ut innuit *Arriaga. Log. Disp. 12. Sect. 2.* Est tamen proculdubio falsa. Quare sit.

Thesis. *Nulla est Relatio non-mutua.* Nam sicut omne relatum respicit terminum aliquem; ita etiam omnis terminus relationis est correlatum.

Obj. I. Actus visionis respicit objectum; sed non vicissim.

Resp. Objectum in actu primo seu visibile essentialiter respicit visionem possibilem. Sol enim natura sua visibilis est; veritas omnis intelligibilis; bonitas appetibilis. In actu autem secundo, seu ut actu objicitur, evidentius refertur ad actum videndi, licet accidentaliter: est enim illius terminus. Omnis autem terminus, est alicujus terminus, ac proinde Relatum quid.

Obj. II. Creaturæ referuntur ad Deum; sed non reciprocè. Sic enim in Deo orirentur novæ Relationes, per quas mutaretur, ut de non-creatore in Creatorem, &c.

Resp. Negatur minor nec per novas relationes Deus mutatur, nisi nova Entitas in eo exurgeret, quæ earum fundamentum foret. Atqui, ut una res novam Relationem ad aliam acquirat, sufficit si oriatur nova Entitas extra eam. Ut dealbato alio pariete Londini, hic paries albus similis ipsi evadit, sine ul-

la mutatione sui. Sic ex ortu creaturæ oritur in Deo nova Relatio, sine mutatione, ut Theologi communiter docent.

Quæst. V. An recte dividantur Relata in Relata secundum dici, & secundum esse. Affirmant communiter, sed in utrisque describendis variant. Alii enim dicunt Relata secundum dici esse res absolutas, connotantes relationem; ut Scientia & scibile. Alii quæ solo concipiendi & explicandi modo, videntur esse Relata; ut *ala caput*. Alii esse res ut explicatas in ordine ad alias, ex. g. res spirituales per materiales. Sic Arriaga, & Comptonus. Alii illa quæ dicuntur Relata, sed non sunt. Relata secundum esse alii appetunt quorum tota essentia posita est in Relatione ad aliud. Alii omnia Relata realia. Sit hic.

Thesis I. Male dicitur Relatum secundum dici, Res absoluta connotans relationem. Nam quæ connotat Relationem, quatenus id facit, non est res absoluta.

Et omne relatum quatenus non connotat Relationem, ex. g. pater quia homo, est res absoluta.

Objicit Burgerdicius. Scientia est absoluta qualitas, connotat tamen relationem ad Scibile.

Resp. I. Nulla qualitas, ut talis, est absoluta. Semper enim respicit aliud quod qualificat.

II. Scientia essentialiter dicit respectum ad Scibile, non minus quam causa ad causatum. Non igitur est res absoluta.

Inst. At *ala* ad *alatum* referri dicitur, *caput* ad *capitatum*: sunt tamen res absolutæ.

Resp. Sub ratione substantiarum sunt absolutæ. Sed ut membra, & organa corporum animatorum, sunt vere Relata, ac secundum esse.

Thesis II. Male etiam dicitur, Relatorum secundum esse totam essentiam positam esse in Relatione. Relatum enim in concreto essentialiter includit subjectum, cujus tota essentia non respicit aliud. Ut essentia Patris, præter Paternitatem includit substantiam intelligentem.

Inst.

Inst. At tota essentia Patris qua Pater est, consistit in relatione ad filium.

Resp. Similiter & omnia relata, quatenus sunt relata. Ut tota essentia Scientiæ, qua Scientia est, capitulis qua caput est.

Thesis. III. *Illæ igitur sunt relata secundum dici, quæ dicuntur relata. sed non sunt.* Ut cum Pontificii dicunt Antichristum esse genere Israelitam, è tribu Dan. Vel quæ concipiuntur ad modum Relatorum, sed non sunt Relata: ut cum privatio concipitur ut Relata ad subjectum, è quo formam tollit. Item illæ quæ Analogiam quandam habent ad Relata, quorum nomina sortiuntur. Ut cum Ecclesia vocatur Sponsa, Uxor, & Corpus Christi, &c. Quæ secus se habent, Relata sunt secundum esse. Veram enim essentiam Relatorum habent.

Quæst. VI. *Quid de Divisione Relatorum in Prædicamentalia, & Transcendentalia, sentiendum sit.* Per priora communiter intelligunt illa, quæ gratis respiciunt terminos suos, seu pure ut terminos, nihil circa illos faciendo; & a subjectis suis distinguuntur tanquam formæ accidentariæ, ut volunt *Conimbricenses*, de Relatis quæst. 1. Art. 2. *Comptonus* supra Sect. 2. Per Transcendentalia vero, quæ terminos suos respiciunt, aliquid circa eos faciendo; nempe producendo, connectendo, cognoscendo, amando aut aliquid ab illis recipiendo, & per suas entitates ad eos referuntur, nec proinde à subjectis suis separari possunt.

Thesis I. *Quædam sunt Relationes communissima, seu quæ in omnibus aut plerisque rerum ordinibus locum habent: qualis est Relatio, causæ ad causatum, potentia & actus ad objectum, & subjectum patiens, subjecti ad adjunctum, partis ad totum, oppositi ad oppositum, prioris ad posterius, & vice versa.* Quædam sunt minus communes, seu quæ ad certum ordinem, restringuntur: ut relatio Patris ad Filium, Domini ad subdi-

tum,

tum, vel servum, docentis ad discipulum, quæ in solis rebus intelligentibus locum habent. Sunt etiam quædam Relationes *Essentiales*, ut relatio actionis ad terminum productum, unionis ad res unitas. Aliæ accidentales; ut Relatio Mariti ad Uxorem, amici ad amicum, &c.

Thesis. II. Sed plane *arbitrarium*, & rationi dissonum est, quod relationes communissimæ, & essentielles, è prædicamentis excludantur. Cum illæ nobilissimæ, & cognitu maxime necessariæ sint: Utpote quæ ubique in plerisque disciplinis occurrunt. Et ego in ea sententia sum, ut omnes omnino relationes ad unum prædicamentum Relationis spectare judicem.

Thesis III. *Membra hujus divisionis, juxta differentias quæ ex communi sententia assignantur, varie coincidunt.* Primo enim, plurimæ ex Relatis quæ prædicamentalia vocantur, aliquid faciunt circa terminos suos; ut Pater Filium gignit; Dominus servum conducit, aut emit, aut bello capit, &c.

Respondet *Comptonus*. Pater respicit Filium causando, per actionem generativam; at non per paternitatem; per hanc enim mere respicit.

Resp. Pater igitur quatenus est causa Filii, est relatum transcendentele, quatenus vero est Pater, est relatum prædicamentale. At distinctio ista est plane ficta. Nam Pater non alia ratione est Pater, quam quatenus est causa procreans, seu Genitor filii; ut vel lippis & tonsoribus notum est.

Inst. At Pater transacta Generatione, filium respicit.

Resp. Respicit forte officia parentis præstando, docendo, castigando alendo, &c. At non respicit ut Pater, nisi per actum generandi. Siquidem cum ut Pater, per entitatem respicere nequeat, necesse est ut respiciat per actum illum, licet præteritum. Actus autem præteriti, subjectum non raro denominant.

Ex altera parte, quædam ex Relatis Transcendentibus terminos suos gratis respiciunt, nihil circa eos efficiendo, aut ab iis recipiendo; ut omnia consentanea, & dissentanea, qua talia.

II. Nonnullæ etiam ex illis, Relationibus, quas prædicamentales nuncupare volunt, identificantur cum subjectis inadæquate, non minus quam Transcendentales. Ut ovum, per suam Entitatem, est ovo simile; & duæ Lineæ, per suas Entitates, sunt æquales.

Dices ovum esse ovo simile, per qualitates distinctas; puta per figuram, & colorem: & duas Lineas esse æquales, per quantitatem distinctam.

Resp. I. At tum, saltem figuræ et colores ovorum, per suas entitates, similes sunt.

II. Est etiam ovum ovo simile in substantia.

III. Quantitas distincta à materia nulla est, ut ostenditur in Physiologia. Ex adverso quædam Relationes transcendentales, accidentales sunt subjectis suis. Accidit enim sæpe, unam rem esse causam et effectum alterius. Scilicet cum causa contingenter operatur, et cum effectus oriri potuit ab alia causa. Nec dicas Relationem causæ, quatenus est causa, et effectus, ut effectus est, esse Essentialem: Sic enim Relatio Patris ad filium, qua pater, essentialis est: sicut omni rei quatenus est talis, essentialiter convenit esse talem v. g. homini quatenus est albus, esse album. Reliqua breviter expediam.

Quæst. VII. *An eadem res Relationem habeat ad seipsum.*

Resp. Negative. Relatio enim, de essentia sua est affectio unius ad aliud.

Obj. I. Intellectus cognoscit seipsum: & sic refertur ad seipsum.

Resp. Refertur medio actu intelligendi: sed potius actus ille ad eum refertur; & inde intellectus ipse referri dicitur.

Obj. II. Oculus, dum seipsum in speculo intuetur, refertur ad seipsum.

Resp.

Resp. Mediante specie visibili, non per se

Quæst. VIII. *An ad Relationem necessarium sit, ut Terminus actu existat.* Hic rursus sine ratione distinguunt inter Relationes prædicamentales, & Transcendentales; & de illis affirmant, de his negant.

Thesis I. *Quadam Relationes terminum requirunt actu existentem;* ut relatio Patris ad Filium, Mariti ad Uxorem, similis ad simile. Quanquam differentia ista ad modum loquendi pertinere videatur; scilicet quod actio generandi denominet aliquem patrem, quamdiu vivit filius, non autem diutius.

Thesis II. *Alia non requirunt terminum existentem, sed tantum possibilem.* Ut Relatio causæ ad effectum. Quanquam res videatur causa dici, antequam actu causet, ex hypothesi tantum quod causet, & ob virtutem causativam, seu aptitudinem causandi.

Thesis III. *Quadam ne quidem possibilem terminum requirunt, sed tantum intelligibilem,* seu qui aptus sit ad esse objectivum habendum. Sic mens refertur ad res impossibiles, dum eas intelligit, aut optat. Peculiare enim ei est, quod actus illius terminari possunt ad pura non-entia, quatenus ideas qualescunque eorum potest in se formare.

Quæst. IX. *An Relatum terminatur ad quid absolutum, an ad respectivum.*

Resp. *Relatum non terminatur ad absolutum quatenus absolutum est, sed ad respectivum, seu correlatum.* Ut Pater qua Pater, refertur ad alium non qua homo est, sed qua genitus, seu filius. Et omnino omnis causa ad effectum, quatenus est effectus ab ea pendens. Ratio à priori est, quia omne relatum, quod tale refertur ad terminum: Omnis autem terminus est respectivus. Sicut enim aliud ipsum respicit, ita etiam ipse ab alio respicitur. At respici ab alio est referri ad aliud.

Quæst. X. *Quid de Divisione Relatorum, & Relationum à Claubergio, tradita Ontosophia, Sect. 12. num. 217, in Relationem Originis, Negationis, & Affirmationis,*

firmationis, sentiendum sit. Sub Relatione *originis* complectitur Relationes *principii*, ad *principiatum*, & *causarum* ad *causata*, num. 220. Sub Relatione *Negationis*, Relationes inter Res *distinctas*, & *oppositas*, num. 264. Sub Relatione denique *Affirmationis*, Relationis *Convenientiæ*. *Partis* ad *Totum*, *adjuncti* ad *subjectum*, *Signi* ad *Signatum*.

Resp. Reprehendenda est illa distributio.

I. Quia termini quibus duo posteriora membra exprimuntur, sunt obscuri, eoque nomine inepti. Non enim facile apparet quid Relationibus Affirmationis, & Negationis, Significetur. Omnia enim relata cum diversa aliquo modo sint, de se invicem negari possunt, nulla autem vere affirmantur, nisi relata quædam rationis.

II. Falso fundamento nititur prædicta Divisio, nempe *Relationem*, ut *Distinctam* à rebus relatis, & fundamento *esse purum putum mentis nostra opus*, ut loquitur Autor, supra, num. 217. Mentem autem nostram tribus modis res ad se invicem referre; inferendo, negando, & affirmando. Nam primo, hic concedere videtur Relationem esse aliquid reale, extra conceptum nostrum, licet indistinctum à fundamento, & termino; quod supra num. 207. negare videbatur. Deinde, licet omnia opera mentis nostræ, ut res ad se invicem confert, ad tria ista revocari possent, non tamen, cum conferimus unam rem cum alia, semper vel inferimus alteram ex altera, vel unam affirmamus, aut negamus de altera. Sæpius enim conferimus res, attribuendo illis unum aliquod tertium, & commune. Neque, sicut in relationibus diversitatis, unam de altera negamus, ita etiam in Relationibus convenientiæ, unam de alia affirmamus, ut termini hic innuere videntur. Tercio cum Relationes à cogitationibus nostris non dependeant, ut ostendimus supra quæst. 1. consentaneum est, ut ex naturis rerum, non autem ex illis differentiæ desumantur.

III. Si

III. Si Terminos hic usurpatos, cum rebus quibus significandis adhibentur, conferamus, patet omnes Relationes originis esse Relationes affirmationis, non minus quam illæ quæ peculiariter affirmationis vocantur. Siquidem cum conferimus causam cum effectu, affirmamus hunc ex illa oriri.

IV. Nec cum res ad origines suas conferimus, referimusve, semper illatione, vel discursu, id præstamus, sed sæpe pure affirmando. Ut cum concimus omnia, præter Deum ipsum, à Deo esse. Si autem dicat Claubergius, conceptus istiusmodi virtualiter esse ratiocinativos, idem dici debet cum diversa aut cognata inter se conferimus.

V. Ad Relationes affirmationis refert partes & Subjecta inhæfionis. Quæ tamen ad Relationes originis evidenter referendæ sunt. Sunt enim partes principia totius compositi, & subjectum est fundamentum modorum qui ab eo pendent. Oriuntur enim modi è substantiis & è potentia materiæ, (ut recte loquuntur Aristotelici) sæpius educuntur. Sed de nævis hujus distributionis satis.

Rectius igitur dividerentur Relationes Reales in Relationes originis, Convenientiæ, Diversitatis, & Ordinis. Relationes originis complectentur Relationes principiorum quorumcunque ad principia; efficientis ad effecta, mediorum ad finem, partium ad composita, subjecti ad adjuncta, exemplaris ad imaginem; cui affinis est Relatio signi & signati. Sub Relationibus convenientiæ continentur Relationes similitudinis, & paritatis, sive in iis quæ rebus essentialia sunt, sive in accidentariis. Sub Relationibus Diversitatis, Relationes dissimilitudinis, & inæqualitatis, seu imparitatis, sive in essentiis, sive in accidentibus. Non autem putandum est Distinctionem esse Relationem. Satis enim patet esse negationem. Distinguitur enim res à re, non quia certo

N
mode

modo se habet ad aliam, sed præcise quia non est alia. Denique Relationes ordinis complectuntur omnes Relationes prioris, & posterioris. Relatio enim eorum quæ simul dicuntur, ad convenientiam potius referenda est.

DISPUTATIO. IX.

De Distinctione Rerum à se invicem.

Quæst. I. **A**N Distinctio formaliter consistat in positiva Entitate rerum quæ distinguuntur, an in negatione mutua. Ex. gr. An Petrus & Johannes homines distincti sint, per suas entitates, an vero per hoc, quod Petrus non sit Johannes, & reciproce. Priorem partem tuerentur Suarez, Fonseca, Arriaga, posteriorem Hurtado, Comptonus, & alii.

Thesis. Distinguuntur Res formaliter, à se invicem, non per solas Entitates suas, sed per negationem mutuam sui; seu ex eo quod una non sit alia. Probatur.

1. Omnis res, per se, & necessario, connotat negationem omnium aliarum. Non igitur mirum esse debet quod res per negationem istiusmodi distinguantur.

2. Seclusa ejusmodi negatione, res non distinguuntur, sed erunt idem. Per eam igitur distinguuntur Per negationem enim istam, formaliter tollitur Identitas; & proinde constituitur distinctio.

Replicat Comptonus, per negationem tolli, non veram Identitatem, sed impossibilem.

Resp.

Resp. Nec necesse est veram identitatem tolli, (hæc enim nunquam tolli potest), sed sufficit tolli impossibilem. Sicut Unitas negationem dicit pluralitatis impossibilis. Aliàs enim possibile esset non distinguere quæ distinguuntur, quod falsum est.

3. Distinctio superaddit Enti Rationem aliquam formalem. Nec enim eadem est formalis Ratio *Entis*, & *Distincti*. At nec aliquid positivum absolutum addit, nec Relationem, seu habitudinem. Solum igitur negationem.

4. Percipere & intelligere non possumus res distinguere, dum videamus alteram non esse alteram.

Obj. I. Prius est rem constitutam esse in Essentia, & Entitate sua, quam quod ei conveniat negatio alterius, seu non esse aliam. Ergo prius convenit ei distinctam esse ab alia, quam negatio alius.

Resp. Non sequitur. Nam per *esse constitutam* in tali Essentia, seu Entitate, res non est formaliter distincta, sed tantum talis res in specie. Adeo ut *res*, sic constituta, sit id quod distinguitur; negatio vero aliarum rerum, id quo distinguitur.

Obj. II. Per Differentiam suam res distinguitur ab alia. At Differentia rei non est semper negatio.

Resp. Per Differentiam suam res non solum distinguitur ab aliis, sed etiam ab iis discrepat, seu dissimilis est. Et Differentia proprie supponit distinctionem aliquam, ut natura priorem. Si quidem nihil differt a seipso, quatenus ipsum est.

Obj. III. Res positiva distinguitur à negativa, per suam Entitatem, sine negatione: Ergo etiam à positiva.

Resp. Neg. Anteced. Nam sine negatione Chimæra, Homo non distinguitur à Chimæra. Deinde nulla Entitas esse potest, sine negatione omnium aliarum.

Obj. IV. Sequeretur parietem distinguere ab albedine,

dine, sibi inhærente, per negationem albedinis, quæ est nihil: adeoque distingui ab ea per nihil.

Resp. Non omnis negatio albedinis, est nihil, sed tantum pura negatio. Paries autem est negatio albedinis, seu non albedo, & aliquid amplius.

Obj. V. Ponamus in quantitate A, esse colorem A, color distinguitur a quantitate: At in illo casu non est negatio coloris in quantitate, quia in nullo simul est res ipsa & ejusdem negatio.

Resp. Egregium Sophisma Homonymiæ. Distinguo minorem. In illo casu, non est negatio coloris, ut inhærentis in quantitate, verum est. Non est negatio coloris ut identificati cum quantitate nego. Habet enim quantitas negationem coloris, quatenus non est color.

Quæstio. II. *An res pure possibiles, & non Entia, distinguuntur realiter.*

Resp. Res possibiles distinguuntur realiter possibiliter, hoc est ex hypothesi quod existerent. At non distinguuntur actu. Sic enim sunt nihil.

Obj. Una res possibilis, etiam in statu possibilitatis, non est alia: habet igitur negationem alterius.

Resp. Habet puram negationem alterius, sine entitate actuali; quæ ad distinctionem realem, proprie non sufficit.

Inst. Quæ non distinguuntur sunt idem. At duo non Entia non sunt idem; puta tenebra & cecitas, quadratum rotundum, & materia intelligens &c. Ergo distinguuntur realiter.

Resp. Non Entia, per se, & intrinsece, nec distinguuntur, nisi in nostro conceptu, nec sunt idem: distinguuntur igitur extrinsece. Et negationes quidem, ratione rerum positivarum quas negant: impossibilia vero, ratione rerum repugnantium, ex quibus componuntur. Privationes per subjecta diversa & quibus formas tollunt. Distinguuntur igitur non Entia, ratione, aut in solo nostro conceptu.

Inst.

Inst. Si non-entia per se non distinguerentur, nec non-ens distingueretur ab Ente; à quo tamen maxime discrepat.

Resp. Ens & non-ens distinguuntur distinctione quæ ex altera parte positiva est, hoc est, quæ fundatur in Entitate reali; ex altera vero negativa: quatenus scilicet non-ens non est idem cum Ente.

Quæstio III. Quenam sint Criteria distinctionis Realis. Circa resolutionem hujus quæstionis, contra manifestam veritatem pugnant Doctores Pontificii, & Lutherani, ut dogmata Transubstantiationis, & Consubstantiationis, sine absurdo tueri videantur. Sit igitur.

Thesis. Quacunque separantur à se invicem, aut separari possunt, sine contradictione, sive ambo separatim existant, sive non; quæ sunt in diversis Subjectis, aut in diversis locis eodem tempore, deniq; quorum alterum est causa, alterum effectus, illa omnia realiter distinguuntur. Per Distinctionem realem, hic intellige omnem distinctionem quæ nec ficta est, nec Rationis, ut scilicet modalem includat. Sunt illa omnia per se manifesta, & nulla alia probatione, indigent, quam ut, quæ in contrariam partem obijciuntur, diluamus. Illa autem diluenda redibunt in his controversiis, an idem corpus possit esse in locis distantibus eodem tempore; an eadem res possit seipsam producere. Contra tertium Critrium obijcit Schiblerus *Metaph. Cap. 8. Art. 3.* Ipsi Calviniani admittunt, non arguere distinctionem realem; quod res existant in diversis temporibus. Ergo nec signum est distinctionis realis, quod res sit in diversis locis simul: locus enim rebus extrinsecus est; non minus quam tempus.

Resp. Non sequitur; & manifesta est disparitas. Tempus enim semper fluit: unde una & eadem res coexistere potest diversis illius partibus,

ut palus in flumine diversis partibus aquæ continuo decurrentis. At locus est quid permanens, ac immobile. Et idcirco quæ in partibus illius distantibus existunt, distant, & separantur à se invicem. Et nunquam sequetur contradictio, si unum intereat dum alterum permanet. Adeoque sunt realiter distincta.

Quæst IV. *An omnia quæ realiter distinguuntur, possint à se invicem separari.* Negant Pontificii. Nos distinguimus.

Thef. I. *Si res necessario coexistant, & uniantur, possunt realiter distinguui, licet separari nequeant.* Ut substantiæ divinæ realiter distinguuntur, cum tamen propter necessitatem existendi, separari à se invicem non possint.

Thef. II. *In creatis semper verum est, quæcumque realiter distinguuntur, citra contradictionem separari posse.* Nam omnis substantia creata potest à quavis alia, cum qua unitur, aut uniri potest, separari: Et omnis modus substantiæ creatæ potest ab illa separari. Nullæ enim res creatæ, absoluta necessitate coherent. Unde non sequetur, si separentur, idem simul esse & non esse.

Objicit I. *Comptonus, Relationes non posse separari à suis subjectis, quamdiu existunt termini.* Nec subjecta ab omnibus Relationibus. Ut Relatio Creaturæ ad Deum, separari nequit à Creatura, nec vicissim.

Resp. Argumentum illud nihil probat, nisi concessa distinctione reali Relationis à fundamento & termino, quæ plane ficta est.

Obj. II. *Non omnia puncta continui possunt à se invicem separari, quæ tamen realiter distinguuntur.*

Resp. Negamus distinguui realiter illa puncta, vel partes, quæ separari nequeunt. Et absolute asserimus, omnia puncta cujusq; continui, posse divinitus separari.

Obj.

Obj. III. A parte materiæ divisibili, non possunt separari omnis figura, & situs partium. Semper enim aliquam figuram & aliquem situm partium retinebit.

Resp. I. Si supponamus omnes partes manere unitas, semper retinebunt quidem aliquam figuram, & situm ad se invicem, in toto : sed suppositio illa potest mutari, sine contradictione, adeoque mutari etiam possint omnia quæ ex ea pendent. Potest enim dividi illa portio materiæ, in omnes partes quas continet ; hoc est in puncta indivisibilia, in quibus nulla est partium distinctio, realis, aut intelligibilis : possunt & omnes partes illæ minimæ, in locis distantibus constitui. Unde nulla erit earum figura, nullus situs cum unionem conjunctus, qualis fuit ante divisionem.

II. Posito quod partes maneant unitæ, retinebunt aliquam figuram indeterminatam : at potest quævis determinata ab ea separari. Idem dicendum de omnibus aliis modis.

Obj. IV. *Cartesiani*, Mentem existere non posse sine omni cogitatione : Cogitatio tamen *realiter-modaliter* ab ea distinguitur.

Resp. I. Sine omni cogitatione indeterminata concedi posset. Nullam tamen determinatam necessario requirit.

II. Incertum etiam est an mens semper cogitet : nec à Cartesianis demonstratur. Quod enim dicunt, cogitationem esse de Essentia mentis, etiam creatæ, immane absurdum est, ut in Psychologia, Deo volente, demonstrabimus.

Quæstio V. *An Distinctio modalis*, quæ inter substantiam & modum reperitur, *major vel minor sit Distinctione Reali*, inter duas substantias, aut duos modos ; Quidam enim minorem vocant ; *Comptonus* majorem esse contendit.

Thesis. *Distinctio modalis nec major proprie, nec minor*

Realis est. Patet quia Distinctio non admittit *magis* & *minus*, omnis enim res vel est eadem cum alia, vel non. Si prius nullo modo ab ea distinguitur. Si posterius non potest magis distingui.

Objicit I. Comptonus; Illa magis distinguuntur, quæ minus conveniunt. At minus conveniunt substantia & modus, quam duæ substantiæ, vel duo modi. Hæc enim genere proximo conveniunt; illa genere tantum remoto.

Resp. Nego maiorem. Quia, quæ minus conveniunt, dissimiliora quidem sunt, non tamen distinctiora. Differentia enim potest esse major vel minor; non sic distinctio.

Obj. II. Minor est distinctio inadæquata, quam adæquata; ut corpus humanum minus distinguitur ab homine, quam lapis.

Resp. Distinctio inadæquata, quatenus distinctio (est enim partim distinctio, partim non, & idcirco *inadæquata* vocatur), non est minor adæquata. Ut corpus humanum, quatenus vere distinguitur ab homine, hoc est à mente, non minus ab eo distinguitur, quam quodvis aliud.

Obj. III. Minor est Entitas modi quam substantiæ. Ergo, minus ab ea distinguitur, quam una substantia ab alia.

Resp. Minor est Entitas micæ pulveris, quam Sol, aut Luna: æque tamen ab illis distinguitur, ac hæc à se invicem. Non igitur quia unum ex natura & Entitate sua, imperfectius est alio, magis minusve ab eo distinguitur. Sic enim Substantia magis distingueretur à modo, quam modus à substantia; Creator à Creatura, quam hæc ab illo.

Obj. IV. Minor est Distinctio Rationis, quam Realis.

Resp. Neque hic minor est, quatenus vera Distinctio est. Ex g. æque distinguitur homo, quia Pater, à seipso, quia Dominus, quatenus distinguitur, ac filius,

&

& servus, ad quos refertur. Nam quatenus sic distinguitur, connotat, ut Pater, Filium; ut Dominus, Servum. Idem dicendum est de distinctione quæ à diversis negationibus oritur. Negationes enim illæ non distinguuntur, nisi per res quas negant, hæ autem distinguuntur realiter, vel ut Entia positiva, vel ut non Entia. Distinctio igitur major vel minor dicitur, per analogiam quandam ad ea quæ proprie majora sunt vel minora, prout scilicet fundamentum majus vel minus est.

Quæst. VI. An sit aliqua Distinctio Rationis, quæ non est Realis. Peculiaris est hic sententia Derodonis, qui negat. *Metaphys. contract. pag. 29, 50.* Concedendum Derodoni est, Distinctionem Rationis esse Realem, eo sensu quo Reale opponitur ficto. Distinctio enim quæ Rationis dicitur non est ficta. Sit tamen.

Thesis. Est quædam Distinctio, quæ non est Realis, juxta vulgarem acceptionem Distinctionis Realis, nec tamen ficta. Patet, Quia illa Distinctio Rationis dicitur, quæ nec est ficta, nec inter duas substantias, aut duos modos Physicos, nec denique inter substantiam & modum Physicum. At datur Distinctio istiusmodi. Ut inter Attributa Divina; puta *Misericordiam & Justitiam*, &c. Item inter attributa cujusvis rei simplicis, ut inter *virtutem intelligendi & volendi* in mente nostra, aut Angelo, quemadmodum supra ostendimus, *Disput. 3. quæst. 2.*

Objicit *Derodon. I.* Distinctio Rationis est Ens Rationis, adeoque impossibile.

Resp. Neg. Antecedens, primo quia distinctio qualis nec est Ens Reale, nec Ens Rationis, sed Affectio Entis, vel potius Entium. Deinde, quia Distinctio Rationis sic vocatur, non quia nullum aliud esse habet præterquam à Ratione, seu apprehensione mentis nostræ, sed quia inter plures rationes rerum intercedit, nempe inter plures *habitudines*, aut *negationes*, ut in Institutionibus definivimus.

Obj.

Obj. II. *Attributa Divina, puta Misericordia & Justitia, si considerentur præcise Ratione principii, quod est ipsa Deitas, nec re nec Ratione distinguuntur: si ratione effectuum, qui sunt punire, & parcere, sic distinguuntur realiter.*

Resp. *Misericordia & Justitia in Deo, nec distinguuntur ratione effectuum præcise, nec ratione principii, sed ratione habitudinis diversæ ad effectus illos, quam principium connotat. Adeo ut misericordia sit Divina essentia, prout realiter connotat Relationem ad actum parcendi, vel conferendi beneficia gratuita: Justitia vero sit eadem Essentia, ut connotat Relationem realem ad actum puniendi, vel ad ipsam pœnam infligendam, vel inflictam. Idem verum est de virtute intelligendi, & volendi, in mente creata, & cæteris similibus.*

Quæst. VII. *An sit aliqua Distinctio Rationis Ratiocinantis, quæ (ut vulgo definitur) nullum fundamentum habet in re. Communis est pars affirmans. Nos sic statuimus.*

Thes. I. *Mens humana sæpe fingit Distinctionem, sine fundamento in rebus: ut multi opinantur Episcopum & Presbyterum esse distinctos ordines in Ecclesia. Sed Distinctio Rationis Ratiocinantis, ex communi sententia, non est plane ficta. Idcirco sit*

Thes. II. *Nulla est Distinctio, præter fictam, quæ non habet fundamentum in re. Ratio est, quia mens ubi nullum fundamentum distinguendi invenit, distinguere nequit, sine fictione. Distinguere enim est diversimode concipere: at impossibile est mentem dissimiles conceptus formare, nisi diversitatem aliquam inveniat in objecto, veram, vel fictam. Siquidem sine objecto vero vel ficto nullus unquam est conceptus.*

Obj. *Cum dicimus Homo est Homo, distinguimus inter Hominem & seipsum, ut modo habet rationem subiecti, modo prædicati; vel cum abstracta di-*

distinguantur à concretis, ut Humanitas ab Homine, Entitas ab Ente.

Resp. Ad primam instantiam, cum dicimus *homo est homo*, vel concipimus hominem esse subjectum simul & prædicatum, vel non. Si prius, Distinctio est rationis ratiocinatæ, habens fundamentum in re. Homo enim à parte rei habet aptitudinem subeundi utramque rationem. Rationes autem illæ sunt diversæ ut per se patet. Si posterius, nullo modo distinguimus Hominem à seipso, sed à contra identificamus eum cum seipso, seu concipimus esse prorsus idem. Ad secundam manifestum est, Hominem in concreto, distingui ab humanitate, non tamen ratione ratiocinata, (ut vulgo loquuntur) sed realiter, aut modaliter, saltem inadæquate. Nam Homo, præter Humanitatem, includit varia accidentia, quæ ab ea, saltem modaliter, distinguuntur. Quod si nulla omnino accidentia includeret, adhuc tamen distinguitur ratione, quia homo in concreto, concipitur ut res quæ sentit & ratiocinatur, Humanitas vero, ut virtus sentiendi, & ratiocinandi, vel ut corpus, mens, & utriusque Unio; illa autem ratione ratiocinata distinguuntur, saltem inadæquate, & diversa connotata includunt. Idem verum est de Ente quod significat aliquid non repugnans, & Entitatem, quæ, quatenus ab Ente distinguitur, (interdum enim nullo modo distinguitur), solam negationem repugnantiam denotat.

Quæst. VII. Quid sentiendum de Distinctione formali, & Natura Rei, quam, præter Distinctionem Realem, & Rationis, adstruunt Scotistæ.

Resp.

Thesis. Nulla est Distinctio formalis, diversa à Distinctione Reali, Modali, & Rationis; Omnis enim Distinctio vel est inter duas substantias, vel inter duos modos Physicos diversarum substantiarum, vel inter substantiam aliquam, & modum alterius. Et hæ

hæ omnes reales ab omnibus vocantur : vel inter substantiam & modum suum, quæ modalis vulgo dicitur : vel inter plures modos ejusdem substantiæ, quæ vel Realis, vel Modalis est : vel denique inter plures rationes rerum, aut inter Rem & Rationem suam : Ut inter duas Relationes, ejusdem Rei, ad diversos terminos, vel inter duas negationes ; vel inter Relationem & negationem, quæ Distinctio Rationis dicitur. Distinctio igitur illa, quam *formalem ex Natura Rei*, hoc est, formalem-realem appellant Scotistæ, non potest esse alia quam Distinctio Modalis, vel Rationis. Ut patet exemplis quæ adferunt. Dicunt enim per eam distingui in re corporea, *Quantitatem & Figuram* : Item Relationem, & *Fundamentum*, ut referunt Conimbricenses in Præf. Porphyrii q. 4. art. 2. Inter rationem Entis, & rationem substantiæ in homine, ut refert Arriaga Disp. 5. Log. 11. 4. In primo enim Distinctio est modalis, in secundo & tertio, est Rationis.

Obj. Omnis Distinctio Rationis est per intellectum : at datur distinctio quædam quæ nec Realis, nec Modalis, nec per intellectum est : ut inter gradus essentiæ, in eodem individuo simplici ; prout inter rationem spiritus, Substantiæ, & Entis, in Gabriele. Illa igitur est formalis ex Natura Rei.

Resp. Negatur major. Nulla enim Distinctio est purè per intellectum, præter Distinctionem fictam ; ut supra ostendimus.

DISPU.

DISPUTATIO. X.

De Universalis.

Quæst. I. **A**N recte definiatur Universalis, *Unam aptum inesse pluribus, & illis attribui, seu de illis prædicari.*

Resp.

Thesis. Recte sic definitur, si intelligas universale pluribus inesse, primo per multiplicationem sui in illis, adeo ut unicuique insit distincta natura, licet plane similis. Alioqui si natura aliqua sit prorsus eadem in pluribus, ut Essentia Divina in tribus personis S. S. Trinitatis, non erit Universalis, sed tantum communis. Secundo per identitatem cum illis pluribus, ita ut in singulis ex iis singulæ sint naturæ similes identificatæ.

Obj. I. Albedo est unum quid in nive, & lacte, non tamen ad illa Universalis est.

Resp. Non est Universalis ad substantiam nivis & lactis, (licet quidam universale accidentale, oppositè ad essenziale appellant), est tamen ad albedinem lactis, & albedinem nivis.

Obj. II. Natura Solis est universalis, non tamen est una in pluribus.

Resp. Non est una in pluribus actu existentibus: Est tamen in pluribus possibilibus; aptitudinem autem essendi in pluribus, ad universale sufficere volunt Logici.

Obj.

Obj. III. Anima Socratis est una in pluribus membris corporis sui; quia est tota in toto corpore, & tota in singulis membris, ut communis fert sententia: est tamen res singularis.

Resp. Non constat esse totam in singulis membris. Et si constaret nec in illis multiplicatur, nec cum illis identificatur. Prius autem necessario requiritur ad *Universale*.

Obj. IV. Natura Heminæ aquæ est in una omnibus illius guttis; non tamen Universalis, sed singularis.

Resp. Est una in natura & ratione aquæ præcise, non in ratione Heminæ.

Quæst. II. *An sit aliqua natura Universalis à parte rei*: An vero omnis Natura quæ universalis est, per intellectum universalis sit. Multum agitur hæc quæstio, cujus tamen exigua aut nulla Utilitas est. Est enim de voce *Universalis*, quam alii aliter pro arbitrio accipiunt; nempe utrum natura, v. g. Hominis in se, an ut tali modo concipitur, universalis dicenda sit. Et tandem eo recidit quæstio, utrum unitas similitudinis, inter singularia, ad Universale sufficiat, an vero alia quædam unitas sit necessaria.

Platonis sententia fuit, Naturas universales esse idæas quasdam separatas à singularibus, in mente divina, (ut quidam Platonem interpretantur) existentes. *Socrates* & *Seneca* docuisse putantur, in singularibus ejusdem speciei, esse naturam unam unitate formali, (ut vocant), non multiplicatam ex se, sed per singularitates distinctas superadditas. *Fonsæna* Naturam esse universalem docuit in statu possibili, seu in signo rationis, antequam contrahitur ad singularitates. *Cajetanus* esse unam unitate negativa à parte rei, quatenus in singularibus non distinguitur, hoc est quatenus non est diversa, seu dissimilis.

Ex altera parte, alii contendunt Naturam non ef-

se Universalem nisi per præcisionem, seu abstractionem mentis; de modo tamen præcisionis inter se dissentiunt. *Thomista* enim dicunt præcisionem illam esse *objectivam*; hoc est. quâ ita concipitur natura, ut singularitates seu differentiae non concipiuntur, magis quam si cum illa nec conjunctae, nec identificatae essent. *Nominales* formalem esse contendunt; scilicet quæ vere attingit, omnes differentias, & singularitates quæ cum ea identificantur, verum adeo *confuse* & indistincte, ac si eas non attingeret. Ab his parum dissentiunt, qui dicunt Universale esse hanc vel illam Naturam communem, indefinite vel indeterminate apprehensam. Ambo quidem concedunt naturam esse Universalem *fundamentaliter*, quatenus convenientia realis inferiorum occasionem menti præbet conceptum præcisivum seu abstractivum formandi: negant tamen esse Universalem *formaliter*. His enim terminis uti volunt.

Denique *Cartesius* docet Universalia nihil esse nisi varios modos cogitandi. In hac questione sit,

Thes. I. Nullæ sunt idea rerum separata à rebus ipsis, nisi in mente, vel Divina, vel creata; Humana scilicet vel Angelica. Nec hæ Universales sunt in *Essendo*, sed in repræsentando.

Thes. II. Nulla Natura communis creata, ita est una in pluribus, ut non sit etiam multiplex intrinsece, & per se: Adeoque Unitas quæ Universale constituit, non potest esse illa Unitas formalis, quam *Scotista* adstruunt; si modo vere eam talem esse putaverint. Sic enim una & eadem Humanitas esset in omnibus hominibus; eo modo quo una & eadem essentia Divina, est in omnibus personis venerandæ Trinitatis. Nec Humanitas universalis esset, sed singularis. Deinde supponit sententia illa, singularitatem esse realiter distinctam à natura, ut accidens quoddam ipsius, quod falsum est. Est enim natura, ex g. humana in Socrate, aliisque hominibus, essentialiter, & per se singularis.

Exci-

Excipiunt *Scorista*, contra posteriorem illam rationem.

I. Si natura esset ex se, & essentialiter singularis, non esset communicabilis, nec esse posset Universalis. At posterius est falsum.

Resp. I. Natura dicitur communicabilis pluribus, non quod una eademque in pluribus, sed quod plures omnino similes, singulæ in singulis sint.

II. *Petrus* & *Paulus* conveniunt specie, & differunt numero; eandem igitur habent essentiam, non eandem individuationem. Proinde, essentia, & individuatio, seu singularitas, non sunt idem.

Resp. Non differunt proprie numero, seu singularitatibus, sed tantum distinguuntur, nec eandem proprie & stricte essentiam habent, sed similes essentias, qua ratione habent etiam eandem singularitatem, id est, singularitates similes. Unde in eodem individuo essentia et singularitas sunt realiter idem, sola autem ratione diversa. Quatenus enim natura humana Socratis consideratur ut id per quod Socrates est Homo, *Essentia* illius dicitur; quatenus vero connotat similem naturam in alio, dicitur eandem specie. Quatenus denique distinguitur realiter à reliquis similibus, et ut negat pluralitatem suæ rationis, *singularis* vocatur.

Thesis. III. Natura in statu possibili, in nullo signo Rationis, indifferens est ad hanc vel illam singularitatem, nisi in nostro conceptu.

Patet, Quia, in quovis signo rationis, natura possibilis est contracta ad suam quæq; singularitatem determinatam possibilem ad illam scilicet quam haberet, si existeret. Sicut natura existens contracta est ad singularitatem determinatam existentem. Nec enim aliam habere potest, quam illa quæ cum ipsa identificatur.

Obj. Natura est indifferens ad existendum vel non: Ergo, etiam à pari ad habendam hanc vel illam singularitatem.

Resp.

Resp. Negatur sequela, et paritas allegata. Natura enim creata est indifferens ad existendum vel non, quia non necessario existit, sed potest existere vel non existere. At non est indifferens ad hanc vel illam singularitatem, quia una singularitas necessario convenit cuiq; naturæ. Nec indifferens esse posset ad plures, nisi singularitas realiter aut modaliter ab ea distingueretur. Ex hoc igitur argumento tantum sequitur, naturam esse indifferentem ad singularitatem actu existentem habendam, vel solam possibilem retinendam.

Obj. II. Deus Hominem creaturus, potuit hunc vel illum singularem creasse, puta *Adamum* vel alium; potuit igitur creasse naturam humanam cum hac vel illa singularitate: Proinde natura indifferens est ad hanc vel illam singularitatem.

Resp. Dist. Consequens. Potuit creasse naturam humanam, cum hac vel illa singularitate, id est hanc vel illam humanitatem singularem, seu hanc vel illam, cum sua quamq; singularitate, esto. Potuit creasse unam & eandem numero humanitatem, cum hac vel illa singularitate, puta naturam humanam *Adami* cum singularitate *Adami*, vel *Platonis*, negatur: hoc enim impossibile est: quia natura humana *Adami* non distinguitur realiter à sua singularitate.

Thef. IV. *Natura Universalis concipitur à mente nostra, conceptu præcisivo, seu abstractivo, qui scilicet representat inferiora secundum id tantum in quo conveniunt, non autem secundum differentias, aut multiplicitates: Ut cum concipimus Naturam humanam in communi, seu secundum se. Quod autem ad diffidium inter Thomistas & Nominales attinet, rectius Thomistæ præcisionem hic statuunt Objectivam. Sunt enim in eadem entitate simplici plures rationes formales, quæ aliter distinguuntur quam per intellectum: (licet hoc non concedant Thomistæ, & sic non satis sibi*

constant) quarum idcirco una concipi potest, dum alia non concipitur. Quanquam res ipsa cui rationes illæ conveniunt, semper concipiatur. Ex. g. alia est ratio formalis, per quam homo est homo; alia per quam est singularis, ante omnem operationem intellectus. Homo enim quia Homo, connotat habitudinem ad actus sentiendi, & ratiocinandi. At quatenus est singularis connotat solam negationem pluralitatis, in ratione hominis; Quæ rationes, per se, sive cogitemus, sive non diversæ sunt. Et in rebus quæ constant pluribus naturis, quarum una est communis ipsis cum aliis, altera propria, ut in homine manifestum est, (Corpus enim quodammodo commune habet cum bestiis, mentem vero sibi propriam,) clarius apparet, quomodo mens objectivè unam partem ab alia præscindit. Ratio a priori est, quia omnis præcisio est objectiva. Si enim totum quod est in objecto concipiatur, nulla est præcisio.

Respondent Nominales esse quandam præcisionem quoad modum concipiendi quæ totum quod est in objecto attingit: nempe cum concipitur, v. g. Natura Humana, cum omnibus singularitatibus in quantum conveniunt, adeoque confuse, & indistinctæ, ac si essent unum quid. Sed hæc doctrina nimis confusa est. Primo enim improprie vocatur præcisio quæ est tantum ratione modi concipiendi. Præcisio enim est alicujus præcisiosæ seu divisio ab alio. At non est divisio modi concipiendi a conceptu: Ergo alicujus ex parte objecti. Deinde si præcisio, respectu modi, considerat omnia alicujus ordinis, (puta omnes homines,) in quantum conveniunt, non autem in quantum differunt, vel distinguuntur, tum certe cum concipitur *Animal*, quia tale, non concipiuntur illius differentię: & cum concipitur homo præcise ut homo non concipiuntur differentię Individuantes, quibus homines distinguuntur: idem enim

enim conceptus non potest duntaxat repræsentare animalia in quantum conveniunt, & eadem simul repræsentare in quantum differunt; & ita de reliquis. Adeo ut *Nominales* reipsa præcisionem objectivam concedant, licet verbis negent.

Obj. Sequeretur unum & idem simul, per eundem actum, cognosci & non cognosci. Natura enim Generica, & differentia suæ, & natura specifica cum singularitatibus, sunt idem.

Resp. Sequeretur unum & idem cognosci, & non cognosci, sed non secundum idem. Et licet natura Generica in re simplici, eadem sit cum differentiis simul sumptis, identitate reali inadæquata, non tamen identitate formali, seu rationis. Ex g licet in puncto Mathematico idem realiter sint *indivisibile*, & *inextensum*, nempe ipsa entitas puncti, Ratio tamen inextensionis, & Ratio indivisibilitatis, non sunt idem. Nam inextensio est negatio partium in distinctis locis indivisibilitas est negatio actus dividendi possibilis. Negationes autem illæ distinguuntur aliter quam per intellectum, ut in superiori disput. ostendimus.

Thefis. V. *Licet Natura Universalis concipi soleat per præcisionem, non tamen est aut fit per eam Una, aut Universalis.* Probatur.

1. Quia sequeretur Naturam esse Universalem & non esse pro libitu nostro; esse scilicet, cum de ea cogitamus per conceptum præscindentem; non esse, cum non cogitamus.

2. Una eademque Natura haberet tot Unitates & Universalitates, quod actibus mentis præcisivis concipitur qui inumeri sunt.

Resp. *Intellectuarii*, actum præcisivum quotiescunque repetitur, semper eodem plane modo præscindere naturam ab inferioribus, ac proinde semper facere idem Universale. Contra quia licet idem specie Universale semper faciat, non tamen facit idem numero. Licet enim materia eadem sit, & forma

plane similis, quia tamen forma est aliud singulare, necesse est totum eatenus esse aliud.

3. Ab intellectu natura nihil mutuatur nisi quod per eum denominetur tali modo cognita, quod non est esse unum aut Universale.

Respondent, Naturas inferiorum fieri unum, cum ita concipiuntur ac si essent unum. Contra, quia si illud sufficeret ut fierent unum, tum quia tenebræ concipiuntur ad modum nigredinis, sequeretur eas fieri nigredinem; Et sic de aliis, quæ per idæas alienas concipiuntur.

Thef. VI. *Natura igitur ex se. est proprie, & formaliter, Universalis, antequam præcinditur ab inferioribus.* Patet, Quia Natura ex se est una genere, vel specie, & multiplex, in inferioribus quatenus in illis est prorsus similis; Totum igitur habet quod requiritur ad Universale. Ex communi enim modo loquendi, unum dicuntur quæ ex æte conveniunt, præsertim in essentiis: cui proinde standum est, nec opus est ad intellectum recurrere, ut inde Unitatem & Universalitatem arcessamus.

Excipiunt Intellectuales, I. Unitatem quam natura habet à parte rei, non esse stricte unitatem. Includit enim essentialiter pluralitatem.

Contra, 1. Quia multo minus unitas illa quæ est per intellectum, est stricte Unitas. Et unitati convenientiæ pluribus nominibus cedit. Hæc enim est *Essentialis inferioribus, necessaria, perpetua, & intrinseca*; illa vero *accidentalis, contingens, mutabilis, & extrinseca.*

2. Multa includunt pluralitatem, quæ tamen una ab omnibus habentur: ut omnes res compositæ.

Excipiunt II. Naturam esse tantum *fundamentaliter* unam & universalem, non autem formaliter. Et hac distinctione omnia argumenta opposita satis se diluere existimant; est tamen mera petitio quæsitæ. Nam naturam esse formaliter unam, & universalem, nihil aliud apud illos significat, quam esse talē per intellectum, hoc

hoc autem est ipsum quæsitum. Deinde natura humana non tantum præbet intellectui fundamentum concipiendi se, instar unius, quod est esse fundamentaliter unam, sed etiam in se dicit unam multitudinem naturarum in certa ratione similiarum, seu negationem plurium multitudinū, quod est *formaliter* esse in ea ratione unam: sicut omnes creaturæ sunt formaliter unum mundum.

Hinc inferimus contra Cajetanum, naturam non tantum negative, sed etiam positive unam esse. Convenientia enim singularium est positiva: siquidem hæc per positivas entitates suas conveniunt.

Obj. I. Quicquid existit extra mentem est singulare. Ergo extra eam nihil est universale.

Resp. Quicquid existit extra mentem, est vel unum singulare, vel plura, conceditur; Unum præcise, negatur. Universale vero non est unum singulare, sed multa quatenus conveniunt.

Obj. II. A parte rei nihil potest esse unum, & Multiplex, in eadem ratione in qua est unum, ut ad universale requiritur.

Resp. Distinguendo minorem. Requiritur ad Universale ut sit unum & multiplex in eadem ratione, quatenus spectatur secundum essentiam talis naturæ, puta Coloris vel Humanitatis: non autem simpliciter. Hoc enim est impossibile. Nec in *Intellectualium* sententia obtinere potest, magis quam *Realium*. Juxta illos enim, natura est una per Intellectum, & extrinsece; multiplex vero, extra intellectum, & intrinsece. Sicut secundum nos est una propter convenientiam multiplex veropropter multitudinem singularium.

Inst. At tot sunt convenientiæ quot sunt singularia. Unumquodque enim singulare, cum quovis alio, suam habet convenientiam.

Resp. Tot sunt convenientiæ partiales, quot sunt singularia: Una tamen est adæquata omnium simul. Omnes enim illæ convenientiæ sunt exacte similes Et ea ratione sunt Una. Deinde satis est ad unitatem con-

dyades
 venientæ, quod omnia singularia convenient inter se, licet pluribus convenientiis. Sicut ut mille partes continui unum constituent, sufficit quod omnes uniantur, licet pluribus unionibus, tot scilicet quot sunt ~~digades~~ partium. Cætera inter disputandum diluenda relinquimus.

Thefis. 7. Objectum conceptus quo concipitur Universale, sunt omnia singularia, huius vel illius ordinis, quatenus convenient. Puta objectum conceptus de animali in communi, sunt omnia animalia, in quantum convenient in natura sensitiva. Patet ex Thefi proxima, & ulterius demonstratur in hunc modum. Objectum conceptus de animali in communi, vel est unum singulare animal, sive determinatum, sive indeterminatum; vel aliquot animalia, vel omnia, eaque tum actu existentia, tum possibilia. At nec primum, quia sic non apprehenderetur Universale sed singulare. Nec secundum quia neque sic apprehenderetur Natura sensitiva in tota latitudine. Tertium igitur dicendum est. Deinde adæquatum objectum conceptus Universalis, est totum quod per ipsum repræsentatur: Totum autem sunt omnia individua certi ordinis. Idea enim animalis repræsentat omnia animalia quatenus sunt animalia.

Obj. Universale inest singulis suis inferioribus, & de illis potest prædicari, quod de omnibus inferioribus simul non est verum.

Resp. Universale inest singulis inferiorum, & de illis potest prædicari, non secundum extensionem, seu Universalitatem, sed secundum Naturam tantum & comprehensionem. Ut tota Essentia Naturæ sensitivæ, secundum omnia attributa sua, est in singulis animalibus; non autem in tota extensione, quæ una cum convenientia eorum in quibus extenditur, est forma Universalis.

DISPUTATIO. XI.

*De Genere, Specie, Individuo, &
Differentia.*

QUæst. prima est, quid definiatur per definitionem Generis (& eadem quæstio fieri potest de omnibus notionibus secundis;) Utrum scilicet Naturæ, ut sunt in se; an ut tali modo cognitæ. Posterius affirmant omnes qui notiones secundas denotare affirmant id quod res habent per intellectum. Unde in definitione generis, *Arriaga* definiri vult naturas, non ut sunt naturæ Physicæ & reales, sed ut cognitæ conceptu confuso qui inter inferiora non distinguit.

Thesis. I. Non definiuntur hic natura qua sunt Genera, secundum naturas suas proprias, nec secundum omnia communia Essentialia. Et idem de specie, Individuo & Differentia, est dicendum. Ex g. Non definitur hic Animal, quatenus est Animal. Sic enim Animal non definitur, Attributum Essentiale conceptum ad modum rei per se stantis commune pluribus quæ essentiis differunt, sed vivens sentiens. Nec in definitione speciei, definitur, homo aut equus, quatenus sunt homo & equus, sed quatenus sunt subjecta attributi Generici; aut Attributa essentialia, concepta instar rerum per se stantium, communia pluribus quæ solis accidentibus differunt. Ad Genus enim & speciem perinde est quid aut qualia sint, animal, color, homo, equus, &c. Modo talia sint ut in definitionibus suis exprimitur.

Thef. II. *Non definiuntur in his definitionibus, natura ut subsunt cognitioni nostra. Sic enim definiri deberent Genus & species, Res abstractè considerata, non cognitui differentiiis.* Cum tamen definiuntur juxta intellectuales, quæ prædicari aptæ sunt de pluribus specie vel numero differentibus, vel pluribus ejusmodi insunt, quatenus sunt tales.

Thef. III. *Definiuntur igitur naturæ reales, secundum id quod habent in se, sive concipiantur sive non.* Seu secundum affectionem, vel rationem communissimam, ut in definitione Generis, *animal, color, lapis, virtus, & reliquæ naturæ similes, secundum genericitatem, seu quatenus sunt communes pluribus quæ essentiis differunt; id est, ut sunt Genera.* In definitione speciei subijcibilis, definiuntur, *homo, equus, albedo, fortitudo, quatenus sunt subjecta generum suorum: Speciei vero prædicabilis, eadem res, & similes, quatenus sunt communes his solis quæ accidentibus tantum differunt.* Seu omnes res quæ species sunt secundum *specificitatem, sive ut species sunt.* Unde & definiuntur res istæ secundum aliquid quod ipsis essentiale est. Essentiale enim est animali, esse multiplicabile in plures species; & homini esse multiplicabilem in plura individua; Adeo ut non sit simpliciter verum, non definiri naturas genericas & specificas secundum essentiam spectatas. Et hoc sensu concedimus quod dici solet, *definiri naturas, ut substrate sunt notionibus Generis speciei, &c.*

Obj. Illud definitur in definitione Generis, (simile de reliquis dicas), quod affirmari potest de speciebus. At natura secundum *Genericitatem* non potest affirmari de speciebus: Non enim verum est *Homo est animal secundum genericitatem.* Siquidem sic homo esset genus.

Resp. Distinguo minorem. Natura secundum *Genericitatem* non potest affirmari de singulis speciebus seorsim; potest tamen de omnibus simul. Vel
non

non potest affirmari de speciebus (intellige figillatim) secundum extensionem, sed secundum reliquam naturam, seu comprehensionem.

Quæst. II. *An definitio Generis, scilicet quod sit prædicabile de pluribus specie differentibus, in quæstione qua quaeritur quid res sit, i. e. ad modum rei per se stantis, bona sit.*

Resp. Affirmative. Traditur enim per Genus, quod est attributum essentiale commune, vel prædicabile de pluribus, in quo differt ab individuo & accidente; & per differentiam quæ in eo sita est, quod habeat se ad modum rei per se stantis, per quod differt à differentia; & quod commune sit pluribus quæ essentiis differunt, hoc est speciebus, in quo à specie differt. Contra obijciuntur nonnulla, quæ non solum Tyronibus, sed & doctis negotium faciunt.

Obj. I. Quicquid definitur per Genus & Differentiam, est species: At Genus non est species. Omnis enim species habet aliquod supra se genus. At Genus hic complectitur sub se omnia Genera. Deinde si esset aliquod genus Generis, daretur etiam illius aliud Genus, & sic in infinitum.

Resp. Ad minorem: Genus non est species in communi, esto. Non est species particularis, nego. Est enim species universalis, seu attributi communis. Nam universale seu attributum commune, dividitur in Genus, Speciem, & Differentiam. Sed *instari* potest. Si Genus esset species quædam particularis, comprehenderetur sub specie tanquam inferius. At Genus est superius specie.

Resp. Genus in communi, quatenus sortitur rationem speciei cujusdam, ut dictum est, continetur sub specie in communi. Quod igitur dicitur Genus esse superius specie, verum est de solo Genere particulari ad speciem particularem; ut de colore ad albedinem, vel de Animali ad hominem, &c.

Ad

Ad priorem probationem, minor distinguenda est: Genus complectitur sub se omnia Genera, quatenus præcise sunt Genera; at non sub omni alia ratione. Ut complectitur sub se Universale, non qua Universale, sed qua Genus est. Universale autem, quæ tale, nec est Genus, nec Species, sive in communi, sive in particulari: Sicut *animal*, quæ animal, nec est homo, nec brutum.

Inst. Ergo Universale erit & superius Generi, & inferius.

Resp. Diversa ratione, ut jam declaravimus; nec est absurdum.

Ad posteriorem probationem, negatur sequi progressus in infinitum: quia Genus in communi non habet supra se aliud Genus in communi, sed tantum attributum quoddam latioris extensionis, puta Universale, vel prædicabile. Et licet hoc etiam habeat aliquod aliud attributum superius, puta affectionem communissimam, tandem tamen devenitur ad rationem supremam, nempe *aliquid*, vel *intelligibile*, cui nihil est superius.

Obj. II. Genus, cum Attributum commune sit, non potest definiri per Differentiam, quæ Attributum proprium est.

Resp. Genus non potest definiri per differentiam in communi. Potest tamen per suam differentiam, quæ differentia quædam est particularis.

Obj. III. Species, Differentia, & Accidens, prædicantur de pluribus specie differentibus in quid. Ex. gr. *Species* de Homine & Bestia, *Differentia* de Rationalitate & Irrationalitate, *Accidens* de Figura & Motu. Ergo Definitio convenit aliis præter Genus.

Resp. Verum est antecedens de communi ratione speciei, Differentiæ, & Accidentis; non autem de specie, Differentia, & Accidente particulari, ut sunt notiones primæ.

Inst.

Inst. Color est Accidens ; & tamen prædicatur de pluribus speciebus in *quid*, puta de albedine & nigredine.

Resp. Est Accidens respectu subjecti colorati ; ut ad *bovem, ovem, chartam, &c.* At non est accidens ad albedinem, & nigredinem, sed Genus.

Obj. IV. Pars non prædicatur de Toto : at Genus est pars speciei : hæc enim componitur ex Genere & Differentia.

Resp. Vera est major de parte in abstracto ; ut *caput* non prædicatur de corpore animalis. At de suo toto prædicatur quævis pars in concreto. Genus autem de specie in concreto prædicatur, non in abstracto ; puta *animal* de homine, non *animalitas*. Quanquam Genus non proprie pars sit speciei, sed analogice tantum, quatenus unum est ex Attributis ipsius essentialibus.

Obj. V. Definitio prædicatur de pluribus specie differentibus in *quid* : At Definitio Generis non est Genus. Ergo prædicari de pluribus specie differentibus in *quid*, convenit alii quam Generi.

Resp. Ad minorem, Definitio Generis est ipsum Genus explicatum, seu explicite cognitum : nec differt à Genere, nisi accidentaliter, aut penes conceptum clarum & obscurum.

Rogabis, cum Genus in communi, sit species quædam universalis, vel Attributi communis, utrum sit subalterna, an infima.

Resp. Esse infimam. Ratio est quia inferiora Generis, scilicet hoc & illud Genus, puta *animal, color, &c.* item Genus supremum, subalternum, & infimum, proximum, & remotum, non differunt in ratione Generis, nisi accidentaliter : sicut *homo albus* & *niger*, sunt differentię tantum accidentales hominis.

Quæst. III. *Quomodo genus prædicetur de Individuis ; scilicet ad modum Generis, an ad modum Speciei ?*
Thes.

Thef. I. *De Individuis completis*, puta de Socrate & Bucephalo, Genus prædicatur ut Genus, nempe incomplete, ut loquuntur in Scholis; hoc est tanquam Pars Essentiæ per se stans, ut exempla data ostendunt.

Thef. II. Sed de individuis incompletis, qualia sunt *hoc animal*, hæc Substantia, hoc Ens, hoc Corporeum, & similia attributa generica individuata; hoc est ut restringuntur ad certas individuaciones, prædicatur ad modum speciei. Ut cum *animal* prædicatur de *hoc animali*, prædicatio est speciei, quia est completa; hoc est attributum in illa exprimit totam Essentiam Subjecti, saltem confuse & obscure.

Obj. In hac prædicatione, *hoc animal est animal*, prædicatum est aliquid quod affirmari potest de pluribus specie differentibus, estque per se stans: Ergo, est Genus.

Resp. Si absolute spectetur est Genus; at non prout refertur ad subiectum *hoc animal*.

Inst. *Hoc animal* est vel Socrates, vel Plato, vel Cyllarus, vel Bucephalus, vel aliud quoddam individuum completum hominis, vel bestię. Ergo attributum *animal*, in hac prædicatione, non denotat totam Essentiam subiecti.

Resp. Est aliquid ex his à parte rei: nullum vero in nostro concipiendi modo. Sic enim, nihil aliud denotat, quam *animal singulare*: hoc autem ut sic consideratur, est *animal duntaxat cum singularitate*. Singularitas enim in Essentia rei non censetur.

Quest. IV. Quo sensu Genus sit Attributum Remotum Individuorum?

Resp. Non quasi Species aut Differentia propius iis convenirent, essentive medium reale, & proprie dictum, inter Genus & Individua: sed tantum quod ex individuo aliquo non infertur immediate Genus,
puta

puta ex Socrate, animal; sed prius Species, & deinde Genus. Cujus ratio est, quia Genus latius patet quam species. Mens autem cum plura attributa disparis extensionis, infert ex aliqua re, prius sumit quod minus late patet.

Quæst. V. *An recte definitur Species subjcibilis, quæ immediate locatur sub Genere: Prædicabilis vero quæ predicatur de pluribus solo numero differentibus, ut tota eorum Essentia. Sunt illæ definitiones Porphyrii, & communiter probantur.*

Thesis. *Posterior Definitio recte se habet. Sed prior reprehendenda est; quia prius definiebatur à Porphyrio Genus, per habitudinem ad suas species. Hic igitur ubi Species rursus definitur per habitudinem ad Genus, Circulus in definiendo committitur.*

Ad hanc rationem communiter respondent Logici, Relata (qualia sunt Genus & Species subjcibilis) non posse aliter definiri, quam per mutuam sui mentionem; licet in obliquo. Ut Pater definitur *is qui habet filium*, & filius qui est à Patre. Verum sic falsum tradunt doctrinam, de Ratione definiendi. Nec enim relata definiuntur per expressam mentionem sui, ut in definitionibus Porphyrianis Generis & Speciei Subjcibilis fit, sed tantum per implicitam, in qua non considerantur ut relata. Exempla patris & filii non concludunt: sic enim definitiones eorum essent plane nugatoriæ: cum sensus prioris esset, *Pater est is qui habet eum qui est à Patre*: Posterioris vero, *Filius est qui est ab eo qui habet Filium*. Aliter igitur definiri debet Pater, *is qui alium genuit*; Filius vero *qui genitus est ab alio*. Similiter Genus definiri debet *Attributum Essentiale, consideratum ad modum rei per se stantis, commune pluribus quæ essentiis differunt*; non autem commune pluribus specie differentibus, aut pluribus speciebus:
Species

Species vero quatenus est subjectum Generis, Unum est è pluribus, quibus convenit aliquod Attributum essentiale commune.

Contra relationem Generis ad speciem, Sophismata sunt quæ sequuntur.

Obj. I. Relata non possunt de se invicem affirmari; quia semper distinguuntur realiter; ut Pater et filius &c. At Genus affirmatur de specie.

Resp. Vera est minor, de Genere et specie *materialiter* consideratis; id est de Naturis particularibus, quæ sunt genera et species; at non *formaliter*; seu ut sunt Genus, et species. Genus enim sic consideratum, complectitur omnes suas species; ut Animal, qua Genus, hominem, et brutum: una autem species non potest affirmari de alia.

Obj. II. Relata sunt simul Natura. At Genus et species non sunt simul natura. Genus enim est prius natura quam species: quia illam ut pars essentialis constituit.

Resp. Hic etiam minor non est vera, de Genere & specie *formaliter*, seu secundum Genereitatem, & specieitatem consideratis; sed tantum *materialiter*, ut sunt tales naturæ particulares, puta *Animal*, et *Homo*, *Color*, et *Albedo*. &c.

Obj. III. Species est Correlatum individuorum Non igitur Generis.

Resp. Species est Correlatum individuorum, non ut subijcibilis, qua ratione est correlatum Generis, sed tantum ut prædicabilis.

Quæst. VI. *An species Subijcibilis, qua talis sit Universalis.*

Resp. Negative; quia species sub illa ratione non habet quidquam sibi inferius, sed tantum aliquid superius, vel æquale, scilicet Genus et differentiam propriam Deinde subijcibilitas, nec Universalitas est nec affectio illius necessaria. Convenit enim rei particulari, et singulari.

Obj.

Obj. Species subijcibilis, qua talis, vel est Universalis, vel singularis. Non singularis: Ergo Universalis.

Resp. Negatur major. Sub ratione enim subijcibilitatis, nec est Universalis, nec singularis. Sicut Homo qua doctus, nec est cæcus, nec videns. Absolute autem et citra illam rationem, est Universalis.

Quæst. VII. *An de individuo recte dicatur, quod de uno solo prædicetur, & identice scil. De seipso.*

Resp. *Affirmative.*

Obj. I. Individuum prædicatur de hoc & illo individuo.

Resp. Verum est de individuo in communi, non in particulari.

Inst. Individuum Equinum est individuum particulare prædicatur tamen de Bucephalo et Cyllaro.

Resp. Individuum Equinum licet particulare quoddam sit ad communem rationem individui, est tamen species quædam ad omnes equos singulares.

Obj. II: Petrus prædicatur de Petro Apostolo, et Petro Ramo.

Resp. Petrus prædicatur de hisce secundum nomen tantum, seu æquivoce: non secundum naturam aliquam nomine significatam. Sensus enim harum prædicationum est, *utrumque nomine Patri vocari.*

Inst. Petrus Apostolus prædicari potuit de Apostolo & Piscatore, non autem secundum nomen tantum: Ergo de pluribus.

Resp. De pluribus sola ratione distinctis, verum est: Realitur negatur; fuerunt enim *Apostolus & Piscator*, quatenus de illis prædicabilis fuit *Petrus*, unus et idem homo singularis.

Quæst. VIII. *An differentia possit definiri.*

Resp. *Affirmative.* Tum enim differentia in communi definiri potest, prout in Institutionibus factum est; tum etiam differentia particularis, ut talis est
res

res vel perfectio rei. v. g. *Subsistere per se*, quod est differentia substantiæ; definitur non indigere subiecto sustentante, vel nulla re indigere, ut existat, præter concursum conservativum primæ causæ. Differentia etiam aliquando definitione explicanda est, scil. quoties non effertur terminis per se notis. Licet, in Differentiis effereendis, ab ejusmodi terminis abstinendum sit, qui definitione indigent.

Obj. Differentia non constat Genere, & Differentia: Ergo definiri nequit definitione Essentiali:

Prob. Antecedens non constat Genere; quia Differentiæ in nullo conveniunt: sunt enim rationes formales, in quibus res adæquate discrepant: Nec Differentiæ; quia sic daretur Differentia Differentiæ in infinitum.

Resp. Neg. Primum Antecedens. Differentiæ enim omnes, quæ tales, conveniunt in his, quod sint attributa propria suorum subiectorum, & quod redant ea inter se dissimilia. Ad Probationem dico, per differentias suas res differunt in omnibus, præterquam in hoc attributo communissimo, quod unaquæque ab altera differat, & sic differentia est adæquata. Nihil autem cogitari potest quod in aliqua ratione communissima, cum aliquo alio non conveniat: Ipsum enim non-Ens in eo convenit cum Ente, quod utrumque nominari & concipi possit. Maximæ igitur differentiæ conveniunt in ratione communi differentiæ, & hæc convenit cum ratione convenientiæ, quod utraque sit *habitus* quædam, seu ratio alicujus Rei.

Inst. Nihil potest esse simul ratio conveniendi & differendi. Ut cum virtus percipiendi sit ratio formalis per quam spiritus differt à materia, quomodo potest esse ratio per quam cum ea convenit?

Resp. Differentia est ratio differendi, quæ talis ratio particularis; ratio autem conveniendi, præcisè quæ differentia, in actu Signato. Ut virtus percipiendi

endi qua talis, est ratio discriminativa spiritus & materiæ; at qua præcise differentia quædam est, convenit cum differentia opposita materiæ; adeoque cum materia ipsa. Et ambo, nempe spiritus & materia, in hoc conveniunt, quod virtus percipiendi sit differentia unius, carentia autem hujus virtutis sit differentia alterius.

Ad Probationem posterioris partis, negatur consequentia. Quia licet quarundam differentiarum excogitari possint aliæ differentiæ, tandem tamen devenitur ad terminos per se evidentes, qui nullis notioribus declarari vel possunt vel indigent.

Quæst. IX. Cum ratio Differentiæ in dissimilitudine aliqua consistat, & essentialis quidem in dissimilitudine essentiæ, sicut accidentalis in dissimilitudine accidentium, *an quævis dissimilitudo essentiæ sufficiat ad differentiam specificam*, ut vocatur. Et hic aliæ quæstiones discutiendæ veniunt: scilicet an omnia individua specie differant; seu an species infima rationem habeat Generis ad sua individua: Et supposito quod quædam specie non differant, an dissimilia aut inæqualia in essentiis esse possunt? De Individuis ejusdem ordinis procedit quæstio; ut de duobus ovibus ejusdem avis; item de dissimilitudine in essentiis, & de inæqualitate in perfectione essentiali. Nam quod ad individua diversi ordinis, puta *Socratem* & *Bucephalum*, illa specie differre omnes concédunt. Conceditur etiam individua ejusdem speciei, sæpius esse dissimilia & inæqualia in accidentibus. His præmissis, sit

Thef. I. *Non omnia individua specie differunt: sive Species infima non est genus ad sua individua.*

Probatur. Quæ specie differunt sunt dissimilia, in Essentiis, hoc est, Attributa quædam essentialia habent disparata, seu dissimilia: At non omnia individua sunt dissimilia. Ut duæ lineæ, aut duo circuli æquales; duo ova ejusdem avis, magnitudine paria. Nulla

P

enim

enim in his differentia excogitari potest, præterquam in accidentibus. Deinde Genus est pars tantum Essentiæ speciei : At species infima non est pars tantum essentiæ Individuorum ; sed totam eorum essentiam continet. Species igitur infima non est Genus, ad sua individua.

Objicit Ramus, & Ramistæ, qui contra statuunt.

I. Species infima est totum, cujus essentia ad singula individua communiter attinet. Hæc autem sunt illius partes subjectæ ; Ergo est Genus ad sua Individua.

Resp. Non omne Totum cujus essentia ad singula Subjectorum communiter attinet Genus est, sed tantum ejusmodi Totum, quod unicum tantum eorum Attributum Essentiale denotat. Utrumque enim tam Genus quam species Infima, Totum est ad sua inferiora ; sed hæc totum simpliciter est, quia integram Essentiam individuorum continet : illud secundum quid tantum ; quia continet duntaxat totam eorum essentiam communem.

Obj. II. G. Dounamius, *Dialect. lib. I. cap. 27.* *Forma differre & specie differre ! at singuli homines Forma differunt. Habent enim, ut omnia Entia & non-Entia, propriam formam per quam sunt, id quod sunt, & à cæteris distinguuntur.*

Resp. I. Fieri potest ut singuli homines specie differant. Hinc tamen male infertur conclusio universalis, de omnibus Individuis. Potest enim unus homo habere aliquid essentiale, quod alius non habet. At quis sanæ mentis simile judicium faceret de duabus lineis æqualibus, & ejusmodi, innumeris singularibus, quæ exacte sunt similia ?

II. Negamus omnia individua forma essentiali differræ (talis enim forma intelligenda est). Siquidem plurima solum habent formas vere & realiter distinctas ; hoc est, quarum una non est alia. At non omnia habent formas essentielles dissimiles, sed multa

multa plane similes. Nec distinctio & differentia confundenda est, ut in argumento fieri videtur.

Obj. III. Singuli homines inter se differunt, vel genere, vel specie; non genere, ergo specie.

Resp. I. Nec Genere nec specie differunt, in ratione hominum, seu quatenus sunt homines; sed tantum distinguuntur.

II. Licet ut homines sunt, differrent, non tamen par est ratio omnium reliquorum singularium.

Inst. Homo non est species singulorum hominum, species enim qua talis refertur ad Genus tantum, non autem ad Individua. Ergo est Genus.

Resp. Neg. Conseq. Quia non omnis natura communis est Genus, sed illa tantum cujus inferiora essentiis differunt, & quæ in illis multiplicatur.

Obj. IV. Individua omnia differunt Individuationibus, seu singularitatibus; hæ autem de eorum essentiis, sunt.

Resp. Non differunt Individuationibus, sed tantum distinguuntur. Unde & individuationes in censum attributorum Essentialium non recipiuntur.

Obj. V. *Arist. Metaph. lib. 2. cap. 3.* dicit infima Genera de solis individuis prædicari. Seneca Epist. 58. Hominem Genus Catonis, Ciceronis, &c. appellat. Stoici apud Laërtium in Zenone, dicunt Socratem esse speciem specialissimam. Jurisconsulti etiam hominem Genus appellant, & apud omnes fere scriptores occurrit *Humanum Genus*.

Resp. Levia sunt ista omnia. Dicuntur enim species infimæ ultima genera, & individua species specialissimæ, non quia hæc essentiis differunt, sed per analogiam quandam ad ea quæ vere genera & Species sunt. Quia scilicet species infima dividitur in individua, sicut quæ vere Genera sunt, in species. Quod autem ad appellationem *Humani Generis*

attinet, in ea Genus non sumitur sensu Logico, pro natura communi, sed pro collectione similium, quæ considerantur ut plura distincta : & idem valet ac *omnes homines*, aut *aliqui* ex omnibus ordinibus. Quin si ex ea sequeretur Hominem esse Genus, ad singulos homines, à pari sequeretur Herculem esse Genus ad suos posteros ; hi enim vocantur Genus Heraclidarum, apud Porphyrium, Isag. cap. 2.

Thef. II. *Individua ejusdem speciei non possunt esse dissimilia in Essentiis.* Est contra Arriagam, de *Anima Disp.* I. Sect. 7. N. 224: Probatur, quia non aliunde provenit Differentia specifica quam à dissimilitudine essentiali. Quæ igitur in Essentiis differunt, necesse est ut differant specie.

Respondet *Arriaga*. Differentiam specificam esse notabilem ; qualis non est omnis dissimilitudo essentialis. Sed contra, quia si ab hac regula discedamus, scilicet, quod differentia specifica in dissimilitudine essentiali posita sit, nullam de ea ideam figere possumus. Quis enim definiet quantanam differentia sit notabilis, quanta non ? Tantilla igitur dissimilitudo in essentia rei, ad differentiam specificam sufficit.

Obijcit autem : Cognitiones de Petro & Paulo, sunt aliquantum dissimiles, & magis differunt quam duæ cognitiones de solo Petro ; non tamen differunt specie.

Resp. Distinguo Antecedens. Si duæ cognitiones altera de Petro, altera de Paulo, objecta plane similia repræsentent, ut si Petrus & Paulus per eas concipiantur præcise ut sunt individua Humana, nullo modo dissimiles erunt. Si vero aliquam dissimilitudinem, etiam accidentalem, in illis repræsentent, erunt dissimiles. & idcirco specie diversæ. Dissimilitudo enim in repræsentando est ipsa differentia essentialis cognitionis. Nec quia differentia in objectis non facit ea specie differre, ipsæ cognitiones de iis non differunt specie. Habemus enim conceptus specie diversos

diversos de eodem individuo; dum diversa illius accidentia, aut etiam attributa essentialia intuemur. Ut cum concipimus mentem Humanam ut peccato vinctam, & immortalem.

Thef. III. Nulla Individua ejusdem speciei, sunt inæqualia, perfectione seu virtute essentiali: Est contra eundem Autorem; & hinc probatur; quia inæqualitas in essentia, dissimilitudinem infert, in qua consistit differentia specifica.

Objicit, I. *Arriaga* loco supra citato, Cognitio de Petro solo, non differt specie à cognitione de Petro & Johanne simul, ut omnes fatentur: sunt tamen cognitiones illæ perfectione inæquales; quia altera ex iis plura objecta repræsentat.

Resp. Mirum Argumentum ab homine acuto profectum. Nam,

1. Non constat perfectiorem esse cognitionem quæ plura objecta repræsentat: contendere enim potest aliquis, cognitionem numeri binarii esse æque perfectam ac cognitio ternarii.

2. Si omnes fatentur cognitiones in argumento memoratas, esse ejusdem speciei, fatentur certe id quod aperte falsum est. Sunt enim cognitiones illæ essentialiter dissimiles. Altera enim repræsentat unum tantum hominem; altera duos: altera distinguit inter partes objecti, altera non: altera duas ideas continet, altera unicam.

Objicit, II. Si quævis inæqualitas sufficeret ad differentiam specificam, sequeretur me specie differre à quovis alio homine, modo unico puncto materiæ eo major fuerim, quod absurdum est. Adde quemlibet puerum differre specie à seipso adulto.

Resp. Nego minorem. Quia quodvis punctum materiæ, cui anima unitur in homine, est de illius essentia. Siquidem corpus est de illius essentia; nec major est ratio unius partis, quam aliûs. Unde idem adultus specie differt à seipso parvulo.

Inst. Sic idem homo continuo mutaretur secundum speciem, & essentiam.

Resp. Inadæquate, seu secundum quædam essentialia, conceditur : nec absurdum est.

Inst. At accidit homini, quod major, minorve mole corporis sit.

Resp. Accidit ei, si spectentur quæ in eo præcipua sunt, puta virtus sentiendi, & ratiocinandi. Unde reliqua quia minora sunt, non attenduntur, nec censentur mutationem essentialem, seu specificam inferre. Et sic tandem dici potest quamlibet inæqualitatem Essentialem differentiam specificam physicam conficere ; licet Logicam non semper constituat ; eo quod excessus parvus, modo præcipua differentia manserit, nullus censeatur. Ideo autem pro nullo habetur, quia ex eo non solemus attributa rei discriminativa arcessere ; vel quia inæqualitas illa rarius nobis innorescit.

Quæst. X. *An Attributa propria rei, puta differentiarum essentialium, aut proprietates essentiam necessario consequentes, possint alteri communicari.* Hæc controversia orta est ex eo, quod Lutherani, qui ubiquitatem naturæ humanæ Christi affingunt, cum hoc argumento ab Orthodoxis urgentur, quod uni proprium est & Essentiali, non potest alteri communicari : ubiquitas est propria naturæ increata ; nequit igitur communicari naturæ create, puta humanæ, propositionem negent, & contra eam nonnulla objiciant.

Thesis. *Attributa propria essentialia,* qualia sunt omnes differentiarum essentialium, tum primæ quæ constituentes, tum secundæ quæ consequentes, seu proprietates vocantur, *communicari nequeunt.* Dico propria essentialia, quia propria accidentalium sunt communicabilia successive : ut pecunia aut bestia, quæ hodie hujus vel illius proprie sunt, cras sunt propriæ alterius. Et quæ de facto unius propria sunt, alteri convenire potuerunt. Ut Alexandro magno proprium

um fuit, fuisse everforem Regni Perfici, quod multis aliis convenire poterat.

Probatur Thesis I. Si propria essentialia communicari possent, cessarent esse propria, & evaderent communia, quod implicat. Nemo enim proprium diceret (inquit Aristoteles) *quod alii inesse potest.*

Respondet Schiblerus, *Metaph. lib. I. cap. 23. num. 83, 84. proprium cum alteri communicatur, non fieri accidens commune duorum; quia etiam cum communicatur, uni soli primario convenit, ratione cuius est proprium; alteri vero solum secundario, & per communicationem.* Contra, quod duobus convenit, licet alteri primario, alteri secundario conveniat, non est proprium alteri, sed utrique commune. Si instetur, esse proprium alteri quatenus ei *primario* convenit, licet non simpliciter; sic tamen asseritur quod falsissimum est; scilicet attributum essentialē, quod unam speciem rei constituit, aut necessario comitatur, posse idem numero alteri secundario convenire, seu communicari. De ejusmodi enim communicatione quæstio est.

II. Communicato proprio aliquo essentiali, communicatur essentia. At eadem numero essentia non potest esse communis pluribus rebus creatis, aut uni increatæ, & alteri creatæ, v. g. *logo* & *humanitati*: sic enim essentia rerum confunderentur, & quælibet res esset quælibet alia: maneret etiam in sua essentia & specie, ac simul in aliam transfiret. Ut si virtutes percipiendi, appetendi, se movendi, communicarentur materiæ, in sensu composito, utiq; materia, manens materia, esset spiritus, quod immane absurdum est. Et si virtutes illæ mentis Socratis, eadem numero communicarentur corpori Socratis, corpus Socratis esset mens Socratis. Dices, Animam cum omnibus suis facultatibus essentialibus communicari corpori.

Resp. Unitur quidem, sed proprie loquendo, non communicatur: Anima enim non est commu-

nis sibi & suo corpori. Et non obstante unione, proprietate suas essentielles & necessarias, distinctas retinent.

Respondent Lutherani, eandem rationem propriam, quæ essentialiter uni convenit, posse accidentaliter alteri convenire.

Replicamus; Si de convenientia, per identitatem, etiam inadæquatam, loquamur, ut quæstio postular, falsissimum est. Sic enim quævis res posset accidentaliter fieri quævis alia: ut creatura accidentaliter fieri posset Deus; materia, intelligens, &c. At nullo exemplum adducere possunt Lutherani mutationis istiusmodi.

III. Communicato uno proprio essentiali, communicantur reliqua omnia: ut si naturæ creatæ communicari posset ubiquitas aut omniscientia, quæ Deo propria sunt, utique eidem communicari posset æternitas. Et si materiæ communicari posset facultas rationis, communicari eidem posset facultas electionis liberæ. At non omnia propria essentialia cujusque rei, possunt alteri communicari, ut fatentur Lutherani. Ratio majoris est, quia propria essentialia identificantur, saltem inadæquate. Et evidentius vera est de propriis quæ sola ratione distinguuntur, de quibus præcipue procedit quæstio.

Objiciunt *Lutherani*, I. Propria partis communicantur toti; ut homo intelligens dicitur, propter intelligentiam quæ propria mentis est.

Resp. Conclusio quæ hinc sequitur non est contra nos, nec Lutheranos juvat. Non enim sic proprium essentialiale unius communicatur alteri adæquate distincto; cum totum sit inadæquate idem cum quavis parte sua. Quæstio autem est an proprium unius speciei, aut individui, communicari posset alteri adæquate distincto? Ut, an propria unius partis, communicari possunt alteri; ex. g. corpori intelligentia, quæ mentis propria est: Deinde propria partis non communicantur toti simpliciter, sed tantum secundum partem,

tem, seu quatenus totum partem illam continet. Et tribuuntur toti, prædicatione synecdochica. Ut intelligentia tribuitur homini, non secundum se totum, sed tantum secundum alteram partem, scilicet mentem. Adeo ut cum homo *intelligens* dicitur, sensus tantum sit, aliquid hominis est intelligens, vel facultas intelligendi est in homine.

Obj. II. Proprietates elementorum communicantur corpori misto quod ex illis coagmentatur.

Resp. Nihil sequitur. 1. Quia proprietates elementorum non manent in misto, secundum illum gradum juxta quem proprietates eorum sunt: sed debilitantur & ad symmetriam revocantur. Ut, supposito quod corpora quædam ex igni, aëre, aqua, & terra coalescant, non manet in illis calor in summo gradu, qui proprietas ignis est, nec frigus in summo gradu, quod proprietas aëris in statu suo naturali putatur.

2. Quia proprietas unius elementi non inhæret alteri; ut calor ignis aëri, aut aquæ. Sed tantum calor quidam remissus producitur in illis per ignem, qui cum illis sociatur. Multo minus frigus aëris, aut humiditas aquæ, communicatur igni.

Obj. III. Potentiæ vitales sunt propriæ animæ; communicantur tamen corpori, & ab eo usurpantur; ut ab oculo ad videndum, à lingua ad gustandum. Sic *Schiblerus Metaph. lib. 1. cap. 23. num. 80.*

Resp. Hæc etiam ratio inconsequens est. 1. Quia potentiæ vitales, ut potentiæ vegetandi, & sentiendi, non sunt propriæ solius animæ vegetantis, & sentientis, sed totius viventis; & includunt præter virtutem animæ, quæ causa principalis actionum vitalium est, organa corporea: Anima enim sine his non exerit actiones vitæ vegetantis, aut sentientis.

2. Quia, si maxime verum esset potentias vitales solius animæ proprias esse, non tamen communicantur corpori, sed tantum in organa illius vires suas exerunt, ut aliæ causæ transeuntes in subjectum extraneum:
vel

vel ut causa principalis movet instrumentum ; motus autem iste non est proprietas necessaria facultatis animæ, sed accidens organi corporei quod movetur. Improperie etiam dicuntur potentiaæ vitales à corpore usurpari, cum è contra organa corporea ab his usurpentur.

Obj. IV. Ignis communicat calorem suum ferro ignito.

Resp. I. Non *suum* communicat calorem, (nisi in quantum seipsum poros ferri permeantem, communicat, unaque calorem suum) sed alium in ferro producit. Qui enim fieri potest, ut unus & idem individuus calor, simul sit in materia ignis & ferri, nisi hæ invicem penetrarentur?

Contra tertiam etiam rationem quam pro Theſi nostra adduximus, objicit *Schiblerus*. Quædam proprietates partium communicantur toti, non tamen omnes. Nam à *prudencia, sanctitate, scientia, immortalitate* animæ, homo denominatur *prudens, sanctus, sciens, immortalis*, non tamen ab *invisibilitate* animæ denominatur *invisibilis*, nec à *spiritualitate* *spiritualis*.

Resp. Futile argumentum, & homine cordato indignum. Nam,

1. Non quæritur an proprietates & accidentia animæ toti Homini denominationem tribuant, quod ad modum loquendi pertinet ; sed an communicari possint, realiter & physice, alteri ; nempe corpori, propter unionem : Sicut Lutherani dicunt propria Deitatis communicari humanitati in Christo, propter unionem.

2. Falsum est per immortalitatem animæ, hominem denominari immortalem, nisi *secundum quid*, nempe secundum animam. Et similiter sanctus, prudens, sciens dicitur, non quia sanctitas, prudentia, & scientia corpori communicantur, (nisi quod corpus per animam ad opera prudentiæ & sanctitatis applicari

cari soleat) sed quia una aliqua illius pars est prudens, sancta, sciens.

3. Omnes igitur proprietates & accidentia partium, æqualiter communicantur toti, si de communicatione reali loquamur. Ut sicut homo est invisibilis, secundum animam tantum, ita secundum illam tantum est intellegens, prudens, sanctus. Ex quo tamen nunquam sequetur proprietates unius partis communicari alteri, propter unionem.

4. Dispar est ratio! attributorum affirmantium & negantium: hæc enim, quia ad eorum veritatem sufficit, si uni parti conveniant, Toti recte tribuuntur. Illa vero quia universaliter negant, nisi addatur limitatio, nequeunt vere attribui. Ut immortalis, invisibilis, immaterialis, non recte dicuntur de homine, quia significarent nihil hominis esse mortale, visibile, & materiale. Revera tamen immortalitas, invisibilitas, immaterialitas, æque conveniunt homini, ac prudentia & scientia.

Hanc quæstionem ideo latius tractavimus, quia utilis est ad controversiam illam, quæ nobis cum Lutheranis agitur de communicatione idiomatum, in persona Salvatoris.

DISPUTATIO. XII.

De Necessitate & Contingentia, Signo & Signato.

Quæst. I. **A**N omnis Necessitas Contingentiam tollat
& vicissim? Affirmant nonnunquam
Arminiani, & Jesuitæ. Nostri contra
statuunt. Sit igitur

Thesis. Non omnis necessitas contingentiam tollit, sed
quadam

quædam cum ea consistit. Probatur à nostris argumentis plerumq; Theologicis. Posita, inquiunt præscientia, & voluntate, seu decreto Dei, de hoc vel illo futuro, necesse est ut eveniat quod Deus præscivit, & præfinivit futurum. Et tamen sæpe contingenter, ac libere evenit. Idem dicendum de prædictionibus, promissis, & comminationibus pænarum. Si enim cum Deus prævidet hoc vel illud futurum, posset illud non evenire, falleretur, seu falsa evaderet præscientia Divina. Et si cum vult, seu decernit aliquid evenire, posset illud non evenire, voluntas & Decretum frustraretur. Nec cum veritate, aut veracitate ipsius stare potest, si prædictiones, promissiones, & comminationes non implerentur. Exempla innumera in sacris literis occurrunt. Ibi enim impossibile esse dicitur, quin eveniant scandala: contingenter tamen homines alii aliis scandala objiciunt, & in ea impingunt. Ossa Christi frangi non poterant, quia ita prædixit Deus: contingenter tamen milites ab iis frangendis abstinuerunt, &c.

Sed & aliis rationibus confirmari potest. 1. Necessitas connexionis attributorum essentialium cum suis subjectis, consistit cum contingentia ipsorum, subjectorum, quoad existentiam, & emanationem à suis causis. Ut homo necessario est rationalis, ex hypothesi scilicet quod sit; contingenter tamen existit, fuitq; contingens quod Deus illum in principio condiderit. Sic alea ludentem vincere necessario est contingens: & fodientem, qui solum intendit agri culturam, aut ædificium extruere inuenire thesaurum, necessario est fortuitum. 2. Quod potest non esse interventu impedimenti, necessario oritur à sua causa, impedimento remoto: ut Sol supra Horizontem, necessario illuminat illam partem terræ quæ intra Horizontem continetur: potest tamen non illuminare, si corpus opacum Lunæ interveniat, ut in Eclipfi fit. 3. Quod est maxime contingens, ex hypothesi aliqua necessarium est, ut hominem sedere
dum

dum sedet, stare cum stat. Et quicquid est, quando est necessario est; & contra. Item quod contingens est in sensu diviso, necessarium est in sensu composito, & vicissim; ut in exemplis datis. 4. Quod respectu unius causæ est necessarium, respectu alterius potest esse contingens, & vicissim. Ut actus liber hominis respectu hominis contingenter evenit: at respectu Dei, qui actum illum præscivit, & præfinivit, aut voluntatem efficaciter ad eum eliciendum movet, & determinat, (ut sæpe facit), necessarius est. 5. Quod naturaliter est contingens aut possibile, potest moraliter esse necessarium, aut impossibile. Sic necesse hominem lapsum, nec restitutum, peccare; & beatos in cœlo tantum bene agere: si tamen naturam humanam spectemus, non repugnat ei à peccato cessare, habentque peccatores vires naturales quibus abstinere possent à multis peccatis, si serio velent.

Quæstio II. *In quo consistat formalis ratio signi.*

Resp. I. *Formalis ratio signi naturalis, consistit in aptitudine intrinseca ad aliquid potentia perceptivæ indicandum.* Quæ aptitudo non distinguitur realiter ab ipsa re. Ut fumus per se aptus est indicare videntis, ignem esse: naturaliter enim esse non potest sine igne, vel præexistente, vel coexistente.

II. *Sed formalis ratio signi ad placitum, consistit in relatione, seu denominatione extrinseca. ex instituto Divino, vel Humano, & usu, seu consuetudine.* Ut hædera suspensa ante tabernam, est signum vini vendibilis, quia ita volunt Caupones: Voluntas tamen illa nihil intrinsecum addit hæderæ.

Quæstio II. *Quomodo signum respiciat rem signatam, & potentiam percipientem.*

Resp. I. Certum est signum respicere utrumque, (signatum enim potentia perceptivæ exhibet): Non tamen eodem modo. Nam in eo casu, quo signum incurrit

incurrit in sensum externum, hunc respicit præcisè ut objectum Terminativum; mentem vero cui, mediante sensu, signatum exhibet, ut objectum motivum; adeoque ut causa quædam cognitionis mentalis de re signata. Hanc enim excitat, seu mentem ad eam eliciendam trahit, & determinat. Quando autem signum à solo intellectu percipitur, utramque rationem ad eum sortitur. Hoc est percipitur ab eo ut objectum terminans, & simul eundem movet ad cogitandum de re signata. Hinc patet qua ratione signatum respiciat, scilicet quatenus aptum est cognitionem illius menti ingerere, aut eam actu ingerit: adeoque respicit signatum ut per ipsum cognoscibile, aut cognitum est. Cum enim dicimus fumum esse signum ignis, sensus est, esse aliquid quo mens excitatur, aut excitari potest ad cogitandum de igne.

II. Respectus ille signi ad rem signatam, & potentiam perceptivam, est de essentia signi qua signum est. Ratio est, quia nihil posset esse signum, nisi esset aliquid quod percipiendum exhiberet, & potentia perceptiva cui illud exhiberetur. Sublata enim re signata, aut signabili, aut potentia perceptiva quæ eam apprehendat, tollitur à re ratio signi. Ut si nihil sit vini in taberna, aut si is qui transit, cæcus fuerit, hædera nequit illi esse signum vini venalis de præsentia.

Obj. Signa arbitraria, ex accidenti respiciunt rem signatam: ut vox *homo*, hominem.

Resp. Verum est de signis illis materialiter consideratis, id est, quatenus sunt tales res, puta vox, hædera &c. at non formaliter, qua signa, seu posita institutione, & usu.

III. Signum prius respicit potentiam perceptivam cui, quam rem signatam quam significat. Hanc enim non aliter respicit, quam eam exhibendo potentia. Exhibet autem, quatenus perceptionem de

ea causat. Prius igitur respicit cognitionem de re signata, & deinde, ea mediante, rem quæ cognoscitur.

IV. Signum tamen dicitur per respectum ad signatum, non ad potentiam. Est enim signum signati, potentiae vero non signum, sed objectum. Ratio est, quia signum denotat id per quod aliquid percipitur. Solum autem signatum, non potentia percipitur ex signo.

Quæst. III. *Qua ratione signum ingerat seu promoveat cognitionem rei signatæ?*

Resp. Non per influxum physicum. (Fumus enim nullo modo influit physice in cognitionem ignis qui ex eo percipitur; Et par ratio est cæterorum) sed ad modum causæ moralis. Sit enim, exempli causa, signum sensibile; hoc primo in sensum externum incurrit: deinde à phantasia vel mente percipitur: indeque movetur mens ad cogitandum de re signata, idque propter connexionem & habitudinem aliquam inter signum & signatum, sive illa naturalis sit; ut inter vestigium & pedem; sive arbitraria, seu ex usu, & consuetudine; ut inter vocem, & rem significatam.

Quæst. IV. *An signum sit adjunctum?* Quidam enim ad locum adjuncti referunt, ut *Burgersdicius Instit. Log. lib. 1. cap. 19.* Verum non omne signum adjunctum est. Multa enim ex signis sunt effecta rei signatæ: ut *pulsus velox*, & *inaequalis*, qui signum febris est, effectus etiam ejusdem est. Sonus est signum simul, & effectus bombardæ explosæ; Effecta autem rei non semper sunt illius adjuncta. Coactio etiam nubium est signum pluviae: nemo tamen, ut opinor, Adjunctum pluviae dixerit. Qua enim ratione dici poterit pluviam esse subjectum coactionis istius? cum coactio ista nec inhæreat pluviae, nec ei adhæreat, sed antecedit ut causa.

Quæst.

Quæst. V. *Utrum ratio signi in significatione actuali, an in aptitudine significandi, consistat?*

Resp. Quæstio hæc, est de voce. In qua dicendum est, *rem non esse signum*, proprie & stricte loquendo, *nisi cum actu aliquid exhibet potentia perceptiva*. Alias non erit signum simpliciter, sed aptum tantum esse signum. Interim tamen propter meram aptitudinem significandi, signum dici solet. Sic hædera ante tabernam signum vini vendibilis dicitur, etiam cum a nemine percipitur.

Quæst. VI. *An omne signum seipsum sensui offerat?*
Sic enim communiter docent Logici.

Resp. Signa quibus homines admonentur, plerumque sunt sensibilia. *Non tamen omnia signa sunt ejusmodi*. Nam mens hominis regeniti, ex actibus internis fidei, charitatis, luctæ cum carne &c. tanquam per signa, concludit reatum peccati esse sibi remissum, & Deum esse reconciliatum. Signa tamen ista non incurrunt in sensum externum.

Dices, ista esse antecedentia vel consequentia remissionis, non signa.

Resp. Quandoquidem illa mentem movent ad remissionem agnoscendam, non minus quam fumus ad cogitandum de igne, cur non dicerentur signa?

Quæst. VII. *An aliquid signum sit suiipsius?*

Resp. Affirmant multi, sed absurde. Signum enim & signatum sunt Relata. Nihil autem refertur ad seipsum. Quod tamen est signum unius rei, signatum est alterius. Ut vox prolata est signum conceptus, & rei alicujus; signatum tamen vocis scriptæ.

Obj. I. Eadem cognitio seipsam reflexe representat. Adeoque est illius signum.

Resp. I. Dubium est Antecedens, de quo in Psychologia.

II. Si de Antecedente constaret, nulla est consequentia.

quentia. Quia ideo tantum cognitio objectum repræsentare dicitur, quatenus est illius idea in mente. Hoc autem non est esse signum, ut ex definitione ejus constat.

Obj. II. Cum intellectus percipit aliquid esse animal, signum habet quod sit vivens: At animal & vivens sunt idem. Sic Schiblerus.

Resp. Mirum Argumentum. Nam,

1. Animal & vivens non sunt *adequate* idem.

2. Nec Animal est signum viventis, nec omne medium in syllogismo, est signum rei quæ inferitur in conclusione. Sic enim omnis syllogismus procederet ex signis, quod falsum est.

Obj. III. *Acolastus* & *Cornelius* seipsos in Comædia repræsentant.

Resp. Nonnisi quatenus pro aliis habentur, ut lex scenæ exigit.

Quæst. VIII. *An. ut signum officio suo defungatur, necessarius sit discursus, quo signatum ex signo colligitur?*

Resp. Homines sæpe colligunt signata ex signis, per discursum. Ut tamen signatum ex signo percipiatur, discursus non semper necessarius est. Infantes enim & bruta signis moventur; ut canis voce heri ad cursum; nec tamen percipit vocem esse signum voluntatis heri; nec signum cum signato confert, sed tantum sono percepto, determinatur ad motum.

Quæst. IX. *An signatum de signo vere enunciari possit in recto?*

Resp. Non enunciatione propriâ: (Signum enim & signatum sunt Relata adeoque distincta, & diversa. Unde sensu proprio falsum est, *hadra est vinum venale*.) Sed tantum metonymicâ. Ut cum statua *Cæsar* *Cæsar* vocatur. Sic *tres propagines tres dies* dicuntur. Gen. 40. & *septem boves, septemque spicæ, septem anni*. *Petra* dicitur *Christus*, 1 ad Cor. 10. *Paris*

& vinum, corpus & sanguis Domini. Matth. 26. In quibus et similibus, verbum substantivum non denotat identitatem attributi cum subiecto, sed tantum indicat attributum esse signum subiecti. Ratio autem huiusmodi locutionis est, quia signum loco signati ponitur, seu vicem illius quodammodo supplet.

DISPUTATIO. XIII.

De Causis & rerum Causalitate, generatim.

Quæst. I. **Q**uanam sit vera notio Cause in genere.

Resp. Variæ à variis adferuntur. Conimbricenses lib. 2. Metaph. cap. 7. Causam definiunt, id à quo aliquid dependet per se. Verum si pendere ab alio, idem sit, ac ita ad illud affectum esse, ut sine eo esse nequeat, sic terra erit causa ambulationis, lex transgressionis. Cum sine terra nulla esse posset naturaliter ambulatio; & ubi nulla est lex nulla est transgressio. Alii inter quos Ruvius lib. 2. Phys. definit, Principium per se influens in effectum. Sed & hæc definitio peccare videtur. Primo quod tradita sit per mentionem effecti, quod æque ignotum est ac causa. Deinde quia exemplar, finis, & objecta motiva, inter causas recensentur; nec tamen causant per influxum proprie dictum. Tertio quia influxus est terminus metaphoricus, qui alia definitione indiget, & nihil significat præter Causalitatem, quæ æque ignota est ac ipsa Causa.

Alii

Alii dicunt Causam esse, quæ influit per influxum defectibilem; ut à ratione causæ excludant Patrem æternum respectu filii: hic enim influit in esse filii sed per influxum indefectibilem. Sed contra, quia (præterquam quod influxus hoc in loco sit metaphora) accidentarium est ad causam, quod influat influxu defectibili, vel indefectibili, cum satis sit ad eam, si quocunque modo vere influat. Deinde causa nobilior erit si indefinenter influat. Tertio Deus influit ut causa conservans indefectibiliter, in existentiam angelorum, & mentium humanarum, licet non necessitate naturali, ut in generationem filii, sed libere ex decreto suæ voluntatis. Cur igitur non est causa hujus, non minus quam illorum, cum hac differentia, quod hunc causat causalitate naturali, illos libere.

Suarivs definit causam, principium per se influens esse in aliud. Ubi per phrasin per se, excludit causas per accidens & remotas: per influens esse, excludit conditiones, quæ non influunt. Per aliud, exclusum existimat Patrem æternum, à ratione causæ, respectu Filii; quia Filius non est aliud à Patre, hoc est alia essentia, sed tantum alius, seu alia persona. Contra,

1. Quia merito quæret aliquis quid per influens intelligendum sit: Hoc enim non est notior quam vox ipsa Causa.

2. Sine necessitate verbum *influo* in sensum acti-
vum detorquetur, cum ex usu linguæ Latinæ semper neutrum sit.

3. Ostendi nequit causam finalem, Exemplar, & objecta motiva, magis influere in alia, quam conditiones.

4. Minime necesse est ut illud aliud, in quod causa influat, sit alia substantia, sed sufficit si sit modus aliquis: ut patet in mente producente in se varios actus, & ideam seu imaginem quandam sui. Quin definitio illa innuere videtur omnem causam influ-

ere esse aliis substantiæ. Et Causam non esse quæ ad modum tantum, aut accidentia rei aliquid confert.

Deniq; & vulgaris illa definitio Causæ *cujus vi res est*, hoc est, quæ aliquid confert ad esse rei, omnes conditiones complectitur, tam necessarias, quam non-necessarias, quæ tamen non sunt causæ. Absurde enim amissio rei causa recuperationis, absurde peccatum causa gloriæ justitiæ, & miserecordiæ divinæ dicitur: quæ tamen istarum rerum conditiones sunt. At inquirunt quidam, esse causas *sine quibus non*. Contra, 1. Negamus omne *sine quo non*, esse Causam: hoc enim est id quod quæritur. 2. Aliquando vi eorum res est, sine quibus esse potest, & sæpe est. Ut pauper vi accessus ad liberalem tali hora, eleemosynam ab eo accipit, quam tamen accipere potuit alia hora, vel etiam ex rogatu alterius, licet non accessisset: accessus igitur ille non est causa *sine qua non* accipiendi eleemosynam.

Ex his apparet Causam in genere, prout à puris conditionibus, & alijs quæ ad locum originis pertinent, sed causæ non dicuntur, non aliter definiri posse nisi disjunctive, *Quicquid confert ad esse rei, intrinsece constituyendo, agendo, aut objective movendo*, ut in Institutionibus descripsimus.

Quæst. II. *An ut aliquid sit causa alterius, necessarium sit ut existat?* Sive an id quod non existit possit aliquid causare? Conceditur hic ab omnibus. 1. Id quod nunquam existit, id est, quod nec fuit, nec est, nec erit, nihil posse causare. Causare enim est dare esse alteri: at nihil dat nisi id quod habet; vel formaliter, vel eminenter. 2. Conceditur Causam finalem, exemplarem, & objectivam, causare eo tempore, quo non existunt; ut Finis antequam existit, movet agentia rationalia, ad electionem & executionem mediorum. Et exemplar externum, quod quis intuitus est, etiam postquam destruitur, modo idea ipsius in mente remanserit, dirigit ad opus conforme efficiendum. Meritum deniq; bonum, vel malum, incitare potest alium ad agen-

agendum, remunerando, vel puniendo, postquam transivit actio quæ meruit. Hæc enim omnia causant inventu cognitionis, quæ esse potest de illis cum non existunt. 3. Ex altera parte conceditur, Materiam & Formam non posse quidquam causare, nisi cum existunt. Causant enim per se, seu per communicationem sui: vel, ut alii volunt, per unionem: At nec se communicare, nec uniri possunt, nisi cum existunt.

Quæstio igitur procedit de causa efficiente activa, seu quæ efficit per veram & physicam actionem. Et de ejusmodi causa, quidam docent, quod causare possit, etiam cum non existit: sed manifesto errore tenentur, & absurdam sententiam produnt. Actio enim seu operatio non potest esse sine agente actu existente. Siquidem omnis actio seu operatio, est forma agentis quatenus est tale, & de essentia sua ex eo pendet: at nec informare potest id quod non est, nec ab eo dependere. Deinde sicut nihil dare potest id quod nunquam habuit; ita nec de præsentia dare potest, per efficientiam physicam, quod non habet de præsentia.

Obj. 1. *Franciscus Bonæ Spei.* Actio durare potest post interitum agentis; ut si quis, Sagitta ex arcu missa, statim moriatur, manet impulsus qui Sagittam defert, per aliquot momenta. Et postquam ignis bombardæ interiit, globus per eum emissus aliquamdiu movetur. Quin nec projiciens, toto tempore agit, quo res projecta movetur. Existit igitur actio, eo tempore quo agens, ut agens, non existit.

Resp. Non sequitur. Impulsus enim qui imprimatur, ab impellente, in sagittam, globum missilem, & ejusmodi, non est actio impellentis, sed motus ab eo productus in alio, qui, cessante actione, aliquamdiu durat. Nihil autem absurdi est, effectum durare postquam cessavit actio per quam productus est.

Obj. II. Res operari solet in loco in quo non est: Ergo etiam operari potest eo tempore in quo non est. In utroque enim casu est æque separata ab effectu.

Resp. I. Si operatio proprie hic intelligatur, falsum est antecedens: impossibile enim est ejusmodi operationem separari ab agente. Nec ullum agens producit effectum in loco distant, nihil efficiendo in medio, ut in Physiologia ostendetur.

II. Negatur etiam consequentia, propter disparitatem temporis, & loci. Ponamus enim rem operari in loco in quo non est, in eodem tamen instanti existit, & sic non est actio sine agente. At si operaretur eo tempore quo non existit, operaretur quando absolute non esset: adeoque actio exerceretur, & aliquid produceretur, ab eo quod est nihil, & idcirco plane ineptum ad illud producendum.

Quæst. III. Quo sensu causa est prior causato.

Resp. I. *Causa non necessario est prior tempore quam causatum.* Ut Sol in primo instanti suæ productionis, lucem emisit. Cur enim ab illa emissionem, vel per unicum instans cessare debuit? An non æque potens, & æque determinatus fuit, per naturam suam, ad illum effectum, in primo, ac in secundo? Angelus etiam, in primo instanti suæ creationis, potuit exercere actum intelligendi. Nec repugnat produci causam in actu secundo, seu causalitatem suam actu exercens.

II. *Causa non semper est prior dignitate, seu perfectione, quam causatum.* Ut ignis produciens non est perfectior igne quem producit.

Obj. Dignus & perfectius est producere, quam produci, dare quam accipere.

Resp. Hinc tantum sequitur, causam efficientem quatenus est talis, esse nobiliorem effectu quatenus est effectus: possunt tamen esse æquales secundum suas entitates. Deinde si loquamur de causa in genere,

nere, imperfectior est causato, etiam quatenus causa est. Ut materia, etiam quatenus ingreditur constitutionem compositi, est imperfectior ipso composito.

III. *Causa adæquata semper est perfectione æqualis suo effectui.* Vera est hæc Assertio tantum de efficiente principali. Et ratio est, quia nihil potest operari ultra suam perfectionem, seu dare quod non habet.

IV. *Omnis Causa est prior naturâ causato.* Sed de prioritate illa quæritur in quo consistat. Quidam enim dicunt consistere in eo, quod ad causam ab effectu valeat consequentia, sed non necessario vicissim. Verum ad multa ab aliis valet consequentia, quæ tamen non sunt priora causalitate. Ut ab inferioribus ad superiora. V. g. ab homine ad animal, ab albedine ad colorem: nec tamen superiora sunt causæ inferiorum. Consistit igitur prioritas Causæ ad causatum in hoc quod causa sit id à quo causatum dependet, quodque esse ipsi confert; non autem vicissim.

Obj. Causa etiam à causato pendet. Si enim impossibile esset causatum; impossibilis etiam esset causa. Ut si nulla esse posset domus, nec ullus esse posset Architectus.

Resp. Neg. Anteced. Probatio non concludit. Non enim omne illud quod necessarium habet connexionem cum alio, ab eo pendet: sed illud solum, ad cuius esse, illud aliud aliquid confert. Sic tamen Sol non potest esse sine Luce, non tamen pendet à Luce, sed contra, Lux pendet à Sole. Non enim Lux ad esse Solis quidquam confert, sed Sol ad esse Lucis. Quod igitur ad possibilitatem causati attinet, Causa cum ea quidem connexa est, sed ab ea non pendet. Nam Materia & Forma non distinguuntur à composito realiter, nisi inadæquate. Quicquid autem dependet ab alio, ab eo adæquate distinguui-

distinguitur: Secus enim idem dependeret à seipso. Materia igitur & forma non dependent à composito. Nec efficiens dependet ab effectu possibili: quia hic quamdiu possibilis est, purum nihil est: at à nihilo nihil dependet. Quod si aliquid *reale* dicamus, nihil aliud illud esse potest, præter virtutem effectivam causæ: palam autem est causam à virtute sua non pendere; quia vel hæc ab illa non distinguitur, nisi ratione, ut in causis per se; vel si distinguitur, ut in iis quæ causant per virtutem adjunctam. (ut homo scribit per artem) non tamen pendent res quæ sic causant, à sua virtute adjuncta: quia virtus illa ad earum esse nihil confert.

Quæstio IV. *An Causa per accidens sit vere causa.*

Resp. I. *Causa per accidens non est vere & proprie causa:* quia qua talis res in specie est, non influit; aut saltem causatum qua talis res in sua specie est, ab ea non oritur. Sed Causa dicitur, quia aliquid quod cum eo ex accidenti conjunctum est, causat. Unde una & eadem res potest esse causa *per se*, unius effectus, causa vero *per accidens* alterius. Ut Evangelium est Causa per se Instrumentaria conversionis, Causa vero per accidens indurationis. Hinc etiam causa per accidens est inordinata, & indefinita, ut observavit Arist. lib. 2. Phys. text. 50, & 55. quia definiri nequit quænam sint aut esse possint causæ ejusmodi. Ex. g. Causa per accidens statutz potest esse Musicus, vel Musicæ imperitus, vir probus, vel improbus, dives vel pauper, &c. Nisi quod semper sit aliquid conjunctum cum causa per se. At vera causa rei est aliquid definitum.

II. Ideo tamen causa per accidens causa dicitur, quia aliquid quod vere causa est cum eo ex accidenti conjungitur. Ut Musicus dicitur causa Statutz, quia accidit Statuarium esse Musicum.

Quæstio V. *An Causa remota sit proprie Causa?*
Quidam

Quidam affirmant, quia vere influit, mediante alia. Alii negant; quia non influit per se, sed in aliud quod influit. Deinde quia ab ea non pendet causatum. Eriam si enim non existeret, esse tamen posset causatum. Ut etiam si non fuisset avus, esse tamen potuit is qui nepos dicitur, nempe filius, ex hypothesi, quod pater extiterit. Unde Adamus non causa procreans omnium posterorum, sed tantum eorum quos ipse solus genuit.

Nos cum distinctione sic statuimus.

I. *Causa Materialis. & finalis, licet remota, veræ sunt causa in suo genere.* Ratio est evidens, quia vere influunt. Nam ad materiam quod attinet, remota non distinguitur à proxima, nisi quod hæc varias uniones includit, quas prior non includit. Et utraque per se compositum constituit. Ut materia seminis, unà cum particulis quas germen è terra exugit, materia remota est Cathedræ, ex quibus fit arbor, seu lignum, quod materia est proxima. Utrumque autem Cathedram constituit. Quod vero finem spectat, finis ultimus est remotissimus, quia ultimò obtinetur: vere tamen, & per se, movet ad actiones circa media ultima: Scilicet cum quis ut Deo inserviat, non minus quam ut vivat, & robur corporis conserve, &c. edere, bibere & dormire statuit.

II. *Efficiens Remota non est proprie causa effectus qui produciuntur ab efficiente proxima:* non enim per actionem suam dat esse effectui isti. Et perit sæpe actio efficientis remotæ, priusquam existat effectus efficientis proximæ. At posita efficiente in actu, ponitur effectus. Solum igitur *causa* dicitur quia est *causa causæ*. Idem de objecto remoto. si non attingatur per actum, dicendum est. Ut cum *mens* dicitur objectum remotum Ethicæ, aut Logicæ. Hæ enim non considerant naturam mentis, nisi obiter, ac indirecte, ac valde imperfecte, sed tantum illius operationes.

III. *Falsum*

III. *Falsum tamen est quod tradit Comptonus, Phys. Disp. 18. Sect. 2. N. 6. Causam remotam esse Causam tantum per accidens.* Differentia enim est manifesta in natura utriusque. Nam Causa per accidens non influit in causam per se: at causa remota in proximam influit. Deinde ubi plures causæ, naturaliter subordinatæ, ad idem effectum concurrunt; aut rotæ supremæ & inferiores, in horologio, ad motum indicis, aut mallei, Ratio, & voluntas, ad actiones imperatas, & exteriores, absurdum est dicere rotam supremam, & Rationem esse causas per accidens horum effectuum; cum tamen causæ sint remotæ. Nec enim per accidens ad effectus illos concurrunt, ut Musica ad ædificandum.

Obijcit *Comptonus*. Illa est causa per accidens, quæ ablata, idem maneret effectus. At posita causa proxima, idem manet effectus, licet remota tollatur.

Resp. I. Major est mala definitio causæ per accidens. Ex ea enim sequetur Architectum, & Agriculturam, esse causas per accidens ædificii, & horti. His enim ablatis, iidem esse possent effectus, per primam causam.

II. Posita causa proxima in actu, ponitur effectus, non existente & operante causa remota: interim tamen contingit, ut si nunquam fuisset causa remota, nec effectus fuisset: eo scilicet casu, quo non fuisset causa proxima, quæ ex ea. vel quoad esse vel quoad actionem, pendet.

Obj. II. Causa remota non est *per se*, causa effectus qui oritur à causa proxima. Siquidem illa, non *per se*, sed per aliud effectum attingit. Ergo est causa per accidens.

Resp. *Causa per se* est phrasis ambigua. Velenim significat id quod per essentiam causat, adeo ut non possit non causare, ex hypothesi quod existat. Sic mens est causa per se cogitandi, secundum Cartesium; putat enim mentem semper cogitare, quamdiu

diu existit. Vel id, quod, per suam actionem quamcunque, immediate attingit effectum. Qua ratione sola causa proxima est causa per se. Vel denique id quod vere aliquid confert ad effectum, sive immediate ipsum producendo; sive producendo aut conservando aliud quod ipsum immediate producit. Et sic tantum opponitur causæ per accidens quæ solum denominative causa est, eo quod cum vera causa ex accidenti, conjungitur. Unde consequentia nulla est.

DISPUTATIO XIV.

De Causa Efficiente, & Actione.

Quæst. I.

Quanam sit Causarum prima, & nobilissima?

Resp. I. Causa efficiens natura prior est reliquis omnibus. Omnes enim reliquæ eam præsupponunt. Nam finis movet efficientem ad agendum: & efficiens, per suam actionem, formam producit in materia, aut etiam materiam ipsam producit.

II. Finis est primus in causatione actuali, seu primo omnium causalitatem suam exercet: movet enim efficientem ut supra diximus ad operandum. Et tunc efficiens vel producit rem per se subsistentem, vel modum illius aliquem, qui forma dicitur.

III. Si de causis creatis naturalibus loquamur, prior natura est materia, seu subjectum patiens: hæ enim independentes à subjecto operari nequeunt.

IV. Efficiens quoad modum causandi nobilissima est. Quia

Quia per veram actionem causat. Cum Materia & Forma per suas Entitates, seu se communicando causent; Finis autem & exemplar, solum objective. Deinde, Efficiens dat novum aliquod esse à se diversum, quod non præstant Materia & Forma nec finis, nisi ut Efficientem incitat. Hinc nomen *Causa* absolute Efficienti tribuitur.

Quæst. II. *Quidnam sit Causa Efficiens?* Varie enim à doctis definiri solet. Aristoteles dicit esse id, *Unde principium primum mutationis & quietis est.* Ubi interpretes primitatem, non temporis intelligunt, (finis enim prius tempore, Causalitatem suam exercet, quam Efficiens) sed dignitatis; quia Efficiens est principium physice agens, finis vero objective tantum movet. Alii Definitionem rejiciunt, eo quod multæ sint Efficientes quæ non primo agunt; ut Causæ Instrumentales, & Adjuvantes: Quanquam Causa Adjuvans aliquando æque primo agat, ac illa cui opem fert.

Comptonus Phys. Disp. 24. Sect. 1. reprehendit definitionem illam, quod excludat Efficientem creantem, quam Aristoteles ignorasse putatur. Unde aliam tradit, viz. *Principium per se influens in aliud, sine mutatione sui.* Sed contra,

1. Obscurum est quid sit *influere*. ut ante notavimus.

2. Etiam Forma, & Finis influunt, sine mutatione sui.

3. Difficile est ostendere quomodo Efficiens agat sine mutatione sui. Nam novam actionem edere est mutari saltem modaliter. Siquidem actio, quatenus vim & conatum Efficientis denotat, est in ipso Efficienti.

Ramus & Ramista, ex Platone & Cicerone, dicunt Efficientem esse, à qua res est. Contra urget *Burgersdicius*, rem esse etiam à fine. Et idcirco addit aliquid definitioni isti, dicitque, Efficientem esse à qua res vera causalitate proficiscitur. Verum gravius objiciet qui petiverit

tiverit sibi explicari, quid sit rem *esse ab aliquo*, quod non explicant Ramistæ. Et Definitio Burgerfdicii, causalitatem non tantum finis, sed materiæ, etiam & formæ tanquam minime veram, seu impropriam, insinuat. Deinde non explicat quid sit vera Causalitas. Vera enim est Causalitas Finis, non metaphorica, ut ait Burgerfdicius. Dicit quidem Aristoteles, finem non esse Effectivum, nisi per Metaphoram; sed non dicit non esse Causam. Unde licet Efficientia finis sit metaphorica, Causalitas tamen vera est: alioqui non esset vera Causa.

Dicendum igitur est, *Efficientem esse que per actionem causat*. Efficere enim est agere, ut omnes norunt. Unde nec Causa præcatartica, nec Exemplaris proprie Efficiens est, licet inter Causas Efficientes annumerari soleant.

Quæst. III. *An eadem res possit seipsam producere?* De secunda productione affirmant Jesuitæ. Sed monstruosum effatum est. Sit igitur contra.

Thesis. *Nihil potest seipsum producere, sive primâ productione sive secundâ.* Probat. ur.

I. Quicquid producitur, pro instanti priori non existit. Productio enim terminatur à *non-esse*. At si idem seipsum produceret, secunda productione, hoc est in eo instanti in quo existit, aliquid jam existens produceretur, nec omnis productio procederet à non-esse, quod manifestam contradictionem implicat. Unde etiam nulla est secunda productio, nisi in eo casu, quo res, quæ prius producta fuit, interit, seu corrumpitur, ut denuo producat. ur.

II. Sequeretur unum & idem esse duplex, & diversum à se. Nam cum eadem res seipsam, producit, ut volunt Adversarii, vel producit aliquid, vel nihil. Posterius, ut opinor, non dicent: quia productio non potest terminari ad nihil: Si igitur aliquid producit, necesse est illud esse diversum quid à producente, seu à re jam existente; quod enim jam existit produci

produci nequit, dum intereat. Unde & secunda illa productio esset plane superflua; quia nihil per eam poneretur in rerum natura.

3. Si idem seipsum produceret, vel seipsum produceret seipsum ex nihilo, vel ex materia præexistente. At neutrum dici potest. Non prius: quia res producens non est nihil. Nec posterius: quia sic novam formam sibiipsum induceret, adeoque non seipsam sed aliquid aliud produceret.

4. Sequeretur idem esse prius & posterius seipso. Omne enim producens est prius producto.

Respondet *Ariana* non repugnare eandem rem, ut productam per unam actionem, esse priorem seipsa, ut producta est per aliam. Non enim, inquit, necesse est, ut Entitas effectus sit posterior sit entitate Causæ; sed tantum ut posterior sit Entitate actionis, qua producitur. Sed contra.

1. Quia, licet res quæ producta fuit per unam actionem hora prima, & interiit hora secunda, reproduci posset hora tertia, & sic esse priorem sibiipsum ratione temporis; repugnat tamen rem quæ continuo existit tres horas, produci per unam actionem hora prima, & rursus produci per secundam, hora tertia. Sic enim secunda actio nihil poneret in rerum natura. Siquidem quod jam factum est fieri nequit, nisi prius intereat.

2. Entitas effectus posterior natura est entitate Causæ seu virtute causativa, non minus quam actione qua producitur. Utraque enim præsupponitur ad existentiam effectus, ut per se manifestum est. Nullus enim effectus existere potest, nisi prius sit Entitas seu virtus causativa, quæ actionem edat per quam producat.

Quid autem induxit homines, alioquin ingeniosos, & doctos, ad sententiam adeo monstrosam propugnamdam? *Christus*, inquit *Suarius*, *sedens ad mensam cum Discipulis, corpus suum secunda vice produxit in Eu-*
charistia.

charstia. At si constaret, Christum corpus suum, sub speciebus panis & vini, produxisse, (quod tamen insigne delirium est) quomodo constat corpus Christi seipsum produxisse? An non illud opus fuisset solius Deitatis? Facebant igitur nugæ illæ, apud omnes cordatos, quas dogma illud fanaticum Transubstantiationis peperit.

Quæstio IV. *An duæ Causæ Efficientes possint esse sibi mutuo causa:* hoc est se mutuo producere, aut conservare? Dixi *duas efficientes*, quia certum est, Finem & Efficientem, esse mutuo sibi causas. Nam finis, sua bonitate, movet Efficientem ad agendum: Et Efficiens rursus, actione sua, finem assequitur, eique dat ut existat. De duabus autem partibus materiæ, aut duabus formis, res est manifesta. Si enim una sit causa materialis alterius, altera erit illius forma, non autem materia, & si altera sit forma, altera erit subjectum, seu materia.

Thes. *Duæ Causæ Efficientes nec possunt se mutuo producere, nec conservare.* Hoc est una & eadem res non potest esse Efficiens, & effectus, respectu ejusdem. Ratio est, quia sic, una & eadem res, respectu ejusdem, esset & prior naturâ, & posterior: & ab una & eadem alia dependeret, & non dependeret. Quin eadem res esset Causa sui. Quod enim est causa causæ, est etiam causa causati: adeoque penderet à seipsa, essetque sibiipsi prior, & posterior. Quod est prius priori, multo magis prius est posteriori.

Objiciuntur variæ *Experientiæ*.

I. *Mulæ prunæ cunctæ seinvicem sovent; & manus complicatæ calorem mutuo conservant.*

Resp. Si omnes prunæ æque calidæ sint, calorem sibi invicem non augent, (quia simile non agit in simile) sed tantum, cum vis unita fortior sit, melius resistunt vi contrariorum, & fortius agunt in materiam accensam. Si non sint æque calidæ, tum calidiores agent in minus calidas, sed non vicissim.

Simile

Simile de manibus dicendum est.

II. Manus frigidæ, mutua frictione, ac compressione, se calefaciunt.

Resp. Manus quidem, in eo casu, per mutuam compressionem, partes subtiliores sanguinis ad motum reducunt, in quo motu calor, consistit. Sed motus dextræ qui producit calorem in sinistra, non producitur à motu sinistræ, ut concludendum est.

III. Lingua calefacit zinziber ; & hoc rursus linguam.

Resp. Zinziber transfundit in poros linguæ, particulas tenues, quæ spiritus linguæ excitant in motum ; & lingua halitum calidum, in poros zinziberis : Et sic quidem mutuo in se agunt ; sed calor linguæ non producit illum calorem in zinzibere qui linguam calefacit, nec vicissim.

IV. Duo ligna prona, sibi invicem à capite innitentia, se mutuo sustentant.

Resp. Non agendo in se invicem ; sed impediendo motum deorsum, in quem utrumque tendit.

V. Partes minimi naturalis, puta aquæ, aut ignis, se mutuo conservant. Possunt enim conjunctim, sub formâ aquæ, vel ignis, existere, separatim non possunt.

Resp. Partes illæ non agunt in se invicem, (adeoque exemplum istud nihil concludit), sed tantum omnes necessariae sunt ad talem speciem, puta aquæ, constituendam ; & si separentur, in aliam abeunt, puta in fumum, vel vaporem : Alii dicunt, ideo partes illas conjunctim existere, non autem separatim, quia in statu unionis, vi contrariorum resistere possunt, cui impares sunt in statu separationis.

Quæst. V. *An causa efficiens, manens eadem, semper facit idem ?*

Resp.

Resp. I. *In prima causa non obtinet.* Hæc enim quia infinita, & illimitatæ virtutis est, & præcipue quia Liberrimè agit, eadem manens in se, circumstantiis item ad extra iisdem manentibus, diversa opera edere potest. Ut nunc cum peccatoribus, pro sua misericordia, parcit; nunc eosdem punit: alium restituit, alium, non magis indignum, non restituit.

II. *Nec semper obtinet in causis creatis liberis:* nisi quatenus determinata sunt ad unum genus effectuum, unumque agendi modum. Hæ enim facultate pollent, per quam actiones suas variare possunt, pro libitu; eo scilicet casu quo nihil apparet, ex una parte magis quam ex altera, quod actum in eam determinet. Sic homo eodem modo dispositus, potest, è fortibus sæpius oblatis, nunc unam sumere, nunc aliam.

III. *Obrinet igitur in solis causis naturalibus.* & quæcunque ad unum modum agendi, unumque genus effectuum, determinantur. Sic animal in gignendo, semper generat animal. Et ignis semper calefacit, ac exurit. Bonus Artifex semper edit opus bonum, nisi propter rationes quasdam aliter voluerit. Interim tamen ut eadem causa, manens eadem, idem opus efficiat, requiritur ut materia, instrumenta, aliæque circumstantiæ, eadem sint; utque nullum impedimentum interveniat.

Variari enim potest effectus, ex accidenti, propter variationem eorum quæ efficienti, ejusque modo agendi, extrinseca sunt. Sic Sol idem manens, & eodem modo agens, quantum ex se, contrarios effectus producit; propter dispositionem contrariam materiæ. Ut cum Lutum indurat, glaciem liquefacit, &c.

Quæst. VI. *An idem singularis effectus, qui de facto oritur ex una causa efficiente, oriri potuit ex alia ejusdem virtutis?* Quidam negant, Nos affirmamus. Quid enim vetat ignem, qui fit ex hoc vel illo ligno, per
R hunc

hunc ignem, ex eodem ligno fieri potuisse, per alium? idem enim est ignis qui fit ex attenuatione, & motu ejusdem materiæ, a quocunque tandem igne accendatur. Nec quidquam prohibet eandem domum extrui potuisse ab alio ædificatore, quam ab eo qui de facto eam extruxit. Eadem enim est domus, quæ ex eadem materia, eodem modo composita extruitur. Ratio à priori est, quia effectus oriri potest à qualibet causa efficiente, quæ sufficiente instructa est virtute, ad eam producendum. At alia causa efficiens ejusdem speciei, satis instructa est ad eundem effectum producendum qui oritur de facto ab alia.

Obj. Distinctæ actiones non possunt tendere ad eundem terminum adæquatum. Effectus igitur, qui oritur ab hac causa, per hanc actionem, non potest oriri ab alia, per aliam.

Resp. Distinctæ actiones non tendunt ad eundem terminum simul; possunt tamen disjunctivè. Hoc est terminus qui productus est per hanc actionem, antequam per eam producat, produci potuit ab alia. Ad quemvis enim effectum producendum, sufficit quævis actio singularis, quæ ad eum proportionatur.

Quæst. VII. *An ulla res possit seipsam conservare?*

Resp. Negativè. Quicquid enim seipsum conservat, à seipso dependet, quoad esse continuatum. At nihil potest à seipso ullo modo dependere. Sic enim esset prius seipso. Siquidem illud à quo res dependet, est prius re quæ ab ea dependet. Si igitur res conservaret seipsam, daretque sibi esse continuatum, illud esse continuatum esset prius seipso, saltem natura.

Obj. I. Ignis se conservat, pabulum continuo depascendo.

Resp. Idem numero ignis se non conservat, sed tantum primus ignis qui ex una parte materiæ accenditur

censæ fit. alium producit in parte proxima, & hic rursus alium; & ita deinceps, dum tota materia absumatur.

Obj. II. Anima conservat animal; ergo Animal habet principium se conservandi in seipso.

Resp. Anima corpus conservat, & idcirco animal dicitur seipsum conservare; sed nec totum animal, totum, nec anima, aut corpus, seipsum conservat.

Obj. III. Pleræque res vi contrariorum, interitum sibi molientium, resistunt, & sic se conservant.

Resp. Non sequitur: quia vi contrariorum resistere, non est se conservare, nisi indirecte, sic enim res non in seipsam agit, sed in contraria, vim eorum retundendo.

Obj. IV. Calor manet in cubiculo, pereunte vel amoto igne, per quem productus est. Ergo se conservat.

Resp. Conservatur à Deo; ut res omnes creatæ quamdiu existunt, vel immediate, vel causarum secundarum ministerio.

Inst. Si à Deo conservatur, cur non semper durat, sed paulatim imminuitur, & tandem evanescit.

Resp. Quia Deus ordinem naturæ à se institutum observat, nec per miraculum contra vim contrariorum eum semper conservare vult, sed tantum quamdiu per vim suam naturalem contrario resistere poterit.

Quæst. VIII. *An sit causa efficiens, qua per suam existentiam causat, sine actione?*

Communis sententia affirmat; & ejusmodi causam *Emanativam*, oppositam ad *Activam*, appellat. Ego vero hujus generis causam capere non possum: Sit igitur *Thesis* negans.

Nulla est causa Efficiens quæ sine actione causat. Probat.

1. Causa quæ sine actione causat, vel causat per suam entitatem, se communicando causato, ut ma-

teria & forma, vel per sui perceptionem, ut causa objectiva. At Causa quæ Emanativa dicitur, nullo ex his modis causat. Nullo igitur modo causat.

2. Nullum exemplum certum, ac evidens, hujusce Causæ adfertur à suis patronis. Quod enim dicunt *omnes essentias, per emanationem, (rectius dixerent per emissionem) producere suas passionés, hoc est, proprietates necessarias*; ut ignis suum calorem, Sol lucem, anima suas facultates, &c. nihil concludit. Nam proprietates illæ rarius distinguuntur à suis subjectis, nisi ratione: Unde subjecta eas producere nequeunt, nisi seipsa producerent. Si autem distinguuntur realiter, aut modaliter, productio earum ad causam subjectorum referenda est, (hæc enim vere efficere, & agere, intelligi potest), non autem ad subjecta ipsa, quæ nulla actione in eas influunt. Sic ut communiter dicitur, *Id quod dat formam, dare omnia quæ eam consequuntur*. Nec apparet ignem producere calorem suum, seu in seipso. Maxime enim probabilis est sententia Cartesii, Calorem esse motum varium et ocysimum particularum materiæ. Materia autem non producit illum motum in seipsâ. Si vero sit qualitas distincta à motu, ut vulgo præsumitur, ad causam productivam ipsius ignis referenda est. Quod ad corpora lucida attinet, (quæ maxime hic alligantur) illa quidem emittunt lucem extra se: sed cur non per actionem; sicut de igne, corpora vicina calefaciente, conceditur. De cæteris omnibus idem dici potest.

3. Causa quæ neque ut materia, aut forma, neque ut objectum, et tamen sine omni actione, causat, per suam Entitatem et essentiam causat: adeoque implicat contradictionem non causare quamdiu existit: at omnis causa existere potest sine suo effectu, omnique actione. Quæ enim realiter distinguuntur, non implicat alterum non existere, altero existente. Effectus autem causæ emanativæ realiter distin-

distinguitur à causa, ut omnes fatentur. ex. g. non implicat contradictionem Solem non emittere lucem extra se, licet naturaliter non possit ab emittendo cessare. Pendere igitur nequit effectus ab efficiente aliter quam per actionem.

Inst. Calor separari nequit ab igne. Si enim ignis calidus non sit, nec erit ignis.

Resp. Ignem esse concretum quid, ex materia, et motu vario; et ocysissimo; Unde non mirum est calorem ab eo separari non posse. Sicut in sensu composito albedo separari nequit ab *albo*. Ex quo liquet calorem qui est in ipso igne non esse effectum ignis, sed causæ quæ ignem producit. Alia est ratio Lucis, quæ emittitur à corpore Lucido, et extra ipsum existit.

Pro divisione igitur Causæ efficientis, in *Emanativam* et *Activam*, aliam substituendam censeo. illam nempe per quam dividitur in *Continuam*, & *Interruptam*; seu in eam quæ indefinenter agit, naturaliter, quamdiu existit, (ejusmodi enim Efficiens satis intelligi potest), & eam quæ *non semper* agit, quamdiu existit. Sic *mens*, ex Cartesio, semper cogitat, quod forsan verum est. *Lucida* semper emittunt lucem, nisi impedimentum interveniat. Et omnia corpora visibilia, species visibiles.

Hinc inferes causalitatem omnis. Causæ Efficientis esse *Actionem*: Et de Efficientibus quæ non agunt quamdiu existunt, facile ostenditur. Per actionem enim Efficiens actu efficit, & effectus ex ea oritur, ac dependet. Deinde Entitas causæ & effectus existere possunt, & sæpius existunt, cum illa hunc non producit; ut *Domus* & *Ædificator*, transacta ædificatione. Causalitas igitur efficientis est quid distinctum à virtute effectrice, & effectu: hoc autem est actio. De iis vero quæ semper sunt in actu, patet ex iis quæ proxime diximus. Intelligi enim nequit quo modo aliquid ab aliquo procedat sine actione.

Quæst. IX. *An duæ causa efficientes totales, ejusdem ordinis, concurrere possint ad eundem numero effectum producendum? Dico Totales, & ejusdem ordinis, quia duæ partiales, aut Totales diversi ordinis, virtute conjuncta eundem effectum sæpe producant. Ut cum duo equi trahunt currum; Mas & femella generant prolem, Manus & Calamus formant Literas. Sed de Causis Totalibus ejusdem ordinis, procedit quæstio. Fatentur omnes Naturaliter illud fieri non posse. Natura enim abhorret à superfluis: adeoque, cum una Causa totalis, unius ordinis, ad effectum producendum sufficiat, non potest plures adhibere. Verum divinitus id fieri posse contendunt Jesuitæ; Licet alii ex Pontificiis negent.*

Thesis. Duæ Causa efficientes Totales, ejusdem speciei, nequeunt concurrere ad eundem effectum producendum.

Probatur. Si duæ ejusmodi efficientes concurrere possent ad eundem effectum, vel concurrerent eadem numero actione, vel distinctis actionibus. Prius est impossibile. Actio enim est exercitium vel actus virtutis effectivæ. Ubi igitur duæ virtutes distinctæ exercentur, necesse est duo esse exercitia: tam enim repugnat exercitium virtutis A, esse exercitium virtutis B, quam has virtutes esse unam & eandem. Deinde sic duo agentia erunt unum tantum agens, quia per unam singularem actionem agunt. Denique actio est modus essentialiter affixus uni agenti: adeo ut actio Petri nequeat esse actio Johannis. Si autem posterius dicatur; tum altera causa vel nihil produceret, & sic non concurreret, quod est contra hypothesin: vel produceret id quod altera totaliter producit. Unde idem effectus bis simul produceretur: Et totus penderet à duabus actionibus totalibus. At, si totus effectus penderet ab actione A, & per eam poneretur in rerum natura, nihil esset quod penderet ab actione B, & nihil de eam poneretur in esse. Plures igitur actiones ad eundem

dem effectum concurrentes, non possunt esse aliæ quam partiales.

Obj. I. Potest quis propter duos fines adequatos, idem medium eligere: puta ambulationem sanitatis, & amici invisendi gratia. Ergo, similiter per duas actiones totales, potest idem effectus produci.

Resp. Dispar est ratio Finis, & Efficientis. Quia finis non dat esse medio, aut illius electioni, sed tantum objective movet Efficientem ad illud eligendum, & obeundum. At Efficiens dat esse effectui. Unde, si totum illud esse tribuat per unam actionem, non potest alia totum tribuere per aliam. Deinde dici potest, duos illos fines, licet absolute diversi sint, in ejusmodi tamen proposito, rationem induere unius totalis. Ambo enim simul sunt totum propter quod suscipitur ambulatio. Et similiter cum pluribus actionibus idem effectus producitur, omnes simul totum sunt per quod effectus producitur: adeoque quælibet seorsim, est tantum medium partiale ad effectum.

Obj. II. Idem effectus oritur à diversis causis totalibus subordinatis; cur igitur non etiam à pluribus coordinatis.

Resp. Disparitas est manifesta: Quia una è causis subordinatis, non est per se sufficienter instructa ad effectum producendum: ut manus scribere nequit sine calamo; nec calamus sine manu. At è pluribus coordinatis, si totales sint, altera per se totum effectum producere potest, & producere supponitur.

Obj. III. Cum duo equi trahunt currum, præsertim ejusmodi ponderis, quem alter facile trahere posset, (& supponamus utrumque indefinentur influere in motum currus), vel uterque producit totum motum, & sic concluditur quod intenditur, vel alter unam partem producit, alter reliquam, quod

explicari nequit. Cur enim alter hanc partem potius produceret, quàm aliam?

Resp. Utrumque figillatim non producere totum motum. Sed alterum producere unum illius gradum, alterum vero alterum. Si enim alter tantum traheret, nec majori conatu quam ubi cum altero conjunctim agit, motus esset dimidio tardior: cum ubi alter concurrir, duplo velocior est.

Quæst. X. *Quenam sit Causa Principalis & quanam Instrumentalis.* Hac de re varie sentiunt Autores. Et ut sententias minus probabiles missas faciamus, Suarez *Metaph. Disp. 17. Sect. 16, 17.* dicit causam principalem esse, qua majorem perfectionem continet quam effectus, aut saltem aequalem; Instrumentum vero esse, quod vel concurrir ad effectum se nobiliorem, vel saltem ad quem ex se nullam habet proportionem. Ita ut Effectus virtutem illius operativam, si non etiam entitativam superet. Huic succinit Scheiblerus, *Metaph. cap. 22. tit. 7.* Verum contra hanc rationem Causæ principalis, & instrumentalis, merito objicitur, effectum qui non nisi per instrumentum à Causa principali produci potest, superare illius virtutem per se spectatam, non minus quam instrumenti. Nec enim anima audire potest, sine aure, aut videre sine oculo, magisquam auris, aut oculus, sine anima. Nec apparet effectum, qui medio instrumento editur, semper esse virtute ejus operativa nobiliorem, Quanto enim nobilior est divisio ligni, quam acies cultri, gladii, aut securis, per quam fit?

Galtruchius, *Phys. Univers. Tract. 2. Disp. 1. cap. 3.* Dicit Causam principalem esse, “quæ agit per virtutem propriam & effectui proportionatam; ut ignis producens ignem, aut calorem; qui effectus non sunt perfectionis majoris, quam est ignis propria. Contra, Instrumentum agit tantum per subordinationem ad causam principalem, aut in virtute illius: nec habet effectus sibi proportionatos Unde elevari dicitur à causa principali, per motionem quam ab

“ipsa

“ipsa vel dependenter ab ipsa recipit. Et motio
 “ista vel est virtus activa; ut cum aqua calefacit per
 “calorem ab igne derivatum: Vel est motus loca-
 “lis, ut quando pictor utitur penicillo, ad pingen-
 “dum. Quamobrem duplex est genus Instrumen-
 “ti: Aliud Activum quod accipit qualitatē acti-
 “vam: aliud pure morum, quod nihil accipit
 “præter motum localem: Nec tam est activum,
 “quam id per quod agit causa principalis; istudq;
 “proprie est Instrumentum Artis; ut calamus quo
 “scribo. Sed etiam hic varia sunt quæ reprehensionem merentur. Nam,

1. *Instrumentum* per virtutem propriam agit, licet non nisi motum per Causam principalem; ut *Calamus*, per cuspidem, & crenam; *Gladus*, per aciem, & rigorem. Nec quidquam est quod agit virtute simpliciter aliena. Sic enim non ipsum ager, sed aliud quid. Licet multa agant virtute derivata, seu mutuata.

2. Unde & effectum habet sibi, in genere suo proportionatum: hoc est, qui virtutem illius activam non superat; sicut Causa principalis in suo.

3. *Instrumentum* quidem semper subordinatur Causæ principali, & motionem suam ab ea accipit. Motio tamen illa nunquam est virtus activa. Omnis enim motio est actio, vel passio. At virtus activa neutra ex his est. Non tamen negamus *Instrumentum* aliquando, virtute aliqua activa, per causam principalem instrui; præsertim si de instrumentis moralibus loquamur: ut *Legatus* à principe, auctoritate instruitur, ad negotia ipsius peragenda. Sed agentia ex auctoritate alterius, non nisi analogice *instrumenta* sunt. Siquidem non tantum ex virtute physica propria agunt, sed etiam per motionem actualem propriam.

4. Cum aqua calefacit, id præstat per calorem, non tanquam per instrumentum; sed seipsum, cum calore quem habet, alteri communicando. Vel ille ipse calor singularis exhalat, ex aqua, in corpus cui applicatur; sicut & exire solet in vapore. Nec alius calor in corpore vicino, aut contiguo producit.

5. Instrumentum sæpius activum est, licet nunquam agat nisi quando adhibetur à Causa superiori. Unde recte dividitur in *activum*, ut gladius, calamus; & *passivum*, ut incus. Verum quidem est instrumenta, cum à causa principali moventur, pati. Ex quo tamen non sequitur, non agere. Nam licet recipiendo motum à causa principali, patiantur; cum tamen in motu illo sunt, vere agunt: Efficiunt enim agere, per causam principalem. Et idem effectum præstant, ac si à se moverentur. Siquidem ut calamus producat characteres, in charta, aut tabula, nihil aliud requiritur nisi ut postquam tali figura præditus sit, talibus motibus agatur, qui signis illis efficiendis apti sint.

Burgersdicius, Inst. Log. lib. 1. cap. 17. Theorem. 25.
Instrumentum definit quod causa principali in effectione subservit: cum prius definiêrat causam minus principalem (quam distribuit in procatarteticam, proëgumenam & Instrumentum) qua principali inservit. Ubi,

1. Eodem plane modo definit Genus, ac alteram ex speciebus quæ sub eo continentur.

2. Ex hac definitione causa proëgumena, quæ intus disponit, aut proritat ad agendum, Instrumentum erit. Illa enim causæ principali inservit in agendo, non minus quam Instrumentum.

3. Hinc qualitates naturales, inter instrumenta agentium, cum Thomistis, male connumerat. Quia illæ ad virtutem activam causarum principalium pertinent. Sicut & qualitates adventitiæ; ut habitus acquisiti, & dotes supernaturales.

4. Hallu-

4. Hallucinatus etiam est, cum Causam principalem definivit quæ sua virtute effectum producit: quod, ut supra monuimus, verum est de omni causa efficiente, & de ipso instrumento.

Keckermannus System. Log. Maj. lib. 1. cap. 15. Causam instrumentalem definit, quæ à principali assumitur ad effectum producendum. Quod proprie verum non est nisi de solis Instrumentis artis. Nam Instrumenta naturalia, ut lingua in loquendo, pedes in ambulando, stomachus in cibo conquoquendo, non assumuntur, sed usurpantur, seu adhibentur, ad opera Causæ principalis. Sed de his forte plus satis; Ex quibus colligere licet Instrumentum esse id quod à Causa aliqua efficiente adhibetur ad agendum, ita tamen ut à virtute illius effectiva qualicumque diversum sit.

Quæst. II. An recte dividantur Instrumenta Physica, in conjuncta, & separata. Sic enim dividunt Pontificii. Exempla posterioris ordinis ponunt Sacramenta, quibus Christus in cœlis existens, gratiam in animis hominum operatur; Calorem in aqua, igne absente, quo alius calor, & semen arboris, separatum ab illa, quo alia arbor producitur. Sed hæc mera Matæologia est. Nam licet instrumenta moralia, separatum à Causa principali agere possint, ut Legatus procul à principe; omnia tamen instrumenta quæ per motum physicum aguntur, cum causa principali necessario conjuncta sunt, vel cum illius virtute, aut effectū aliquo. Quod ad exempla data spectat, Sacramenta non operantur physice, sed tantum moraliter. Nec si physice operarentur, humanitas Christi quæ longe ab illis distat, causa principalis esset gratiæ sanctificantis, sed divina illius natura quæ ubique præsens est. De calore aquæ supra diximus: nec enim ille instrumentum ignis est, quando cum eo conjungitur, sed virtus ejus activa: multo minus cum ab eo separatur. Et, si instrumentum ulla ratione foret; cur non aquæ in qua

qua est, potius quam ignis, qui forte extinguitur, instrumentum diceretur? Nihil enim est Instrumentum causæ non existentis actu, præsertim physicum. Propter eandem rationem, semen non est instrumentum arboris, quo aliam arborem producit. Arbor enim sæpe interit, antequam ex semine ipsius alia arbor fiat. Et pari ratione diceret aliquis, filium esse instrumentum patris, etiam mortui, quo pater generat nepotem, quod non nisi rhetoricando dici potest.

DISPUTATIO XV.

De Causa objectiva, Exemplari, & Fine.

Quæst. I. **I**N quo consistit Causalitas Causæ objectivæ, seu objecti directivi, ac motivi?

Resp. I. *Non in actione aliqua physica: & proprie dicta.* Cogitari enim nequit quam actionem, pulchritudo ad amorem moveat, & incitat; aut deformitas ad odium, ac displicentiam. Deinde res non existentes causalitatem objectivam exercent: ut cum quis moveretur bonitate finis, quem nondum affecutus est, ad eum appetendum, aut cum à spe illius potiundi excidit, ad dolorem. At nihil agit in aliud actione physica, nisi quando existit.

II. *Cognitio est conditio quidem necessaria, ut objectum moveat potentiam ad actum: sed causalitas ejus dici nequit.* Quia causalitas rei est intrinseca ei cujus causalitas est. At cognitio objecti est extrinseca.

III. *Non*

III. *Nec mera entitas objecti est ejus causalitas* ; quia sic semper causaret ; Entitas enim objecti semper est eadem. At non semper objective causat, etiam existente potentia in quam ageret.

IV. *Causalitas igitur objecti est ipsa Entitas*, aut qualitas objecti, ut actu terminat actum cognitionis, sive ut ei objicitur, & ab eo percipitur. Nec enim sola entitas objecti movet potentiam. Siquidem cum non apprehenditur, non movet. Nec sola cognitio ; quia sic cognitio esset causa objectiva, non autem objectum, quod falsum est. Licer igitur objectum per se aptum sit movere potentiam, quia tamen ad eam movendam per se non sufficit, causalitas ejus locanda est in actuali terminatione actus per quem apprehenditur.

Objic. Posita causalitate ponitur effectus. At multa objecta actu terminant apprehensionem, quae non movent. Ut quidam bonam formam intuentur, sine amore ; quidam malam, sine displicentia.

Resp. Ex accidenti aliquo illud provenit, propter dispositionem aliquam contrariam ejus qui objectum intuetur. Nempe, vel quia videt se objecto pulchro frui non posse, aut non nisi cum difficultate, aut molestia, quam ferre nequit ? aut quia aliis objectis jam capitur, &c. Ex se tamen objectum pulchrum, recte cognitum, semper aptum est animum ad se trahere.

Quæst. II. *Utrum Exemplar internum, sit conceptus de opere faciendo, in mente existens, an illius objectum ?* Et si objectum sit, utrum sit ipsum opus faciendum, an aliud objectum, seu Idolum, ad cuius similitudinem artifex operatur. Utraque pars utriusque questionis suos habet Patrones. Nos sic statuimus.

Thes. I. *Exemplar non est conceptus in mente, prae- cise ut conceptus.* Ratio est quia artifex, dum ad exemplar operis faciendi attendit, non necessario cogitat

cogitat reflexe de suo conceptu, sed directe fertur in objectum aliquod ab eo diversum; scilicet vel illud ipsum, quod efficere statuit, vel aliquod illius simulachrum. *Nec est ipsum opus faciendum, præcise.* Quia hoc non est exemplar sui ipsius. *Sed est objectum ut representatur per conceptum,* seu objectum in esse cognito. Ad ejus enim similitudinem opus efficitur. Unde, non statuendum est, ut quidam faciunt, duplex exemplar, aliud *objectivum*, aliud *formale*: sed unum tantum nempe *objectum figuratum* in mente. Nec enim conceptus nisi quatenus representat objectum, nec objectum nisi ut representatur per conceptum, Exemplar est.

Thef. II. Exemplar est ipsum opus faciendum, in esse cognito, non autem aliud quid ad cujus similitudinem opus efficitur. Ut Idæa Cæsaris, quam pictor in mente format, representat ipsum Cæsarem qui existit, aut extitit; non autem alium, ad cujus similitudinem imaginem cæsaris depingit. Ratio est. Quia sine necessitate fingitur illud aliud objectum, ab opere faciendo distinctum. Æque enim facile est menti ipsum opus faciendum præconcipere, ac aliud fingere quod ipsi simile sit.

Obj. I. Petrus à Sancto Joseph. lib. 2. Metaph. cap. 7. art. 3. Cum pictor intuetur regem, & imaginem illius in mente format; ipse rex est exemplar imaginis quam postea pingit; non autem imago mente concepta. Ad similitudinem enim ipsius regis imaginem pingit.

Resp. I. In illo casu, ipse rex est exemplar externum, ad cujus similitudinem pictor primo format imaginem regis in mente, deinde aliam visibilem manu pingit. Sed idea imaginis pingendæ, quam ex ipsius regis intuitu concipit, est exemplar internum, per quod pictor immediate dirigitur ad imaginem manu pingendam. Quæstio autem est de exemplari interno; Hoc autem semper habet artifex; externum non semper habet.

II. Nec

II. Nec exemplar externum Exemplar est, nisi quatenus excitat ideam internam in mente, quæ artificem in operando dirigit.

Obj. II. *Opus censetur rectum quando conforme est suo exemplari? At Imago Regis non censetur recte facta eo quod sibi conformis sit. sed quatenus ipsum regem repræsentat. Non igitur res facienda exemplar est. sed aliud quid ad cuius similitudinem fit.*

Resp. Dist. minorem. Imago Regis non ideo censetur recta, quia est conformis sibi, ut extra mentem existit verum est: quia est conformis sibi, ut concepta à mente, negatur. Recte enim facta est propter utramque conformitatem, tum ad ipsum Regem, tum ad veram imaginem regis, & sui, in mente pictoris.

Obj. III. *Potest quis formare ideam rei factibilis in mente, qui nihil statuit efficere, aut qui non statuit efficere hoc individuum magis quam aliud. In illo igitur casu, idea est aliquid aliud, quam opus quod efficitur, ut figuratum in mente.*

Resp. I. Cum quis format ideam rei quam non effecturus est, idea illa est res, non quidem quæ postea fiet, sed quæ fieri potest, ut repræsentata à mente. Unde per rem faciendam, hic intelligimus, tum illam quæ fit, si modo ulla fiat, tum illam quæ fieri potest.

II. Cum autem artifex non cogitat de uno individuo magis quam alio, idea quam format, complectitur omnia individua certæ alicujus speciei: omnia enim ex æquo repræsentat. Dicitur tamen idea hujus aut illius individui determinati, potius quam alterius, quia hoc vel illud determinate, ex idea illa præconcepta, & operatione consequente, emergit.

Quæst. III. *In quo consistat causalitas finis?*

Resp. I. *Causalitas finis, in actu primo, hoc est virtus illius causativa, est ipsa bonitas finis, vera, vel appa-*

apparens. Hæc enim est aptitudo illius ad efficientem movendum.

II. In actu autem secundo est bonitas illa, ut apprehensa. Ad bonitatem enim, quæ virtus causandi in actu primo est, accedere debet cognitio. seu apprehensio, ut actu causet. Et si res in præsentibus circumstantiis bona appareat, semper movet ad sui prosecutionem.

III. Est igitur causalitas finis, in actu secundo, aliquid distinctum ab actione Efficientis, per quam eum amat & intendit, & media ad eum obtinendum exequitur. Finis enim causalitatem suam in actu secundo exercet, pro priori saltem naturæ antequam efficiens eam amet, intendat, aut prosequatur. Deinde actio efficientis est causalitas ipsius efficientis. Efficiens autem & finis, cum causæ diversæ sint, Causalitates etiam diversas obtinent.

Objicit Comptonus Phys. Disp. 23. Sect. 3. Potest finis per cognitionem representari; & tamen non movere voluntatem ad prosecutionem sui. At posita Causalitate finis, in actu secundo, sequitur effectus, nempe motus ille efficientis.

Resp. Non potest finis representari ut hic & nunc prosequendus, quin efficiens intendat efficaciter eum prosequi. Adeo ut, semper in eo aut in circumstantiis aliquid apparet, quod voluntatem, ab intentione illius efficaci retrahit.

Quæst. IV. An Finis secundum esse reale, an objectivum, Efficientem moveat? Hoc est utrum per entitatem suam, an per cognitionem sui. Extendendi hæc quæstio ad omnes causas objectivas, & multum agitur inter Doctores Pontificios; sed facile nostro iudicio deceditur, si dicas secundum utrumque movere. Quod autem secundum esse reale moveat manifestum est. Secundum illud enim movet, quod efficiens expetit, & intendit: hoc autem est esse Finis reale, non autem esse cognitum. Ut æger qui medicamentis, sanitatis

sanitatis gratia, utitur, sanitatem, secundum esse reale intendit, & prosequitur. Quod autem moveat etiam secundum *esse objectivum*, seu ut cognitus, patet; quia finis incognitus neminem movere potest, aut solet. Quamvis res, quæ cognitionis expertes sunt, in finem tendant ex consilio & directione primæ Causæ, aut per instinctum naturalem in eo ferantur; ut bruta quorum cognitio non distinguit finem à mediis, sub rationibus suis formalibus.

Obj. I. Finis secundum esse reale, est Effectus Efficientis: Non igitur est causa actionis Efficientis; proinde, secundum esse reale, ad eam non movet.

Resp. Finis, secundum esse reale, est & causa actionis efficientis, quatenus inducit eum ad se intendendum; Et effectus, quatenus per aliam illius actionem obtinetur. Sive est Causa intentionis, effectus executionis. Unde finis & efficiens sibi mutuo sunt causa, diversa ratione.

Obj. II. Finis dum causat, nullum habet esse reale, sed tantum objectivum in mente.

Resp. Nullum habet esse reale actuale, hoc est non actu existit: habet tamen esse reale potentia. Et in hoc differt causa finalis, & omnis fere causa objectiva, à Causa Efficiente proprie dicta. Hæc enim, quia vera actione causat, nihil causat, nisi cum existit.

Inst. Impossibilia aliquando movent ad appetitionem sui: ut cum improbus cupit esse beatus, sine virtute, vel sanctitate.

Resp. Beatitudo nihilominus, in eo casu, movet secundum illud esse quam habet in se, nempe ut est status in quo animus acquiescere possit. Sed hinc oritur

Quæst. V. Si ne cognitio bonitatis, per quam finis movet, causalitas illius, an tantum conditio necessaria.

S

Resp.

Resp. *Certum est esse conditionem necessariam* ; quoniam ignoti nulla est cupido. *Est tamen pars Causalitatis.* Nec enim sola bonitas finis, nec etiam sola illius cognitio Efficientem movet, sed utrumque simul : prior quidem ut ratio *quæ* movet, posterior *per quam.* Ratio est quia si cognitionem à causalitate finis rejiciamus, ut plerique faciunt, nulla illius causalitas in actu secundo assignari poterit ; nihil enim tunc restabit, præter ipsam entitatem finis, & actiones Efficientis. Hæ autem sunt effectus causalitatis finis, illa vero esse potest, cum finis actu non causat.

Quæst. VI. *Quid sit causatum finis ?*

Resp. I. *Appetitus, Amor & Intentio sui.* Hos enim effectus in voluntate excitat.

II. *Judicium practicum,* in mente, de fine prosequendo, per executionem mediorum.

III. *Electio* mediorum, & *consultatio* de iis, si dubia sint.

IV. *Amor mediorum* propter finem, licet in se ingrata sint. Ut cum æger, propter sanitatem, multa remedia amplectitur, quæ dolorem & molestiam creant.

V. *Imperium voluntatis,* quo potentias executivas trahit ad media exequenda.

VI. *Finis modum & mensuram mediis ponit :* nec enim Efficiens ea ulterius prosequitur, quam quantum ad finem obtinendum expedit.

DISPU²

DISPUTATIO. XVI.

De Rerum Convenientia, Differentia, & Oppositione.

Quæst. I.

Quid sit Convenientia, & Differentia, seu diversitas? *Burgersdic. Instit. lib. 1. cap. 20.* Convenientiam describit, qua plura, aut quasi plura, uniantur inter se. Distribuit autem, in Realem & Rationis. Convenientiam realem definit, Convenientiam unius rei cum seipsa; Convenientiam vero Rationis, Convenientiam plurium in uno conceptu. Convenientiam Essentialem, Identitatem vocat, quam Unitatem Essentiæ definit. Et distribuit in subordinatam, & coordinatam. Priorem definit, qua conveniunt superiora cum inferioribus sibi subjectis. Posteriolem distribuit in Numericam, Specificam, & Genericam. Primam ex his definit, Identitatem unius individui cum seipso? Secundam definit, Identitatem plurium individuum, sub eadem specie. Et eadem specie esse dicit, quorum una est ratio essentiæ, sive quæ specie non differunt. Tertiam definit, Identitatem plurium specierum, aut individuorum, sub eodem genere. Et eadem genere esse dicit, quæ sub eodem genere sunt. Ibid. cap. 21. Diversitatem definit, qua res à se invicem distinguuntur. Et consimili modo distribuit, ac convenientiam. *Keckermannus* vero, *Syst. Log. Maj. cap. 4.* Convenientiam, Identitatem, & Unitatem, pro iisdem habet. Unde Identitatem definit, Unitatem & convenientiam rerum. Et sic omnes modos convenientiæ ad Identitates revocat. Sed in his plurima sunt quæ reprehensionem merentur.

I. *Convenientia non est unio plurium aut quasi plurium, nisi metaphorice.* Unio enim proprie, est forma compositi; quæ longe alia est à *Convenientia*. Et nulla conveniunt quæ non uniuntur, sed separantur. Ut nos cum illis, qui in India degunt, convenimus, in natura humana, à quibus tamen longe distamus. Fateor in ipsa voce *Convenientiæ*, prout in hoc argumento accipitur, esse metaphoram. *Convenire* enim proprie, est in unum locum, aut saltem in locos vicinos venire. Et idcirco, pro *Convenientia* rectius adhiberetur vox *Similitudinis*, quæ proprie sumpta, eandem rem significat. Sed licet nomen rei definiendæ metaphoram includat, definitio tamen illius, & rei per ipsum significatæ, verbis propriis exprimi debet; si modo ullæ talia suppetant.

II. *Identitas & Convenientia proprie dicta, longe differunt.* Nam *Identitas* est unius rei affectio, qua res illa ipsa est quæ est, seu suam ipsius habet naturam. At *Convenientia* est similitudo unius rei ad aliam. Et omnis res eadem cum seipſa est. At nihil sibiipſi simile est, aut cum seipſo convenit; nisi sensu negativo, (quatenus non est sibi dissimile, seu quatenus non differt, aut dissentit à seipſo), aut metaphorice, cum phrasēs istæ ad *Constantiam* indicandam usurpantur. Unde non conveniunt proprie, nisi quæ distinguuntur, aut quæ ut distincta spectantur.

III. *Ab Unitate etiam proprie dicta, differt tum convenientia, tum Identitas.* *Unitas* enim proprie, est affectio Unius rei, aut plurium quæ componuntur; & sic differt à *convenientia*, quæ semper est plurimum, aut quæ ut plura spectantur. Deinde *Unitas* formaliter negat pluralitatem: at *Identitas* negat rem esse aliam, seu distinctam ab ea quæ est. Cum igitur *Convenientia* plurium *Unitas*, & *Identitas* appellatur; (Ut cum natura Humana Unitarem, & *Identitatem* specificam, in omnibus hominibus, & Natura anima-

animalis Unitatem, & Identitatem Genericam, in omnibus animalibus, habere dicitur) voces *Unitatis*, et *Identitatis*, analogice usurpantur.

IV. *Mira est Definitio Convenientia Realis*, in qua dicitur esse *convenientia Unius rei cum seipsa*. Convenientia enim proprie loquendo, semper est plurimum. Quin potius, sicut diversitas, per quam eadem res est diversa à seipsa, eodem tempore, propter diversas rationes quæ ei conveniunt, (quomodo Angelus, ut virtute intelligendi præditus, est diversus à seipso, ut virtute libere eligendi pollet), est diversitas rationis, sic etiam convenientia rei cum seipsa, convenientia est rationis. Quæ enim conveniunt, necessario spectantur ut distincta. Et qualis est distinctio eorum, quæ conveniunt, talis etiam est convenientia; Proinde quæ sola ratione distinguuntur, sola etiam ratione conveniunt, et realiter idem sunt: Male igitur confunditur convenientia realis cum reali identitate. Et si convenientia unius rei cum seipsa sit realis, qualisnam quæso erit convenientia plurium inter se, ut hominis et bestię in natura sensitiva, vel Socratis et Platonis quoad Doctrinam, Gentilismum, &c.? An non quæ magis conveniunt quam per diversas negationes, aut diversas habitudines ad res distinctas, adeoque conveniunt ante omnem operationem intellectus, realiter convenire dicenda sunt?

V. *Nec convenientia plurium in uno conceptu, recte dicitur convenientia Rationis*. Quæ enim in uno conceptu conveniunt, sæpius realiter conveniunt, ut homo et bestia in conceptu animalis. album, et nigrum in conceptu colorati. Quin nec uno conceptu confuso (seu qui inter ea non distinguit) concipi possent, nisi ante conceptum illum convenirent. Siquidem convenientia inter ea, est ratio cur vere, uno istiusmodi conceptu, concipi possint. Nec quæ uno conceptu conveniunt, Identitatem rationis habere dicenda sunt; sed Identitatem Metaphoricam, et analogicam.

Realiter enim plerumque diversa sunt. Neque ulla est identitas rationis proprie, præter illam qua una aliqua ratio rei est eadem cum seipsa; v. g. ratio Intellectivi in angelo.

VI. *Male etiam Convenientia Essentialis, definitur unitas Essentia.* Nam quodvis individuum habet unitatem Essentiæ, nec tamen Convenientiam Essentialem cum seipsa, nisi plane improprie. Dicendum igitur fuit, Convenientiam Essentialem, esse similitudinem plurium Essentiarum, sive per quam una essentia est sicut alia.

VII. *Nec rectius convenientia Essentialis identitas dicitur, quam convenientia in accidentibus:* quia utraque eorum est quæ distinguuntur, aut quæ ut distincta spectantur, quorum tamen nulla est identitas propria.

VIII. *Nec video cur Convenientia eorum, quæ subordinantur, aut coordinantur, subordinata aut coordinata, magis quam convenientia sentientium, sentiens, aut alborum alba dici debeat.*

IX. *Error non Levis est quod Identitas numerica, tanquam species convenientia, aut identitatis coordinata ponatur.* Hæc enim non est rerum, quæ coordinantur. Nam coordinatio semper est plurium, & nihil proprie coordinatur cum seipsa.

X. *Licet omnis species eadem sit cum seipsa, & similiter omne genus, (quoniam quicquid cadit sub conceptum nostrum, cum seipso idem est, & idcirco individua, quæ similes habent Essentias, ejusdem speciei dici soleant; sicut species quæ similes habent Essentias quæ tales, ejusdem generis) Dura tamen est Locutio, in qua Individua illa eadem dicuntur in natura speciei, aut species eadem in Natura Generis. Non enim eadem sunt, sed similia. Nec eadem habent naturam; sed similes.*

XI. *Deniq;, nec recte dicitur Diversitas, prout convenientiæ opponitur, quæ res à se invicem distinguuntur.*
Licet

Licet enim distinctio & diversitas pro eodem sæpe usurpari soleant, omnino tamen expedit ut distinguantur; vel Loco diversitatis alia vox substituenda est, oppositæ significationis ad vocem convenientiæ: nempe *discrepantia, differentia*; aut aliqua similis. Ratio est quia multa distinguuntur quæ non differunt, hoc est quæ non discrepant, aut discordant: Licet quæcunque differunt, etiam distinguantur. Potest enim esse vera ac realis distinctio sine ulla differentia; ut est inter duas *Lineas*, aut duos *circulos æquales* *Diversitas* igitur ut convenientiæ opponitur, est *dissimilitudo rerum*; seu ejusmodi earum affectio, *per quam una aliter se habet ac altera*; vel quoad essentiam, vel quoad accidentia.

Ex his duo corrolaria addimus.

1. *Falsum est, quod multi axiomatis loco habent, Quæcunque conveniunt realiter, ratione distinguuntur, & quæcunque realiter distinguuntur conveniunt ratione.* Licet enim quæ realiter idem sunt, ratione & conceptu distinguere soleant, & quæ realiter differunt, concipiantur sæpe sub ratione aliqua communi, tanquam essent unum, & idem, (mens enim pro sua vel subtilitate, vel infirmitate, dividere solet quæ unita, & unire quæ divisa sunt, ut in conceptibus confusis. & præcisivis), tamen, quæ realiter conveniunt, etiam realiter distinguuntur, & quæ realiter distinguuntur, vel non conveniunt, vel plus quam ratione conveniunt. Præterquam quod vix reperire possim Convenientiam Rationis, nisi talis dicatur Convenientia plurium rationum, ut in *angelo* convenientia respectum ad actus intelligendi, & volendi.

2. *Falsum etiam est id quod habet Herebordus, Select. Disp. Vol. 2. Disp. 27. Multa realiter differre quorum una est numero essentia.* Nisi hoc sensu intelligatur, quod multa quæ realiter differunt, unam essentiam

compositam conficiant. Sed non sic intelligere videtur Herebordus, ut patet ex instantiis quas adfert in illius confirmationem. *Modus inquit, & res modificata, sunt una numero essentia, & tamen realiter differunt. Ut unio animæ & corporis est eadem essentia animæ & corporis, realiter tamen ab iis differt.* Similiter de personalitate, & natura Suppositi intelligentis, pronunciat. Sed ista omnia sunt mera deliria. Si enim eorum quæ realiter differunt una & eadem esset numero essentia, idem à seipso, eodem tempore, realiter differret. Et, (cum quæ realiter differunt in creatis separari possint à se invicem), idem posset separari à seipso. Unde, cum unio animæ & corporis separari ab illis possit, impossibile est, ut eandem essentiam cum illis habeat. Idem de personalitate, & natura dicendum est. Reliqua quæ ad locum convenientiæ & Diversitatis spectant, brevius expediam. Sit igitur,

Quæst. II. An & quo sensu verum sit, *quæ conveniunt in uno tertio, ea conveniunt inter se?*

Resp. Verissimum quidem illud est, sed sensu nugatorio, seu identico, qui nihil docet; Nam quæ conveniunt in uno tertio, non aliter conveniunt inter se, quam in illo tertio, sive per illud. Quod idem est ac si dicas *quæ conveniunt in uno tertio, illa conveniunt in illo tertio, aut (ad summum) illa conveniunt.* Omnia enim quæ conveniunt, *inter se* conveniunt. Sic igitur exprimendum fuit illud axioma, *quæ conveniunt cum eodem tertio, eatenus conveniunt inter se.* Ut quæ æqualia sunt eidem mensuræ communi, æqualia sunt inter se; & quæ similem habent essentiam, aut similia accidentia, cum eodem tertio, eorum essentia & accidentia sunt similia inter se.

Quæst. III. An detur similitudo in essentiis? Quidam negant, & *Similitudinem* ad qualitates restringunt: Convenientiam vero rerum in essentiis, *Identitatem* appellant. Sed quæstio est de voce: in qua vocibus abutuntur, aut sine ratione uti recusant, ut usurpari recte possent.

possent. Quid enim aliud est *unam rem esse similem alteri*, quam esse ut altera est. Jam vero una res est ut altera, non tantum in qualitatibus suis, & modis, sed etiam in essentia; ut omnia individua ejusdem speciei. Nec convenientia in essentiis, Identitas est nisi improprie. Quo igitur nomine appellabitur convenientia in qualitate, cum hæc ab essentia rei realiter distinguitur?

Resp. *Similitudo* (cum additamento) *strictè sumpta*, ut opponitur æqualitati, & paritati. In defectu enim vocum, nomen Generis restringitur ad unam aliquam illius speciem designandam.

Quæst. IV. *An Convenientia & Diversitas realiter distinguantur à rebus ipsis quæ conveniunt & differunt?*

Resp. I. Si de convenientia & diversitate *Essentiali* loquamur, *palam est eas non distingui à rebus quæ conveniunt & differunt, nisi ratione*. Realiter enim in illo casu distingui nequeunt. Quia quæ essentiis conveniunt, conveniunt *per se*, & quæ essentiis differunt, *per se* differunt. Quod autem *per se* tale est, non est tale per aliquid à se realiter distinctum. Ratione autem distinguuntur, quia res quatenus conveniunt aut differunt, habitudines seu relationes ad alias includunt. Unde distinguitur convenientia à rebus quæ conveniunt, & differentia à rebus quæ differunt, eo modo quo relatio à subjecto et termino; De quo supra Disp. 8. quæst. 3.

2. *Aliter de convenientia, & differentia rerum, in accidentibus philosophandum est*. Quando enim res conveniunt accidente communi, cum illud proprie semper distinguatur realiter, saltem modaliter, adeoque magis quam ratione, necesse est convenientiam subjectorum, magis etiam quam ratione, à subjectis ipsis distingui, Quamquam convenientia ipsa accidentium, (ut per se spectantur), quia essentialis est, sola ratione ab illis distincta sit. Idem de differentia seu diversitate dicendum est.

Quæst.

Quæst. V. *An dua entitates simplices, possint in eadem ratione, simul convenire, & differre?*

Respondent quidam, *posse in gradibus remissis*: Convenientiam enim & diversitatem magis & minus recipere. Falluntur tamen. Ubi enim inter duo, aliqua est Convenientia, & aliqua differentia, licet utraque realiter sit illorum duorum Entitas, necesse tamen est ut illa aliqua, seu remissa convenientia, ut vocatur, in una ratione sit, & differentia, in alia.

Patet, quia convenientia & differentia sunt affectiones rerum dissimiles; adeoque oriuntur à rationibus, non tantum distinctis, sed etiam dissimilibus.

Obj. Substantia & modus conveniunt in aliquo reali positivo, ut per se patet; differunt vero in eodem reali positivo; quia non differunt in nihil. Et spiritus ac materia conveniunt in ratione substantiæ, ut omnes fatentur; in eadem etiam differunt, quia non solis modis differunt. Ipsæ etiam rerum differentiæ, & oppositiones, per se ipsas differunt, quatenus sunt differentiæ, & oppositiones, conveniunt tamen in eo quod utraque sit differentia, & oppositio.

Resp. Nulla ex his conveniunt & differunt in eadem ratione. Ut substantia & modus conveniunt in reali positivo communi, quod plane simile est in utroque; differunt vero in reali positivo proprio. Similiter materia & spiritus conveniunt, in ratione substantiæ communi tantum; & in solis rationibus propriis differunt. Et differentiæ ac oppositiones conveniunt in communi ratione differentiæ, et oppositionis; differunt vero quatenus diversarum rerum differentiæ, et oppositiones sunt. Adeo ut ratio conveniendi, et differendi semper sit alia, et alia.

Quæst. VI. *In quo consistat rerum oppositio*: Item,

an a

an à diversitate distincta sit, et quatenus. Obscure plerique hîc, si non omnes, differunt Logici. Nos luculentius rem, sequentibus Aphorismis, exponere tentabimus.

1. *Oppositio semper est inter terminos distinctos; et omnia opposita quâ talia distincta sunt.* Nec enim idem sibi ipsi, quatenus idem est, unquam opponitur; ut per se patet. Dico autem oppositionem esse *inter terminos*, hoc est inter objecta quæ apprehensionem mentis nostræ terminant, (de oppositione enim simplici nunc sermo est), potius quam inter *res*; quia extrema oppositionis non semper sunt res, proprie loquendo, ut in oppositione privativa, et contradictoria maxime patet.

2. *Oppositio in genere, et latissima significatione, est quavis plurium repugnantia.* Et *opposita sunt, quæ consistere nequeunt.* Cui opponitur affectio rerum quæ cognatio, et consensus dicitur, quæ nihil aliud est quam convenientia, seu similitudo late sumpta

3. Hinc sicut omnes omnino termini aliquatenus conveniunt; ut ipsum *ens*, et *non-ens*, *homo*, et *non-homo*, *cæcus*, et *videns*, in hoc quod omnes esse possint, et aliquando sint objecta mentis nostræ, et signata sermonis; sic etiam omnes aliqua ratione repugnant sibi invicem. Adeo ut unum et idem oppositum et non oppositum sit, diversa ratione. Ut *probus* et *improbus* ratione formarum, *probitatis*, nempe et *improbitatis*, opposita sunt; sed ratione subjectorum, quæ sunt duo homines, cum per se præcise ut homines spectantur, non opponuntur, sed consentiunt.

4. Sed *repugnantia* terminorum ex variis capitibus oriuntur, quæ valde sunt dissimilia. Unde *alia major, alia minor est.* Quidam enim termini ita sibi met invicem repugnant, ut in rerum natura consistere nequeunt; ut *res* et *sua negatio*, seu *carentia*. Nihil enim potest simul esse et non esse. Et hæc

hæc oppositio *contradictio* vocatur : Sed hic intelligenda est carentia *totalis*, five *Universalis*. Adeo ut cum dicimus *hominem & non-hominem* consistere non posse in rerum natura, per *non-homo* intelligendum est *nullus homo*, seu totale *non-esse* hominis. Secus enim equus est aliquod *non-homo*, quod cum homine satis bene consistit. Sed *homo & nihil quod sit homo* consistere nequeunt. Ratio est quia *aliquid quod non est homo*, potest esse quid positivum. Plura autem positiva facile consistunt, nec alterum ab altero expellitur è rerum natura. Si autem dicas carentiam rei non posse esse in rerum natura, respice ad ea quæ de negationibus dicta sunt supra *Disp. 4. q. 5.*

5. Secundo, *alii sunt termini qui in eodem subiecto consistere nequeunt*, circa quod idcirco pugnare dicuntur. Ex quibus alter interdum positivus est, nempe forma, seu modus vel pars, vel adjunctum externum, quæ omnia nomine *Habitus* veniunt; alter negativus, qui privatio dicitur : ut *Scientia*, & *ignorantia*, *visus*, & *cæcitas*. Et terminorum ejusmodi oppositio, *privativa* dicitur, denominatione sumpta ex altero oppositorum, nempe privatione. Interdum uterque terminorum est positivus. Quo casu, si absoluti sint, *Contraria* vocantur, & oppositio eorum *contrarietas* dicitur. Sic opponuntur modi substantiarum, qui maxime sunt diversi, seu dissimiles; ut in mente, *virtus & vitium*, *scientia & error*; in substantia corporea, *calor*, & *frigus*, *gravitas*, & *levitas*, *albedo & nigredo*. Notandum tamen est, omnia opposita nomine contrariorum, nonnunquam appellari. Sin respectivi fuerint, oppositio *Relativa* nuncupatur; ut oppositio inter causam & effectum, partem, & totum, subje-ctum, & adjunctum, si ad idem conferantur. Sic enim nihil potest esse & causa, & effectus, totum, & pars, ejusdem rei.

6. Oppositio eorum quæ circa idem subiectum pugnant.

pugnant proprie est inter formam & illius carentiam, vel inter plures Formas, Modos, aut Relationes: subjecta autem quæ hisce afficiuntur non nisi ratione illorum opponuntur, seu quatenus illis affecta sunt: ut *cæcus & videns, albus & niger, Pater & Filius.*

7. Quæ tamen privative opponuntur, sunt Habitus, et privatio, non qualiscunque, sed illius tantum habitus quem tollit. Sic *manus & carentia pedis*, in homine non opponuntur privative; sed manus & carentia manus, pes & carentia pedis. Et (quod magis advertendum est) aliquis gradus *Lucis*, & aliquis gradus tenebrarum indeterminate, in aere, tempore vespertino, non opponuntur privative, sed aliquis gradus determinatus lucis, & ejusdem carentia. Sicut nec scientia rerum naturalium, & ignorantia spiritualium, sed scientia rerum naturalium, & earundem ignorantia.

8. Quarto denique, *alii sunt termini, qui*, licet consistere possint in rerum natura, & in eodem subjecto, (nisi quod plurimi eorum in nullo subjecto, ne seorsim quidem esse possint), *nequeunt tamen identificari.* Et ex his quidam similitudinem in essentiis denotant: ut omnes species rerum, sive substantiæ sint, ut *homo, equus, arbor, lapis*; sive modi, ut *scientia, virtus, albedo, flavedo, lux, motus*, sive concreta ex utrisque, ut *calidum, lucidum, grave.* Et termini istiusmodi *disparate* opponi dicuntur. Quidam plane similes sunt; ut duo circuli æquales. Si igitur hi oppositi sint, utique omnes termini distincti, quatenus distincti sunt, etiam illi qui sola ratione distinguuntur, quatenus sic distinguuntur, oppositi sunt dicendi. Licet enim qui *disparati* vocantur dissimiles sint, nullam tamen repugnantiam includunt ad se invicem; nisi quod non possint identificari. seu de se affirmari.

Dices forte, pugnare, quod non possint esse sub eadem specie infima; aut propter dissimilitudinem
in

in essentiis. Sed quid hoc est repugnare ut sint sub eadem specie infima, nisi quod repugnent esse omnino similes in essentiis, seu quod necessario dissimiles sint? At *esse dissimile*, non est idem ac non posse consistere cum alio, adeoque nec oppositum esse.

9. Hinc inferimus, *disparata non esse proprie opposita*. Multo minus omnia illa quæ distinguuntur, seu quorum unum non est aliud. Unde defendi nequit definitio vulgaris oppositorum. *Qua nec de se invicem, nec de eodem tertio, secundum idem* (id est secundum eandem partem vel naturam) *ad idem* (seu eodem respectu) *& eodem tempore, affirmari possunt*. Sic enim omnia non solum quæ dissimilia, sed etiam quæ realiter distincta sunt, quin & quæ sola ratione distincta sunt quatenus distinguuntur, essent opposita. Nulla enim ex his de se vere affirmantur. At quis dixerit duas lineas æquales esse oppositas, nisi forte quoad locum, cum altera è regione alterius locatur? Et longe absurdus, Genus & differentia, & omnia attributa essentialia ejusdem rei, opposita dicerentur. Sic enim omnia consentanea essent opposita; præter ea quæ solis vocibus distinguuntur, ut homo et *Anthrôpos*. Deinde omnis oppositio præsupponit distinctionem, adeoque nulla ex parte eadem cum illa est.

10. Nec recte definitur oppositio à *Claubergio*. *Ontoph. Sect. 265. Summus diversitatis gradus*. Sic enim, nisi declararetur quisnam gradus summus sit, sola contradictio erit oppositio. Nec recte declaratur, si dicas illa esse opposita, quorum positio unius est ablatio alterius. Nam si *ponere* simpliciter hic intelligas, sic sola contradicentia erunt opposita: si respectu alterius; sic non solum *diversa* sed etiam *distincta* erunt opposita; Nam posito uno distinctorum, tanquam eodem cum hoc vel illo, tollitur alterum; ut si hic homo sit Petrus; non potest esse Paulus.

Hinc

Hinc reprehendendum est, quod idem autor dicit supra Sect. 274. *Contrariorum pugnam, quandoque esse naturæ suæ diversitatem, propter quam de se invicem affirmari nequeunt*; ut *par & impar, rectum & curvum*. Non enim sola diversitas, sed simplex distinctio affirmationi mutuae rerum obstat. Nec *par & impar* contraria sunt, ut vulgo statuuntur, sed privantia. Curvitas autem & rectitudo circa subiectum tantum pugnant.

11. Nec probandus est *Ramus*, qui lib. 1. *Dialect.* cap. 12. & 13. *Diversa definit, quæ sola ratione dissentiant; opposita vero quæ ratione & re*. Multa enim sunt diversa, quæ non sola ratione, sed re ipsa dissentiant. Sumamus enim exempla diversitatis quæ ab ipso Ramo ponuntur, nempe *victoriam, & insignia victoriæ, ratione Sylle & Muræna, qui ante victoriam triumpharunt, item esse formosum & facundum ratione Ulyssis, illa naturis suis dissentiant, hoc est dissimilia sunt, non autem sola ratione alicujus tertii, cui simul non conveniunt. Quin illa, & quæ ejusmodi sunt, magis dissentiant re, quam relata plurima. Hæc enim, quoniam Relatio est tantum ratio rei, sola ratione dissentiant: ut esse simile, & dissimile, respectu ejusdem. Unde vel Relata è censu oppositorum expungenda sunt, vel mala erit Definitio oppositorum à Ramo tradita.*

12. Hinc etiam Relata, præter contraria, & privantia, (sunt enim & hæc relata quædam; nam contrarium est contrarii contrarium, et privatio est Habitûs privatio) inter opposita non sunt numeranda: quia repugnantia eorum nec est in natura; ut contradicentium, et privantium; nec ratione subiecti præcise; (nam *paternitas, et filiatio* eidem subiecto convenire possunt), sed præcipue ratione ejusdem termini. Ad diversa igitur potius referenda sunt. Unde et inter opposita in Institutionibus non retulimus.

13. Sunt

13. Sunt igitur tria tantum genera oppositorum, *Contradictoria*, *Privantia*, & *Contraria*. Ex quibus contradictoria maxime opponitur, quia absolute *repugnantia* sunt. Proxime accedunt privantia, quia eorum alterum est quid negativum, in quo cum contradictoribus conveniunt. Minorem tamen oppositionem includunt, partim quia extremum quod negativum est, aliquid positivum connotat, nempe capacitatem subjecti ad formam quam tollit recipiendam; partim quia utrumque ex privantibus circa idem subiectum pugnat; cum contradictoria à subiecto absolvantur. Minima vero est oppositio contrariorum; partim quia utrumque est positivum, positivum autem cum positivo minus pugnat, quam cum negativo: partim, quia sub eodem genere intrinseco, & reali, continentur, in quo idcirco consentiunt. At contradictoria & privantia in pullo genere seu ratione essentiali communi, conveniunt, nisi quod utrumque extremorum potest esse objectum actus alicujus vitalis, cognitionis puta, aut appetitionis.

Obj. Privantia, tum naturis suis pugnant, eo quod alteram eorum negativum sit; tum ratione ejusdem subjecti; in quo consistere nequeunt. Unde & oppositionem tum contradictoriam, tum contrariam simul obtinent. Hæc igitur maxime opposita sunt.

Resp. Non sequitur. Quia his non obstantibus, in diversis subjectis simul consistunt. Ut *cæcus* in *Homero*, & *visus* in *Hesio*. lo. Item in eodem per vices. Denique extremum negativum aliquid positivi connotat, & multo minus late patet quam in contradictoriis. Unde inter privantia datur medium tum negationis; ut inter *cæcum*, & *videntem*, mediat *lapis*, qui nec cæus est, nec videns; tum participationis; ut inter *cæcum* & *videntem*, mediat *luscus*, vel *caligans*; inter *diem* & *noctem* mediat *crepusculum*.

DISPUTATIO. XVII.

De Vocibus.

Quæst. I.

Quid voces significent? Quidam enim, ut *Scotus*, & alii, dicunt voces solas *res* significare, non autem *conceptus*, nisi paucæ quædam quæ solis conceptibus significandis adhibentur; eo modo quo reliquæ significant *res*; ut *cogitatio*, *intellectio*, *apprehensio*, *judicium*, et reliquæ quæ actuum mentis nomina sunt. Fatentur tamen voces pro conceptibus substitui, quia eorum interpretes sunt. Ideo enim vocibus utimur, quia conceptus non possumus aliis, per se et immediate ostendere. Ex altera parte, *Boethius*, solos conceptus vocibus significari statuit. Alii utrumque, tam *res* quam conceptus, per voces significari docent: estque communis sententia. Nos sic definimus.

Thes. I. Voces significant & res, & conceptus simul. Quod res significant, patet.

1. Quia cum dicimus, ex. g. *ignis urit*, sensus est; *res significata per vocem ignis*, nempe substantia quædam fluida et calida, *urit*, seu actionem ustionis præstat. Vox igitur *ignis* significat rem quæ nomine *ignis* dicitur.

2. Audita voce significativa, si significationem intelligimus, statim trahimur ad cogitandum de re aliqua. Ut cum audimus hanc enunciationem, *Luna exorta est*, statim cogitamus de *Luna*, ejusque apparitione supra horizontem.

3. Voces significant ea de quibus loquimur; at de rebus plerumque loquimur, non de solis conceptibus.

T

4. Cum

4. Cum Adamus in principio, nomina animalibus ad se adductis, imposuit, quid aliud fecit quam signa quædam ad-invenit, et constituit, quibus illa postea dignoscerentur, et à se invicem distinguerentur.

5. Si voces solos conceptus significarent, pleræque propositionum essent falsæ; ut cum dicimus *Lapis est visibilis*, si *Lapis* solum conceptum significet, sequeretur hunc esse sensum, *conceptus qui significatur nomine Lapis est visibilis*, quod falsissimum est.

Quod autem conceptus etiam, vocibus aliquo modo significantur, manifestum est.

1. Quia ex vocibus ab alio prolatis, colligimus eum cogitare de rebus: Judicium item facimus de conceptibus, sintne veri, an falsi, clari, an obscuri, ordinati, an confusi, &c.

2. Intendimus etiam aliquando, dum ipsi loquimur, ut audiens non tantum res concipiat, sed etiam sciat nos eas intelligere.

3. Voces & oratio institutæ sunt, ad societatem, & commercium inter homines colendum: Societas autem illa, magna ex parte, in communicatione conceptuum sita est. Cum enim conceptus detegere non possumus aliter quam actionibus, & vocibus, his sæpius utimur ad eos indicandos.

4. Si voces non essent signa conceptuum, nihil quod dicimus esset verum aut falsum *Ethice*: sed tantum *Logice*. Veritas enim *Ethica* consistit in conformitate sermonis ad judicium mentis, seu quod ei subest judicium rei de qua loquimur. Falsitas autem, seu mendacium, est cum sermo significat conceptum seu judicium, quod non est in mente loquentis. Unde nec audiens fallaci sermone decipi posset, nisi existimaret eum significare judicium aliquod internum quod in mente non habet.

Objicit. *Boethius*. I. Verba *Aristotelis*, de *Interp.*
Cap.

Cap. 1. *Voces prolatas esse signa conceptuum, qui in anima sunt; scripta esse signa vocum.* Ubi nullam mentionem rerum facit.

Resp. Idem tamen cap. ult. dicit, *quia res est, vel non est, orationem esse veram, vel falsam.* Vult igitur orationem utrumque significare, tum res, tum conceptus. Partem igitur tantum veritatis protulit, quæ præsentī instituto sufficiebat.

Objicit. II. Nutus æquipollent vocibus in significando; cum hoc discrimine, quod voces auribus; nutus oculis percipiuntur. At nutus solum indicant consensum, & dissensum mentis. Ergo et voces.

Resp. Negatur minor. Nutus enim adhibentur à mutis, non tantum ad cogitationes suas, sed etiam res significandas: ut cum porrectione digitorum, à fronte, *diabolum* indicant &c. Reliqua quæ opponit, nullam fere speciem argumentorum gerunt.

Difficilius Scotus Objicit.

I. Si voces significarent conceptus falsæ essent pleræque propositiones: ex. g. hæc, *homo est animal.* Sensus enim esset, *conceptus hominis est conceptus animalis.*

Resp. Hoc argumentum probat quidem voces, non eodem modo significare res, ac conceptus. Non autem probat nullo modo conceptus significare. Potest enim idem signum plura diversimode significare. Ut *vox natura* sua, significat esse causam aliquam, & motum, in eo à quo profertur; sed ex *voluntate* & consensu hominum, res & conceptus. Qua autem diversitate, voces res & conceptus significant, sequente quæstione dicitur.

Obj. II. Sequeretur omnem vocem esse æquivocam, seu ambiguam, quia plura significat diversa, quatenus sunt diversa. Nempe vox *Homo* rem quæ dicitur Homo, & conceptum de Homine.

Resp. Negatur connexio. Ratio est, quia illæ tantum voces Æquivocæ sunt, & incertæ significationis,

tionis, quæ unum è pluribus indeterminate significant, nec possunt simul accipi pro omnibus significatis. Ut *Gallus* vel *Hominem* vel *Avem*. indeterminate, non autem utrumque simul, in eadem oratione. At voces in eadem oratione, res & conceptus simul, & determinate significant. Ut *Homo* denotat rem quæ dicitur Homo, & simul loquentem de eo cogitare.

Obj. III. Multæ sunt voces quibus non respondent conceptus. Ut 1. In iis qui voces proferunt quas non intelligunt, ex. g. pueri cum legere docentur linguas ignotas. 2. In avibus, puta psittacis, picis, &c. quæ voces humanas imitantur, sine conceptibus. 3. In dormientibus. 4. In iis qui aliud cogitantes voces temere proferunt. 5. Item in phreneticis, qui linguam gubernare nequeunt. 6. In iis qui mentiuntur.

Resp. I. Hæc objectio non concludit de vocibus loquentium, qui concipiunt ea quæ loquuntur. De quibus precipue instituitur quæstio.

II. Sed & illæ, quibus non respondent conceptus in proferente, conceptus significant, hoc est mentem audientis trahunt ad cogitandum de conceptibus, qui vocibus istis subesse solent: item ut existimet loquentem eos habere, aut ad dubitandum utrum habeat necne. Ad dormientes quod attinet, non constat eos nullos habere conceptus rerum de quibus loquuntur. Et certum est habere aliquando, ut cum loquuntur de iis quæ per somnium mentibus eorum offeruntur. In iis etiam qui aliud cogitantes loquuntur, possunt esse conceptus (saltem confusi) rerum quas voces significant, idem de phreneticis dicendum.

Thesis II. Cum voces significare dicuntur *Res*, per *Res intelligenda sunt omnia quæ sub conceptum Humanum cadere solent. Adeoque non tantum res veras, & positivas, sed etiam negationes, privationes, ficta possibilis & impossibilia. Quin & ipsæ voces, sub aliqua ratione communi, aliis vocibus significantur. Ut vox omnes vo-*
ces;

ces; & *Dictio* omnes voces articulatas, significet, *Nomen* omnia nomina, *Verbum* omnia verba &c. Ex altera vero parte, voces non tantum affectus mentis, sed omnis animi affectus indicant. Ut *volitionem*, & *nolitionem* voluntatis; *amorem*, *odium*, *gaudium*, *tristitiam*, *timorem*, *fiduciam*, *iram*, & reliquos affectus. Item *imagines* rerum sensibilibus, quæ in phantasia formantur. Ut cum præceptor discipulum legere jubet, voces discipulo significant non tantum actum legendi, sed etiam voluntatem & imperium præceptoris, de eo præstando.

Quæst. II. *An voces, eodem modo, res, ac conceptus significant?* Et si diversimode, quænam sit illa diversitas? Hic quidam docent, voces primo, & immediate significare conceptus; Res autem non nisi mediantibus conceptibus. Sic *Burgersdicius*, alios secutus, *Inst. Lib. 1. Cap. 24.* Alii contra, dicunt primo, & immediate significare res, & consequenter conceptus; quam sententiam Scoto ascribunt *Conimbricenses*, in *Lib. de Interpret. q. 3. art. 2.* Alii deniq; dicunt immediate significare tum res, tum earum conceptus. Et his assentiuntur *Conimbricenses*, Loco citato. Est & hic alia quæstio, *an voces sint signa suppositiva rerum, & manifestativa duntaxat conceptuum.* Quidam affirmant, inter quos *Galtruchius*, *Mith: & Inst. Log. Disp. 1. Cap. 3.*

Thesis I. Voces primario, et præcipue, significant res, præter conceptus; quod ideo addimus, nequis cavilletur, conceptus esse, res. Sumuntur enim res hic, ut à conceptibus distinguuntur. Patet.

1. Quia majus beneficium est audienti res ipsas intelligere quas voces significant quam conceptus loquentis. Et frequentior prioris usus est, quam posterioris.

2. Unde & qui alium alloquitur, non, ut plurimum, sollicitus est, utrum is conceptus suos eorumque modos animadvertat, modo res ipsas intelligat.

Ut patet in iis qui alios instituunt. Et audiens præcipue & sæpius in res quæ vocibus significantur, cogitationem dirigit. Dico sæpius, quia aliquando præcipue observat quid loquens velit aut intendat, et quid ei gratum, aut ingratum sit. Scilicet cum finis præcipuus ex communicatione est animum ejus intelligere.

Thef. II. *Voces immediate significant res, et mediante cognitione rerum, conceptus, & affectus loquentis.* Probat,ur,

1. Quia, cum audimus voces, prius percipimus quænam res per eas significantur, quam loquentem de rebus illis cogitare. Ex sermone enim, percipere non possumus eum de his rebus, potius quam de aliis cogitare, nisi quia novimus voces significare has, & non alias.

2. Vocibus auditis, statim apprehendimus res significatas, (si modo usum vocum communem novimus), sine discursu. At cogitationes loquentis non nisi per discursum percipimus, in hunc modum. *Qui profert voces quæ has res significant, novitque earum significationem, & quantum apparet, attendit ad ea quæ loquitur, is cogitat de his rebus: at qui profert has voces, novit significationem, & considerate loqui videtur. Ergo de his rebus cogitat. Vel brevius, Signa usitata vocalia harum rerum edit; ergo de his rebus cogitat. Prius igitur voces exhibent audienti res: & deinde conceptus de iisdem rebus.*

Thef. III. *Voces postquam iis imposita est significatio, necessario & semper significant res, hoc est immediate aptæ sunt rebus significantis.* Siquidem nihil aliud necessarium est ut significant res, quam ut ad hunc finem & usum instituantur, & applicentur. Sed *conceptus loquentis non necessario, nec semper significant.* Quia is non semper cogitat de rebus quarum signa vocalia profert. Hinc etiam certiora sunt signa rerum, quam conceptuum; Certi enim sumus, ex usu communi, quod has & illas res significant: at non
perinde

perinde certi sumus, de conceptu loquentis. Fieri enim potest ut nihil omnino cogitet de rebus, aut ut non cogitet prout loquitur.

Thef. IV. *Sunt etiam voces nomina rerum* quibus res appellantur. Unde & *signa suppositiva* vocantur, quia res repræsentant, & earum vice funguntur, seu pro illis substituuntur. At *non sunt nomina conceptuum*, (nisi quod paucæ quædam hoc munere fungantur sicut & nonnullæ nomina vocum sunt) *sed indicia*. Unde signa *manifestativa* dicuntur. Scilicet quia media quædam sunt quibus conceptus loquentis innotescunt.

Patet ex eo, quod verum est dicere vox *homo* est nomen hominis: at non est verum, esse nomen conceptus de homine. Hinc Scotus negavit voces esse signum conceptuum. Et Conimbricenses signa Doctrinalia rerum vocant: quia in docendo eas pro rebus sufficimus.

Objiciet aliquis. Voces manifestant res: Alioquin ineptæ essent ad usum docendi. Et subrogantur pro conceptibus, seu eorum vice funguntur. Quia enim non possumus conceptus nostros aliis immediate, et per se detegere, in locum eorum voces substituimus.

Resp. Conceditur voces manifestare res, et proinde esse signa earum manifestativa, non minus quam conceptuum. At substitui proprie in locum conceptuum negamus. Non enim illorum nomina sunt. Quod igitur surrogari et constitui pro conceptibus dicantur, nihil aliud intelligendum est, quam quod usus earum medium quoddam est quo conceptus aliis patefacimus. Si autem quæras quid sit *esse nomen rei*; Respondeo nihil aliud quam esse *signum vocale pro re substitutum*.

Quæst. III. *Unde voces significationem habeant, à natura an aliunde?* Hic nulla est controversia. Respondemus igitur.

I. *Voces inarticulatæ, quæ affectus animi, significant, ut gemitus, fletus, risus, sunt signa naturalia.* Sunt enim eadem apud omnes, ut & affectus quos indicant. Et natura duce ab omnibus eduntur. Licet eatenus arbitraria sint, quatenus simulate usurpari possunt, & solent, ab iis in quibus affectus congrui non respondent.

II. *Voces articulatæ, natura sua, aptitudinem habens significandi remotam;* hoc est ut adhibeantur ad res significandas. Et quoad hanc omnes sunt æquales. Secus enim non possent ad res significandas usurpari. Quanquam nonnullæ ad utum illum aptiores sint quam aliæ; illæ scilicet quæ facilius pronunciantur.

III. *Omnes voces Humana, natura sua, aliquid significant.* Scilicet facultatem internam loquendi, & aliquem motum in animo, & conceptus indeterminate, hos vel illos. Siquidem sine his, homines voces sponte sua non ederent. Dico *sponte sua*, quia Dæmones aliquando utuntur organis loquelæ energumenorum, ad multas voces formandas, ad quas hi nihil conferunt, sed aguntur ut machinæ quæ per artem quasdam voces humanas imitantur.

IV. *Non tamen naturaliter, seu natura sua, habent quod has res potius quam alias significant, sed ex instituto, seu arbitrio, ac placito, divino, vel humano.* Et eadem causa est, cur hos conceptus significant, potius quam alios. Ex. g. quod vox *Homo* animal ratione præditum, in lingua Latina, significet, potius quam lapidem; & loquentem de tali animali cogitare dum eam profert, potius quam de equo, aut lapide, ex arbitrio Dei vel hominis est. Probat. *ur.*

I. Quia signa naturalia sunt eadem apud omnes gentes; ut *suspiria* ubique significant dolorem, nisi quod aliquando simulata & ficta sint. At voces articulatæ non sunt eadem apud omnes, sed longe diversæ.

versæ. Aliis enim utuntur Angli, aliis Galli, aliis Germani.

2. Sgna naturalia eadem permanent, quamdiu eadem sint res quæ illis significantur. At manentibus iisdem rebus, mutantur voces quibus appellantur: veteres inolescunt, novæ usurpantur. Magnæ enim mutationes in multis linguis contigerunt.

3. Signum naturale determinatur ad unum significandum: ut *fumus* ad ignem, *Iris* ad pluviam. At voces articulatae non sic. Nam vox *ignis*, quæ nunc significat ignem, usurpari potuit ad significandam aquam, si Authoribus linguæ Latinæ ita placuisset. Ideo autem significant hunc conceptum, aut affectum animi, & non alium, quia ad hanc rem, & non aliam significandam adhibentur.

Obj. I. Vox est homini naturalis. Ergo est signum naturale.

Resp. I. Ad Antecedens. Vox aliqua est naturalis. Quia naturale est homini loqui. Ubi tamen *naturale* significat id ad quod natura in homine propendet, non autem id quod connascitur, multo minus quod essenziale est. Unde minus proprie sermo homini naturalis dicitur. Et de voce articulata negari potest antecedens. Homo enim sine societate, & consuetudine loquendi, nulla lingua, sed solis nutibus uteretur, ut experientia probatum narrationes historicæ testantur. Esto autem sermonem aliquem esse homini naturalem, minime tamen à natura est quod hac lingua loquatur potius quam alia, sed ex sola consuetudine, institutione, et usu.

II. Mala etiam est consequentia. Quia licet naturale esset homini his vel illis vocibus uti, quod tamen ad has res potius quam alias significandas adhibeat, est arbitrium, et ex instituto.

Obj. II. Institutio nihil ponit in vocibus: tum quia non operatur physice; tum quia jamdudum præcessit, ac præterit. Non potest igitur efficere ut voces significativæ sint.

Resp.

Resp. Institutio nihil *physicum* ponit in vocibus, esto; nihil *morale*, qualis est significatio, negatur. Quemadmodum enim voluntas Magistratus, valorem et æstimationem pecuniæ conciliat, ita voluntas Dei, aut hominum, vocibus significationem imponit. Ad priorem probationem dicimus, non opus esse actione physica ad effectum moralem: Ad posteriorem, licet voluntas primorum Autorum linguarum præcesserit, et (si de humana voluntate loquamur) præteriiit, effectus tamen permanet, succedente consensu, et usu sæculorum sequentium.

Obj. III. Bruta, per naturam, edunt voces sibi necessarias; ut oves *balatum*, equi *hinnitum*, &c. Si igitur homines per naturam non loquerentur, imperfectiores essent in suo ordine, quam bruta in suo

Resp. I. Homines varias voces edunt per naturam, ut *vagitus*, *clamores*, *risus* &c. non minus quam bruta.

II. Quod autem per naturam non loquantur articulate, præsertim integram linguam aliquam, aut quantum necessarium est ad conceptus et affectus suos aliis notificandos, non arguit imperfectionem. Quia natura eas facultates ipsis concessit, quibus possent voces vel invenire, vel ab aliis inventas facile discere.

Obj. IV. Quædam voces similitudinem habent rerum quas significant, ut *tinnitus*, *boatus*, *clangor*, et multæ aliæ quæ *fictitiæ à sono* vocantur. Saltem igitur illæ sunt signa naturalia.

Resp. Nec illud concedendum est. Quia poterant homines Latini aliis vocibus uti, ad easdem res significandas. Ut et aliæ gentes aliis utuntur, probatio autem non concludit; quia non omnia signa naturalia sunt, quæ similitudinem aliquam rerum gerunt. Ut patet de Signis sacramentalibus, aquæ, panis, et vini, quæ analogiam aliquam et umbram

umbram habent rerum spiritualium quas significant, sunt tamen pure ex instituto divino.

Obj. V. Quicquid est essentialis rei est etiam naturale. At significatio est essentialis voci significativæ; est enim illius forma, sicut sonus est materia.

Resp. Significatio est essentialis voci significativæ, *reduplicativè*, seu quatenus est significativa; sicut *nigredo* est de essentia lanæ per artem denigratæ, quæ nigra est; At non specificativè, seu ut vox, etiam articulata.

Obj. VI. Non est in potestate aut arbitrio hominum, ut voces hoc vel illud significant; Non enim penes eos est, ut, auditores voce hac vel illa prolata, hoc vel illud intelligant. Non igitur ex Voluntate Institutentium est, quod voces significant.

Resp. Negatur Antecedens. In potestate enim hominum est vocibus uti, et applicare ad res has vel illas significandas, eoque significationem iis imponere. Adeoque (quod ad probationem est) medio uti quo alii ad has vel illas res intelligendas inducantur. Cum enim sentiunt alios hisce vel illis vocibus tanquam signis certarum rerum semper uti, ex usu diuturno facile percipiunt quasnam res per eas indigere volunt.

Obj. VII. Si voces ex instituto significant, nemo posset significationem earum intelligere, nisi qui institutum illud sciret. At multi significationem vocum intelligunt, qui de instituto aliorum nihil sciunt: Ut pueri et rustici. Ergo,

Resp. Neganda est major. Quia multæ res intelliguntur, quarum causæ et origines nesciuntur. Potest igitur significatio vocum, ex usu frequenti, intelligi ab iis qui nesciunt, causam cur significant. Rusticos quod attinet, multi eorum, si rogentur cur vox *homo* hominem significet, respondebunt, quia commu-

communiter usurpatur ad hominem indicandum.

Quæst. IV. *Quinam fuerunt primi vocum & linguarum Autores.*

Resp. I. *Primus vocum & linguarum Autor* proculdubio fuit ipse Deus. Nec enim credibile est homines, saltem ex mero facultatum naturalium usu, eas invenire potuisse. Est enim in omnibus linguis ea, (si ita loqui liceat), regularitas, cum paucis anomalis, quæ Autorem divinum aperte ostendit. Unde omnis linguæ Idioma seu proprietas, ad certas regulas seu præcepta, reduci potest, & actu sæpe reducitur per artem quæ *Grammatica* dicitur: In qua omnes voces, ad certos ordines, seu partes Orationis revocantur, quæ numerum octonarium, aut novenarium non excedunt: Nomina, numero, genere, & casu; verba, conjugatione, temporibus, & personis variantur; in quibus tamen omnibus una est radix. Unde primis generis humani parentibus, Deus creator, ut reliqua privilegia, ita etiam *loquelam*, hoc est primam linguam, (quæ probabiliter fuit Hebræa) concessit, seu inspiravit. Quî enim aliter statim à creatione, vir mulierem compellasset, & non diu post, uterque apud Deum, se delicti sui excusassent; si modo id sermone externo fecerint, quod omnino verisimile est? Deinde ex sacris literis constat, Deum in pœnam generis humani præsertim ob ceptum illud audax, in turri Babylonica extruenda, linguas divisisse. Et rationi consentaneum est omnes linguas Cardinales, seu Primitivas, tum cæpisse usurpari, præsertim quoad partes præcipuas.

II. Sed & *homines ipsi*, per autem & industricam, *plurimas in linguis mutationes fecerunt*. Et primo ascribi ipsis possunt variæ Dialecti, in una & eadem lingua: Quibus Hebræa, & Græca præcipue, abundat. Sunt enim Chaldaica & Syriaca, & forte aliæ quædam uniûs Hebraicæ Dialectæ diversæ: sicut Ionica, Attica, Dorica, &c. Græcæ. Deinde

vix

vix est quod dubitemus, varias voces, variis in sæculis, singulis linguis fuisse adjectas, easque non solum derivatas, & compositas, sed etiam primitivas, & simplices. Novæ etiam phrasæ & syntaxes sæpius inventæ sunt. Denique, (ne diutius hac in re immoremur) ex confusione populorum, ac gentium, & continuo commercio, è plurimis linguis antiquis novæ exortæ sunt: Partim dum una gens, linguam alterius, ad modum loquendi sibi prius assuetum inflexit; partim dum multi, fastidio vocum quarundam linguæ propriæ, aut quia minus Emphaticæ videbantur, aut quavis alia de causa, ex aliis linguis plurimas mutuati sunt: ut plæræque gentes Æuropææ, nunc è Latina, & Græca, paucas etiam ex Hebraica. Et licet regula communiter recepta est, ut cum vulgo, hoc est juxta consuetudinem communem, loquamur, cuique tamen Artifici, præsertim Doctoribus Philosophiæ, permittitur voces fingere; cum necessitas ita postulat.

Quæst. V. *Quenam è linguis melior sit?* Nemo enim ut opinor, dicet omnes utilitate, & aptitudine ad usum loquendi, esse æquales.

Resp. *Præstantia* & utilitas linguæ, in his præcipue sita videtur.

1. Si *Copiosa* sit; hoc est, si in ea singulis rebus de quibus loquuntur homines in hac vita, singulæ voces respondeant. Nam rebus diversis, ut sunt diversæ, idem nomen imponere ambiguitatem parit, eoque incommodum est. Hac prærogativa gaudet lingua Græca supra reliquas, licet vocibus ambiguis non careat.

2. Si *compendiosa* sit; in qua plura breviori temporis spatio, dici possunt. Quoad hanc virtutem, ipsa, Græca, & Latina, plurimis aliis cedunt, nominatim nostræ, quæ Monosyllabis abundat.

3. Si

3. Si *facilius pronuncietur*. In quo deficit Lingua Hebraica, & Hibernica, (si fas sit eas comparare) propter litteras Gutturales, & Nasales, & Diphthongos pronuntiatio difficiles.

4. Si voces *rebus* quantum fieri potest, *congruant*. Hoc est, si simplices simplicibus, compositæ compositis, positivæ affirmantibus, negativæ & privativæ privantibus, similes similibus, diversæ diversis, affines affinibus, exprimantur.

5. Si voces auribus gratæ sint. Hoc est sonis claris, & lenibus constiterint : ut in Lingua Latina, Italica, Gallica, & Anglicana secundum puriorem illius Dialectum.

Non tamen inter virtutes Linguarum referimus, ut vocibus tropicis vacet, sic enim minus aptæ essent ad affectus movendos, qui unus est è finibus Sermonis externi : Sed ut singularum rerum propriæ voces sint, quæ transferri possunt per tropum, in significationem alienam, prout necessarium fuerit.

Quæst. VI. *An, ut voces significativæ sint, & ut quis proprie loquatur, debeat & proferens eas intelligere, et audire?*

Quod ad priorem partem quæstionis attinet, in eo casu quo nec loquens, nec audiens intelligit quæ dicuntur, voces, si usitatæ sint, in se sunt significativæ, seu aptæ ad significandum, ut per se patet. Et ex accidenti est quod nihil actu significant. Sin audiens intelligat quæ ab alio proferantur, actu ei significant, sive loquens ea intelligat sive non. Significare enim actu est, cum signum facit aliquem venire in cognitionem rei signatæ. Huic parti immerito reclamant *Arriaga, Disp. Log. 13. num. 27.* Licet recte fateatur esse quæstionem de nomine.

Ad alteram partem quod attinet, nompe *an proprie loqui dicendus sit, qui profert voces quas vel ipse, vel audiens non intelligit.* negat *Hurtado*, ut refert *Comptonus, Disp. Log. 42. Sect. 3.* Sed etiam hæc pars quæstionis

onis est de nomine. In qua affirmativam recte tenet *Comptonus*, loco proxime citato. Ratio est, quia loqui proprie nihil aliud significat, quam voces articulatas proferre; præsertim illas quæ in hac vel illa lingua usurpari solent; seu significativas. Hoc autem addimus, quia quæret forte quis, an proferre voces non significativas, articulatas tamen, & quæ solo usu destituuntur, sit proprie loqui. Cujus etiam pars affirmativa defendi potest. Hinc etiam bestię ipsæ loquutæ dicuntur: ut Asinus Balaami. Unde nimis stricte definitur loquela à *Comptono*, actio personæ rationalis, verba per se, & actu primo significantia proferentis. Nam (ut omittam dicere omnem personam esse rationalem, adeoque additamentum rationalis esse superfluum:) primo bestię aliquando loquutæ sunt, licet non ex facultate propria. Et homines loqui dicuntur, cum verba articulata, significantibus similia, proferunt.

Obj. Loquela est actus rationis, & in hunc finem præstatur, ut is ad quem dirigitur, vel res, vel conceptus loquentis, vel utraque intelligat. At cum vel loquens, vel audiens, verba prolata non intelligit, loquela non est actus rationis in finem illum præstitus.

Resp. I. Loquela non semper est actus rationis, sed temere nonnunquam, & per coactionem præstatur; ut in amentibus & bestiis.

II. Potest quis ex aliqua ratione, & propter finem, loqui ea quæ nec ipse nec audiens intelligit. Scilicet ut ostendat alteri se voces ejusmodi memoria tenere, aut fingere posse. Multo magis potest quis voces proferre, coram alio, quas is non intelligit, vel jussu alterius, vel ex errore, cum scilicet existimat verborum ejusmodi recitatione effectum aliquem bonum sequi posse. Ut Sacerdotes Pontificii, dum alios absolvunt verbis Latinis quæ hi non intelligunt, eosque compellant, *absolvo te &c.*
Simili

Similiter Venefici, & incantatores, bestias alloquuntur, quibus mederi per incantamenta sua moliuntur. Hoc tantum concedendum est, qui loquuntur quæ audiens non intelligit, non uti sermone propter finem principalem, & usitatum.

Non tamen placent Rationes Comptoni: Scilicet quod *Josue* soli locutus sit; Christus ficui cui maledixit, item mari & ventis. Hi enim non rebus illis locuti sunt: sed hominibus qui aderant, & intellexerunt; ut scilicet eos docerent; utque effectus consequentes attentius observarentur.

Quæst. VII. *Possuntne quis secum loqui?* Affirmat *Comptonus*. Et certum est multos proferre verba significativa apud seipsos solos. Nec negari potest ejusmodi verborum usum esse locutionem. Sed ratio *Comptoni*, *frequentem homines seipsos cum aliis alloqui*, ut cum dicunt *eamus festinemus* &c. non concludit. Quia eo in casu alios tantum alloquuntur, & significant tantum se velle, hoc vel illud ipsi facere, utque alii unâ faciant.

Quæst. VIII. *Quid Scripta significant?* Scilicet vocesne, an res, et conceptus. Et si hæc omnia *utrum eodem modo, an diverso?* Et si diverso, *qua diversitate?* Communis fere sententia est, scripta nostra, & similia, immediate significare voces, seu sonos articulatos, & his mediantibus, res. *Comptonus* reclamatur, & contendit conceptus, vocem & scripturam æque immediate significare res. *Disp. Log. 42. Sect. 5.* Ubi obiter reprehendendi sunt Pontificii Doctores, quod ipsos conceptus signa rerum statuunt. Signa enim in cognitionem rei signatæ ducunt, objectivè, & ad modum causæ efficientis. Definiuntur enim communiter, *quæ aliquid exhibent potentia cognoscitiva*. At conceptus non ducunt in cognitionem rerum; quia sunt cognitio ipsa.

Nec obstat quod *imagines rerum* dicantur. Quia (licet propriæ rerum imagines essent, quod falsum est,

est, ut in Psychologia deo volente ostendetur) non omnis imago rei est signum. Omne enim simile est imago aliqua ratione alterius, non tamen signum proprie. Sed ad quæstionem definiendam sic procedimus.

1. *Scriptura instituitur ad res significandas* absentibus, aut posteris. Et idcirco in iis etiam homines mortui loqui, aliosque docere dicuntur: estque hic præcipuus eorum usus.

2. *Quædam scripta immediate significant res.* Ut Characteres Sinesium, & Hieroglyphica Egyptiorum: eo modo quo imagines piæ res significant, & Characteres Astronomorum planetas, & Constellationes Zodiaci; ut in Calendariis, sive Almanacis.

3. *Scripta etiam nostra vulgaria, aliquando immediate significant res,* nullo autem modo voces: ut recte asserit Comptonus. Qui enim surdi & muti nati sunt, scripta intelligere, & scribere docentur: Adeoque intelligunt scripta significare res, ut *equus* equum, *Homo* Hominem. Quod autem voces prolatas denotent, non intelligunt, quia sonos non percipiunt.

4. *Ordinariè tamen, & iis qui auditu non destituntur, scripta significant voces,* seu sonos ore prolatos: Quod sic ostenditur

1. Cum scripta legimus, mentibus nostris occurrere solent ideæ seu imagines sonorum vocalium, qui easdem res significant. Ut cum videmus has literas *Homo*, hoc modo & ordine compositas, sonus *homo*, menti communiter obversatur, teste experientia.

2. Si hoc non fuisset institutum eorum qui scripturam primo invenerunt, ut per eam soni articulati vocum significarentur, cur literis & syllabis quæ vocibus prolatis respondent, uti voluerunt, potius quam aliis? An non hæ syllabæ *Ho*, & *mo*,
V sonis

sonis accommodantur? & si quis per scripta latina significare velit, non aliter quam per illas exhibebit.

3. Scripta illa, quæ nullam rem significant, ut *blictri*, *scindapsus*, voces tamen prolatas significant, & per eas leguntur.

4. Et si scripta nostra solas res significarent, tum mutata significatione vocis, mutari etiam deberet tota significatio scripti. At contrarium constat. Nam cum vox à propria significatione in impropiam transfertur, si scripta fuerit, eundem sonum significabit.

5. Scripta iis qui ex auditu legere discunt, non immediate significant res, & conceptus, sed immediate sonos articulatos, & deinde res. Patet.

Quia his, qui ita legere didicerunt, (ut communiter fit) inter legendum, prius occurrunt soni quos scripta significant, & deinde sono agnito, res per sonos illos significatæ. Si verò sonus non occurrat, seu legere nequeant quæ scribuntur, ignari manent rerum quæ illis significantur. Ex altera parte, licet noverint quinam soni scriptis significantur, si tamen significationem eorum nesciant, nullam, per lectionem scriptorum, cognitionem rerum acquirunt.

Objicit *Comptonus*. 1. Poterant homines scripturam instituere ad res immediate significandas. Ergo verisimilius est eos ita de facto instituisse. Frustra enim fit per plura, quod fieri potest per pauciora; frustra per ambages, quod multo expeditius immediate.

Resp. Verum est antecedens. Sed consequentia nulla. Probationem distinguimus. Frustra fit per plura quod æquè facile, aut facilius fieri potest per pauciora, verum est: Quod longe majori difficultate per pauciora fit, nego. Jam vero manifestum est, eum qui scripta ex auditu legere docetur, multo facilius & citius significationem eorum discere si prius
ante-

intelliga. quosnam sonos significant. Sonorum enim significationem jam tenet. Unde rarissime, & nonnisi magna difficultate, qui surdi sunt ex utero, aut antequam erudiantur, significationem scripturæ docentur.

Objicit II. Qui mutuo literarum officio se salutant, non iis curæ est, ut is ad quem literæ diriguntur, articulatum vocis sonum, sed res sub signis contentas percipiat.

Resp. Concedimus hunc esse finem præcipuum, & ultimum scripturæ, ut legentes res significatas intelligant, quod & scribentes expressius intendunt. Sed intentio operis est, ut prius percipiant sonos, qui characteribus significantur. Est enim scriptura medium ad sonos illos percipiendos. Qui autem medio utitur quod ex se tendit ad certum finem, intendit etiam finem, saltem implicite, & virtualiter; Licet modus quo per medium illud finis acquiritur, non novit, quod sæpius hic contingit.

6. *Vox scripta per partes significat vocem prolatam*, si modo hæc composita sit; Ut *animal* tres sonos, quibus vox *animal* constat. At tota simul significat rem & illius conceptum, sicut & vox prolata. Non enim per partes vel hunc vel illam significat.

Quæst. IX. *An vox rem clarius manifestare possit audienti, quam sit nota loquenti?* Longe lateque à nonnullis tractatur hæc quæstio; nominatim à Comptono, qui & pro parte negante Arriagam citat, licet hic inter Logomachias referat. Disp. Log. 13. num. 28. Sed res facilis est, et uno verbo expediti potest.

Nam 1. Fieri potest, ut is qui loquitur plane ignarus sit significationis vocum quas profert.

2. Aut ut imperfecte percipiat ea quæ ex usu communi voces denotant, cum audiens clare et perfecte ea percipit.

Ratio à priori est, quia voces significant ex usu

communi, qui à cognitione cuiusvis eorum qui iis utuntur non pendet. Hoc tantum verum est, voces non posse plus significare audienti, quam notum fuit alicui eorum qui eas usurparunt. Hoc est, non significant plus quam ad quantum significandum instituuntur. Ex instituto enim significant. Hinc oritur

Quæstio X. An vox posset clarius significare rem, ad quam significandum adhibetur, quam primus autor vocis, aut alius qui post modum eam usurpavit, rem illam intellexit. Affirmat *Comptonus* supra, *Secl 7.* Nobis tamen pars negativa vera videtur. Ratio est, quia cum voces significant ad placitum institutorum, & aliorum qui in usum earum consenserunt, non possunt plus aut clarius significare, quam illi voluerunt.

Obj. Potest alius quispiam longe perfectius intelligere res significatas per voces, quam primus earum Autor, aut multi etiam alii, qui iis post modum usi sunt. Potest enim alius acumine ingenii illos longe antecellere. Ut Angeli, & Christus, qui cum hominibus loquebantur, longe perfectius intellexerunt res per voces significatas, quam homines.

Resp. Huic rationi nimis fudit *Comptonus*. Licet enim certum sit, Christum & Angelos longe perfectius intellexisse res significatas per voces ab hominibus prolatas, quam homines ipsi, non tamen ex vocibus intelligentiam illam habuerunt, sed aliunde, nempe à perfectione naturali intellectus, vel ab habitu infuso vel acquisito.

Iust. Potest aliquis qui audit vocem, plura attributa rei significatæ percipere, quæ primi Autores, & omnes qui eâ hætenus usi sunt, plane ignorarunt. Ut qui *triangulo* nomen primo imposuerunt, nihil cogitarunt de proprietatibus, quas *Geometræ* de eo postea demonstrarunt: Ut quod omnes illius anguli æ-

qua-

quales sint duobus angulis rectis, &c.

Resp. Concedimus ista : ex quibus non concluditur thesis. Quia nulla vox significat omnia attributa rei cuius signum est. Et ut in exemplo *trianguli* insistamus, hic nihil significat nisi figuram quæ tribus angulis constat, ut & vox ipsa indicat. Similiter & vox *Homo* non significat omnes proprietates essentielles hominis, (plurimæ enim aliæ voces adhibentur ad eas significandas) sed tantum rem quæ tali corpore & anima constat.

Ut finem huic contraversiæ ponamus, cum audiens, voce prolata, plura intelligit de re, quam primus autor intellexit, adhibetque vocem ad ea significanda, manifestum est cum significationem vocis extendere, & novam ex parte significationem ei imponere : Aut, ex occasione vocis, cogitationes suas dilatare, ad varia attributa rei significatæ indicanda, quorum primi Autores ignari fuerunt. Hæc tamen contemplatur, non quasi vox audita ea repræsentaret, sed ex scientia quam aliunde habet.

DISPUTATIO. XVIII.

De Oratione, ejusque partibus, Nomine, & Verbo.

QUæ hic disputantur parvi aut nullius momenti sunt. Quia tamen nonnullis displiceret totalis eorum neglectus, ideo ea breviter perstringemus. Sit ergo.

Quæst. I. *An recte definitur Interpretatio simplex, quæ dictio est, cujus nulla pars significat separatim?* Probat^{ur} communiter hæc definitio. Sed obijcitur, voces *Dominus, valebis, &* alias simplices, ejusmodi partibus constare, quæ separatim significant, ut *Do & minus*, in voce *Dominus, Vale & bis* in voce *Valebis*.

Respondent partes illas separatim significare, non ut partes harum vocum, sed ut aliunde sunt dictiones integræ. Recte quidem ista.

Interim tamen sunt multæ dictiones quarum partes separatim, etiam ut partes earum sunt, aliquid significant; Ut omnes voces compositæ; ex g. Vocis *Philosophia* prior pars significat *amorem*, posterior *sapientiam*, licet in obliquo. Et in voce *innocens*, prior pars significat *carentiam* seu negationem, posterior eum qui alteri nocet, aut nocuit. Sic *Respublica, Jurisconsultus, &* multæ istiusmodi. Quin & omnes voces simplices scriptæ polysyllabæ, plures sonos, pro numero syllabarum, significant. Sed Definitio quam examinamus, loquitur de voce prolata, aut si scriptam etiam comprehendat, intelligenda est de primaria significatione, quæ non soni est, sed rei. Deinde, advertendum etiam est vocem compositam æquivalere orationi imperfectæ. Ut *Jurisconsultus*, idem significat ac *is qui legum gnarus est*.

Dices forte, multas dictiones simplices, in significando, orationi istiusmodi imperfectæ æquipollere; ut *doctus* significat eum qui doctrina imbutus est.

Resp. Dictiones simplices tales quidem sunt; verum non per partes suas seorsim spectatas, ut compositæ; sed secundum se totas; seu per omnes partes simul.

Obj. Ex non significativis non coalescit significativum. Ergo si ullæ sint dictiones, cujus partes nihil separatim significant, neque totum ex illis conflatum, quidquam significabit.

Resp. Neg. Anteced. Sicut enim ex iis fit domus, quæ

quæ separatim non sunt domus, puta ex lapidibus, lignis, limo, &c. ita etiam ex partibus non significantibus seorsim, exurgere potest totum significans. Ratio est quia voces significant ad placitum. Placuit autem earum autoribus toti voci significationem imponere, non autem partibus seorsim.

Quæstio. An recte definiatur Nomen, ex Aristotele, *vox significans sine tempore, qua conjuncta cum verbo [est] verum vel falsum effert*? Defenditur à plerisque ista definitio. Sed contra obijcitur. Hæc nomina *tempus, annus, mensis, hora, &c.* non significare sine tempore.

Respondetur nomina illa nihil significare, præter tempus, vel partes temporis: Non autem adsignificare tempus, ut verbum. Verum hæc responsio innuit nomen aliquid significare debere præter tempus, quod non semper verum est. Deinde ex eadem responsione pro *sine tempore* dici debuit, *non adsignificans tempus*. Sed & contra hoc instari potest. *cenam, prandium, jentaculum* adsignificare tempus. Significant enim actionem sumendi cibum, certo tempore; vesperi, scilicet, meridie, & mane.

Respondent, non adsignificare tempus pro quo aliquid alteri convenit, aut non convenit, ut verbum. Ergo (inquam) illud in definitione dici debuit. Deinde per explicationem illam innuitur per se evidens esse, aut per definitionem aliquam priorem explicatum fuisse, qua ratione verbum tempus adsignificet: Cum tamen neutrum verum sit. Non enim per se evidens est quomodo verbum tempus adsignificet. Prius autem ab Aristotele definitur, & ab omnibus definiri solet, nomen, quam verbum. Et recte quidem; quia ex ordine naturæ, primum locum obtinet in oratione enunciativa.

Ex his liquet definitionem illam non esse exactam. Et rectius definiri posse nomen sine mentione temporis, *Vocem qua solum subiectum Enunciationis, vel so-*

lum attributum significatur. Unde patet differentia Nominum ab omnibus aliis partibus Orationis. Nam casus Nominis, Adverbia, Præpositiones, & Conjunctiones, sunt tantum modificationes nominum, & verborum: Verbum autem semper significat identitatem significati sui principalis, cum subiecto: Subiectum vero quia tale nunquam significat. Quin forte rectissime definiretur nomen, *Vox per quam significatur id cui aliquid tribuitur*: Adeo ut sit signum solius subiecti attributionis. Et si quando, vox quæ ex se apta est subiectum significare, pars attributi fuerit (ut cum dicimus *Socrates est homo, equus est animal*) in eo casu non esse nomen Logicum. Sed parvi refert utrum eligas.

Quæst. III. *An Nomen Infinitum recte dicatur significare quidvis, sive Ens, sive Non ens, præter suum finitum?*

Respond. *Ex se aptum est ita significare.* Negatio enim cuius termino tribui potest, præter illum quem tollit, sive cuius est negatio. Ut *non-homo* quidvis significare potest præter hominem.

Obj. I. *Non-homo* non est *non-equus*: Quia, negatio equi non est negatio hominis: Negationes enim distinguuntur per terminos quos negant.

Resp. *Non-homo* non est omne *non-equus*, seu *non-equus* in tota extensione sua. Sic enim *non-equus* continet sub se hominem. At est aliquod *non-equus*, & quidem omne præter hominem.

Obj. II. *Non-perceptibile*, seu *non-imaginabile*, de nullo, neque Ente, nec Non-ente, dicitur. Omne enim Ens, & omne Non-ens, est aliquo modo perceptibile. At hæc sunt nomina Infinita.

Resp. Excipiendi sunt ab Assertionem illa de nomine Infinito, termini latissimæ significationis; quales sunt illi qui in objectione memorantur. De illis enim nihil dici aut cogitari potest; seu non sunt objectum intellectus; adeoq; nec nomina Logica.

Obj.

Obj. III. Nomen cum negatione præfixa, nihil significat præter puram carentiam rei quam negat. Ut *non-homo* solum significat carentiam seu non-esse hominis.

Respondetur communiter, Nomen cum negatione præfixa, aliquando *neganter* accipi, aliquando *infinite*. Sic enim barbare loquuntur, & voces novas cudunt. Priori modo inquirunt puram carentiam denotat: posteriori multa positiva; ut *non-homo*, lapidem, arborem, chimæram, & alia infinita. Unde & nomen infinitum dicitur. Sed termini isti obscuri sunt, adeoque inepti ad Sophisma istud solvendum. Negandum igitur potius est Antecedens. Nisi nomen cum negatione accipiatur pro parte tantum suæ extensionis, ut *non-homo* pro aliquo quod non est homo.

2. Frequentius tamen nomen Infinitum significat id quod est à suo finito diversum, & sub genere aliquo communi, una cum eo, continetur. Ut *non-dives*, nec pauperem, nec divitem, sed mediocris seu tenuis fortunæ: *Non-cæcus*, eum qui nec acute videt, nec penitus visu privatur, sed luscum seu caligantem.

Quæst. IV. Cur Aristoteles nomina infinita, & *cæsus nominum*, è censu nominum Logicorum rejecerit.

De nomine infinito respondent *Conimbricenses* (& *Thomas Aquinatus*) in *cap. 4. de Interp. q. 2. Art. 3.* Quia nominis proprium est, aliquid determinatum potentiae (id est menti) objicere, Infinita autem remouent potius omnia, quam aliquid ei proponunt. Sed juxta hanc solutionem, *aliquis homo* non esset nomen. Nihil enim quod determinatum est menti objicit. Ratio igitur potius est, quia nomen Infinitum, seu negatum, non solet esse subjectum in disciplinis: partim quia non significat, ex se, aliquid positivum, sed negationem, seu non-esse. Partim quia, licet per consequentiam quandam, (ut dixit *Niphus* apud *Conimb.* loco proxime citato) positiva significet, illa

illa tamen tot sunt, ut nullius dissertationis subjectum, seu argumentum, simul esse possint. Sigillatim vero sub aliis nominibus veniunt.

Quod ad *casus* nominis attinet, propter eandem rationem inter nomina non numerantur. Per se enim, & sine nomine casus recti, subjecta propositionum non efficiunt, sed significationem nominum & verborum restringunt.

Obj. In hac enunciatione, *Patris est gignere filium*, Casus obliquus locum subjecti obtinet. Idem enim est sensus ac si diceret *Pater generat Filium*.

Resp. Negatur antecedens. Quia *Patris* hic, non est subjectum, sed *gignere filium*. Propositio enim habet hunc sensum, *gignere Filium est opus Patris*: qui quidem quoad rem conceptam, et significatam, idem est ac *Pater gignit Filium*: sed modo concipiendi, et significandi diversus est. In hac enim *gignere Filium*, concipitur ut quid adjacens homini, qui dicitur Pater: in illa vero, opus Patris concipitur ut adjacens actioni gignendi.

Quomodo igitur differt nomen à casibus suis?

Resp. Casus semper significant nomina, ut sunt termini correlati alicujus subjecti. Nomen vero ipsum, seu in recto, significat rem, vel absolute, ac sine relatione; vel, si ut relatum, semper tamen ut subjectum relationis, non autem ut terminum. Ut cum dicimus *Filius Sophronisci*, *Filius* quidem significat relatum quid, sed subjectum relationis, nempe filiationis; *Sophroniscus* vero oblique concipitur ut terminus illius.

Quæst. V. *Qua ratione differunt Nomen Substantivum & Adjectivum.*

Resp. Nomen Substantivum semper significat rem per se consistentem. Ut *Lapidem*, *Cathedram*: vel quæ concipitur ad modum re per se consistentis; ut modos rerum abstracte consideratos; ex. g. *Scientiam*, *albedinem*. Adjectivum vero significat affectionem

ctionem alterius, seu esse aliquo modo affectum per aliud. Ut *Sciens* significat *habens scientiam*, *albus* significat *habens albedinem*. Nomen substantivum significat *rem* aliquam, vel id quod concipitur ad modum *rei*. Adjectivum vero *qualitatem* denotat, vel id quod apprehenditur ad modum qualitatis. Hinc nomen adjectivum, licet apud Grammaticos inter nomina censeatur, eo quod per genera & casus variatur, non tamen est nomen Logicum; quia ineptum est esse signum subjecti Attributionis, sed, ex institutione sua, adhibetur ad affectionem alterius, seu attributum duntaxat indicandum.

Obj. Adjectivum *albus* significat id quod albedine affectum est; adeoque in recto subjectum, sicut in obliquo formam. Et similiter substantivum *Cathedra* significat materiam tali figura affectam. Proinde significat subjectum in recto, & formam in obliquo. Differentia igitur quam assignavimus nulla est.

Resp. Adjectivum, non adjective sumptum, seu ut adjectivum, significat subjectum; sed tantum Substantivatum, ut loquuntur Grammatici, ex. g. *album* in neutro genere, quod idem valet ac *res alba*, subjectum in recto denotat. At non sic *albus*, aut *alba*; sic enim cum dicis *res alba*, sensus esset *res res alba*, quod nugatorium est. Solum igitur significat formam aliquam affectum esse. Hoc autem nullum subjectum denotat, sed solam qualitatem.

Quæst. VI. An recte definiatur verbum, *vox adsignificans tempus, & quæ semper signum est eorum quæ de altero dicuntur*. Definitio illa Aristotelis est, & communiter usurpatur à Logicis. Unde verbum tria significare dicunt.

1. Formam aliquam, aut quod ei analogum est, sæpius vero actionem, vel passionem, ut *verbero*, *verberor*, *sedeo*, *candeo*.

2. Formam illam subjecto alicui convenire. Nisi quod ubi nota negandi adjicitur, hæc indicat non convenire.

3. tem-

3. Tempus aliquod, præsens, præteritum, vel futurum. Hoc autem adsignificare dicitur, quia est significatum minus principale.

Thesis I. *Verbum plerumque adsignificat tempus, nempe vel omne tempus, ut in hac propositione, Deus Pater generat Filium, vel partem aliquam temporis, præsertim præteritam, aut futuram. Unde & variari dicitur per tempora, seu varias habet formas, quæ non aliter distinguuntur, quam quod diversas partes temporis significant.*

Obj. Verbum *Duro* nihil aliud significat quam tempus.

Respond. Significat etiam existentiam continuatam, quæ est quidem in tempore, sed non est ipsum tempus.

Thes. II. *Licet Verbum semper aptum sit adsignificare tempus pro quo attributum subjecto convenit, (ad hoc enim adhiberi potest omne verbum in propositionibus) non tamen semper munere illo fungitur, nec quod tempus connotet semper attenditur, sive à loquente, sive ab audiente.*

Patet. Quia cum aliquid affirmamus, vel negamus, non semper cogitamus ipsi (sicut nec cogitant audientes) de tempore pro quo verum, vel falsum est quod efferimus: sed tantum concipimus aliquid esse vel non esse. Est enim aliqua differentia inter has sententias, *ego scribo. & ego nunc scribo.* Nam Sensus enim prioris esse potest, *ego aliquando scribo, vel scribere soleo*, in quo tempus præsens non intelligitur; licet verbum sit formæ præsentis. Sed posterior necessario intelligenda est de tempore præsentis, ut adverbium *nunc* postulat. Ratio est quia non necessarium est, in propositionibus efferendis, aut intelligendis, cogitare de tempore. (Facile enim mens ab eo præscindit.) Sed sufficit si percipiamus attributum convenire subjecto, vel non convenire.

Patet

Paret id maxime in propositionibus perpetuæ (alii dicunt *æternæ*) veritatis. Ut, *Homo est animal. Sol est lucidus, rotundus, currens, &c.*

Respondent plerique, ejusmodi propositiones significare connexionem necessariam attributi cum subiecto, non pro una aliqua temporis differentia, sed pro omni. Verum non advertunt, voces quæ in istis & similibus propositionibus adhibentur, nec significare connexionem necessariam terminorum, nec contingentem. Alioqui idem significaret *homo est animal, ac necesse est hominem esse animal.* At falsum illud, quia secus *necesse est* non significaret plus quam *est*. Unde nec necesse est ut quis intelligat propositiones illas esse veras *omni* tempore, nisi postquam perspexit connexionem terminorum esse necessariam: nec tunc quidem necesse est ut intelligat; licet facile sit per discursum illud inferre.

Thef. III. *Verbum, ut verbum, semper est nota illius quod de alio dicitur.* Sicut nomen illius de quo aliquid dicitur. Et hæc verbi differentia est essentialis, prima, & præcipua. Semper enim significat attributum aliquod.

Obj. I. In hac propositione, *Rex est qui metuit nihil*, verbum *metuit* non est attributum, sed pars subiecti.

Respond. Non est attributum propositionis principalis, est tamen incidentis, quæ in subiecto continetur.

Inst. In hac, *si lapis sentit, etiam vivit*, verbum *sentit* nullius propositionis, ne incidentis attributum est. Conditio enim nihil affirmat vel negat.

Resp. I. Neg. Anteced. Ad probationem dicimus, conditionem supponere aliquid affirmari, licet nihil absolute affirmet. Habet enim hunc sensum, *supponatur tanquam verum lapidem vivere.*

II. Ver-

II. Verbum aliquando non fungitur munere suo, sed nomen seu subjectum modificat: sicut & nomen sæpe est pars verbi, seu attributi; quin attributum ipsum, prout distinguitur ab unione sua cum sub-jecto. Ut in hac propositione, *homo est animal*, *animal* est pars verbi. Denotat enim quasi formam quæ convenit subjecto Homini. *Est* autem Unionem utriusque significat. Unde idem valet ac hæc propositio, *Homo vivit, & sentit*; nisi quod *vivere, & sentire*, sæpius actus vitales, & sensationis indicent, qui non omnes sunt de essentia animalis.

Obj. II. In hac enunciatione, *Lego est verbum*, *Lego* non est nota attributi, sed integri nominis, seu subjecti vice defungitur.

Resp. In hac, & similibus, verbum materialiter accipitur, pro voce, seu sono; non autem pro re significata. Nisi quod hæc etiam in obliquo innuatur.

Quæst. VII. *An verbum, extra orationem, tempus adsignificet?*

Resp. Affirmative. I. Quia cum audio vocem *currit*, vel *curritur*, cogito de cursu in præsentī: & discrimen inter *currit* & *cucurrit*, aut *curret*, quoad significationem, percipio, quod penes tempus adsignificatum solummodo intelligo.

Exceptio: Mens audientis, in illo casu, suspensa est.

Resp. Suspensa quidem est, quatenus vi solius verbi non percipit quānam significatum illius conveniat. At non est simpliciter suspensa.

II. Si verbum extra orationem non significaret tempus, neque in oratione illud præstaret. Siquidem vi compositionis cum nomine, tantum significat aliquid alicui convenire.

Quæst. VIII. *An verbum in oratione semper significet aliquid alicui convenire, ad modum actionis?* Affirmant *Conimbricenses de Interpret, quæst. 2. art. 4.* & complures alii. Sed mirum est quidnam eos in talem sententiam

tentiam pertraxerit. Quædam enim verba significant passionem, ut *verberor, impellor*; quædam formam permanentem, ut *sedeo, luceo, frigeo*, quædam carentiam actionis, ut *desino, sisto, quiesco*. Unde apud Grammaticos dividuntur verba, in *Activa, Passiva, & Neutra*.

Quæst. IX. *An ullum sit Verbum Infinitum?*

Resp. Plerique affirmant. Et per Verbum Infinitum illud intelligunt, in quo non copula, sed formale (hoc est primarium) significatum negatur. Ut si hanc orationem, *Socrates non currit*, sic resolvas, *Socrates est non-currens*, hoc est, *Socrates est aliquid non-currens*. Sic autem differre volunt à verbo negato. Et certum est, verbum cum nota negandi præfixa, aliquando significare posse puram carentiam rei: aliquando adhiberi posse ad aliquid positivum denotandum, aut quod ad modum positivi concipitur, (perinde enim est utrum hoc an illud sit). Et cum hac diversitate adhiberi solet, sicut & Nomen. Sed an idcirco nunc negatum, nunc infinitum vocandum sit, est Logomachia. In qua minus recte loquuntur, qui verbum in oratione Infinitum vocant. Consentaneum enim est ut Verbum infinitum infinita significet. At in oratione non significat infinita, licet extra eam istud præstet. Ex. g. cum dicimus *Socrates est non-currens*, non intelligimus esse quidlibet præter currens. Aliter de nomine statuendum est. Hoc enim sæpe etiam in oratione significat quidvis aliud præter id quod negat: ut cum dicimus, *quod non est deus non est adorandum; quod non est spiritus est perceptionis expers*. Hinc verbi infiniti nullum usum in oratione reperio. Nec enim usurpatur sub forma verbi adjectivi, sed nominis, cum verbo substantivo Est.

Objiciunt *Conimbricenses*, supra. I. Verbum Infinitum dicitur de omnibus quæ sunt vel non sunt, præter suum finitum, ut ait Aristoteles. Non potest

test autem de aliquo dici, nisi in oratione; Ergo, in ea manet infinitum.

Resp. Si adhibeatur in omnibus enunciationibus in quibus adhiberi potest, verum est dici posse de omnibus præter suum finitum. Non tamen ita se habet in singulis orationibus seorsim, in quibus adhibetur. Sic enim restringitur, ad aliquam partem sui significati, per subjectum cui tribuitur.

Object. II. Extra Orationem reperitur verbum infinitum. Ergo & in oratione. Subjectum enim ipsi additum, naturam & conceptum ejus non evertit, aut mutat.

Resp. Mirum Argumentum, à tantis viris perfectum! Ac si quis diceret, *currit extra orationem significat quicquid currit* (saltem enim aliquando sic significat) Ergo *etiam in oratione*. An non enim attributum quod ex se universaliter significat, in parte accipi solet, juxta extensionem subjecti cui in oratione adjicitur?

Quæst. X. *An Verbum Substantivum sit verum Verbum?*

Resp. Cum solum reperitur adjunctum nomini, (quo casu vocari solet *est* secundi adjecti) est verum verbum: & idem significat ac *existit*. Quando vero nomen sequitur, & dicitur *est* tertii adjecti, non est verbum integrum, sed tantum pars Verbi: Dubius enim tantum ex officiis ejus fungitur: Scilicet est nota unionis, seu Identitatis inter subjectum, & Attributum, & adsignificat tempus quo illa cohærent. Ut in hac sententia, *Fuit Ilium & ingens gloria Teucrorum*, sensus est *Ilium & gloria Teucrorum quondam extiterunt*; At in hac *fuius Troes*, sensus non est *fuius existentes Troes*. Alioqui etiam in hac *Chimæra est non-ens*, sensus esset *Chimæra est existens non-ens*, (ubi altera pars attributi alterum evertit) sed *esse Troes vel honor Trojanorum aliquando nobis conveniebat*; Sicut et in altera, *non ens convenit Chimæra*.

Quæst.

Quæst. II. An recte definiatur Oratio ex *Aristotele de Interp. cap. 4. Vox significans ex instituto, cujus aliqua pars significat separatim*; scilicet ut dictio, sed non ut affirmatio, aut negatio.

Resp. Defenditur communiter illa definitio: sed vix defendi potest. Nam Oratio, ut à dictione differt, non est vox, sed voces, seu complexum ex pluribus vocibus.

Resp. Conimbricenses in cap. 4. de Interp. quæst. 3. art. 1. *Et si oratio ratione vocum, & significationum, sit multiplex, adhuc censei unam ratione ordinis, qui est propria illius forma, ut artefactum est. Ordinem autem illum esse nexum Grammaticalem, quo partes uniuntur, inter se: Voces enim nullo nexu copulata, ut cælum, terra, aer, licet singula separatim significant, defectu tamen ordinis orationem non conficiunt. Verum licet oratio unitatem quandam habeat, non tamen idcirco recte dicitur vox. Nec probabile est ab Aristotele appellari vocem in numero singulari, propter nexum partium. Partim quia etiam Nomen vox appellatur, cap. 2. in quo tamen nullus est nexus partium, ut in oratione; quandoque etiam nullis partibus, constat, nempe cum Monosyllabum esse contingit. Partim quia potest esse nexus aliquis vorum. Ut si dicas, Cælum & Terra & Aer, ubi non constat esse Orationem, magis quam si nullus esset. Existimandum igitur potius est, Orationem ideo vocem dici, quia vox apud Græcos non tantum unicam dictionem, sed & sermonem significat: & facilius fuit unica dictione illud exprimere, quam pluribus.*

An igitur quandocunque plures voces continuo effertur, Oratio dicenda sit?

Resp. Quæstio est de voce Orationis. In qua dicimus, multitudinem vorum, etiam cum nexu aliquo afficiuntur, non sufficere ad orationem constituendam; ut cum nomina aut verba conjunctionibus

copulativis connexa efferuntur: ex. g. *caput & pes, scribit & legit*, nullo nomine subaudito. Ratio est quia omnis oratio, ut à dictionibus distinguitur, significat aliquid de aliquo, expresse vel implicite. Hoc autem dupliciter fit. Primo cum aliquid affirmatur, aut negatur de aliquo, ut in Enunciatione, seu oratione perfecta. Deinde cum, licet nihil expresse affirmetur, aut negetur, significatum tamen unius vocis, ut per eam exprimitur, afficit quodammodo significatum alterius: ut cum *homo & doctus* conjunguntur, quæ oratio imperfecta est, *Doctus* enim significat aliquid ut afficiens hominem.

Rectius igitur definiretur Oratio, *Complexio vocum plura significantium, ex quibus unum aliud quodammodo afficit*. Sed Sophismata contra definitionem Aristotelicam breviter videamus.

Obj. I. Complexa nequeunt unica definitione finiri: Oratio est quid complexum.

Resp. Complexa nequeunt definiri unica definitione, quæ omnes partes sigillatim explicet, verum est; ut sunt tota quædam, unica forma constantia, nego. Est autem quævis oratio totum quid, pro materia habens plures voces significativas, pro forma vero debitam earum conjunctionem ut jam explicavimus.

Obj. II. *Aliquis homo* est oratio, altera tamen ejus pars, nempe *aliquis*, nihil significat separatim.

Resp. Vox *Aliquis*, ut & reliqua Syncategoremata, *omnis, nullus, &c.* nihil significat determinatum; sicut nec adjectiva, adverbia, & præpositiones; aliquid tamen indeterminatum denotat. Cum enim audimus vocem *aliquis*, intelligimus nonnihil confusè, & indeterminatè nempe hoc, vel illud, vel aliud.

Inst. Voces istiusmodi solum consignificant, cum aliis.

Resp.

Resp. Solum consignant determinatè : Hoc est tunc tantum aliquid exhibent in quo conceptus audientis quodammodo acquiescat, cum aliæ adjiciuntur : Non tamen simpliciter solum consignant. Quod enim per se plane nihil significat, nequit cum alio quidquam significare, nisi quod ex utroque unum signum confici possit, quod hic non contingit. Nam voces illæ, significationem nominum quibus adjiciuntur, immutant.

Obj. III. Oratio est unica dictio, nec partes habet separatim significantes.

Resp. Verum est de Oratione materialiter, pro voce; non formaliter pro significato; hoc enim semper complectitur plures voces.

Obj. IV. Quædam partes Orationis nihil significant, ut *non-ens, nihil, nullus*.

Resp. Nihil significant positivi: negativum tamen aliquid denotant, quod sufficit.

Obj. V. Hæ voces, *nullus, nemo*, partibus constant quæ nihil significant separatim. Sunt tamen orationes, licet imperfectæ, *nemo* enim idem est ac *nullus homo*, &c.

Resp. Sunt orationes *virtualiter*; quatenus pluribus vocibus significativis, ordinem aliquem in significando ad se invicem habentibus æquipollent: At non formaliter, & expresse.

Obj. VI. *Pluit curritur*, & similes, sunt orationes: quarum tamen partes separatim nil significant.

Resp. Non sunt orationes nisi aliquæ aliæ voces una subintelligantur. Nam *pluit* idem valet ac *pluvia cadit*; & in voce *curritur*, subaudiendum est *a me, vel te, vel aliquid aliud ejusmodi*, &c.

Obj. VII. Judicium internum mentis est unus simplex actus, nec partes habet quæ seorsim terminantur ad objecta. Ergo nec oratio, quæ ejus signum est, partes habet seorsim significantes.

Resp. Negatur Antecedens. Judicium enim complectitur ideas subjecti, attributi, & connexionis, quæ plures diversæ sunt, ut infra demonstrabitur. Et qui dicunt judicium esse unum actum physice simplicem, agnoscunt tamen plura objecta repræsentare, quibus in oratione respondent plures voces.

Obj. VIII. Oratio non adhibetur ad significandum, sed tantum dictiones. Non igitur recte dicitur significare.

Resp. Oratio non adhibetur ad significandum diversum quid ab iis quæ dictiones significant, esto. Ut *Homo est mortalis*, nihil significat præter ea quæ voces *Homo est*, & *mortalis* significant. Satis tamen est ad significationem illius salvandam, quod partes omnes significant.

DISPUTATIO. XIX.

De Homonymis, Synonymis, Analogis, & Parenymis, seu Denominativis.

Homonyma, ex Aristotele, lib. de Categoriis, cap. I. sunt quorum nomen est commune, ratio vero Essentialis secundum illud nomen, diversa. Hoc est communi voce appellantur, quæ nihil significat reale ipsis commune. Sic *Homo Francus*, & *Gallus avis*. Homonyma sunt in voce *Gallus*. Synonyma vero, quorum & nomen commune est. & ratio essentia secundum illud nomen eadem; hoc est plane similis est: seu quæ exacte

exacte conveniunt in natura communi nomine significata. Ut *Homo* & *Bestia* communi nomine *animalis* appellantur, & conveniunt in natura sensitiva, quæ illo significatur. Homonyma Latini *Æquivoca*. Synonyma *Univoca* appellant. Paronyma denique sunt, quæcunque ab aliquo, ita ut casu differant appellationem nominis habent. Casu autem differre est differre terminatione. Latine *denominativa* vocantur: ut *justus* & *juste* Paronyma sunt, quia derivantur à *justitia*, & ab ea denominantur. Et si vocem primitivam & derivatas simul spectemus, ut *justitia*, *justus*, *juste* agere. Conjugata dicuntur. Notandum tamen est, vocem primitivam apud Logicos dici, quæ formam simplicem, ut *justitia*, *albedo*; Derivatam vero; quæ concretum ex subjecto & forma, significat; ut *justus*, *albus*; contra ac apud Grammaticos obtinet. Analoga non definivit hic Aristoteles; quia in Univocis, vel Æquivocis includuntur. De his igitur.

Quæst. I. Est, *Quidnam definiatur in his definitionibus.*

Resp. Non voces, nisi indirecte. (Hæ enim non habent nomen commune), sed *Res*: nec tamen res absolute, & in se, sed prout certis vocibus appellantur. Sic animal latrans, & signum illud cæleste quod *Canis* dicitur, prout voce *Canis* significantur, sunt Homonyma. At *homo* & *bestia* prout nomine *animalis* exprimentur, sunt Synonyma. In his enim ratio essentiae, seu natura, voce animalis significata, est eadem: hoc est communis, seu similis. In illis vero nulla est ratio essentiae, seu naturæ nomine *canis* significata, quæ communis aut similis utrique sit.

Indirecte tamen definiuntur voces. Innuitur enim vocem Homonymam esse, quæ significat plura ut diversa; seu quæ non conveniunt in natura aliqua quæ per eam significetur. Synonymam vero, quæ

plura significat ut convenientia in natura aliqua nomine communi significata. Interim tamen voces illæ inepte dicuntur Homonymæ, ac Synonymæ. Hæc enim rerum duntaxat nomina sunt. Pro voce igitur Homonyma rectius dices *ambiguam*, seu ancipitis significationis: pro Synonyma vero *communem*, significationis certæ, & determinatæ. Vox enim synonyma proprie est, quæ cum aliqua alia ejusdem plane significationis est, ut *ensis* & *gladius*, aio & *inquam*.

In Definitione Paronymorum, altera pars solis vocibus applicari potest: nempe illa, in qua Paronyma casu differre dicuntur. Nec enim res significatæ casibus differunt, sed tantum voces. Altera rebus congruit, illa scilicet in qua Paronyma ab aliquo appellationem habere dicitur; solæ enim res appellationem habent. Quo nomine definitio illa reprehendenda est. Rectius igitur res Paronymæ dicentur, quæ vocibus affinis, casu differentibus significantur. Voces vero paronymæ, (satis enim recte possunt sic appellari) quæ affines sunt in significando, casu tamen differunt. Ut *Bonus*, *bonitas*, *bene*.

Sed contra definitionem Homonymorum sic obijcitur.

I. Homonyma prius distinguenda sunt quam definienda.

Resp. Homonyma particularia, ut *canis*, *gallus*, *jus*, &c. (quia ante distinctionem factam incertæ significationis sunt) prius distinguere convenit, quam definire. At non sic Homonyma in communi: sub illa enim ratione satis determinate significant.

Obj. II. Homonyma non habent unam essentiam, sed plures dissimiles. Non igitur possunt aut debent, unica definitione definiri.

Resp. Verum est Antecedens de Homonymis materialiter sumptis, & in actu exercito; ut de gallo, &

CANIS.

cane, secundum naturas & essentias suas, ut sunt talia animalia : At non in actu signato, seu reduplicative, & præcise ut homonyma : Sic enim omnia conveniunt in communi ratione Homonymorum.

Inst. At sic Homonyma erunt Synonyma : habent enim nomen commune, & rationem aliquam similem per nomen significatam.

Resp. Præcise ut conveniunt in ratione communi Homonymorum, sunt quædam Synonyma particularia. At nec in actu exercito Synonyma sunt, (Hoc est particularia quæ illis substernuntur non sunt synonyma), nec sunt synonyma in communi.

Contra Definitionem Synonymorum, objicitur.

I. *Homo & bestia* sunt synonyma. At non habent eandem seu communem essentiam, sed unumquodque propriam.

Resp. Non habent eandem essentiam, prout nominibus *Hominis & Bestie* propriis significantur, verum est : prout aliis communibus significantur, qualia sunt *animal, vivens, substantia, &c.* nego.

Inst. At *animal, vivens & substantia*, non sunt nomina *hominis*, aut *bestie*. Res enim diversas ab his significant.

Resp. Non sunt nomina propria, quæ proprias eorum differentias significant ; sunt tamen nomina communia, quæ attributa essentialia utrique communia designant. Unde significant res solum inadæquate diversas.

Obj. II. *Ratione præditum* v. g. non dicitur de *homine* secundum nomen, & definitionem, ut ad synonymum requiritur.

Probatur Anteced. Quia, cum Differentia sit, non potest definiri per Genus, & Differentiam. Sic enim definiri posset res in infinitum.

Resp. Negatur Antecedens cum proxima probatione. *Ratione enim præditum* definiri potest id quod
haber

habet virtutem intelligendi seu ratiocinandi. Nec tamen in definiendo sine fine procedere licet, aut opus est; quia sunt termini per se evidentes, vel omnibus, vel iis quos instruimus.

Obj. III. Homonyma habent multa nomina communia, & rationem essentialiæ, secundum nomina illa, eandem, seu similem: ut *Canis domesticus*, & *marinus*, habent nomina *animalis*, *viventis*, *substantiæ* &c. communia, quibus subsunt rationes essentialium similes.

Resp. De Homonymis, quatenus nominibus communibus determinatæ significationis exprimuntur, verum est; (sic autem sunt Synonyma): At non ut vocibus ambiguis; qua sola ratione Homonyma vocantur.

Quæst. II. Unde ortum duxerit Communitas vocum, seu quod plures res, etiam dissimiles, eadem voce significantur.

Resp. I. Hujus rei quandoque nulla causa est, (nisi per accidens), præter occultam Dei providentiam. Ut cum mero casu res diversæ eodem nomine appellantur, quæ idcirco Homonyma à casu dicuntur. Ex. g. quod *judicium* in foro & *succus carnis* in aqua decoctus, nomine *juris* nuncupentur.

II. Causa tamen aliqua sæpe accidit, quam sic explicat Burgersdicius, (Instit. lib. 1. cap. 26.) è Kerkermanno, & aliis. Ratio inquit Homonymia vel est in rebus, vel in nobis. In rebus ratio est *trōpus*, vel *inæqualis attributio*; scilicet cum vox naturam communem significat, qua subjectis speciebus inæqualiter convenit: ut *Ens* respectu *substantiæ* & *accidenti*, sanum respectu *animalis*, *medicinæ*, & *urinæ*. In nobis, cum liberis nostris imponimus nomen propinqua nobisve charæ personæ, ad memoriam ejus conservandam, aut personæ illustri, ob speciem similitudinis, vel ad exemplum; hoc est ut eos sic ad imitationem incitemus, adde etiam ut honorem per-

personis istiusmodi deferamus, aut gratitudinem erga eas testemur. Sic in memoriam & honorem Majorum, multi è regibus Gallix, filiis suis præfertim natu maximis, nomen *Lodovici*, quidam etiam *Caroli*, indiderunt. Addit etiam *causam homonymia in Genere esse penuriam vocum*. Hæ enim multo pauciores sunt quam res. Sed hic varia reprehendenda sunt.

I. Non loquitur adæquate ad materiam subiectam, cum de communitate vocum tractans, homonymiæ tantum rationem assignat: Causa enim omnis communitatis assignanda fuit.

II. Nec præcepta reciproca tradit, dum causam homonymiæ reddens, rationes generales communitatis vocum assignat; qualis est penuria vocum, & habitudo verum ad se invicem.

III. Non accurate dicitur, causa Homonymiæ à consilio profectæ, & prout à casuali differt, esse aliquando in nobis tantum, non autem in rebus. Ut cum in honorem personæ alicujus eximix nomen liberis communicamus. Tunc enim ratio est virtus, vel dignitas illius personæ, adeoque in re extra nos.

IV. Non tantum liberis, sed aliis etiam rebus nomina personarum imponimus. Ut equo nomen Domini prioris.

V. Causa in rebus, cur vox aliqua sit ambigua, non potest esse Tropus, quia Tropus non est in rebus, sed in sermone.

VI. Vix assignari potest exemplum inæqualis Attributionis, extra omnem Tropum. Et in exemplo *sani respectu animalis, medicamenti & urina*, manifesta est Metonymia: Sanum enim de medicamento dicitur, per Metonymiam Efficientis pro effectu; de urina vero, per metonymiam effectus, & signi. De *Ente* autem respectu substantiæ & accidentis inhærentis,
supra

supra ostendimus, non esse Homonymum, sed Analogum. *Disp. 4. Quæst. 3.*

De causis igitur, cur tot Voces communes sint, generatim inquirendum est. Sunt autem plures.

1. Multæ voces communes sunt propter exactam similitudinem, sive in essentiis, ut omnes species ejusdem generis; sive in accidentibus, ut omnia subjecta quæ similiter affecta sunt. Et ubi, propter hanc rationem, plures eadem voce exprimuntur, *Synonymæ*. seu *Univoca* vocantur.

2. Aliæ communes sunt propter exilem & levem similitudinem rerum; quæ similitudo *Analogia* vocatur; sicut & res dicuntur Analogæ. Sic *acutum* dicitur de corpore cujus cuspis tenuis est, de sono altiori, de ingenio bono &c. propter similitudinem aliquam effectuum. Sicut enim corpus cuspidæ acutum, facilius per alia corpora penetrat, ita sonus altior, & vehementior, facilius aurem ferit: & ingenium vividum, res, facilius, & distinctius contemplatur.

3. Aliæ sunt communes pluribus rebus propter alias habitudines ad se invicem. Et sic nomina causæ, & causati, signi & signati, subjecti & adjuncti, permutantur, per Metonymiam; nomina Totius, et partis, Generis et Speciei, per Synecdochen; nomina contrariorum, per Ironiam: ut cum *bonus vir* (qua phrasi proprie, et communiter designatur is qui virtute præditus est) sensu contrario, hominem nequam indigitat. Atque ex his liquet paucitatem vocabulorum, non semper, quin nec sæpius, esse causam cur tot sint communia: Nec homines necessitate plerumque, sed sponte, plures res uno et eodem nomine appellare. Nam.

Omnino expedit ut omnia quæ conveniunt, quatenus conveniunt, iisdem nominibus appellentur. Sic enim voces rebus congruunt, essetq; non perfectio, sed defectus linguæ, si rebus similibus, quatenus
sunt

sunt similes, dissimilia nomina imponderentur.

2. Convenit etiam, in re facili, ad auditores magis delectandos, et affectus vehementius ciendos, nomina rerum quæ quocunq; modo ad se referuntur, sæpius mutare: sic in variis, et alienis imaginibus objectis, mens audientis magis afficitur, quam si singula propriis nominibus exprimerentur.

Quæst. 3. *Quanam sint Analoga, & in quo consistat Analogia rerum.* Hac de re sententia fere communis est, *Analogiam* quæ Latine proportio dicitur, proprie esse *habitudinem unius quantitatis ad aliam*.

Ut cum dicimus proportionem quatuor ad duo esse duplam, duorum ad quatuor esse dimidium; seu duo et quatuor habere se ad invicem ut duplum et dimidium. Sed extenditur vox *Analogia* ad quamvis fere similitudinem, seu convenientiam significandam. Unde et ipsa univoca *Analogia* sunt. Nam *Homo* & *bestia* eodem modo se habent ad *aximal*. Et ut *animal* est ad hominem et bestiam, ita *color* ad albedinem et nigredinem

Communiter tamen *Analogia* definiuntur. *Quorum nomen est commune, ratio vero per nomen significata nec omnino eadem est, nec omnino diversa.* Adeoque *Media* statuuntur inter pure *Æquivoca*, et *Univoca*. Dividuntur vero in *Analogia proportionis*, in quibus aiunt *rationem communi nomine significatam, uni proprie convenire, alteri improprie, seu per similitudinem aliquam*; ut *risus* ad *risum humanum*, & *amanitatem prati*, propter quam quasi *ridere* dicitur: Et *Analogia attributionis*, in quibus dicunt *rationem communem uni principaliter, & per se, alteri aut reliquis per ordinem ad illud convenire*. Qua ratione *sanum* quod primario, & per se, convenit animali, *medicamento* tribitur, quia sanitatem restituit; & *urina* quæ eam significat. Sed *Comptopus Log. Disp. 29. Sect. 3.* *Analogia* dividit in *propria* & *impropria*. Illa appellat in quibus *ratio communis propria est*; ut *ratio Entis* ad *substantiam*, & *accidens*.

cidens. Hæc, cum ratio communis in uno tantum propria est, in reliquis impropria.

Hinc illa sola pro Homonymis seu æquivocis habent, quæ talia sunt à casu. Alii contra omnia vocant Homonyma, quæ non sunt absolute Synonyma, ut *Burgerfidius*, *Instit. lib. 1. cap. 26.* Et Divisionem Analogorum in Analoga Attributionis & Proportionis inculcat.

1. Quia non continet *Synecdochen*, *Metonymiam*, & *Ironiam*, quæ sedes Homonymiæ sunt, non minus quam *Metaphora*.

2. Quia Nomen *Analogiæ* admodum inepte usurpat: cum in iis quæ inæqualiter tribuuntur nulla sit, proportio.

In his, corrigenda videntur quæ sequuntur.

I. In communi definitione Analogorum, pro eo quod dicitur rationem communi nomine significatam, nec esse omnino eandem, nec omnino diversam, rectius diceretur, rationem illam nec esse exacte similem, ut in Univocis, nec omnis similitudinis expertem, ut in Æquivocis; Indentitas enim hic non nisi improprie usurpatur.

II. Licet Analogata, ut vocantur, in pluribus semper sint dissimilia, ut & Univoca, dubito tamen an dissimilitudo illa communi nomine significetur: Existimoq; eo significari id tantum in quo conveniunt. Ut risum cum de homine & campo dicitur, seu ut utrique communis est, solum significare vel bonam utriusque conditionem, vel quod utrumque videntes delectet: Diversitas enim aliis vocibus significari solet. Nec constat unam & eandem vocem diversitatem significare, nisi pure æquivoca sit. Unde rectius forte *Analogæ* in Genere definirentur, ubi nomen commune aliam relationem plurium significat, præter exactam convenientiam.

III. Parum recte distribuuntur Analoga, in Analoga Proportionis, & Attributionis. Siquidem omnia Analogata proportionem aliquam habent ad se invicem. Unde non probo illud *Burgerſdicii*, inter ea quæ inæqualiter tribuuntur, nullam esse proportionem. Nam *ſanum* inæqualiter tribuitur animali, & medicamento, ut omnes agnoscent. Est tamen proportio aliqua inter sanitatem animalis, & medicamenti: quæ in hoc consistit, quod sicut animal est subiectum sanitatis, ita medicamentum est ejusdem causæ quædam; hoc est utrumque sanitatem respicit: Secus enim cur *ſanum* diceretur Analogice convenire medicamento?

IV. Quin & omnia Analoga, etiam illa quæ proportionis vocantur, inæqualiter tribuuntur suis inferioribus. Ut enim *Sanum* non ex æquo convenit animali, & medicamento, ita nec *risus* risui hominis, & prati. Unde omne Analogum, per se, & sine adjecto prolatum, stat pro principali analogato. Ut *ſanum* per se, pro animali sano, & *risus* per se, pro risu humano.

V. Male dicitur, Analoga proportionis uni proprie convenire, alteri improprie. Hoc enim tenet in omnibus Analogis. Nulla igitur sunt Analoga propria, & nullum eorum exemplum adducitur, præter illud *Entis* ad Substantiam & Accidens, quod supra ostendimus esse Univocum.

VI. Fallitur *Burgerſdicius*, cum dicit Analoga per *Synechdochen*, *Metonymiam*, & *Ironiam*, communi divisione Analogorum non contineri. Omnia enim illa contineri possunt sub Analogis inæqualis attributionis. Nam *Caput* inæqualiter dicitur de parte suprema corporis humani, & homine ipso ubi est *synecdoche partis pro toto*. Et *bonus vir* inæqualiter dicitur de eo qui vere talis est,

aut

aut putatur, & de homine nequam, per Ironiam. Exempla autem inæqualis attributionis quæ communiter proferuntur, ut *sanum* ad animal, aerem, medicamentum, urinam, Metonymiam apertam continent efficientis, et signi, pro effectu, et signato.

Satius igitur fuisset divisisse Analoga, in ea quæ talia sunt propter similitudinem aliquam remotam, & obscuram; & ea quæ talia sunt propter aliquam habitudinem, partis scilicet, Totius, Causæ, Causati, Signi, Signati, ut supra innuimus. Vel sine ambagibus, dividenda essent pro divisione Troporum, ex quibus (prout omnia Univoca excludunt) semper oriuntur, in Metaphorica, Synecdochica, & Metonymica. Ironica enim nulla sunt: quia in Ironia est contrarietas non Analogia.

Quæst. III. *Ani in veris synonymis, ratio communi nomine significata, semper essentialis sit?* Plerique affirmant. Et idcirco subjecta quæ à forma accidentali communi denominantur, ut Duo parietes ab albedine, Synonyma seu Univoca esse negant. Quæstio est de voce: utrum scilicet vocabulum *Synonymorum*, ad subjecta accidente communi affecta, extendendum sit. In qua qui negant pro arbitrio ipsum restringunt ad ea quæ in attributo essentiali conveniunt. Nam,

1. Eorum quæ in solo accidente communi conveniunt, ut *duo parietes* in eo quod uterque *albus* sit, nomen est commune, & ratio per ipsum significata, est omnino similis.

2. Quæ conveniunt in ejusmodi Attributis, nec sunt pure Homonyma, nec pure Analoga, nec etiam paronyma, ut ex singulorum definitionibus manifestum est. Sunt igitur Synonyma. Hinc dividi possunt Synonyma in *Essentialia*, quibus ratio communi nomine significata est Essentialis, & *Accidentalialia*, quibus Accidentalis est.

Obj. Concreta accidentalialia prædicantur de suis
sub:

subjectis, paronymôs, hoc est secundum nomen, sed non secundum definitionem. *Albor enim* (inquit *Burgersdicius, Instit. lib. 1. cap. 4.*) *cum sit in corpore, nomine quidem tenuis corpore tribuitur, (nam aliquod corpus dicitur album:)* sed definitio alboris corpori tribui non potest. Synonyma vero tribuuntur inferioribus suis, secundum nomen simul & definitionem. Concreta igitur accidentalia non sunt Synonyma, sed Paronyma.

Resp. I. Falsa est major propositio. An non enim natura albi convenit chartæ, et parieti; adeoque et definitio, quæ nihil aliud est nisi *habens albedinem*, seu eâ esse affectum? Si autem solum nomen illis conveniret, non essent Paronyma sed pure Homonyma.

II. Probatio non concludit: partim quia licet definitio *alboris* corpori non tribuatur in enunciatione, tribuitur tamen definitio *albi*. Quæstio autem non est de accidentibus abstractis, sed de concretis ex subjecto & accidente. Partim quia neque animalitas, de homine & bestia, vere prædicatur: Sunt tamen Synonyma ad animal.

III. Verba illa, *concreta accidentalia prædicantur paronymôs*, nullum commodum sensum efficiunt; cur enim dicuntur prædicari *paronymôs*? An quia, in propositione in qua prædicantur, attributum est paronymum ad subjectum? At hoc sæpe falsum. *Doctus* enim est concretum accidentale, et dicitur de homine paronymôs, ut ajunt; non tamen est paronymum ad hominem, ut facile concedent. Nec enim in sono, nec in significatione, eam affinitatem ad hominem gerit, quæ ad paronymum communiter requiritur. An quia sunt paronyma ad alias res, ut *doctus* ad *doctrinam*, *docte*, &c. At sic etiam synonyma; ut *animal* ad *animalem*, *animalitatem*, *animaliter*, (patiantur nunc hujus vocis fictionem) *animam*, &c.

Quæst.

Quæst. IV. *An ad univoca, necessarium sit, ut omnia simul natura, & sine dependentia unius, ex alio rationem communi nomine significatam participant?* Plerique affirmant; et dicunt illa omnia quæ participant rationem communem, per prius, et posterius, hoc est, ita ut in participatione illa, unum dependeat ab altero, esse tantum Analoga. ex. g. *Substantiam & Accidens*, in participatione *Entis*. Verum disparitas illa univocationem non tollit: quia exercetur in solis differentiis, non in ratione communi præcise spectata. V. g. quod *substantia* prius conveniat existentia, vel non-repugnantia existendi, quam *accidenti*, ad differentiam propriam substantiæ spectat, non vero ad rationem *Entis* ut sic, quæ tota est communis.

Quæst. V. *Quid & quotuplex sit Denominatio, & quam pro denominativis habenda sunt.*

Ad primam partem quæstionis, dicimus, *Denominationem formaliter*, seu passive acceptam, active enim sumpta actionem denotat, qua nomen rei imponitur) *esse per quam una res accipit nomen, à nomine alterius*, propter relationem aliquam alterius ad alteram. Ex his autem una est *denominans*, altera *denominata*. Ambæ vero, quia nomina habent affinia in sonis, licet terminatione differentia, *Paronyma* vocantur. Et res *Denominans* semper est simplicior, plerumque vero forma abstracta, aut aliquid simile. Ut à *justitia* homo dicitur *justus*, à *doctrina* *doctus*, propter relationem justitiæ & doctrinæ, ad hominem, qui illis affectus est. Ubi *Justitia* & *Doctrina* sunt formæ simplices, abstractæ, denominantes; *homo* vero subiectum quod per eas denominatur.

Ad secundam partem quæstionis quod attinet, *Duplex* vulgo statuitur *Denominatio*. Alia *extrinseca*, quæ à forma extrinseca provenit. Sic *paries* dicitur, *visus*, & *cognitus*, à visione, & cognitione, quæ

quæ circa eam exercentur. Alia *intrinseca*. quæ à forma intrinseca provenit: ut cum *aqua* dicitur calida, aut frigida, à calore, vel frigore. Verum exacte loquendo, *omnis denominatio est extrinseca*; quia *denominari* nihil aliud est, quam nomen vel appellationem habere, à nomine alterius. Omne autem nomen rei extrinsecum est. Sola igitur ratio Denominationis, interdum extrinseca est rei denominatæ, interdum intrinseca.

Ad tertiam, distinguunt communiter Logici Paronyma in *Grammatica*, & *Logica*. (Quamquam quæ Grammatica sunt, sæpius contingit esse etiam Logica). Hæc appellant, cum à significato unius vocis, ad significatum alterius. valet consequentia: ut à *justitia* ad *justum*, sequitur enim est *justitia*, ergo etiam aliquis *justus*, & vicissim. Illa vero, ubi non valet; ut à *potu* ad *potatorem*, à *loquutione* ad *loquacem*, à *somno* ad *somnolentum*. Quin & illa, quæ eandem affinitatem in significando habent, ac ea quæ vocibus sono affinis appellantur, licet voce nullo modo consentiant, paronyma vocant; ut *virtus*, & *probus*. Non enim patitur lingua Latina, ut à virtute *virtuosum* dicamus: cujus unica ratio est, quia *virtuosus* non est in usu. Verum hæc nulla ratione dicuntur Paronyma, sed *Parasema* vocari debent: affinitate enim non vocis, sed tantum significationis constant.

DISPUTATIO XX.

De Apprehensione & Idea simplici.

Quæst. I. **A**N per apprehensionem, simplicem, aliquid
semper rei apprehensa tribuamus?
Respondemus sequentibus pronun-
ciatis.

I. *Apprehensio quæ absolute simplex est, nihil tribuit
objecto apprehenso.* Hæc enim rationem aliquam sim-
plicissimam repræsentat: in qua idcirco non con-
cipiuntur plura, ex quibus alterum alteri conve-
niat. Ut cum apprehendimus, *aliquid*, vel *nihil*,
esse, & *non-esse*, in communi. Ejusmodi enim ter-
mini abstracti omnino simplices sunt.

Obj. Si nullum attributum objecti percipimus, nec
ipsū ullo modo percipimus. Omne enim objectum
mentis percipitur per sua attributa.

Resp. Si objectum attributa aliqua habeat di-
stincta, verum est. At aliquando nulla sunt illius
attributa: nempe cum objectum ipsum est attri-
butum simplicissimum, ut in exemplis datis.

II. *In reliquis actibus apprehendendi, licet objectum
unica voce simplici exprimatur, semper concipimus ali-
quid illius attributum, seu aliquid quod ei convenit,
essentiale scilicet, vel accidentale, intrinsecum, vel
extrinsecum.* Ut cum apprehendimus *lineam*, con-
cipimus id quod longitudinem aliquam habet:
Cum apprehendimus hominem, concipimus vel
aliquid corporeum intelligentia præditum, ut à sci-
entioribus

entioribus fit, vel aliquid tales partes & talem figuram habens, quales scilicet corpori humano conveniunt, ut solent pueri.

III. *Quin & necesse est, ut attributum illud, per quod rem apprehendimus, tanquam illius attributum, hoc est ei convenire percipiamus.* Ut longitudinem convenire lineæ; talem figuram convenire mensuræ, &c. Alioqui attributum non repræsentabit unam rem magis quam aliam: ut nisi percipiamus longitudinem inesse lineæ, non potest per eam repræsentari lineam.

Obj. Si vera illa sint, confunditur apprehensio cum iudicio: Iudicium enim fit de objecto, cum aliquid ei tribuitur.

Resp. I. Apprehensio sæpe includit iudicium virtuale, cum ex ea, iudicium, per consequentiam, ferri potest de objecto. Patet id in apprehensione quæ complexa nuncupatur: ut cum apprehenditur *homo doctus*, implicite innuitur aliquem hominem esse doctum, præsertim cum aliquid de eo, aut ipse de aliquo effertur, quod, in communi sermone, indicare solet eum vel existere actu, aut esse posse, ac solere. Nullum tamen fertur iudicium formale, magis quam cum apprehenditur (ex. g. res) composita qua talis, ubi plures partes apprehenduntur ut unitæ. Audiens enim, prolatis istiusmodi terminis, suspensus manet, & expectat aliquid aliud addendum, ut iudicium loquentis percipiat, vel ut ipse de iis iudicium ferat.

II. Apprehensio non semper iudicium, ne quidem virtuale, includit, etiam ubi objectum complexum est. Ut, si quis Orthodoxus apprehendat homines ordinaria generatione ab Adamo lapsi oriundos qui perfecte puri & sancti sint, non iudicat ullos tales esse, sed pure apprehendit aliquos, ac si tales essent. Nec dicas apprehendentem in eo casu virtualiter iudicare nullos esse tales: quia fieri

potest ut incertus sit de re quam apprehendit, sitne aliquid existens, an non, possibile, an impossibile: Ut cum quis apprehendit, creaturam perfectissimam, tractum materiæ infinite extensum, aut simile quid, de quo ambigit sitne possibile, an non.

3. In apprehensione complexa ad summum supponitur aliquid esse tale, non autem judicatur. Ut cum dixit Aristoteles, *eum qui vita solitaria delectatur, vel esse feram, vel Deum*, subjectum propositionis est terminus complexus, & objectum apprehensionis; & solum supponit aliquem esse talem: Habet enim hunc sensum; *Si quis vita solitaria semper gaudeat, fera est, vel Deus*: Ubi nullum iudicium fertur ex parte Antecedentis, sed tantum in conceptu componitur vita solitaria cum homine.

4. *Apprehensio semper aliquo modo complexa est, nisi objectum sit ratio simplicissima*; Licet terminus illius unica voce, eaque simplici, exprimatur. Ut cum apprehenditur *bos*, concipitur aliquid figura ejusmodi præditum, quæ corpori bovis propria est. Nec enim conceptus omnino simplex repræsentare potest nisi rationem simplicem. Sic ubi apprehenditur motus, apprehenditur mutatio loci, in aliqua re. Nec possibile est aliter eum apprehendere. Hic tamen conceptus repræsentat aliquid confuse, & indeterminate, quod locum mutat, locum in quo fit mutatio & mutationem quæ in loco fit: Licet hanc directe, illa indirecte.

Quæst. II. *An. & quomodo, per simplicem apprehensionem, percipiatur integra propositio, aut discursus, sine iudicio.*

Resp. I. Per simplicem apprehensionem, sine iudicio, integras propositiones, & discursus percipi, manifestum est exemplis. Potest enim quis apprehendere totam hanc propositionem, *omnia astra sunt paria*.

paria, & rotunda, cum tamen dubitat sitne vera, an falsa; potest & integrum hunc discursum, *Angelus mira opera præstat; non igitur est inextensus quoad substantiam, instar puncti Mathematici*; dubitando tamen de consequentia: in quo casu non judicat consequens recte inferri ex antecedente.

II. Modus quo mens connexiones terminorum apprehendit, sine judicio, à nemine, quod sciam hætenus explicatur; nec quidem facile explicabilis est. De quo hoc nobis verisimilius est, *mentem formare quidem ideam qua repræsentat connexionem, aut disjunctionem terminorum, in propositione dubia, adeoque eam apprehendere; non tamen formare ideam quæ eam repræsentat ut veram, vel falsam; seu non habere ideas veritatis, aut falsitatis. Et in consequentia plane dubia, mens format ideam consequentiæ; sed non format ideam quæ eam repræsentat ut firmam, aut plane vitiosam.*

Dices, neque mentem, dum assentitur propositioni, aut ei dissentit, concipere connexionem terminorum esse veram: vel non, sed tantum attributum convenire subjecto, vel non convenire. Nec cum unam propositionem ex alia infert, cogitare de bonitate consequentiæ, sed tantum percipere unam propositionem in alia contineri. Ergo differentia inter apprehensionem & judicium, circa connexiones terminorum, in propositionibus, & consequentiam propositionum, in discursu, nulla est.

Resp. Non sequitur; quia, licet mens dum judicat attributum convenire subjecto, non judicet expresse identitatem eorum esse veram, virtualiter tamen & implicite illud facit; quatenus amplectitur identitatem illam per assensum. Idem dices de consequentia in discursu.

Inst. Quid aliud est judicare, quam percipere connexiones terminorum, vel propositionum? Ergo si per simplicem apprehensionem, connexio illa percipitur, (percipitur autem cum mens ideam illius habet), sequetur simplicem apprehensionem esse judicium.

Resp. Judicium aliquid amplius continet quam perceptionem connexionis: Possum enim percipere connexionem fictam ab alio, hoc est ideam illius formare sine judicio affirmante. Secus enim qua ratione intelligerem alium errare in judicando, nisi objectum judicii falsi ab eo lati, apprehenderem? Judicium igitur, præter perceptionem connexionis, *complacentiam* quandam in ea, ut vera continet, quam non continet simplex apprehensio.

Inst. II. Cum mens judicium cohibet de propositione, nullam connexionem terminorum videt. Nullam igitur apprehendit.

Resp. Nullam connexionem videt quam veram agnoscit, esto: ab alio fictam, aut quæ fingi posset, nego.

Quæst. III. *An idea rei in mente sit ipse conceptus mentis, an vero res ipsa ut ab ea concipitur?*

Distinguunt Doctores, præsertim Pontificii, inter conceptum *formalem*, qui est actus mentis, & *objectivum* qui actus illius objectum est. Et similiter forte distinguerent *Ideam*, si pro voce *conceptus* vocem *Idee* usurparent.

Resp. I. *Nullus proprie est conceptus objectivus*; ut per se patet. Per conceptum enim *objectivum* intelligunt, non conceptum de objecto, (seu qui ad ipsum terminatur) sed objectum ipsum, aut aliquid in objecto. In eo autem nullus est conceptus, nisi cum contingit mentem actus suos, aut alienos intueri.

II. *Nec ulla, nisi simili improprietate, est Idea objectiva.*

1. Quia omnis Idea est Idea objecti, seu rei conceptæ. At objectum non est Idea suiipsius. Idea autem objectiva nihil aliud esse potest nisi objectum ipsum. Idea enim est veluti effigies, seu simulacrum rei: Res autem non est effigies, vel simulacrum sui.

Dices forte, rem ut tali modo cognitam repræsentare seipsam, prout est extra mentem.

Resp. Si per *ut cognitam*, intelligis cognitionem, verum dicis. At non, si rem ut actu objicitur cognitioni. Non enim quia ei objicitur vere repræsentat: quia fieri potest ut male objiciatur.

2. Idea est bona & vera, quando ita se habet in repræsentando, ut objectum in essendo. Ergo est aliquid diversum ab objecto.

3. Ideæ possunt varie mutari: existunt enim cum cogitamus, non existunt cum non cogitamus. Solent etiam homines diversas ideas earundem rerum formare, hoc est quas ad easdem res applicant. At objectum sæpius idem est, ac immutatum. Ex altera parte objectum mutatur, cum idea illius eadem manet.

4. Ideæ sunt in mente: At objecta rarius in mente sunt: Eo scilicet casu duntaxat, quo mens aliquid in seipsa, aut in alia mente contempletur.

III. Dicendum igitur est, *Ideam rei* in mente nihil aliud esse præter *actum mentis*, per quem objectum percipitur. Adeoque nec esse objectum ipsum, absolute spectatum, quod omnes, ut opinor, concedent: Nec objectum ut conceptum, seu ut conceptui mentis subest. Objectum enim ut conceptum, est objectum ut actu objicitur, seu ut actu terminus est conceptus, & ab eo denominatur. At esse ideam rei conceptæ, non est terminare conceptum, aut ab eo denominari. Sic enim *esse ideam* & *actu objici* essent idem.

Obj. I. Idea rei est attributum aliquod illius essen-

tiale proprium, aut saltem complexio quædam attributorum essentialium, quæ omnia simul cum ea recipiuntur, & Criterium illius constituunt, quo ab omnibus aliis distinguatur. Ex. gr. Idea *spiritus* est *substantia percipiens*. At attributa rei sunt res ipsa, tali modo cognita, non autem conceptus.

Resp. Nego Antecedens. Ad exemplum Spiritus, & reliqua similia, dico locutiones illas esse improprias: quibus nihil aliud intenditur, quam Ideam repræsentare rem cujus est Idea, per talia attributa. Ut Ideam spiritus, spiritum exhibere ut substantiam percipientem, & sic de cæteris. Si enim substantia percipiens, (exempli causa) esset idea spiritus, sequeretur Ideam spiritus semper existere, etiam cum nemo de spiritu cogitat. Siquidem spiritus semper est substantia perceptiva. Nec dicas tunc tantum esse ideam cum cognoscitur, quia sic idea esset compositum quid ex objecto & cognitione, aut cognitio esset conditio quædam necessaria, ut attributa rei essentialia propria ideam illius constituerent. Utrumque rationi dissonum est. Concludimus igitur, ideam simplicem rei, & apprehensionem simplicem esse unum & idem: Dicitur enim Idea ab *eidô* video. Unde quasi visionem objecti mentalem denotat.

Obj. II. Si simplex apprehensio rei esset illius idea simplex, iudicium absolutum & illativum essent Ideæ compositæ. At Idea est unius rei, non autem propositionis, aut syllogismi.

Respond. I. Neg. Maj. Quia si placuit philosophis, solum conceptum apprehensivum, non autem iudicativum, vel discursivum, nomine Ideæ appellare, nec necessarium sit novos terminos excudere, cum vulgo loquendum, ut in proverbio est.

II. Ad minorem; licet Idea communiter ad solam

lam apprehensionem restringatur, quia est veluti visio mentis, (visio autem est simplex actus) nihil tamen vetat quin ad iudicium & Discursum extendatur. In illo enim est Idea Identitatis, aut diversitatis, connexionis, aut disjunctionis, unius termini ad alium. In hoc vero est idea connexionis plurium propositionum, cum assensu, vel dissensu.

Quæst. IV. *Quænam sit Idea clara, & obscura.*

Respondet *Claubergius*, *Log. part. 1. quæst. 18, Eam esse claram perceptionem, quæ menti attendenti præsens & aperta est.* Obscura igitur erit, quæ absens, remota, tecta, seu occulta est. Sed hæc descriptio est tantum Analogica, nempe per Metaphoram, à similitudine claræ visionis desumptæ, cujus objectum plerumque prope est, & liberum ab iis quæ visionem impediunt.

Nobis vero *claritas Idea in eo consistit, quod illud in re exhibeat quod ei essentiale proprium est.* Clara enim perceptio eadem est ac distincta. Distincta autem est quæ rem ab omnibus aliis distinguit: hoc autem per essentialia propria maxime præstatur. Propria enim accidentia rem quidem ut distinctam repræsentant, verum non ut *per se* distincta est, sed per aliud superadditum.

Idea igitur *obscura est, cujus vi non possumus distinguere rem ab omnibus aliis: qualis est quæ exhibet accidentia, aut similitudines aliquas rei, aut attributa tantum communia, licet essentialia: Multo magis obscura est, quæ proponit attributa rei incerta.* Quæ autem aperte falsa proponit, non obscura est, sed erronea. Reliqua ad naturam Idearum spectantia, in Psychologia, Deo volente, exponemus.

Quæstio V. *An in apprehensione sit veritas, & falsitas?* Multi præsertim ex Antiquioribus, negant: Nos sic statuimus.

Thef.

Thef. I. In apprehensione omnino simplici, est aliqua veritas, nulla autem falsitas. Ut in apprehensione objectorum simplicium. Prior pars sic probatur. Veritas conceptus consistit in conformitate ad objectum. At apprehensio rei simplicis, puta *linea, anguli*, est conformis suo objecto. Secus enim non esset idea illius. Posterior pars hinc ostenditur, quod apprehensio incomplexa, objecto suo nunquam sit difformis: illud enim est ejus objectum quod repræsentat. Huic autem nequit esse difformis, quia sic non repræsentaret illud, sed aliquid aliud.

Obj. I. Cum quis operam dans substantiæ spirituali apprehendendæ, apprehendit materiam aliquam puriorem, non attingit objectum quod erat apprehendendum: Ergo falsò apprehendit; ad simile argumentum respondet *Comptonus*, non attingit in quod voluit apprehendere, esto; quod erat attingendum per hanc apprehensionem, negatur. Non enim ideo falsus est actus quia voluntati difformis sit, sed quia objectum aliter repræsentat ac est. Et decipitur qui sic apprehendit, non quia habet actum falsum, sed quia intento frustratur. Verum, ni fallor, hæc responsio concludit nullum actum mentis esse falsum; quia omnis actus attingit id quod per *ipsum* attingendum est. Ut actus qui repræsentat Antichristum futurum, attingit id quod per eum attingendum fuit: Nihil enim aliud per eum attingi potuit, quam quod de facto attingitur, scilicet futuritio Antichristi.

Vera igitur responsio est, cum quis volens apprehendere naturam spiritus, apprehendit materiam aliquam subtilem, tenuem, & agilem, falso quidem concipere, non tamen per simplicem apprehensionem, sed per judicium: Attribuit enim, in illo casu, materiam tenuem significato vocis *spiritus*; & sic falsò judicat.

Obi. II. Veritas & falsitas sunt circa idem sub-
jectum:

jectum: Ergo si veritas sit in simplici apprehensione, est in ea etiam falsitas.

Resp. Veritas & falsitas sunt in actibus ejusdem potentiae, puta intellectus: nec ulterius extendi debet id quod in Antecedente dicitur. Non enim necesse est, ut in eisdem specie actibus, in quibus est veritas, sit etiam falsitas.

Thes. II. *Veritas quae in Apprehensione incomplexa reperitur, non est Logica, sed Metaphysica, seu Entitativa.* Veritas enim Logica, prout ab Entitativa distinguitur, (ut distingui communiter solet), semper est *complexa*; & consistit in eo, quod attributum vere conveniat subjecto, prout judicatur, aut dicitur. Nunquam autem illa, qua res nomini & apparentiae suae conformis est: hæc enim veritas est tantum Entitativa. Talis autem est veritas apprehensionis incomplexæ. Per eam enim apprehensio solum habet id quod nomini suo respondet, nempe naturam apprehensionis incomplexæ: sicut conformitas imaginis, ad rem cujus imago est, non est veritas Logica, sed Entitativa. Est enim apprehensio imago quædam objecti.

Thes. III. *In Apprehensione complexa, est & veritas, & falsitas Logica, sed virtualis, non formalis, & aperta.* Esse veritatem patet; ut cum quis apprehendit *animal rationale*, veram ideam hominis format. Est & in apprehensione illa, veritas Logica virtualis: implicite enim includit hoc judicium, *quoddam animal est rationale*. Esse autem falsitatem Logicam virtualem, patet de Apprehensione complexa; in qua apprehenduntur plura ut conjuncta, quæ in re non junguntur, aut etiam sibi-met invicem repugnant. Ut cum Enthusiastæ, vulgo Tremuli, apprehendunt *hominem in hac vita perfecte sanctum*: aut cum Pontificii apprehendunt *Antichristum futurum, corpus Christi in uno puncto loci, & in pluribus locis longe distantibus, eodem tempore*, quod ut dici solet, repugnantia

nantia est in adjecto. Apprehensiones enim istæ innuunt Antichristum etiamnum esse futurum, corpus Christi esse in pluribus locis simul, &c. Nec objecta illa pro figmentis ab Enthusiasticis, & Pontificiis habentur: nec in illis mere supponitur una pars alteri convenire. Falso igitur apprehenditur Antichristus, & corpus Christi, tanquam aliquid eis conveniret quod non convenit.

Quæst. VI. *An Apprehensio dirigi possit, actuve dirigatur præceptis Logicis?* Plurimi negant. Nos in partem affirmantem cedimus.

1. Quia multo facilius apprehendit attributa rerum quæ apprehendenda sunt, qui præcepta Logicæ de locis communibus attributorum didicit, puta essentiae, Accidentis, Generis, Differentiæ, Causæ, &c. quam qui eorum imperitus est. Facilitant igitur præcepta illa apprehensionem. Mentem enim determinant ad inquirendum, quidnam communibus illis ideis conforme in objecto proposito inveniri possit; faciuntque ut incidat in attributa rei quæ sine eorum cognitione non detegeret. Confirmatur. Logica dirigit actus definiendi, & dividendi, ut omnes fatentur. At ut actus illi recte eliciantur, maxima pars difficultatis est, recte apprehendere genus & differentiam, partes & species immediatas: His enim apprehensis, facilius est conferre cum re definienda aut dividenda, quod iudicii munus est: Logica igitur apprehensionem illorum attributorum faciliat, juvatque ut mens in ea incidat, per præcepta quæ de genere, differentia, partibus, & speciebus in communi tradit.

2. Logica vetat ne terminos impertinentes, aut repugnantes jungamus in apprehensione complexa. Ut *Sacrificium incruentum, opera supererogationis, corpus bilocatum, &c.* Apprehensionem etiam malam ac indebitam reprehendit, juberque, ut si quando talem eliciamus, ea rejecta, aliam quæramus.

Obj.

Obj. I. Logica solos modos sciendi dirigit, quales sunt *judicium*, & *discursus*

Resp. I. Apprehensio etiam modus sciendi est, saltem imperfectus, & inchoatus.

II. Licet nullo respectu esset modus sciendi, utile tamen est ad modos sciendi, ut dirigatur, si modo dirigi possit.

Obj. II. Necessitate naturali apprehendimus ea quæ menti nostræ occurrunt, sive per sensum externum, sive per phantasiam, aut species mentibus impressas, sive ex contemplatione, & conatu circa res deregendas.

Resp. Non semper per necessitatem naturalem objecta apprehendimus; sed sæpius ex imperio voluntatis, cui subicitur apprehensio quoad exercitium, & quodammodo etiam quoad specificationem. Siquidem applicare solemus mentes nostras ad apprehendendum, & cogitationes in ejusmodi objecta libere dirigimus, quæ varia alia nobis obijciunt, in quæ, secus non incideremus. Ut si propositum sit investigare Genus proximum: Logicæ, conjicimus cogitationes in ordinem modorum mentem afficientium, qui Habitus dicuntur, eumq; dividimus (juxta præcepta Genetica *Log. Specialis, part. 1. cap. 3. sect. 8, 9*) per varias differentias, dum ad ejusmodi Habitu deveniamus, qui solam Logicam, & aliquam aliam speciem coordinatam complectitur. Ad hoc autem dirigimur, & juvamus, per ideas Generis remoti, & proximi, differentię proprię, speciei ejusdem & diversi generis, subalternę & infimę, quas tradit Logica.

Obj. III. In Apprehensione non est falsitas, nec error non igitur dirigitur per præcepta ad veritatem.

Resp. I. In Apprehensione complexa est falsitas Logica virtualis, ut quæstione præcedenti ostendimus.

II. In

II. In illis actibus apprehensionis, qui à falsitate & errore immunes sunt, alii defectus contingunt: ut cum mens unum apprehendere volens, aliud apprehendit: in quo casu, licet non eliciat actum falsum, proposito tamen frustratur. Beneficio autem præceptorum Logicorum, mens ad defectum illum detegendum, & corrigendum dirigitur.

III. Licet mens nihil unquam male apprehenderet, difficultate tamen apprehendendi, seu iucident di in objecta, ad rem de qua inquirat, pertinentia, laborat. Quæ difficultas per præcepta Logicæ saltem minuitur.

DISPUTATIO. XXI.

*De Propositione generatim; & de Affirmante
ac negante in Specie.*

Quæst. I. **Q**uid sit propositio, seu Enunciatio: five quomodo definienda sit? Aristotelis, *Analyt. prior Lib. I. cap. I.* definit *Orationem affirmantem vel negantem aliquid de aliquo.* Verum definitio illa duplici nomine peccat.

1. Quod mentionem faciat eorum quæ in extensione rei definiendæ continentur, puta affirmationis, & negationis, quæ differentiarum divisivæ sunt ipsius propositionis, adeoque extra illius essentiam. Ac si quis definiret animal, *vivens rationale vel irrationale.*

2. Quod non tradat primam differentiam: prius enim propositio aliquid effert, vel statuit de aliquo, quam

quam concipi potest affirmare, vel negare. Derodon Log. restituta part. 4. p. 510. definit, duas res de quibus simplex iudicium fertur. Vult enim propositionem, & enunciationem, de qua in Logica agitur, non esse actum mentis, aut Orationem, sed hujus signatum, illius vero objectum, quæ propositio *objectiva* dicitur. Verum res connexæ, vel disjunctæ, non sunt enunciatio, aut propositio, quia nihil enunciant; aut proponunt, sed enunciantur, & proponuntur. Propositio enim sic dicitur, quia per eam aliquid proponimus judicandum, sive nobismetipsis, sive aliis. Enunciatio vero, quia per eam aliquid effe-

Obj. Objecta iudicii propositiones vocantur: ut cum dicimus contra Judæos *Messiam esse futurum est propositio falsa*.

Resp. Sensus hic est, ut & in omnibus similibus, in quibus objecta significari videntur, *Cum Messias putatur, aut dicitur futurus, falsa est propositio, in mente, vel ore.* Adeo ut iudicium, vel sermo notetur, non autem objectum, nisi indirecte. Nec enim objecta sunt vera vel falsa *Logice*, sed tantum *Entitative*.

Inst. I. Cum dicimus, *Hominem esse animal, est propositio necessaria, parietem esse album, est propositio contingens*, solum objectum intelligendum est. Nec enim iudicium mentis, nec oratio, de his connexionibus, necessaria est, sed contingens. Contingenter enim de iis iudicamus, & loquimur.

Resp. Major hic species rationis est. Propositiones tamen illa *necessariæ* & *contingentes* dici possunt, ratione objectorum, per Metonymiam; sicut & conceptus, & oratio *universalis* dicitur, quia omnia alicujus ordinis simul attingit, vel significat, licet proprie, & in se, semper singularis sit.

Inst. II. Ergo similiter, propositio & enunciatio denotare possunt res propositas, & enunciatas.

Resp.

Resp. Possunt quidem : sed non constat ita communiter fieri. Contrarium potius patet ex usu vulgari nominum verbalium ; quibus actio aliqua sæpius significatur, aut illius effectus. Ut *compositio* significat actum componendi, aut unionem quæ per illum producit. Quidni etiam *propositio* actum proponendi, Enunciatio actum efferendi ?

Quæst. II. *An omnis propositio, subiecto, attributo & copula constet ?* Negat Derodon supra pag. 511. Et primo dicit in *propositione negante, non reperiri attributum, seu prædicatum ; quia in ea, alterum extremum de alio non affirmatur, sed negatur.*

Resp. Neg. Anteced. quia in *propositione negante, negatio alterius extremi, attribuitur subiecto. Vel dicendum est, negationem alicujus termini esse totum attributum. Ut in hac homo non est lapis, negatio lapidis attributum est quod prædicatur de homine.*

Inst. At sic confunditur *propositio negans, cum infinita. Sensus enim propositionis proximæ memoratæ esset, homo est non-lapis.*

Resp. Confunditur quidem quoad formam verborum (sicut & in his, *Socrates non est dives, & Socrates est non-dives ;* Alterutra enim significare potest vel Socratem carere divitiis absolute, vel esse mediocris fortunæ) sed non quoad sensum ; Hic autem ex circumstantiis loquentis eruendus est. Nam etiam propositiones de attributo infinito, quoad formam, admittunt quandoque sensum negativum : sicut in lingua nostra, propositiones negantes sæpe formæ istius sunt : scilicet quoties nota negandi post copulam ponitur. Hoc ipsum in lingua etiam latina patet, nempe cum attributum est terminus negativus : ut in hac, *atomus est invisibilis, idem est sensus, ac si dictum fuisset, atomus est non-visibilis.* Præpositio enim in idem valet in compositione cum nominibus adjectivis, ac non. Est tamen *propositio negans,*

&

& eundem habet sensum ac *atomus non est visibilis*.

Deinde dicit, in propositione negante non reperiri copulam: quia in ea, alterum extremum cum altero non copulatur, sed ab ea dividitur, seu disjungitur: Estque in ea negatio copulæ.

Resp. Alterum de extremis quæ apta sunt efficere propositionem affirmantem, disjungitur ab altero; ut lapis ab homine in superiore exemplo. At non disjungitur totum quod attributum constituit, sed copulatur; puta negatio lapidis cum homine. Unde, licet non copuletur lapis cum homine, copulatur tamen cum eo non-lapis, five negatio lapidis.

Objicit porro, Copulam esse inter ea quæ realiter distinguuntur. Nihil enim copulatur cum seipso. Sed in propositione affirmante, extrema sunt realiter idem. Verbum enim est identitatem denotat.

Resp. Copula physica est inter ea quæ realiter distinguuntur. Sed ut duo Logice copulentur, sufficit si ratione distinguantur. Deinde neque semper in propositione vera affirmante, attributum est realiter & adæquate idem cum subjecto; sed sæpe tantum inadæquate; idque non in Propositione Essentiali tantum, sed etiam in accidentali; ut vocat autor; quanquam nulla fere propositio essentialis sit, nisi sibiipso; omnes enim sunt accidentia mentis & linguæ. Ut in hac, *Homo est intelligens*, attributum solam virtutem mentis, subjectum compositum quid ex mente & corpore denotat. Et in hac *quidam homo est doctus*, attributum denotat aliquid realiter diversum ab homine, licet in obliquo, nempe doctrinam. In propositione igitur affirmante vera, attributum sæpe plus quam ratione distinguitur à subjecto.

Quæst. III. Quomodo subjectum & attributum, in propositione discernenda sunt? Respondent quidam, ex eo, quod subjectum antecedit copulam attributum sequatur. Contra insurgunt alii, & exemplis ostendunt Attributum interdum antecedere copulam:

Ut in hac, *nobilitas est sola, atque unica virtus*. Verum utrique distinguere debuerunt; In mente subiectum semper antecedere; in sermone interdum antecedere interdum sequi. Posterior pars frequentibus patet exemplis. Prior ratione sic ostenditur: Cum aliquid de aliquo statuimus per iudicium mentis, sicut necesse est utrumque prius apprehendere, quam alterum alteri convenire aut non convenire statuamus (quia de ignotis non est iudicium) ita etiam necesse est ut in apprehensione habeamus aliquid de quo statuamus, sive cui alterum tribuamus, priusquam aliquid de eo statuere, aut aliquid ipsi tribuere possimus. Sicut ut Artifex formam producat, necesse est ut materiam præexistentem habeat cui eam adjungat.

Quæst. IV. *An subiectum & Attributum sint Entia Rationis?* Multi affirmant: Licet per Entia Rationis, non intelligant objecta ficta, sed quæ sola mentis ope distinguuntur, & referuntur; & idcirco Entia Rationis *Logica*, & *Relata Rationis* appellant. Nos sic statuimus

In Propositionibus veris de Entibus rationis, termini quidem sunt Entia Rationis: ut in hac, *Antichristus hodie omnino futurus est figmentum*. Sed in iis quæ fiunt de Entibus realibus, sunt Entia Realia, licet non semper realiter distincta. Nam,

1. In propositionibus veris negantibus, termini sæpius distinguuntur realiter: ut in hac, *bestia non sunt ratione prædite*. Dico sæpius, quia nonnunquam sola ratione distinguuntur; ut cum dicimus *miser cordiam dei non esse formaliter ipsius justitiam*.

2. In propositione affirmante, Attributum sæpe distinguitur realiter inadæquate à subiecto: hoc est aliquid reale includit quod non includitur in subiecto, aut aliquo reali destituitur quod subiectum continet. Idque non tantum cum attributum est accedens subiecti; ut in hac, *homo est doctus*, (ubi attribu-

tum

tum includit *doctrinam*, quæ realiter diversa est ab homine) sed etiam quando est de illius *Essentia*; ut in hac *quoddam corporeum est animatum*, attributum includit animam, quam subjectum non includit. Et in hac *homo est animal*. *Homo* includit aliquid reale, quod animal non includit, nempe *rationem*.

3. Ubi termini sola ratione distinguuntur, si modo res de quibus fiunt reales sint, non tamen sunt Entia Rationis sola mente distincta. Distinguuntur enim per *Rationes* reales, quæ nemine cogitante rebus conveniunt, ut supra ostendimus, ubi de distinctione Rationis.

4. Subjecta & Attributa in actu primo, sunt res quatenus aptæ sunt ut subjiciantur, vel attribuantur. Hoc autem habent ex se, non autem à mente. Secus enim non possent vere subjici, & attribui sibi invicem. In actu secundo, id est, prout hic & nunc subjiciuntur, & attribuuntur, sunt res ipsæ, ut à mente concipiuntur, & sermone significantur, adeoque solam denominationem extrinsecam rebus superaddunt. At non idcirco dicenda sunt Entia Rationis. Sic enim omnia quæ cognoscimus, & sermone efferimus, quatenus cognita, & enunciata sunt, Entia Rationis dicenda forent, quod Adversarii merito negabunt.

Obj. I. A parte rei *Homo* (exempli causa) non est magis subjectum quam *animal*, aut *ratione praditum*: neque hæc magis sunt attributa, quam *Homo*. Sunt enim realiter idem. Cum igitur omnis Identitas mutua sit, si hæc tribui possunt homini, iisdem etiam tribui potest *Homo*. Sola igitur mente sunt subjecta, & attributa.

Resp. *Homo* non est magis subjectum *actu* ad hæc attributa, quam vicissim, conceditur, (nisi ex accidenti, cum hæc de illo affirmantur) *Potestate*, seu aptitudine, nego. Cum enim *animal* & *ratione praditum* sint quasi partes essentielles hominis, *Homo*

autem Totum quid, ex se aptiora sunt attribui homini, quam ipsis homo. Quia totum non afficit partem, sed contra pars Totum: Nec sigillatim sunt realiter adæquate idem cum homine. Homo enim plus dicit quam alterutrum ex iis seorsim.

Obj. II. Subjectum & Attributum sunt Relata. At non sunt Relata Realia: Ergo Rationis.

Resp. I. Ad Majorem. Subjectum & Attributum in actu signato, sunt Relata: At non semper in actu exercito: ut cum idem tribuitur sibiipso. Ex. g. in hac propositione, *Homo est Homo*, *Homo* non refertur ad seipsum, nec concipitur ut Relatus ad seipsum, sed ut idem cum seipso. Identitas autem non est Relatio; nec idem ad seipsum refertur. Jam vero subjectum & Attributum in actu signato, in nulla disciplina sunt termini propositionum, præterquam in Logica. Similiter, cum subjectum & Attributum sola ratione distinguuntur, non nisi in actu signato, Relata sunt. Quis enim diceret *Ens & substantiam* esse Relata Angeli? Siquidem non sunt *Ens & substantia* Angeli, magis quam lapidis: Suntque termini absoluti. In actu vero signato, quatenus sunt subjectum & Attributa, dici etiam possunt Relata realia. Ut enim unum alteri tribuitur, relationem ad seinvicem habent; Cujus fundamentum remotum est realis eorum identitas, propter quam *Ens & substantia* tribui possunt Angelo; proximum vero est actus mentis, aut sermo æternus, per quem ei tribuuntur. Utrum autem, propterea quod Relatio illa à cognitione nostra oriatur, Relata Rationis, an Realia vocanda sint, est quæstio de voce, & nullius momenti.

II. Ad Minorem, Subjectum & Attributum, quoties Relata sunt, Realia sunt Relata. Ut primo, quando realiter adæquate distinguuntur à se invicem; prout in propositione vera negante sepius

pius contingit: Referuntur enim, in illo casu, ut diversa à se: licet non in actu exercito, sed signato. Nam *lapis* negatur de homine: non tamen ut *lapis*, refertur ad hominem, sed sub ratione *diversi*. Secundo cum realiter distinguuntur, sed inadæquate tantum: In quo casu attributum est concretum, cuius forma est modus, aut pars subjecti. Ex. gr. in his, *Homo est albus, doctus, &c. albus & doctus*, secundum formas suas sunt modi, prior quidem corporis, posterior mentis. Unde modi illi realiter referuntur ad hominem; & idcirco ipsa Attributa ratione formarum suarum, ad eum referuntur, nemine cogitante: Omnis enim modus refertur realiter ad suum subjectum: Similiter & in his, *Homo est corporeus, animatus, rationalis, intelligens, &c.* Attributa sunt concreta; et secundum id in illis quod rationem formæ sortitur, nempe *corpus, animam, rationem intelligentiam*, inadæquate distinguuntur ab homine: Cum autem omnia ad hominem realiter pertineant, eumque constituent, quidni sunt Relata ejus realia? Omnis enim pars refertur ad suum Totum, relatione reali.

Quæst. V. *Sintne termini propositionum Res, an voces an conceptus?*

Resp. Esse communiter Res, et rerum affectiones. Has enim illis, in propositionibus, tribuimus. Voces autem earum sunt signa. Dico *communiter*, quia aliquando termini sunt voces et conceptus, eorumque attributa, nempe cum de vocibus et conceptibus agitur.

Quæst. VI. *Utrum res ex se habeant esse terminos, an per intellectum.*

Resp. Ex se aptæ sunt esse termini. Nec enim per vim ad statum illum trahuntur. Sed quod actu termini sint, ab intellectu, vel sermone est, vel utroque. Ex intellectu enim et sermone est, quod actu in propositionibus ordinentur.

Quæst. VII. *An Mutatio copulae, quoad situm, sensum propositionis immutet?*

Resp. I. Cum termini propositionis sunt res per se stantes, aut quæ ut tales spectentur; item cum necessario nexu cohærent, perinde est ad sensum, ubinam locetur copula, si modo subjectum ponatur ante attributum: Eundem enim sensum habent, *albedo color est, est albedo color, ac albedo est color*. Eundem etiam habent, *homo rationalis est, est homo rationalis, ac homo est rationalis*. Ratio est, quia è duabus rebus per se stantibus, aut quæ ut tales spectantur, una non afficit aliam, ut ipsi adjacens: adeoque periculum non est ne audiens utrumque pro uno termino complexo, & copulam pro verbo adjectivo accipiat: ut in his *albedo color est, Homo rationalis est*, quia cum omnis albedo sit color, & omnis homo sit rationalis, audiens non facile putabit *hominem & rationalem*, aut *albedinem & colorem* esse unum terminum complexum, aut unum aliquem hominem aut albedinem denotare, ab aliis distinctam. Si tamen subjectum non ponatur ante attributum, potest propositio sensum falsum ingerere audienti. Ut si dicas, *color albedo est, vel est color albedo*: hæ enim significare possunt albedinem affirmari de colore, quod non intenditur.

II. Si termini contingentem cohæreant, pro situ copulae varius esse potest sensus. Hæc enim *Homo mortuus est*, aliter significare apta est, ac *Homo est mortuus* scilicet Hominem mortuum existere, quod falsum est.

Quæst. VIII. Quid sentiendum de doctrina Deodonis, qui Enunciationem dividit, primo in *Identificantem*, in quâ (inquit) *unum est aliud*, et *distinctentem*, in qua *unum non est aliud*. Unde oriri dicit divisionem Enunciationis, in *affirmabilem*, in qua unum affirmari potest de alio, & *negabilem*, in quâ unum potest de alio negari. Res enim à parte rei sunt affirmabiles, et negabiles. Deinde hinc oriri

oriri ait divisionem Enunciationis in *Affirmantem*, & *Negantem*, quæ sunt conceptus mentis, (adde vel sermones oris) judicantes, vel enunciantes unum esse aliud, vel non esse. Denique, ex hac rursus oriri dicit divisionem Enunciationis, in *affirmatam*, et *negatam*, quæ est divisio Enunciationis *objectivæ*, per denominationem extrinsecam sic dictæ, à judicio mentis affirmante, et negante.

Resp. Quædam in Divisionibus istis reprehendenda sunt.

1. Divisio Enunciationis in *Identificantem*, et *Distinctivam*, non potest esse Divisio Enunciationis *objectivæ*, sed tantum mentalis, vocalis, vel scriptæ. Hæ enim sunt, non autem illæ, quæ identificant, et distinguunt terminos. Quin nec illæ proprie identificant, (licet distinguant), sed tantum res ut easdem repræsentant.

2. Nec ulla propositio proprie affirmabilis, aut negabilis est. (Nisi quod una propositio de alia negari potest, quod Autor non intendit.) Sed tantum termini seu res, earumque affectiones, affirmabiles et negabiles sunt. Dicere autem propositionem affirmabilem esse, vel negabilem, eo quod attributum ejus affirmabile, vel negabile sit, est dura locutio.

3. Unde nec propositio ulla proprie affirmata est aut negata: sola enim attributa affirmantur, et negantur.

4. Pro Enunciatione igitur Identificante, et distinguente rectius per periphrasin dixisset *Enunciationem in qua unum repræsentatur ut idem cum alio, aut ut ab eo diversum*. Et dicendum, cum Logica communi, omnem propositionem esse affirmantem, vel negantem; nullam vero esse affirmatam, vel negatam, affirmabilem, vel negabilem. Propositio enim proprie vel est Judicium mentis, vel sermo oris.

Quæst. IX. *An sint propositiones Infinitæ, à negantibus distinctæ?*

Resp. I. Sunt quædam propositiones quæ negantes videntur, non tamen tales sunt. Ut *Adamus potuit non peccare. Aneas potuit non vincere Turnum*. Et aptius illæ in quibus attributum negatum est Terminus negativus. Ut, *non omnis homo est cæcus, non omnis oratio caret venustate*.

II. Sed ille & istiusmodi non sunt infinitæ. Et duo priora exempla, per incogitantiam pro exemplis infinitæ, à *Burger/dic:o* ponuntur, *Instit. lib. I cap. 30*. Est enim propositio infinita, quæ constat subjecto, aut attributo, seu nomine, aut verbo, vel utroque infinito, ut omnes concedunt. At hæc *Adamus potuit non peccare, Aneas potuit non vincere Turnum*, non constant toto attributo infinito. Totum enim attributum hic est *potens peccare, & potens vincere*, quibus idcirco, ut infinitæ fierent, nota negandi erat præfigenda.

III. Propositiones de attributo negato, sæpius coincidunt cum illis in quibus & copula negatur. Ut in exemplis proxime memoratis, & in modalibus, in quibus modus negatur, ex. g. *hominem currere est non necesse*.

IV. Nonnunquam tamen attributum negatum sumitur pro aliquo positivo. Ut *quidam non adeo divites sunt minime sordidi*, id est, *sunt culti, aut liberales*. Sed propositiones istiusmodi minus recte vocantur infinitæ: quia attributum negatum in his non est infinitæ significationis.

V. Propositio infinita, si aliqua sit quæ sic vocari debet, non potest esse distincta ab affirmante & negante. Nulla enim est propositio quæ nec negat, nec affirmat. Utique vel statuit attributum esse idem aliquo modo cum subjecto, estque affirmans; vel esse ab eo diversum, & est negans.

DISPUTATIO XXII.

De Veritate & Falsitate Propositionum.

Quæst. I. **A**N omnis propositio sit vera, vel falsa.

Resp. Affirmative. Omnis enim propositio vel pronunciat ut res est, & sic est vera; vel aliter ac res est, & est falsa. Sed Sophismata quædam in partem oppositam sunt diluenda.

Obj. I. Qui dicit Antipodas esse, sed non credit, nec dicit verum nec falsum. Non verum, quia mentitur, nec falsum, quia dicit ut res est.

Resp. Dicit verum Logice, sed falsum Ethice. vide Institut. part. com. cap. 8. sect. I.

Obj. II. Si quis dixerit *hæc propositio est vera*, nulla propositione indicata præter eam quam profert, nec verum dicit, nec falsum: Ergo quædam propositio nec est vera nec falsa.

Resp. Non sequitur, quia in eo casu, nulla est propositio, propter defectum subjecti. Voces enim quæ locum subjecti occupant, nempe *hæc propositio*, nihil significant.

Obj. III. Si quis nihil cogitans, dicat *ego nunc mentior*, propositio nec erit vera, quia loquens non mentitur; nec falsa, quia vere mentitur, dicendo se mentiri cum non mentitur.

Resp. Propositionem illam esse falsam; quia si loquens nihil cogitet, ut supponitur, non potest mentiri, seu contra mentem ire. Probatio in oppositam partem non concludit. Propositio enim illa non potest supra se reflectere. Et si reflecteret, in hunc sensum, ego mentior, dicendo me mentiri, si loquens

loquens nihil cogitet ut supponitur, adhuc falsa est, quia non mentitur, sed tantum falsum dicit. Idem existimandum est de hac. *ego nunc dico falsum*, ex hypothefi quod nihil aliud dicat. Tunc enim propositio nihil significat, ob defectum objecti.

Obj. IV. Si Antonio demandata sit custodia pontis, ea lege, ut si quis ei falsum dixerit, in fluvium dejiciatur; & occurrat Socrates dicens, tu me dejicies in fluvium; supponamus etiam Antonium legem observaturum; propositio illa Socratis non erit vera, nisi Antonius eum dejiciat, quod ex lege facere non potest. Nec falsa, quia supponitur dejiciendum falsum dicere.

Resp. Molestum est istud sophisma.

Resp. Si Antonius Socratem istud dicentem non dejiciat, falsa est propositio; sed tum suppositio est impossibilis, nempe dejiciendum esse qui falso dixit se dejiciendum. Si dejiciat, propositio est vera, sed lex non observatur. Breviter, una pars Hypothesis, seu casus dati, alteram evertit. Posito autem impossibili, sequitur impossibile.

Obj. V. Si propositio omnis vera sit, vel falsa, vel talis est in principio, vel in medio, vel in fine.

Non in principio aut medio, quia in his nondum est propositio completa; Nec in fine, quia sic non amplius est. Evanuit enim.

Resp. Omnes voces, quibus propositio vocalis exprimitur, (de hac enim loquitur objectio; siquidem in judicio mentis non est principium, medium, & finis, quia totum in instanti peragitur), simul sumptas, veritatem vel falsitatem significare: sed officium illud non præstant in unico instanti. Quia enim est signum fluens per partes, non potest, in unico instanti, munus suum implere.

Quæst. II. *An sola enuntiatio, seu Oratio enunciativa, verum vel falsum Logice, significet?*

Resp. Affirmative, si de expressa significatione loqua-

loquamur. Sola enim talis oratio expresse statuit aliquid alicui convenire, vel non convenire.

Obj. I. Hæc Oratio *Utinam Petrus adesset*, vera est si loquens cupiat Petrum adesse, falsa autem si non cupiat. Non tamen est enunciativa, sed optativa.

Resp. Implicitæ, & virtualiter, est enunciativa, quatenus resolvi potest in hanc, *ego cupio Petrum adesse*.

Obj. II. Hæc, *si Petrus legeret, evaderet Doctus*, non est enunciativa, quia non est indicativi modi, vera tamen est vel falsa.

Resp. Virtualiter est indicativi modi. Æquivalet enim huic, *si Petrus leget erit doctus*, vel *probabile est eum fore doctum*.

Quæst. III. *An una & eadem propositio possit esse & vera, & falsa, eodem tempore.*

Resp. Negative. Ratio est, quia non potest eadem propositio, eodem tempore, esse & conformis objecto suo, & difformis.

Replicat *Comptonius*, respectu ejusdem objecti conceditur, respectu diversorum falsum est. Hæc enim propositio, *Petrus currit, Paulus loquitur*, Petro currente est vera, Paulo non loquente est falsa.

Resp. Contra; hic non est una propositio, sed plures. Non igitur mirum est si altera vera sit, altera falsa. At quæstio est de una sola. Quod si duæ illæ in unam compositam coalescant in hunc modum, & *Petrus currit & Paulus loquitur*, in eo casu licet Petrus currat, Paulo tamen non loquente, est tantum falsa. Ad veritatem enim propositionis copulativæ requiritur veritas omnium partium.

Obj. I. *Quidam homines sunt justi*; est vera, quia sic res est: & falsa quia quidam non sunt justi.

Resp. Negatur esse falsa, quia non loquitur nisi de justis, seu de quibusdam justis. Quidam enim qui non sunt justi, alii sunt, nec hic significantur.

Obj.

loquens nihil cogitet ut supponitur, adhuc falsa est, quia non mentitur, sed tantum falsum dicit. Idem existimandum est de hac. *ego nunc dico falsum*, ex hypothese quod nihil aliud dicat. Tunc enim propositio nihil significat, ob defectum objecti.

Obj. IV. Si Antonio demandata sit custodia pontis, ea lege, ut si quis ei falsum dixerit, in fluvium dejiciatur; & occurrat Socrates dicens, tu me dejicies in fluvium; supponamus etiam Antonium legem observaturum; propositio illa Socratis non erit vera, nisi Antonius eum dejiciat, quod ex lege facere non potest. Nec falsa, quia supponitur de-jiciendum falsum dicere.

Resp. Molestum est istud sophisma.

Resp. Si Antonius Socratem istud dicentem non dejiciat, falsa est propositio; sed tum suppositio est impossibilis, nempe de-jiciendum esse qui falso dixit se de-jiciendum. Si dejiciat, propositio est vera, sed lex non observatur. Breviter, una pars Hypothesis, seu casus dati, alteram evertit. Posito autem impossibili, sequitur impossibile.

Obj. V. Si propositio omnis vera sit, vel falsa, vel talis est in principio, vel in medio, vel in fine.

Non in principio aut medio, quia in his nondum est propositio completa; Nec in fine, quia sic non amplius est. Evanuit enim.

Resp. Omnes voces, quibus propositio vocalis exprimitur, (de hac enim loquitur objectio; siquidem in judicio mentis non est principium, medium, & finis, quia totum in instanti peragitur), simul sumptas, veritatem vel falsitatem significare: sed officium illud non præstant in unico instanti. Quia enim est signum fluens per partes, non potest, in unico instanti, munus suum implere.

Quæst. II. *An sola enuntiatio, seu Oratio enunciativa, verum vel falsum Logice, significet?*

Resp. Affirmative, si de expressa significatione loqua-

loquamur. Sola enim talis oratio expresse statuit aliquid alicui convenire, vel non convenire.

Obj. I. Hæc Oratio *Utinam Petrus adesset*, vera est si loquens cupiat Petrum adesse, falsa autem si non cupiat. Non tamen est enunciativa, sed optativa.

Resp. Implicitæ, & virtualiter, est enunciativa, quatenus resolvi potest in hanc, *ego cupio Petrum adesse*.

Obj. II. Hæc, *si Petrus legeret, evaderet Doctus*, non est enunciativa, quia non est indicativi modi, vera tamen est vel falsa.

Resp. Virtualiter est indicativi modi. Equivalet enim huic, *si Petrus leget erit doctus*, vel *probabile est eum fore doctum*.

Quæst. III. *An una & eadem propositio possit esse & vera, & falsa, eodem tempore.*

Resp. Negative. Ratio est, quia non potest eadem propositio, eodem tempore, esse & conformis objecto suo, & difformis.

Replicat *Comptonus*, respectu ejusdem objecti conceditur, respectu diversorum falsum est. Hæc enim propositio, *Petrus currit, Paulus loquitur*, Petro currente est vera, Paulo non loquente est falsa.

Resp. Contra; hic non est una propositio, sed plures. Non igitur mirum est si altera vera sit, altera falsa. At quæstio est de una sola. Quod si duæ illæ in unam compositam coalescant in hunc modum, & *Petrus currit & Paulus loquitur*, in eo casu licet Petrus currat, Paulo tamen non loquente, est tantum falsa. Ad veritatem enim propositionis copulativæ requiritur veritas omnium partium.

Obj. I. *Quidam homines sunt justi*; est vera, quia sic res est: & falsa quia quidam non sunt justi.

Resp. Negatur esse falsa, quia non loquitur nisi de justis, seu de quibusdam justis. Quidam enim qui non sunt justi, alii sunt, nec hic significantur.

Obj.

Obj. II. Hæc, *Omnes Cretenses sunt mendaces*, si veram esse supponamus, & proferri à Cretensi aliquo, erit simul vera, & falsa. Vera quia supponimus omnes Cretenses esse mendaces. Falsa vero, quia Cretensis eam proferendo verum dicit.

Resp. Hic etiam suppositio facta impossibilis est, & altera pars alteram evertit. Si enim omnes Cretenses essent mendaces, propositio illa non potest proferri ab ullo Cretensi, & si proferri posset à Cretensi, non omnes essent mendaces.

Quæst. IV. *Sitne veritas & falsitas propositioni intrinseca, & Essentialis?* Utrumque affirmat Hurtado. Nos breviter sic statuimus.

Thes. I. *Veritas & falsitas partim intrinseca est propositioni, partim extrinseca. Intrinseca*, quatenus dicit actum mentis hoc vel illo modo concipere seu repræsentare objectum: *Extrinseca*, quatenus objectum ita est, vel non est, ut repræsentatur. Prius actui essentialis est. Omnis enim actus iudicii, de natura sua, repræsentat aliquid hoc vel illo modo esse. Posterius autem, nempe quod objectum ita sit vel non sit, est ei accidentarium.

Probatur. Omnis Relatio est partim intrinseca subjecto, quatenus importat ejus entitatem; partim extrinseca, quatenus connotat terminum. At veritas & falsitas sunt Relationes. Veritas enim est conformitas actus ad objectum. Falsitas est difformitas actus ab objecto. Hæ autem sunt relationes, ut per se patet. *Confirmatur.* Quomodocunque se habeat actus, nisi objectum sit prout ipse dicit, non erit verus. Et quomodocunque se habeat objectum, nisi actus tali modo ipsum repræsentet, non erit verus. Ex. g. Cartesius iudicat *mundum esse indefinite extensum*. Hic actus repræsentat mundum indefinite extensum; jam, si mundus sit indefinite extensus, actus ille est verus. Dico igitur concurrunt ad veritatem actus istius, nempe quod repræsentet mundum ut indefinite

definite extensum, & quod mundus ita se habeat ut actus eum repræsentat. Et si alterutrum desit, actus ille non posset esse verus. Similiter de falsitate dicendum est.

Obijciunt I. Si veritas aut falsitas sit partim intrinseca propositioni, sequetur objectum esse partem veritatis. At absurdum istud: Partim, quia objectum sæpe non existit, imo nec potest existere. De rebus enim non existentibus, & impossibilibus fiunt propositiones, tum veræ, tum falsæ. Partim quia sic, cum quis format propositionem falsam de Deo, dicendum esset Deum esse partem falsitatis. Propter hanc rationem monet *Comptenius* ut dicamus actum verum connotare objectum, non autem per ipsum constitui, ut per partem. Sed parum refert utrum dicamus objectum partem esse veritatis, & falsitatis, an non: Certum enim est objectum ad eam concurrere, ut terminus concurrat ad Relationem; an vero idcirco pars dicenda sit, est quæstio de voce *partis*. Sed rationes in oppositam, non urgent. Nam cum objectum propositionis non existit, est tamen illius negatio, quæ propositionem terminare potest, non minus quam res positiva. Et cum quis falso de Deo judicat, Deus non est pars falsitatis, sed id quod falso ei affingitur. Ut cum Sociniani negant Deum esse Trinum personis, pars falsitatis est negatio Trinitatis Deo afficta, non autem, Deus ipse.

Obj. II. Propositio quæ modo vera est, & eadem manet secundum entitatem, evadere potest falsa, ex sola mutatione objecti, et vicissim. Ergo veritas est unice ex objecto.

Resp. Missio nunc Antecedente (de quo quæstione sequenti) nego consequentiam. Quemadmodum non sequitur, manente circulo A, secundum totam entitatem, murato autem alio circulo B, cui fuit

fuit æqualis, et similis, circulus A evadit dissimilis et inæqualis circulo B: Ergo similitudo et æqualitas circuli A, ad circulum B, ante mutationem, oriebatur à solo circulo B. Ratio est quia veritas propositionis dicit et Entitatem actus, et concomitantiam objecti.

Obj. III. Propositio per suam Entitatem, nec est vera, nec falsa determinate. Quod igitur determinate vera sit, vel falsa, à solo objecto est.

Resp. Hic etiam sequela nulla est. Quia licet ad veritatem vel falsitatem non sufficiat entitas actus, ad eam tamen necessario requiritur, non minus quam ut objectum sit prout actus statuit.*

Obj. IV. Propositio per se, vel repræsentat objectum ut est, vel aliter ac est. Ergo per se vel est vera, vel falsa, quomodocunque se habeat objectum. Ergo veritas est adæquate intrinseca et essentialis propositioni.

Resp. Distinguo primum consequens, ergo propositio per se vel est vera, vel falsa, indeterminate, conceditur. Sicut omnis numerus per se vel est æqualis cuivis alteri, vel inæqualis. At non sequitur esse determinate veram, aut falsam. Siquidem ad hoc necessarium est ut objectum sit prout propositio dicit. Unde altera conclusio non sequitur: Licet enim propositioni quæ dicit *Petrum currere*, essentialis sit esse vel veram vel falsam indeterminate, sive Petrus currat sive non, quod tamen sit vera potius quam falsa, ex eo partim saltem est, quod Petrus currat: et quod falsa sit, inde ex parte est, quod non currat. Eademque propositio fieri potuit sive cucurrisset Petrus, sive non. Et propositio per suam entitatem, seu Essentiam repræsentat quidem aliquod objectum, quod indeterminate vel est ut repræsentatur, vel non est: at quod objectum sit vel non sit, ut ipsa repræsentat, est ei plane accidentarium.

Obj. V. Veritas est perfectio iudicii, & sermonis

nis Enunciativi, falsitas vero est imperfectio. Utraque igitur est iudicio & sermoni intrinseca.

Resp. Non sequitur: quia non omne illud quod perfectionis & imperfectionis nomine venit, est intrinsecum rei cui convenit. Ut *prudens uxor* dicitur *corona viro*, à sapiente: viro tamen extrinseca est. Deinde veritas est perfectio actus, non absolute, sed prout occasio est alicujus boni inde secuturi. Nec est perfectio physica magis quam falsitas, sed tantum relativa, quatenus per eam actus conformatur objecto.

Obj. VI. Saltem propositio necessaria, vera sit, necessario vera est, & impossibilis necessario falsa est, necessitate absoluta; adeoque propositio necessaria est essentialiter vera, & impossibilis essentialiter falsa.

Resp. Sunt quidem propositiones necessariae de essentiis suis veræ, & impossibiles essentialiter falsæ. Veritas tamen et falsitas non sunt iis adæquate intrinsecæ, sed partim oriuntur ex objectis. Si enim objecta aliter se haberent, possent propositiones quæ de iis modo veræ sunt, non esse veræ, et quæ modo falsæ, sunt, non esse falsæ.

Inst. At omnis essentia rei est intrinseca.

Resp. Essentia rei absoluta, est intrinseca: at Essentia Relationis, qualis est veritas, et falsitas, partim intrinseca est subjecto, partim extrinseca.

Interim tamen veritas et falsitas, licet differentiarum essentielles propositionum forent, non essent primæ differentiarum, sed secundæ tantum, seu consequentes. Prima enim differentia est, repræsentare aliquid alicui convenire, vel non convenire. Ex qua sequitur veritas, et falsitas, prout objectum est, vel non est.

Quæstio V. An propositio mutari possit de vera, in falsam, aut vicissim?

Respondemus his Thesisibus.

Thes.

Thes. I. *Propositio vocalis non potest mutari de vera in falsam, aut vicissim.* Ratio est, quia, cum natura sua transiens sit, durare nequit, dum objectum mutetur, ut ex mutatione illa fiat falsa. Quod si in eodem instanti, quo absoluitur propositio, objectum mutetur, (ut si in eodem instanti quo quis dicit Petrum sedere, Petrus surgat), propositio quæ alias vera esset, est falsa: sed non mutatur in falsam. Et similiter quæ falsa esset, est vera, si contra eveniat.

Thes. II. *Nulla propositio de materia necessaria, aut impossibili, mutari potest de vera in falsam, aut vicissim.*

Patet quia sic mutari nequit propositio, nisi mutetur objectum. At objectum propositionis necessariae, et impossibilis, mutari nequit. Unde propositiones illæ dicuntur *æterna veritatis, et falsitatis.*

Sed de propositione scripta, et mentali, seu actu iudicii, in materia contingenti, sive mutabili, quæstio est. In qua varîe sentiunt scriptores. Et supponere omnes videntur, eundem numero actum mentis durare posse, et sæpius durare pro tempore aliquo divisibili, nec in instanti transire. Si enim pro unico instanti tantum esset in mente, (ut in unico perfici videtur), facilis esset quæstionis resolutio: scilicet actum non durare, dum, mutato objecto, mutetur de vero in falsum, aut vicissim. Et suppositio satis videtur probabilis. Certum enim est per experientiam communem, mentem sæpius in ejusdem veritatis contemplatione, pro tempore divisibili immorari. Nec constat eam, illo in casu, singulis instantibus, eundem actum repetere: Nec multiplicandi sunt actus sine necessitate.

Quidam igitur negant actum verum iudicii, in ulla materia, mutari posse de vero in falsum, aut de falso in verum. Et affirmant omnem actum iudicativum, qui semel verus est, semper esse verum, et omnem qui falsus est, semper esse falsum. Sic

Arriaga

Arriaga & Comptonus. Idem tenentur asserere de propositione scripta.

Alii distinguunt. Et ex his quidam dicunt quosdam actus mentis significare instans, vel tempus in quo objectum est vel non est; ex. g. hunc, *Petrus nunc dormit*; & fatentur actus ejusmodi non posse transire de veris in falsos, aut vicissim. Alios esse qui tempus non significant, in quo res est, vel non est, sed tantum attributum aliquod convenire subiecto, vel non convenire. Et hos dicunt esse mutabiles, quoad veritatem & falsitatem. Alii vero, ut refert *Comptonus*, dicunt actum obscurum posse mutare objectum. Ex. g. hunc, aut similem, *Petrus peccat*. Dicunt enim eum in primo instanti, in quo formatur, repræsentare instans A, in secundo instans B, & sic deinceps. Si igitur Petrus in primo instanti peccat. & desinat peccare in secundo, in primo instanti est verus, et in secundo falsus. His igitur prænotatis, fit

Thef. III. *Idem numero actus judicii, licet de re contingenti, nequit mutari de vero in falsum, aut vicissim.* Patet.

I. Quia judicium quo quis dicit *Petrus loquitur*, significat Petrum in eo instanti loqui, in quo judicium illud fertur. Hoc autem semper postea verum est. Nec in sequenti instanti, si duræt, Petro tacente, est falsum. Quia in sequenti instanti non dicit Petrum loqui pro sequenti instanti. Sic enim non esset idem judicium singulare, quod fuit in primo instanti, sed aliud. Siquidem aliud haberet objectum, nempe loquelam Petri in instanti secundo. At objectum mutare non potest. Sic enim mutaret essentiam. Siquidem de essentia sua est representatio hujus objecti.

Dices rationem illam concludere, de actu judicii, circa res successivas, qualis est *loquela, cursus*, &c. Actus enim istiusmodi in secundo instanti, novum

haberent objectum, nempe novam partem loquelæ quæ in secundo instanti peragitur. Sed si actus sit de re permanente, (ut si quis dicat *Petrus sedet*, & actum continuat per tria instantia,) objectum erit plane idem. Unde si existat in primo instanti actus in eo instanti erit verus; & si in secundo non existat, in eo actus erit falsus.

Resp. Fatemur majorem longe fore mutationem objecti in judicio de re successiva, quam de re permanente. Quia in priori mutaretur tum objectum principale, tum tempus adsignificatum, cum in posteriori solum posterius mutaretur. Sufficit tamen hæc mutatio, ut actus in secundo instanti, alius sit quam fuit in primo. In primo enim representabat tantum Petrum sedere in primo instanti. Aliud autem est Petrum sedere in primo instanti, aliud eum sedere in secundo. Hoc est aliud est sessionem coexistere uni instanti, aliud eam coexistere alteri, licet sessio ipsa ex se, in utroque eadem sit.

Nec dicas cum iis qui partem oppositam tenent, quasdam propositiones nullum tempus adsignificare, sed tantum connexionem terminorum. Quia omnis propositio aliquo modo significat tempus: nempe vel omne tempus, si propositio necessaria, vel impossibilis sit, vel aliquam partem temporis, si contingens; eamque vel determinatam, vel indeterminatam, præsentem, præteritam, vel futuram. Et audientes semper intelligunt aliquod tempus, præsertim in propositione contingenti: ut cum audiunt hanc propositionem *Petrus sedet*, intelligunt eum nunc in præsentem sedere, cum audiunt hanc *Petrus sedebit*, intelligunt eum sessurum esse pro aliquo tempore futuro. Perinde autem est quam partem temporis propositio adsignificet; quia si pro quovis tempore verum sit aliquid esse, semper verum est illud pro eo esse.

II. Si propositio posset mutari de vera in falsam, ob mutationem in objecto, sequeretur magnam partem Scripturæ sacræ nunc esse falsam. Tota scilicet illa quæ prædictiones jam impletas exhibet. Ex. g. illa quæ temporibus Apostolorum significabat Antichristum esse futurum. Objectum enim jam mutatum est: hoc est Antichristus qui tempore Pauli erat futurus, nunc non est futurus.

Patet consequentia. Quia par omnino ratio est inter has propositiones, *Petrus sequenti instanti loquetur, & Antichristus est futurus*, quoad mutabilitatem, secundum veritatem, aut falsitatem: Sicut enim dicunt Adversarii hanc propositionem *Petrus in instanti sequenti loquetur*, si perseveret in mente formantis ad tertium instans, & Petrus tunc loqui desinat, falsam esse in tertio instanti; eodem plane modo dicere debent hanc propositionem, *Homo peccati revelabitur*, quæ fuit vera ætate Pauli, nunc esse falsam.

Dices forte, Quomodo constat hanc propositionem nunc esse veram, quandoquidem homo peccati jam revelatur, non autem est revelandus?

Resp. Quia propositio illa non dixit Antichristum revelandum esse post nostram ætatem, sed post ætatem Pauli. Hoc autem semper verum est.

Ex his obiter percipere licet, quid sit propositioem esse de præsentis, præterito, & futuro. Scilicet propositio de præsentis dicitur, cum res est, vel non est, prout in propositione dicitur, eo ipso tempore quo propositio formatur: de præterito, cum res tempore antecessit: de futuro, cum res sequitur.

Inferes autem, propositionem quæ durat pro tribus instantibus in quibus etiam objectum manet immutatum, veram vel falsam esse, tantum respectu primi instantis, quo dicit objectum hoc vel illo modo esse, non autem ratione secundi, aut tertii. Ut hæc, *Petrus sedet*, posito quod sessionem continuet per

tria instantia, vera est ratione primi duntaxat instantis. Pro eo enim solo propositio dicit eum sedere, nunquam autem postea dicit eum sedere pro alio. Sic enim non esset eadem propositio, contra hypothesin.

Obj. I. Mutato objecto propositionis, veritas & falsitas ejusdem mutatur. Nam veritas & falsitas oritur ex objecto, ut præcedenti quæstione ostendimus: At si quis continuet hanc propositionem in mente sua, *Petrus sedet per quadrantem horæ.* & Petrus, licet in initio illius quadrantis sedeat, postea tamen surgat, priusquam quadrans transeat, propositio illa in initio quadrantis erit vera, postea vero, cum Petrus surrexit, est falsa: difformis enim est objecto, & dicit Petrum sedere, quando non sedet: Mutatur igitur de vera in falsam.

Resp. Disting. Maj. Mutato objecto propositionis quoad repræsentationem, hoc est si propositio aliud objectum, aut idem aliter repræsentet, mutatur veritas vel falsitas, esto. At non mutatur ex eo quod objectum mutetur secundum esse reale. Sicut non mutatur imago, vel statua Cæsaris juvenis aut viventis, ex eo quod Cæsar postea senio confectus, aut mortuus sit. Semper enim repræsentat Cæsarem qualis fuit dum juvenis esset, & dum viveret. Nec consilium pictoris aut statuarii fuit aliud repræsentare. Ad confirmationem dicimus, veritatem & falsitatem non alio modo oriri ex objecto, quam quod propositio vera sit, vel falsa, ex eo quod objectum sit, vel non sit, prout propositio dicit. Non enim oritur falsitas in eadem propositione quæ fuit vera, aut veritas in eadem quæ fuit falsa, ex mutatione objecti secundum esse reale. Unde ad minorem dicimus, in casu facto, cum Petrus surgit, propositionem quæ in initio dixit Petrum sedere, non dicere eum sedere cum surgit, sed tantum pro instanti in quo sedebat. Nec prouinde difformis est suo objecto, quia sessio Petri

Petri ficta, ac si sederet cum stat, non est ejus objectum, sed vera sessio, quam habuit in initio : Nec objectum illud unquam mutat.

Sed urgebis, propositio illa in secundo instanti suæ durationis, vel repræsentat Petrum sedere in illo instanti, vel in primo, vel in nullo. Si in secundo, tum, posito quod in illo Petrus surrexit, mutatur in falsam. Si in primo, tum repræsentabit sessionem præteritam; cum in initio repræsentabat præsentem. In secundo enim instanti quo durat propositio, non est verum Petrum sedere, sed sedisse. Propositio igitur ut vera sit in secundo instanti suæ durationis, mutare debet objectum, quod est contra nos.

Resp. Propositio illa, in secundo instanti, solum repræsentat Petrum sedere in primo instanti quo ipsa formatur. Nec tamen mutat objectum. Non enim repræsentat sessionem Petri ut præteritam reduplicative, sed tantum sessionem quæ est præterita specificative, qualis fuit dum erat præsens, ut supra de imagine Cæsaris diximus. Quod autem sessio illa sit præterita, per accidens est ad repræsentationem quam propositio facit.

Obj. II. Communiter agnoscitur inter homines, id quod hodie verum est. cras esse falsum, & vicissim.

Resp. Dictum illud non significat eandem numero propositionem esse veram hodie, & falsam cras: sed vel id quod hodie est, cras non esse; & quod hodie non est, cras futurum esse: vel id quod per unam propositionem, hodie vere dicitur, per aliam omnino similem, de simili plane objecto, cras falso dici. Reliqua facilius solvuntur, & videas, si vis, soluta ab *Arriaga & Comptono*.

Quæst. VI. *An eadem numero propositio possit esse simul vera, & falsa?*

Resp. Negative. Quia eadem propositio vel est

conformis objecto, & sic est tantum vera; vel non est conformis, & sic est tantum falsa.

Respondet *Comptonus*. (is enim de hac veritate ab omnibus agnita dubitare se drofiterur) *Log. disp. 45. Sect. 5. Conformis est, & difformis, respectu diversorum objectorum, licet non respectu ejusdem. Ut cum quis dicit, Petrus currit, Paulus loquitur, nec per actum copulativæ, sed disparate fertur in duo illa objecta, in eo casu, Petro currente, Paulo autem non loquente, actus est simul verus, & falsus, seu partim verus, partim falsus.*

Resp. In casu dato, sunt duæ propositiones, quarum altera vera est, altera falsa. Et concedit *Comptonus* propositionem illam esse virtualiter duplicem. Una autem esse nequit, quia partes ejus nulla unionis nota cohærent.

Quæst VII. *An Una Propositio sit verior, aut falsior altera?* Negant plerique. Nos vero non videmus cur negetur. Potest enim una propositio esse magis conformis objecto: illa scilicet quæ totam veritatem, quam quæ partem tantum enunciat. Ut si viginti homines currant, verius loquitur, qui dicit novemdecem currere, quam qui duos vel tres. Et verius loquitur qui dicit omnes homines esse mortales, quam qui quosdam tantum.

Dices propositio quæ, viginti currentibus, duos currere affirmat, tam conformis est suo objecto, quam quæ novemdecem, suo.

Resp. Verum quidem est tam vere priorem repræsentare duos currere, quam posterior repræsentat novemdecem currere. Hinc tamen non sequitur utramque æque veram esse. Quia veritas non æstimanda est ex sola conformitate propositionis ad rem, in quantum repræsentatur, sed etiam in quantum est in se. Unde verior est propositio quæ magis dicit ut res est, seu quæ ei magis adæquatur.

Obj. I. *Comptonus, Log. disp. 45. sect. 6. primo repræsentare rem sicuti est, consistit in indivisibili. Si enim*

actus

actus vel minimum addat, vel demat, non repræsentat rem sicuti est. Item, si duæ lineæ sint omnino rectæ, non potest una rectior esse alia; sed veritas est linea intentionalis omnino recta.

Resp. Neg. Anteced. una cum confirmatione. Representare enim rem uti est, latitudinem admittit, potestque quis in repræsentando addere vel demere, non quidem negando aliquid quod ei convenit, sed plus vel minus repræsentando, ut in exemplis supra datis. Instantia rectitudinis in lineis non quadrat. Licet enim vera propositio nihil habeat falsitatis, & eatenus rectæ lineæ congruit, quæ omnem curvitatē excludit, habet tamen nunc plus nunc minus veritatis, prout plus vel minus repræsentat de eo quod rei convenit.

Obj. II. Veritas est adæquatio actus ad objectum. At non potest unus actus magis adæquari objecto, quam alius. Ultra enim adæquationem nihil est.

Resp. Veritas consistit in conformitate ad objectum, quantacunque, sine difformitate: non autem in adæquatione, nisi per eam conformitas simplex intelligatur. Multi enim vere loquuntur de re quam tractant, qui tamen in eo peccant quod non loquantur adæquate.

Inst. Omnis propositio vera repræsentat totum quod est illius objectum. Et licet una sit plenior declaratio alicujus rei, quam alia, non tamen est verior. Ut tam vera est propositio quæ dicit Deum esse omnipotentem, quam quæ dicit esse spiritum immensum, æternum, immutabilem, omnipotentem, & sapientissimum.

Resp. I. Omnem propositionem repræsentare totum id quod ejus objectum est, nihil aliud dicit quam repræsentare totum quod repræsentat.

II. Plenior declaratio rei est etiam verior *extensive*, quia plures veritates de re exhibet, licet *intensive*, seu quoad præcisam Essentiam veritatis, non

fit verior. Ex quo tamen non sequitur non esse veriore absolute. Alioqui posset quis arguere, diluculum non continere plus lucis, quam meridiem, quia minima pars lucis est lux.

De Propositione falsa res evidentior est. Una enim magis difformis est suo objecto, quam alia suo; idque sumendo objecta utriusque in quantum duntaxat repræsentantur. Ut magis dissentit à suo objecto, quæ dicit *mille hominum simul currere*, duobus tantum currentibus, quam quæ *tres*. Plures enim falsitates effert, & plura objecta fingit. Quid autem aliud est propositio falsa, quam imaginari aut pronunciare id quod non est?

Obijcit *Comptonus*, supra I. *Hæc Propositio omnes homines currunt, uno tantum non currente, tam falsa est ac uno tantum currente. Ratio est, quia omnes homines hic considerantur, prout in unum copulantur in cursu. Unde, uno non currente, tollitur copulatio, & veritas. Addi potest, tot falsitates dicere qui dicit omnes currere, uno solo currente, quam qui idem dicit, omnibus currentibus præter unum. Posterior enim tot falsitates dicit, quot sunt homines. Dicit enim unum qui non currit conjunctum esse, in cursu, cum unoquoque reliquorum qui currunt. Prior autem plures falsitates non continet.*

Resp. Uno tantum non currente, propositio tam falsa est, quoad absolutam essentiam falsitatis, quam nullo præter unum currente. Non tamen quoad gradum, de quo procedit quæstio. Et licet in priori casu, tot sint falsitates, quot sint homines, quia unus non-currens conjungitur, in negatione cursus, cum reliquis omnibus currentibus; multæ tamen veritates dicuntur, nempe omnes currere præter unum. In posteriori autem omnes falsitates reperiuntur quæ sunt in priori, & nihil veritatis, præterquam de uno.

Inq. At sic, eadem propositio erit simul vera, & falsa, respectu diversarum partium objecti, quod supra negavimus.

Resp.

Resp. Solum negavimus propositionem quæ disparate fertur in plura objecta, esse unam. Hic autem sermo est de propositione quæ copulativæ æquipollet; qualis est omnis universalis. Addimus etiam propositionem ejusmodi, licet objectum partim sit ut ipsa dicit, partim non, absolute esse falsam; non autem veram. Quia veritas est perfectio propositionis; & requirit totalem conformitatem ad suum objectum. Falsitas vero est malitia quædam, quæ ex quavis difformitate oriri potest.

Quæst. VIII. *An Propositiones de futuro contingenti, sint determinate vera, vel falsa.* Hoc est, an è duabus contradictoriis de futuro contingenti, ex.g. *Socrates cras disputabit, Socrates non cras disputabit*, altera determinate vera sit, altera falsa. Negat *Aristoteles*, de *Interp. cap. 9.* Solum enim vult alteram ex his indeterminate, esse veram, alteram vero falsam: eo modo quo verum est alterum oculorum esse necessarium ad videndum; scilicet alterum indeterminate. Neuter enim determinate, hoc est nec dexter, nec sinister, necessarius est. De veritate et falsitate harum propositionum quoad nos, non quaeritur. (Omnes enim concedunt, nos non certo scire posse, utra ex ejusmodi propositionibus determinate, sit vera, vel falsa; sed tantum ut sunt in se. Omnes Philosophi Christiani hic Aristotelem deserunt, etiam illi qui, in aliis, maxime sunt Aristotelici, quorum adeo est.

Thesis. Propositiones de futuro, quantumvis contingenti, sunt determinate veræ, vel falsæ. Ex.g. Altera determinate, ex his, *Socrates disputabit cras, Socrates non disputabit cras*, est vera, altera falsa. Ratio est.

1. Quia altera ex his determinate, ita pronunciat ut res erit, altera non; scilicet, vel illa quæ dicit Socratem cras disputaturum, vel illa quæ negat. Alterum enim ex objectis determinate, futurum est.

2. Deus, per suam præscientiam, videt alterum ex his objectis determinate, esse futurum. Adeoq; novit alteram ex propositionibus quæ de iis fiunt, esse veram, alteram esse falsam; & quænam illa sit.

3. E

3. E duabus contradicentibus, de præfenti, altera determinate vera est, altera falsa; Ergo idem dicendum de iis quæ sunt de futuro. Patet consequentia; quia quod nunc præfense est, fuit ante futurum; et quod nunc futurum est, aliquando erit præfens. Et quod nunc non præfens est, non fuit nunc eventurum; sicut & quod nunquam erit præfens, non est omnino futurum. Ergo, si hodie determinate verum sit, *Socrates disputat*, heri determinate verum fuit, *Socrates cras disputabit*. Et si hodie de verum determinate sit, *Socrates non disputat*, heri etiam verum fuit *Socrates cras non disputabit*. Nec opus est pluribus argumentis.

Obj. I. Si altera ex his propositionibus sit determinate vera, altera falsa, sequetur alteram esse necessariam, alteram impossibilem. Illi enim quæ vera est, non potest esse falsa: & illa quæ falsa est, non potest esse vera. Item sequeretur res contingentes necessario evenire, vel non evenire. Et tolleretur omnis contingentia. Scilicet si hoc unum determinate verum est, hodie *Socrates cras disputabit*; vel si oppositum determinate falsum sit, actus disputandi necessario eveniret, aut negatio illius necessario obtineret.

Resp. Neutrum sequi. Quia propositiones illæ necessario veræ vel falsæ sunt, necessitate non absoluta, sed hypothetica tantum. Si enim Socrates cras disputaturus est, necessario disputaturus est, non propter connexionem essentialem, aut naturalem, inter Socratem & actum disputandi, sed præcise quia determinabit se libere, & contingenter, ad disputandum, cum posset si vellet (possetque etiam velle) ad actum illum se non determinare. Et similiter dicendum est de altera parte. Nec ex eo quod futurum sit eum disputare, major oritur necessitas disputandi, quam ex eo quod actu disputet de præfenti. Unde propositiones illæ sunt omnino contingentes,

tingentes, nec contingentia eventuum tollitur. Necessitas enim illa cum contingentia amice consentit. Sicut & necessitas illa per quam res contingens est contingens.

Obj. II. Sequetur alteram ex istis propositionibus veram fuisse ab æterno, adeoque esse æternæ veritatis, & omnino necessariam.

Resp. Veram fuisse ab æterno nihil est absurdi: & eatenus quidem dici potest esse æternæ veritatis. Interim tamen talis non dicitur. Quia illa sola propositio æternæ veritatis vocatur, in qua attributum immutabiliter, ex intrinseca natura sua, postulat inesse subjecto: sive cujus termini essentiali nexu cohererent: quod de propositione contingenti, licet ab æterno vera fuerit, dici non potest.

Obj. III. Futurum contingens est indifferens ad esse, & non esse. Ergo etiam propositio de eo, indifferens est ad veritatem, vel falsitatem. Nec proinde determinate vera est, vel falsa.

Resp. Futurum contingens est indifferens ad esse, & non esse, quoad modum procedendi à causa sua; scilicet quatenus contingenter aut libere ab ea oritur: Sicut & res contingentes. cum actu existunt, indifferentes sunt ad existendum, vel non, ratione modi quo à causis profluunt. At ex hypothese quod futurum sit, hoc est quod causa ejus se determinaturus sit, ad illud producendum, eatenus non est indifferens ad esse, vel non esse, sed determinatum ad esse futurum.

Obj. IV. Per hanc quæstionis resolutionem, tollitur libertas voluntatis humanæ. Si enim Socrates determinate disputaturus sit cras, non est in arbitrio ejus disputare, vel non.

Resp. Non sequitur. Quia licet determinate futurum sit Socratem disputaturum cras, verum tamen est eum libere disputaturum; seu ita se applicaturum ad actionem disputandi, ut posset se non applicare

applicare. Nec futuritio antecedens cogit aut determinat voluntatem ipsius ad unam partem, magis quam ad aliam. Quin quia libere determinaturus est se ad disputandum, ideo futurum est ut cras disputet.

Obj. V Frustraneæ essent admonitiones, Consilia, deliberationes, conatus, &c. Si enim determinate verum sit Socratem cras disputaturum esse, frustra est eum hortari ad disputandum, frustra deliberabit de disputando, frustra studiis incumbit, argumenta excogitat, &c.

Resp. Neg. Conseq. Quia ex hypothese quod disputaturus sit, necessarium est ut omnia media ad disputandum necessaria ponantur. Adeoque ut, si aversus sit, per hortationem excitetur, si non sit paratus, ut se præparet, &c.

Obj. VI. Solum verum est Socratem cras disputaturum, vel non. At hoc est alterum indeterminate tantum esse verum, non autem alterum determinate.

Resp. Negando minorem. Quia licet inter hæc duo nihil sit medii, & necesse sit alterum esse, alterum tamen determinate erit verum: Sicut, licet verum nunc sit, *vel dies est, vel nox est*, alterum tamen determinate est. Non autem alterutrum indeterminate.

Inst. Alterum determinate esse, est vel hoc vel illud determinate esse; at hoc vel illud determinate esse, est alterum indeterminate esse: Ergo alterum determinate esse, est alterum indeterminate esse, quod implicat.

Resp. Ad minorem hoc vel illud determinate esse, est alterum indeterminate, quoad nos, seu in nostro conceptu, esse; non autem à parte rei. Adeo ut altera ex propositionibus prædictis determinate, in se semper vera sit, licet non determinate nobis constet, utranam illa sit.

Eodem modo de propositionibus de futuro contingenti conditionalis statuendum est: *ex. g.* de his
Si Petrus cras tentabitur peccabit; Etiam si cras ten a'it ut

Petrus,

Petrus non peccabit. Nec enim conditio ullum discrimen facit, inter illas, & propositiones absolutas, quoad veritatem, & falsitatem.

Obj. II. Hæ propositiones, *Si Canis latraverit, aquila volabit, si Papa legeris, Turca ridebit.* & similes, nec sunt determinatæ veræ, nec falsæ. Latratus enim canis nec infert volatum aquilæ, nec eum impedit, & sic de cæteris.

Resp. Si propositiones illæ accipiantur in sensu causali, seu illativo, quomodo communiter accipi solent, sunt determinate semper falsæ. At si solum denotent concomitantiam rerum ratione temporis, sunt determinatè veræ, vel falsæ, prout res; ex accidenti, simul tempore contingunt, vel non. Ut si cum Papa legit, Turca ridet, propositio erit determinate vera; si non ridet, erit determinate falsa. Alterum autem determinate necessario futurum est, nempe vel Turcam risurum cum Papa legit, vel non risurum cum Papa legit, licet necessitate hypothetica.

DISPUTATIO XXIII.

De Reliquis Affectionibus Propositionis.

Quæst. I. **A**N recte divisa sit propositio, in *Universalem, particularem, singularem, & indefinitam.*

Respondetur communiter affirmative. Demonstratur sic. Subjectum principale propositionis vel est singulare, vel universale: nec enim invenitur tertium. Si prius, propositio est singularis; ut *Aristoteles: fuit vir ingeniosissimus.* Si posterius, vel accipitur pro

pro omniibus quæ in extensione sua continentur; estque propositio Universalis; ut *omnis homo est rationalis, nulla bestia est rationalis*: vel pro parte tantum, una, vel pluribus; ut *aliquis homo fuit expers peccati, quidam homines sunt liberales*; Et omnes ejusmodi propositiones Particulares vocantur. Vel denique accipitur secundum naturam tantum, nulla habita ratione extensionis: ut *Homo est creatura fragilis, Justitia est virtus pulcherrima*.

Obj. Sunt propositiones quæ ad nullam ex his revocari possunt: illæ scilicet in quibus subjectum universale in majori parte accipitur, ex. g. *plerique homines sunt mali*. Nec enim istæ Universales sunt, ut per se patet. Nec sunt proprie particulares: hæ enim in sermone stricto, semper loquuntur de uno singulari, vel de pluribus determinatis; & notis, aliquis, vel aliqui, quidam, nonnullus, nonnulli, indicantur.

Resp. Ad hanc & alias eodém tendentes Objectiones, perinde est sive dicas, præter quatuor illas species, esse nonnullas alias; illas scilicet quæ loquuntur de multis, & paucis, de plerisque, & pene omnibus. Sive distinguas propositiones particulares, in illas quæ de uno, aut pluribus, indeterminate loquuntur, & in illas quæ de pluribus, infra omnes, cum aliqua determinatione; ut de multis, paucis, plerisque, & pene omnibus. Quamquam hæ minis recte particulares vocantur.

Quæst. II. An Propositio Indefinita, in Materia Necessaria, sit Universalis, in Contingenti vero particularis? Communiter affirmant Logici. Nos sic respondemus.

I. Licet Propositiones indefinitæ, in Materia Necessaria, Notam Universalitatis plerumque admittant, non tamen ædém plane, sensu sunt cum Universalibus. Ut non idem sonat, *Spiritus percipit*, & *omnis Spiritus percipit*. Posterior enitit representat omnes spec.

et, & omnia individua Spiritus, prior non dem.

II. *Propositio Indefinita, in materia contingenti, quandoque in Universalem transformari potest: ut Homo post lapsum factus est peccator, & morti obnoxius. Qui vero credis in Jesum Christum salvabitur.*

III. Sed neque, ubi solam notam particularitatis capimus, eadem sensu sunt cum particularibus. Ut non idem sonat Homo est Grammaticus, & aliquis homo est Grammaticus. In priori enim solum significatur, Grammaticam convenire naturæ Humanæ; & idcirco vi illius non potest audiens certo intelligere, utrum omnis Homo sit Grammaticus, an aliquis tantum. In posteriori vero indicatur, Grammaticam convenire uni homini indeterminato.

IV. *Quadam Propositiones indefinitæ in Materia contingenti, exponenda sunt per illas, quæ sunt de majori, vel maxima parte; nec sunt particulares: ut Hispani sunt Zelotipi, & suspicaces, Germani proceri, Galli agiles, & Gesticulosi. Nemo enim ferret eas exponi per particulares; scilicet, quidam Hispani sunt Zelotipi, & suspicaces, quidam Germani sunt proceri.*

V. Neque omnis propositio indefinita in Materia Necessaria admittit Universalitatem. Ut nominatim ille in quibus aliquid effertur de rebus ut sunt communes pluribus. ex g. cum dicimus *hominem esse speciem, animal esse genus*. Homo enim necessario aptus est multiplicari, & esse communis pluribus singulis. Non tamen verum istud est de omnibus hominibus, sive distributive, sive collective sumptis.

Quæst. III. *An Attributum quod ex se Universale est, Universalitatem retineat in propositione? Quæstionem hanc, ait Comptenus, præcipue esse circa prædicationem Attributi Universalis de Individuo; ut cum homo affirmatur de Petro. In qua quidam dicunt attributum evadere singulare: alii dicunt manere Universale. Nos sic statuimus.*

Thef.

pro omnia quæ in extensione sua continentur; estque propositio Universalis; ut *omnis homo est rationalis, nulla bestia est rationalis*: vel pro parte tantum, una, vel pluribus; ut *aliquis homo fuit expers peccati, quidam homines sunt liberales*; Et omnes ejusmodi propositiones Particulares vocantur. Vel denique accipitur secundum naturam tantum, nulla habita ratione extensionis: ut *Homo est creatura fragilis, Justitia est virtus pulcherrima*.

Obj. Sunt propositiones quæ ad nullam ex his revocari possunt: illæ scilicet in quibus subjectum universale in majori parte accipitur, ex. g. *plerique homines sunt mali*. Nec enim istæ Universales sunt; ut per se patet. Nec sunt proprie particulares: hæ enim in sermone stricto, semper loquuntur de uno singulari, vel de pluribus determinatis; & notis; *aliquis, vel aliqui, quidam, nonnullus, nonnulli*, indicantur.

Resp. Ad hanc & alias eodem tendentes Objectiones, perinde est sive dicas, præter quatuor illas species, esse nonnullas alias; illas scilicet quæ loquuntur de *multis, & paucis, de plerisque, & pene omnibus*. Sive distinguas propositiones particulares, in illas quæ de uno, aut pluribus, indeterminate loquuntur, & in illas quæ de pluribus, infra omnes, cum aliqua determinatione; ut de multis, paucis, plerisque, & pene omnibus. Quanquam hæ minus recte particulares vocantur.

Quæst. II. An Propositio Indefinita, in Materia Necessaria, sit Universalis, in Contingenti vero particularis? Communiter affirmant Logici. Nos sic respondemus.

I. Licet Propositiones indefinitæ, in Materia Necessaria, Notam Universalitatis plerumque admittant, non tamen eodem plane, sensu sunt cum Universalibus. Ut non idem sonat, *Spiritus percipit, & omnis Spiritus percipit*. Posterior enim repræsentat omnes species;

cies, & omnia individua Spiritus, prior non item.

II. *Propositio Indefinita, in materia contingenti, quandoque in Universalem transformari potest: ut Homo post lapsum factus est peccator, & morti obnoxius. Qui vere credit in Jesum Christum salvabitur.*

III. *Sed neque, ubi solam notam particularitatis capiunt, eadem sensu sunt cum particularibus. Ut non idem sonat Homo est Grammaticus, & aliquis homo est Grammaticus. In priori enim solum significatur, Grammaticam convenire naturæ Humanæ; & idcirco vi illius non potest audiens certo intelligere, utrum omnis Homo sit Grammaticus, an aliquis tantum. In posteriori vero indicatur, Grammaticam convenire uni homini indeterminato.*

IV. *Quadam Propositiones indefinitæ in Materia contingenti, exponenda sunt per illa, quæ sunt de majori, vel maxima parte; nec sunt particulares: ut Hispani sunt Zelotypi, & suspicaces, Germani proceri, Galli agiles, & Gesticulosi. Nemo enim ferret eas exponi per particulares; scilicet, quidam Hispani sunt Zelotypi, & suspicaces, quidam Germani sunt proceri.*

V. *Neque omnis propositio indefinita in Materia Necessaria admittit Universalitatem. Ut nominatim illæ in quibus aliquid effertur de rebus ut sunt communes pluribus. ex g. cum dicimus hominem esse speciem. animal esse genus. Homo enim necessario aptus est multiplicari, & esse communis pluribus singularibus. Non tamen verum istud est de omnibus hominibus, five distributive, five collective sumptis.*

Quæst. III. *An Attributum quod ex se Universale est, Universalitatem retineat in propositione? Quæstionem hanc, ait Comptonus, præcipue esse circa prædicationem Attributi Universalis de Individuo; ut cum homo affirmatur de Petro. In qua quidam dicunt attributum evadere singulare: alii dicunt manere Universale. Nos sic statuimus.*

Thef.

f Thef. I. *Attributum in Propositione, quandoque manet formaliter Universale, & ut tale spectatur; scilicet quando ipsum Universale, aut aliqua illius species, vel proprietas, de aliquo effertur. Ut cum dicimus, Genus est quid Universale, Natura humana est una species, in omnibus hominibus.*

Thef. II. *Cum de subjecto Universali effertur attributum reciprocum, seu aqualis extensionis, (ut cum quis dicit homo est animal ratione præditum) sicut subjectum Universale est in se, nempe natura communis pluribus, per similitudinem & multiplicationem in illis, ita etiam attributum quod cum illo adæquate idem est.*

Thef. III. *Cum de subjecto Universali effertur Attributum majoris extensionis, ut in hac, Animal est vivens, Attributum non retinet totam Universalitatem, quam ex se habet. Restrigitur enim ad extensionem subjecti. Non enim potest vivens vere affirmari de animali, nisi quatenus cum eo identificatur: At cum eo non identificatur in tota extensione.*

Thef. IV. *At, cum subjectum est singulare, Attributum non retinet ullam partem sua Universalitatis. Ut cum dicimus Petrus est Homo. Ratio est eadem quæ prioris. Nec enim in prædicto exemplo, prædicatur Homo, nisi qui identificatur cum Petro: at is est Homo singularis, ut per se patet, nempe Homo qui est ipse Petrus, seu in Petro. Idem dicendum est, cum de subjecto Universali distributo aliquid enunciatur. Tum enim singulis partibus distributionis respondet attributum æqualis extensionis, seu quod cum illis identificatur. Ut in hac, Omnis homo est animal, attributum idem valet ac animal singulare: Nihil enim aliud identificatur cum singulis hominibus.*

Thef. V, *Extra casum Thefi prima memoratum, Attributum in propositione, nec spectatur ut Universale, neque ut singulare, sed secundum se, seu naturam suam. Adeo*
ut,

ut, licet id quod prædicatur Universale sæpe fit; & Universalitatem verè retineat, non tamen prædicatur Universalitas, seu *status*, sed tantum res ipsa. Ut cum *homo* affirmatur de Petro, licet verè singularis sit, non consideratur ut singularis. Sic enim *Petrus est homo*, & *Petrus est unus singularis seu individuus homo*, essent eadem propositio, & solis verbis discreparent. At falsum istud. Prior enim solam humanitatem attribuit Petro; posterior, præter Humanitatem, attribuit etiam Unitatem Individualem. Similiter, cum *animal* affirmatur de homine indefinite, est verè Universale. Eandem enim extensionem retinet ac homo cui tribuitur: Non tamen consideratur ut universale: quia sic eadem essent propositio, *Homo est animal*, & *Homo est animal unum in pluribus individuis*, vel *abstractum à pluribus*, quod per se manifeste falsum est. Et certe, si consideratur *animal* ut Universale, in illa propositione, vel consideratur ut Genus, vel ut species: at neutrum verum est: falsa enim esset propositio si *animal* consideratur ut Genus: haberet enim hunc sensum, *Homo est animal in Genere*. Et licet, si consideratur ut species animalis, vera quidem esset, alia tamen est propositio quæ dicit *Homo est animal*, ab eâ quæ dicit *Homo est species animalis*. Deinde, attributum considerari secundum naturam tantum, patet; Quia, in his propositionibus, *Petrus est homo*, & *Homo est animal*, voces *Homo* & *animal*, nihil significant nisi id ad quod significandum communiter usurpantur. Hoc autem est sola Natura humana, & sensitiva, non autem Universalitas.

Objicit Galtruchius, cum aiunt *Petrus est homo*, manet *homo* in se cum abstractione; nec conceptus hominis est conceptus Petri: alioqui propositio esset identica.

Resp. I. Potest *homo* manere cum abstractione, sine Universalitate. Potest enim abstrahi à solis accidentibus Humanitatis.

II. Licet retineret abstractionem ab omnibus singularitatibus, & sic maneret universalis, non tamen consideratur ut sic abstractus, & universalis. Sic enim propositio esset falsa: Haberet utique hunc sensum, *Petrus est homo abstractus ab omni singularitate*; cum tamen sit homo contractus ad singularitatem Petri.

III. Sed & falsum est, manere abstractum ab omnibus singularitatibus. Solum enim consideratur *Homo* qui est idem cum Petro, & Humanitas quæ est in Petro. Hæc autem solum abstrahitur à singularitate Petri. Verum abstractio illa non consideratur; sed tantum consideratur *homo* in Petro, non considerata illius singularitate.

Inst. Secunda mentis operatio non destruit primas, seu simplices Apprehensiones subjecti, & prædicati, sed eas retinet. At in simplici apprehensione, *Homo* abstracte consideratus, est universalis; Ergo etiam in iudicio quo dicimus *Petrus est Homo*.

Resp. Neg. Minorem. Nam in simplici apprehensione, potest *homo* considerari indefinire, hoc est, nec ut est unum quid in omnibus, aut pluribus hominibus, nec ut in uno tantum, sed duntaxat secundum naturam; abstrahendo ab his, & omnibus aliis. Et revera sic consideratur, ut supra probatum est.

Objiciet forte alius quispiam, saltem in propositione negante attributum considerari ut universale; ex g. cum dicitur *nullus homo est immortalis*. Attributum enim in propositione negante, complete distribuitur. Habetque propositio ista hunc sensum, *Nullus homo est ullum immortale*.

Resp. Neque hic attributum consideratur ut Universale, sed tantum indefinite, ut supra diximus de aliis. Probationem distinguo. Attributum propositionis negantis aptum est complete distribui, salva veritate,

veritate, adeoque ex consequenti ita distribuitur. Ex hac enim *Nullus homo est immortalis*, recte inferitur, *Homo non est ullum immortale*. quæ alia est propositio: At actu, & expresse, nec distribuitur complete, nec incomplete.

Quæst. IV. *An recte propositiones Modales ad quatuor ordines reducuntur, necesse, contingens, possibile, & impossibile; seu, an quatuor tantum sint Modi, qui connexionem terminorum in propositione efficiunt?*

Resp. Affirmative. Omnes enim alii modi qui ipsam terminorum connexionem aut disjunctionem efficiunt, vel plures ex hisce comprehendunt, vel sub aliquo eorum comprehenduntur: Siquidem omnis connexio terminorum vel est vera, vel falsa. Et si vera sit, vel est necessaria, vel contingens: si falsa, vel est possibilis, vel impossibilis. Sed ad hanc rem declarandam, objectionum sequentium solutio aliquantum conducet.

Obj. I. Quatuor isti modi sunt determinationes rerum. Ut necessitas, contingentia, & possibilitas, Entium realium; impossibilitas, non-entium. Non igitur propositionum.

Resp. Non sequitur. Quia possunt esse determinationes & rerum, & connexionum in propositionibus. Sicut enim res quæ actu est, vel necessaria est, vel contingens, & quæ non est, vel est possibilis, vel impossibilis; ita etiam vera connexio terminorum, in propositione, vel est necessaria, vel contingens, & falsa vel est possibilis, vel impossibilis.

Obj. II. Hi sunt modi Enunciationum, *Verum, falsum, certum, incertum, probabile, improbabile, obscurum, evidens, absurdum, non absurdum*: ut in his, *esse Antipodas est verum; Antichristum nondum vanisse est falsum, spiritum se movere est certum, materiam se movere est incertum* &c. At ad nullum ex quatuor prioribus reduci possunt.

Resp. *Verum* completitur modis necesse, & contingens:

tingens: *Falsum* autem, possibile, & impossibile. Ubi notandum est, errare eos qui dicunt hanc propositionem, & similes, *Esse Antipodas est verum*, nihil amplius dicere quam *Antipodes existere*. Dicit enim expresse, & in actu signato, existentiam Anripodum conformiter se habere in re, ut in propositione effertur, quod posterior non dicit. *Certum* vero vel denotat certitudinem objectivam, & sic idem est cum *necesse*; vel subjectivam, quæ in mente nostra est; & sic non afficit intrinsece propositionem. Idem de *incerto* dicendum est. Reliqui sunt affectiones propositionum extrinsecæ, seu in ordine ad nos; nulla enim propositio in se est probabilis, aut improbabilis, evidens, aut obscura, sed tantum respectu mentis creatæ. *Absurdum* autem vel notat intrinsecam repugnantiam terminorum in propositione, & sic idem est ac *impossibile*: vel aptitudinem ad aures. & mentes bene dispositas offendendas, & sic est affectio orta à relatione ad nos. Quatuor autem modi illi intrinsece afficiunt ipsam connexionem terminorum.

Inq. I. Mutabiliter, & immutabiliter, per se, & per accidens, sunt modi, connexionem terminorum intrinsece afficientes: ut in his *Deus est immutabiliter justus*, *Homo est mutabiliter sanctus & beatus*. *Homo est per se animal*, *per accidens Grammaticus*.

Resp. Mutabiliter & Immutabiliter idem valent ac *Contingens & Neceffe*. De modis *per se*, & *per accidens*, quidam respondent, esse tantum materiales, hoc est solos terminos afficere, non autem connexionem, ut modi formales, quales sunt quatuor supra memorati. Nam in hac, *Homo per se est animal*, terminus *per se*, solum subjectum afficit puta *Hominem*: *Sensus* enim est, *Homo per essentiam est animal*. Sed juxta hanc responsionem, etiam *Modus neceffe* esset sæpe, si non semper, materialis tantum.

Ut

Ut in hac, *ignis necessario est calidus*. Modus enim *necessario*, subjectum afficit: & propositio hunc habet sensum, *ignis ex necessitate naturæ suæ est calidus*. Dicendum igitur cum aliis, modum *per se* spectare ad *necesse*, *per accidens* autem ad *contingens*.

Inst. II. Si modus *adverbialiter* efferatur, Enunciatio non est modalis sed pura.

Resp. Atqui ego potius dicerem, modum *nominaliter* prolatum, Enunciationem puram efficere, *adverbialiter* vero modalem. Priori enim ratione Modus est attributum, *Dictum* vero subjectum. In posteriori, præter subjectum & attributum, inseritur modus quo hoc illi convenit. Interim, si vere loqui velimus, siue nominaliter siue *adverbialiter* modus efferatur, fatendum est, Enunciationem esse modalem. Utrovis enim modo ostendit quomodo Termini Enunciationis cohæreant.

Quæst. V. *An verum sit, propositionem Universalem & particularem negantem, & quamlibet singularem, admittere conversionem simplicem?*

Resp. Affirmative. Sed exercitationis gratia, respondendum est quibusdam instantiis quæ in contrarium objiciuntur. Hæ propositiones non admittunt conversionem simplicem.

1. *Nullus cæcus fit naturaliter videns.*
2. *Nullus homo est species.*
3. *Nulla navis necessaria est ad navigandum.*
4. *Nullus puer fuit senex.*
5. *Aliquis ambulans videt cæcum.*
6. *Quidam homo est mortuus, quædam domus est combusta.* Non enim verum est conversim dicere, *nullus videns fit naturaliter cæcus, nulla species est homo, nihil necessarium ad navigandum est navis, nullus senex fuit puer, aliquis cæcus videt ambulantem, aliquid mortuum est homo, aliquid combustum est domus.*

Resp. Conversiones istæ non sunt legitimæ. Vel enim totum Attributum non transit in locum subiecti, ut in Instantia prima, quarta, quinta, & sexta; vel termini non eodem modo utrobique accipiuntur, ut in secunda, & tertia. Sic igitur convertendæ sunt propositiones datæ; *Nullus qui fit* (quocunque modo) *videns, est cæcus.* *Nulla species est homo singularis* (in hac enim nullus homo est species, homo distribuitur in homines singulares.) *Nihil necessarium ad navigandum est ulla navis determinata.* (Sic enim sumitur navis in convertenda): *Nullus qui fuit senex est puer, aliquis qui videt cæcum est ambulans. Aliquid quod mortuum est fuit homo.* (Convertenda enim hunc habet sensum *aliquid quod prius fuit homo nunc est mortuum.*) *Aliquid quod combustum est fuit domus.* Et juxta exempla ista reliquas similes recte convertes.

Quæst. VI. *An Universalis affirmans per accidens semper convertatur.*

Resp. Affirmative; Rationem dedimus in Institutionibus.

Obj. I. Nonnunquam convertitur simpliciter, ut *Omnis Spiritus percipit, omne percipiens est Spiritus.*

Resp. Universalis affirmans, de attributo proprio, seu reciproco, conversionem simplicem admittit. Sed id non acceptioni terminorum, in propositione, sed qualitati eorum, prout absolute spectantur, imputandum est. Ut in hac *omnis spiritus percipit*, attributum non distribuitur universaliter, sed sumitur indefinite, & idcirco soli parti æquipollet. Sensus enim non est, omnem spiritum esse omne percipiens, sed tantum esse aliquod percipiens. Unde vi istius acceptionis converti non potest nisi per accidens.

Obj. II. Hæc, *omne animal est homo*, non potest converti in hanc *quidam homo est animal*, quia conversio legitima postulat, ut qualis sit convertenda quoad veritatem aut falsitatem, talis etiam sit illa in quam

quam convertitur. Hic autem convertenda est falsa, altera vera.

Resp. Neg. Anteced. Ad confirmationem dicimus, in conversione qualitatem non ulterius utrobique observandam esse, quam quod si convertenda sit vera, altera in quam legitime convertitur, non possit esse falsa. Si enim convertenda sit falsa, nihil verat eam in quam convertitur esse veram. Quia ex falso verum sequitur, vi formæ syllogisticæ. Conversio autem est species quædam discursus. Interim tamen, si termini utrobique in eadem extensione accipiantur, ubi convertenda est falsa, etiam conversa erit falsa. Ut si *omne animal est homo* convertatur in hanc, *homo est omne animal*. Sed in conversione, quantitas subjecti non transit in Attributum.

Obj. III. Hæc *omnis Grammaticus est homo*, ante inventam Grammaticam, non potuit converti in particularem affirmantem, *quidam homo est Grammaticus*. In eo enim casu nullus homo fuit Grammaticus.

Resp. Converti potuit in sensu conditionato: Hunc enim habet sensum *si sit ullus Grammaticus, est homo*: Unde intertur recte, *si ullus sit Grammaticus, aliquis Grammaticus est homo*. Solum autem convertenda in sensu conditionato, non potest converti in sensu absoluto, qui supponit aliquam Grammaticum actu existere. Idem dicendum de hac *omnis homo albus est homo*.

Quæst. VII. An Particularis negans conversionis capax sit? Communis sententia hætenus negavit, sed minus recte. Omnis enim propositio converti potest salva veritate, modo Conversio recte instituat. Nam omnis Identitas, & diversitas est mutua. Si igitur attributum in propositione, sit idem cum subjecto, subjectum etiam idem est cum attributo: & si attributum diversum sit à subjecto, subjectum vicissim diversum est ab attributo. Intellige tamen, si

eodem modo utrobique accipiantur, aut saltem non plus significant in conversa quam in convertenda.

Quod ad Particularem negantem attinet, fatendum est eam non converti sumendo attributum, si ne nota negandi, in locum subjecti: ut *quædam creatura rationalis non est peccator, quidam peccator non est creatura rationalis*. Si tamen loco subjecti sumatur integrum attributum, cuius pars est negatio, recte convertitur particularis negans, scilicet hæc *quædam creatura rationalis non est peccator*, in hanc *aliquid quod non est peccator, est creatura rationalis*.

Obj. In conversione servanda est qualitas; quod in istiusmodi conversione non fit. In ea enim conversa est affirmans, de subjecto infinito, cum convertenda sit negans.

Resp. In conversione servanda est veritas, & consequentia legitima: Nec ulterius extendenda est qualitatis observatio. Deinde propositio negans æquipollet affirmanti de attributo infinito: ut *Quædam creatura rationalis non est peccator*, æquivalet huic, *quædam creatura rationalis est aliquid quod non est peccator*. Recte igitur convertitur in affirmante de subjecto infinito, ut facile apparet.

Quæst. VIII. *An duæ contrariæ aliquando sint simul veræ.*

Resp. Neg. Rationem in Institutionibus reddimus.

Obj. Hæ sunt contrariæ simul veræ, Si *omnis homo currit* *omnis homo movetur*, si *nullus homo currit* *nullus homo movetur*, item *cujuslibet hominis altera manus est dextra*, *cujuslibet hominis altera manus non est dextra*.

Resp. E duabus prioribus, posterior est falsa; non enim sequitur, *Nullus homo currit*, Ergo *nullus homo movetur*. Procedit utique à specie ad Genus, negative

gative, qualis illatio est vitiosa : Potest enim homo aliter moveri quam currendo. Deinde contrarietas non reperitur in propositionibus hypotheticis, sed tantum in absolutis. Duæ autem posteriores non sunt contrariæ, sed subcontrariæ, quæ possunt esse simul veræ. Hæc enim *cujuslibet hominis altera manus est dextra*, sic resolvenda est, *altera manus cujuslibet hominis est dextra*, quæ propositio particularis est. Idem verum est de altera. Nota enim Universalitatis in neutra afficit subjectum principale, sed tantum illius modificationem. Quod si in formam universalem mutantur, hoc modo, *Omnis homo habet alteram manum quæ est dextra*, *Omnis homo habet alteram manum quæ non est dextra*, non erunt contrariæ quia ambæ affirmant. Denique altera manus non utrobique pro eodem accipitur.

Quæst. IX. *An dua contradicentes possint esse simul veræ, aut falsæ?*

Resp. Neg. Estque omnibus per se notum.

Obijciuntur tamen aliquot propositiones quæ contradicentes esse videntur, ambæ autem sunt veræ.

1. *Nulla navis est necessaria ad navigandum, aliqua navis est necessaria ad navigandum.*

2. *Omnia Elementa sunt quatuor, quædam Elementa non sunt quatuor.*

3. *Omne animal fuit in arca Noë, non omne animal fuit in arca Noë.*

4. *Petrus currit, non Petrus currit.*

Resp. In prima Instantia, si prior loquatur de *omni navi*, determinata pariter, & indeterminata, sunt quidem contradicentes: Non vero si loquatur tantum de *omni determinata*. Sic enim datur medium, nempe aliqua indeterminata. In secunda *Elementa* utrobique sumuntur collective: in priori quidem, omnia, in posteriori quædam; scilicet duo, vel tria. Sic autem non sunt contradicentes: quia datur medium, nempe

nempe quoddam vel omne Elementum distributive. Vel dicendum est priorem non esse Universalem sed singularem, quia in ea omnia Elementa in specie sumuntur pro uno singulari, nempe pro uno Numero. In tertia, terminus *Animal* utrobique quidem distribuitur; sed in priori, distributio est in genera singulorum, in posteriori, in singula generum. In quarta, posterior potest esse affirmans, in hunc sensum, *aliquid quod non est Petrus*, hoc est aliquid diversum à Petro, *currit*; & sic priori non contradicit. Si autem negatio cadit supra verbum *currit* contradicit priori.

Objici etiam possunt nonnullæ, quæ videntur esse simul falsæ. Ex. g.

1. *Omne ambulans movetur, quoddam ambulans non movetur, ex hypothesi quod nemo ambulet.*

2. *Ante creatam Evam hæ fuerunt simul falsæ, Omnis homo dormit, aliquis homo non dormit. Prior quidem quia solus Adamus dormiebat: Posterior, quia nullus tunc fuit non dormiens.*

3. *Hæ Chimæra distat à me, Chimæra non distat à me. Chimæra enim cum nullibi sit, nec potest distare à me, nec esse prope.*

4. *Item solus homo currit, non solus homo currit, ex hypothesi quod homo omnino non currat.*

5. *Petrus essentialiter est albus, Petrus essentialiter non est albus. Petrus enim essentialiter, nec est albus, nec non albus; hoc est nec postulat albedinem, nec eam respuit.*

Resp. In primo exemplo, prior propositio, etiam ex hypothesi quod nemo actu ambulet, est vera. Nul- lum enim alium sensum habet, quam motum ne- cessario convenire rei ambulanti, sive existat actu, sive non. In secundo si intelligatur homo actu, existens, prior est vera, posterior falsa; Si vero intelligatur omnis homo absolute, ita ut propositi- ones etiam de possibilibus loquantur, prior est falsa, posterior

posterior vera. In tertio, si *distare* significet esse in loco distante, & *non distare* esse in loco contiguo, aut propinquo, utraque quidem est falsa: Sed non sunt contradicentes: quia datur medium, nempe nec distare, nec non distare, in sensu dato, scilicet nulli esse. At si *distare* significet esse in loco distante, & *non distare*, præcise non esse in loco distante, (ut usus communis postulat) prior est falsa, posterior vera. Denique si *distare* significet non esse in loco vicino, & *non distare* esse in loco vicino, prior est vera posterior falsa. In quarto, suppositio facta naturam istarum propositionum evertit. Ex ea enim, non possunt esse exclusivæ proprie. Interim tamen sic altera erit vera, altera falsa. Habebunt enim hunc sensum nihil diversum ab homine currit, aliquid diversum ab homine currit. In quinto exemplo, propositiones datæ non sunt contradicentes. Quia utraque est affirmans. Sunt enim Propositiones restrictivæ, habentes hunc sensum, *Petrus secundum essentiam est albus. Petrus secundum essentiam non est albus.* Restrictiva autem non negatur nisi negando restrictionem, quod hic non fit. Si autem negetur restrictio, altera est vera, altera falsa.

Inst. At si Petrus non sit albus, utraque erit falsa.

Resp. Non tamen secundum idem. Prior enim falsa erit quatenus dicit & Petrum esse album, & albedinem esse ei essentialem: Posterior, solum quatenus dicit Petrum esse album. At his respectibus non sunt contradicentes. Quia ambæ affirmant; & termini ex parte sunt diversi.

DISPUTATIO XXIV.

*De Definitione & Divisione.*Quæst. I. **A**N Definitio possit definiri?

Resp. I. Definitio particularis non potest definiri, quatenus est Definitio; quia est formaliter complexum ex pluribus Attributis rei definiendæ, quæ non ut unum quid, sed ad summum per partes, sigillatim acceptas, definiri possunt. Nec definitione indiget, quia est ultima rei explicatio. Si enim per aliam definitionem explicari exigeret, non esset reipsa definitio. Interim tamen possunt partes cujuslibet definitionis, præter eam cujus omnes termini sunt per se noti (qualis est definitio Entis in communi) seorsim explicari. Ex. g. *Animal rationale* est definitio hominis, cujus utraque pars, nempe *animal*, & *rationale*, definitionibus propriis declarari possunt.

II. Sed Definitio in communi tum *objectiva*, tum *formalis*, *mentalis*, *vocalis*, & *scripta* (hoc est, communis idea seu ratio omnium definitionum) *definiri potest*; Et in Logica definitur. Recte enim dicimus *Definitionem formalem esse explicationem rei per attributa essentialia propria*. *Objectivam vero esse essentiam rei evolutam*, seu *explicatam*. Ratio est quia quicquid sub conceptum nostrum cadit, nisi sit per se notum, potest aliquo modo declarari, assignando aliquam illius ideam propriam.

Obj. I. Si Definitio potest definiri, necesse est ut per definitionem definiatur. At posterius est absurdum,

dum, sic enim definiretur per seipsum, nec notior esse definito.

Resp. Disting. propositionem. Necessè est ut definiatur per definitionem: non tamen per definitionem particularem hujus vel illius rei, à definitione in communi diversam; nec per definitionem in communi confuse & obscure conceptam, (hæc enim sunt absurda) sed per attributa propria definitionis in communi; puta per genus & differentiam; hoc enim non est magis absurdum, quam quod concipi potest conceptus in communi, per actum communem reflexum.

Obj. II. Si definitio, etiam in communi, definiri potest, per aliam definitionem definiri debet. At posterius falsum est. Quia, pari ratione, hæc alia definienda est per aliam, & sic procedetur in infinitum.

Resp. Neg. connexionem. Definitio enim in communi non est proprie definitio, (sicut animal in communi non exercet actus vitæ & sensus) sed communis ratio omnium definitionum particularium.

Quandoquidem vero definitio dici solet, non est absurdum si definiatur alia definitione, nempe sua, siquæ eam explicet. Neq; sic proceditur definiendo in infinitum. Quia definitio definitionis in communi nec potest nec eget nova definitione explicari, ut definitio ipsa in communi quæ definitur.

Quæst. II. *An recte definiatur definitio*. Oratio explicans naturam, seu essentiam rei. Ubique enim ab Aristotele dicitur λόγος τῆς οὐσίας, λόγος τοῦ τί ἐστίν, & λόγος τοῦ τί ἐν εἶναι; id est Ratio, seu sermo essentialis, Ratio explicans quid res sit.

Resp. Definitio varie significat, & pro illa varietate varie definienda est. (Sed quæstio procedit de definitione essentiali:)

I. Quandoquidem significat conceptum mentis, & sic definienda est, *conceptus essentialis rei.*

2. Non

2. Nonnunquam sermonem externum, prolatum vel scriptum : Et sic definiri debet, *Explicatio essentie.*

3. Nonnunquam objectum istius conceptus, & signatum sermonis, ac scripti, sic autem est *essentia rei clare concepta, aut explicata.* Contra id quod hic dicitur *Definitionem esse Orationem.*

Obj. I. Definitio sæpius *Terminus* apud Aristotelem nuncupatur. *Terminus* autem non est Oratio.

Resp. Definitio non dicitur *Terminus* quasi esset unica vox ; neque quia est *Attributum* in propositione definitiva, sed quia *finis & limites rei* in nostro conceptu ponit, hoc est eam ab omnibus aliis distinguit, seu ut distinctam exhibet : *Quemadmodum* limitibus suis agri & prædia determinantur.

Obj. II. Definitio Rei interdum unica voce exprimitur ; definitum etiam, aliquando pluribus, seu oratione : ut cum *malitia moralis*, seu peccati definitur *anomia* 1 Joh. 3, 4.

Resp. Definitio interdum unica voce exprimitur, quæ significatione pluribus, seu orationi æquipollet. Ut in exemplo dato, *anomia* idem significat ac *Discrepantiam à lege.* Definitum vero quandoque oratione quadam exprimitur, ut distingui possit ab aliis rebus, quæ aliis Definitionibus sunt explicandæ : Ut *Malitia Moralis* sic dicitur ad differentiam malitiæ *naturalis*, aut *pœnalis.*

Quæst. III. *An Definitio Mentalis in simplici apprehensione consistat, an in iudicio ?*

Thesis. Definitio mentalis consistit in iudicio, quo attributa explicantia *Essentiam*, de re definienda affirmantur : Non autem in simplici apprehensione, nisi ut in prærequisito, seu præparatione quadam : quatenus attributa explicantia non possunt de re explicanda affirmari ; nec sciri esse illius attributa, nisi per apprehensionem simplicem præconciuntur. Vide *Instit. part. com. cap. 19. sect. 5.*

Probat

Probatur Thesis. Definitio est explicatio Essentiae rei. At explicari nequit Essentia Rei nisi attributa essentialia statuantur rei convenire, quod in solo iudicio fit. Simplex enim Apprehensio & Generis & Differentiae, non sufficit ut sciamus rei essentiam: sed requiritur porro ut hæc cum re conferantur in p.opositione. Et quamdiu cum ea non comparamus, seu illi non aptamus, nescimus utrum essentiam ejus repræsentent, nec ne.

Obijciunt qui contra statuunt, I. Totum artificium definiendi consistere in inventione attributorum definiendum, quæ per simplicem apprehensionem fit. Hæc enim, si inveniamus, facile rei definiendæ tribuuntur. Ergo tota definitio in simplici Apprehensione consistit.

Resp. Non sequitur. Sicut data linea recta, non fit triangulus rectilineus, ex generatione aliarum duarum, nisi duæ illæ cum linea data jungantur; Aut invento medio non fit Syllogismus, nisi medium cum extremis conferatur; licet præcipua difficultas in eo inveniendi consistat.

Obj. II. Definitio constat genere & differentia, quæ concipiuntur sine iudicio.

Resp. Definitio objectiva constat genere & Differentia: Suntque duo illa Attributa Tota rei Essentia. Sed definitio formalis non in solo conceptu generis, & Differentiae, consistit, sed etiam in attributione eorum ad rem definiendam. Itaque sensus dicti illius, *Definitio constat genere & differentia*, non est exclusivus rei definiendæ: sed tantum indicat attributum, in propositione essentiam rei declarante, esse Genus & Differentiam.

Inst. Hinc sequeretur definitum ingredi Definitionem, contra regulam communiter probatam.

Resp. Sensus istius regulæ *Definitum non ingreditur definitionem*, alius non est, quam quod definitum non debet loco attributi in definitione poni. Ut non recte

recte dicitur *homo est homo rationalis*. Secus enim in Oratione explicante essentiam rei, si tota spectetur, necesse est mentionem facere rei explicandæ: nec aliter scire possumus quid per eam explicetur.

Ex his inferes, neque divisionem in simplici apprehensione, sed in iudicio consistere; illo scilicet in quo partes vel species rei concipiuntur toti convenire. Item, ut sciamus essentiam rei, per definitionem, aut partes vel species, per divisionem, necessarium esse ut perspiciamus esse illius Essentiam, partes, vel species. Sicut & ut sciamus nos definitionem rei invenisse, requiritur ut sciamus attributa quæ invenimus, esse rei Essentialia, & propria.

Quæst. IV. *An & quomodo distinguatur definitum à definitione?*

Resp. Definitio in hac quæstione sumitur objective, pro attributis quibus res essentialiter differt ab omnibus aliis. Nam de definitione formali, satis manifestum est eam distingui à definito, ut actus à suo objecto. De Definitione igitur objectiva, & Definito dicimus distingui in hunc modum. Definitum est res quævis, considerata ut hoc vel illo nomine vocatur, & hic conceptus est maxime obscurus, & imperfectus: vel ut certis accidentibus propriis substat: Ut cum pueri hominem concipiunt, esse tali figura præditum, quodque loqui & tali modo incedere solet, aut ejusmodi. Et hic conceptus aliquanto clarior, & perfectior est. Definitio vero objectiva est eadem res, ut per attributa essentialia propria cognoscitur: qualiter ab adultis & doctis consideratur.

Ex quibus liquet, Definitum & Definitionem, plus quam ratione distingui. Quia plus quam ratione distinguuntur illa quibus Definitum ut tale designatur, & Essentia quæ definitione explicatur. Non tamen adæquate distinguuntur. Aliquid enim est commune utriusque

utriusque conceptui, qui rem considerat nunc ut rem, seu aliquid, aut sub aliquo alio attributo essentiali minus communi, nunc sub attributis essentialibus propriis. Ex g. Homo forte antequam definitur, consideratur ut res vivens, sentiens, loquens, ambulans, tali modo figuratam, nomine hominis appellata, at cum definitione explicatur, concipitur ut *animal ratione præditum*.

Patet etiam rem *esse Definitam*, non esse Ens Rationis, ut quidam loquuntur, sed esse rem ut denominatur extrinsece, per actum mentis, quo attributa illius essentialia propria evolvuntur.

Si autem quæras, quid sit rem *esse definibilem*, Dicimus esse denominationem partim intrinsecam, ab aptitudine intrinseca rei ad explicationem subeundam; in qua differt à puris Chimæris, quæ explicari nequeunt. Partim extrinsecam, à virtute mentis nostræ quæ eam explicet.

Quæst. V: *An unius rei plures possunt esse definitiones bonæ?*

Resp. I. *Unius rei secundum partes diversas spectatæ, plures sunt Definitiones.* Ut alia est Definitio corporis humani, alia mentis: & pro partium corporis diversitate, alia est definitio oculi, alia auri, alia carnis, alia ossis. Sed *unius rei quatenus est una*, & ut sic spectatur, *unica est Definitio ejusdem Generis*. Ratio est quia Definitio est explicatio essentiae: Unius autem rei quatenus est una, unica est essentia: quatenus vero plures partes diversas continet, plures etiam essentias complectitur, & idcirco plures definitiones suscipit. Dixi autem unius rei *ut una est*, unicam esse definitionem *eiusdem generis*: Quia eadem res potest diversimode definiri: Definitione scilicet *Physica*, ut loquuntur quæ explicat rem per partes physicas; ut cum homo definitur *corpus organicum, & anima rationalis, cum unione*: vel *Metaphysica*, ut appellant, quæ rem explicat per attributa essentialia: Hæc enim partes *Metaphysicas*, seu *Logicas* vocant. Ut cum homo definitur *animal ratione præditum*.

II. Similiter unius rei, si plures habeat facultates seu perfectiones quæ dissimiles operationes edunt, aut quarum beneficio dissimilia patitur, plures sunt definitiones, licet facultates illæ in re sint una & eadem Entitas. Sic aliter definitur intellectus, aliter voluntas; quæ mentis virtutes sunt: licet non aliter distinctæ sint, quam prout diversas operationes, & passionem respiciunt.

Quæst. VI. *An ulla res à nobis in hoc statu imperfectionis perfecte definiri, seu quidditative, (ut loquuntur scholæ) sciri possit.*

Resp. I. Certum est Definitiones nostras, omnium rerum, multifaria imperfectione laborare. Ut enim perfectam ideam essentiae rei consequamur, requiritur ut omnia quæ ad essentiam ejus pertinent, perspicue intueamur. Quis vero est qui illud de se jure præsumat? Quid enim est in tota rerum Universitate, quod perfectius scimus quam mentem nostram? In hunc tamen usque diem, dubitatur inter Philosophos, sitne extensa per partes, an in puncto indivisibili consistat. Necesse autem est alterum ex his esse de Essentia mentis. Definitor etiam vulgo mens nostra Substantia immaterialis, intelligens; ad societatem corporis organici ordinata. At ut reliqua in illa definitione omitteremus, nemo perfecte definire potest, quid sit intelligere, aut in quo consistat unio illa quam mens cum corpore obtinet, quæ tamen de essentia hominis est.

II. Interim tamen, perfecta definitio censetur, quæ traditur per attributa propria essentialia; adeoque necessario distinguit rem ab omni alia. Eo quod nulla perfectior à nobis fieri possit, aut soleat. Nec enim tota perfectio Essentialis rei unica cogitatione intelligi, aut unica sententia explicari, & exhiberi potest, sed longatius sepius tractationem postulat.

Quæst. VII. *Quanam res possint perfecte definiri? (Perfectione intellige quam in præcedenti quæstione*

one diximus:) *Burgesdicius Instit. Log. lib. 2. cap. 3. ait,*
Quedam natura sua perfectam definitionem respuere: Ut,

1. *Res Infinitas nempe Deum.*
2. *Quæ non habent veram Essentiam; ut Entia Rationis, Res fictas, simulacra rerum privationes.*
3. *Quæ non habent Essentiam perfectam; ut partes, principia rerum, res in fieri.*
4. *Quæ non habent Essentiam per se unam; ut concretæ, aggregatæ, complexæ.*

5. *Quæ non collocantur immediate sub aliquo genere: ut Transcendentia, summa genera & individua: Alia esse quæ licet ex se definitionis perfectæ capacia sint, propter imbecillitatem tamen mentis nostræ, aut propter defectum vocabulorum, perfecte à nobis definiri non posse. Nos salva reverentia viri alioquin docti, & ingeniosi, totam fere hanc doctrinam à veritate alienam censemus. Ideo contradicimus.*

I. *Nihil esse quod natura sua definitionem perfectam respuit, & solam imperfectam admittit. Et idcirco totam difficultatem definiendi, ab imbecillitate mentis nostræ oriri. Ratio est manifesta; quia omnes res, quæ sub conceptum nostrum ullo modo cadunt, aliquam habent essentiam, vel positivam, ut omnia Entia; vel Negativam, & imaginariam, seu fictam, ut non-entia, & figmenta: Si autem Essentia quam habent explicetur, qualiscunque tandem illa sit, definiuntur perfecte, non minus quam aliæ de quibus non quæritur. At res ipsæ impedire nequeunt quominus Essentia quam habent explicetur, si imperfectio mentis nostræ non impediret. Quoad hoc enim res omnes sunt æquales.*

II. *Res Infinita non minus perfecte definiuntur, quam pleraque finitæ; quarum definitio res perfectæ censentur: scilicet esse, in quibus aliquid semper est ultra; vel negative, quæ terminis non concluduntur. Quod autem ad Deum optimum maximum attinet, nulla fere definitio perfectior est quam qua is definitur; nempe*

Ens perfectissimum; vel Ens aeternum, immensum, omnipotens, omniscium, &c. Quo enim plura ex attributis rei essentialibus propriis tenemus, eo rem perfectius percipimus. At nullius rei tot ex attributis istiusmodi percipimus, ac Entis primi. In perfectione tamen illa magna est imperfectio.

III *Quæ non habent veram essentiam, definiri tamen possunt per Essentiam quæ iis per fictionem, tribuitur.* Ut res impossibiles, per definitiones possibilium quas negant. Ex. g. *triangulus circularis est figura ficta seu impossibilis, quæ, in fictione memis, tribus angulis constat, quorum omnes partes laterum aequaliter distant a centro.* Quid reprehendis in illa definitione? Partes se mutuo evertunt. At secus non esset vera & bona. Nemo potest percipere ejusmodi figuram. Judicio & assensu verum est, at apprehensione simplici facile concipitur. *Ficta autem possibili: ut mons aureus, equus alatus, satis perfecte definiuntur, conjungendo ideas rerum actu existentium: ut montis et auri, equi et alati. Res apparentes, ut coloris in Iride, spectra et ejusmodi, definiuntur per ideas rerum quæ esse videntur, seu quas præ se ferunt. Privationes non minus perfecte definiuntur quam habitus quos tollunt. Idea enim privationis consistit in negatione habitus, vel formæ, cum capacitate subjecti ad eum habendum.*

IV. *Quæ imperfectam habent essentiam possunt perfecte definiri, per essentiam quam habent.* Perfecta enim est Definitio quæ explicat essentiam quamcunque, sive perfectam, sive imperfectam. Alioqui quo perfectior est res eo perfectior esset definitio, & vicissim. Ex. g. perfectior esset definitio *mentis*, aut *angeli*, quam *trianguli*, aut *circuli*, quod fallum est. Ratio est, quia perfectio vel imperfectio definitionis oritur, non à conditione objecti, sed à modo quo illud explicatur. Unde tam perfecta est definitio *puncti*, *cujus pars nulla est*, quam *lineæ quæ ex fluxu illius gigni intelligitur.*

V. *Quæ non habent unam essentiam, quæ talia sunt, non quidem unica definitione definiri possunt: ut hoc*

com-

complexum *homo & bestia*. Quæ tamen una per accidens vocantur. (nisi solo conceptu nostro unum quodammodo objectum sint, ut in exemplo proxime dato) possunt unica definitione definiri; nempe per partes, et unionem quam per accidens sortiuntur. Ut *acervus* diversorum corporum, satis perfecte definitur, enumerando corpora illa, et ostendendo quomodo unum acervum conficiunt. Complexa etiam, si per ea intelligamus propositiones in actu exercito, definiri possunt non minus perfecte quam termini simplices. Ex. g. hæc, *Petrus est doctus* si pro rebus significatis accipiatur sic definitur, *alis vel talis homo notitia rerum imbutus*. Si pro oratione vero, definitur, *Enunciatio significans talem hominem esse notitia rerum imbutum*: Pro actu denique mentis definitur, *iudicium in quo esse doctum statuitur convenire Petro*. Possunt igitur complexa definiri, definitione complexa omnium terminorum ex quibus constant. Est præterea maxime hic reprehendendum, quod *concreta* ex ordine definibilium exulare velint. Quis enim neget *justum* recte definitum, qui *fixam* habet propensionem suam cuique reddendi?

VI. Licet verum sit ea quæ non collocantur sub aliquo genere, definiri non posse, scilicet, quia nullo modo concipi possunt, male tamen exemplorum loco, *summa genera et transcendentia* adducuntur, si juxta vulgarem doctrinam accipiantur. *Transcendentia* enim communiter vocant, *rem, aliquid ens, unum, verum, bonum*. Alii, quæcunque sunt communia substantiæ, et accidenti: at ipsi transcendentia definiunt, tum in communi nempe quod omnes ordines rerum transcendant, seu per eos vagantur. Tum in specie: ut cum unum definiunt, quod est indivisum in se et divisum à quovis alio: vel quod non est plura ejusdem rationis cum seipso. Bonum quod alicui conveniens. Sed absurdus negatur Decem summa Genera Aristotelica definiri posse. Peripatetici enim ea non minus perfecte definiunt, quam Genera, & species, quæ sub iis collocant. Annon enim æque perfecta est definitio substantiæ, *Ens vel res per se subsistens*,

ac corporis, quod sit substantia constans materia & forma? Quin prior longe perfectior est, quia terminis constat notioribus. Adde quod nihil prorsus fit, præter terminos communissimos, ut *aliquid, esse, & ejusmodi* quod non continetur sub aliquo genere. Est enim unum Genus omnium Entium, & aliud non Entium. Quin & duo illa Genera continentur sub uno communi, nempe *esse objectum mentis nostra*. Nihil igitur ob defectum generis definiri recusat.

VII. Tandem dicimus non posse definiri.

1. Quæ simplicissima sunt, & pluribus conceptibus explicari nequeunt: qualia sunt *Res & Aliquid*.

2. Quæ jam definitione satis explicantur: Hæc enim ulterius definiri non possunt, nisi velis terminos definitionis novis definitionibus explicare. In quo tamen non licet procedere in infinitum: quia tandem deveniendum est ad terminos per se notos.

3. Illa quæ omnibus per se manifesta sunt, ut nulla definitione egent, ita vix ullam admittunt; quale est *To esse vel existere*. Hæc enim definitionibus obscurantur potius, quam declarantur; Et Mens sapius per definitiones rerum istiusmodi ab idea satis facili, quam sine monitore jam tenet, divertitur, aut in ea contemplanda turbatur.

Quæst. VIII. *An Definitio perfecta, semper tradenda sit per Attributa essentialia intrinseca; puta per Genus, & Differentiam?*

Negat Derodon, sed immerito. Cum enim Definitio perfecta sit explicatio essentiae, hæc autem cuique rei intrinseca sit, cum etiam omne attributum essentialiale, vel sit commune seu Genericum, vel proprium seu differentiale, cum denique attributa essentialia & essentia rei idem sint, necesse est definitionem perfectam constare attributis essentialibus intrinsecis; puta *Genere & Differentia*.

Obijcit

Objicis Derodon. I. *Physica* definitur *Scientia corporum naturalium*. At corpora naturalia non sunt de essentia *Physica*. Hæc enim accidens est, scilicet, habitus acquisitus; illa sunt substantiæ. Ergo multa ponuntur in definitione quæ non sunt de essentia rei.

Resp. Dist. consequ. Multa ponuntur indirecte, & in obliquo, quæ non sunt de essentia rei, verum est. At nihil directe ponitur, hoc est nihil de re affirmatur, quod non est de illius essentia. Ut, in exemplo facto, corporum naturalium mentio fit in Definitione *Physica*: non tamen in ea ponuntur ut illius attributa, sed ut terminus quem respicit. Respectus autem ad illa quem *physica* connotat, est de ejus essentia, & in concreto de ea affirmatur. Cum igitur definitio tradi dicitur per connotata extrinseca, intelligendi, sunt respectus ad illa connotata.

Obj. II. Genus non est ponendum in Definitione: Si enim Genus accipiatur in tota sua extensione, non potest affirmari de specie definienda: ut *animal* in communi, seu prout complectitur hominem & bestiam, affirmari nequit de homine. Si autem accipiatur indefinite, non explicat unam ex speciebus quæ sub ea continentur, magis quam aliam. At definitio debet explicare rem quatenus talis est.

Resp. Genus in definitione accipitur indefinite, & secundum naturam suam. Sic autem explicat aliquid rem definiendam, ostendendo, ex parte quid sit, & cum quibus essentialiter conveniat. Ut si quis demonstrare posset lucem esse substantiam, naturam illius per demonstrationem illam aliquatenus explicaret. Ad probationem dicimus, definitionem integre spectatam, explicare quidem rem, qua talis est: Non tamen necesse est ut istud secundum omnes partes sigillatim præstet: Sed sufficit si omnia attributa in definitione, simul sumpta, propriam rei ideam exhibeant. Deinde Genus, licet,

per se, non magis explicet unam ex suis speciebus, quam aliam cum differentia tamen aliquid rei definitæ proprium exhibet. Ut *animal*, cum *ratione præditum*, aliquid homini proprium denotat; nempe illam virtutem sentiendi, quæ cum ratione conjuncta est. Hæc autem hominis propria est. Differentia enim Genus restringit, & uni speciei appropriat.

Adde quod Differentia sine genere in definitione consistere nequeat. Semper enim concipitur Differentia ad modum rei adjacentis: & idcirco requirit aliquid per se stans, cui adiaceat. Nec per differentiam sine omni Genere declaratur quid res sit, sed qualis sit. Nemo enim audiens hanc propositionem, *Homo est ratione præditus*, (etiam ex hypothese quod nihil aliud ratione præditum foret) intelligeret definitionem hominis à loquente designari.

Inst. At satis recte definitur homo, *aliquid ratione præditum*.

Resp. I. Illud *aliquid* est Attributum Genericum. Non igitur sic definitur sine Genere.

II. Cum illud *aliquid* sit communissimum, minus recte se habet ista Definitio, quam si pro eo assumeretur attributum commune minoris extensionis. Quo enim minoris extensionis est Attributum Genericum, eo clarius percipitur natura rei definiendæ. Unde recte docent Logici, in definitione sumendum esse Genus proximum, si inveniri possit.

Quæst. IX. An divisio sit modus sciendi à definitione diversus? Hic nulla est controversia: & idcirco sufficiet breviter hæc notasse.

I. Divisio est modus seu instrumentum sciendi. Quia res à se invicem distinguit, materiam definiendi, & ratiocinandi proponit, & quotuplex res sit, hoc est quot sint illius partes, ordines, & species, ostendit.

Adeoque aliquo modo res explicat. Ut cum dividimus *animal* in *rationale* & *irrationale*, aut *homines* in
doctos.

doctos, & rudēs, percipimus, & ostendimus animal tale esse ut societatem rationis, ejusve carentiam partiat; naturam Humanam scientiam vel ignorantiam admittere. Ostendit igitur divisio qualis res sit.

II. *Divisio est modus sciendi à Definitione diversus.* Ratio est quia aliud Definitio, aliud Divisio, de re re cognoscenda notificat. Prior enim ostendit quid res sit, & Attributa ejus essentialia proponit; posterior ostendit quoruplex sit, & quot species seu ordines in se, vel sub se contineat.

Obj. In Definitione partes rei Essentiales *Metaphysica* notantur, ut *animal & Rationale* in Definitione hominis. At partes rei notare & distinguere, idem est ac dividere.

Resp. Partes physicas & proprie dictas notare, idem est ac dividere: non autem illas notare, quæ analogice tantum partes sunt: quales partes sunt Genus, & Differentia, in Definitione. Hæc enim non sunt partes propriæ, sed attributa, seu perfectiones rei. Deinde illa Distinctio partium qua essentia rei explicatur, seu resolvitur, non vocatur divisio, sed definitio.

III. Partitio etiam, in qua partes essentialis physicae distinguuntur, est modus sciendi diversus à Definitione quæ physica vocatur. In priori enim solæ partes notantur; ut cum dicimus, *partes hominis sunt corpus & mens.* In posteriori unio etiam notatur: ut cum hominem definimus, *Substantiam compositam ex mente & corpore.* Unde Definitio plus dicit quam partitio. Et verum est dicere, *Partes hominis sunt mens & corpus,* quæ est partitio, At nec verum est *hominem esse corpus & mentem.* Siquidem possunt existere corpus & mens post mortem, homine non existente.) Nec si verum esset bonam definitionem conficeret, quia totam essentiam definiti non exhaurit.

Hæc

Hæc enim includit etiam Unionem. Si excipiat quis, dividi posse rem in partes & Unionem. Ut si dicamus, *Homo est mens & corpus cum unionem*, sic autem Definitio & Partitio idem erunt.

Resp. Distinctionem partium & unionis non esse partitionem; quia Partitio solas partes distinguit. Unio autem non est pars, sed modus Partium.

IV. *Differt etiam Distributio à Descriptione.* Distributio enim proponit plures res: ut cum subjectum distribuitur per adjuncta, adjuncta per subjecta, causæ per effecta, & effecta per causas. At Descriptio qua talis, solum proponit plura attributa accidentalibus ejusdem rei, cum quibusdam interdum essentialibus communibus. Interim tamen, ut supra monuimus, omnis Divisio, Partitio, & Distributio, rem divisam, partitam & distributam, aliquatenus describit.

DISPUTATIO XXV.

De Syllogismo in Genere.

Quæst. I. **A**N Syllogismus formaliter includat plura judicia, an in solis præmissis, aut in sola conclusione, consistat? Multum hic variant sententiæ. Alii enim in solis præmissis Syllogismum consistere volunt: Alii in sola conclusione, inter quos *Comptonus*. Alii in præmissis & conclusione simul, ut *Hurtado*, & *Arriaga*.

Thef. I. *Tota Natura seu Essentia Syllogismi nec continetur in præmissis, nec in conclusione, sed in præmissis & conclusione simul.*

Probatur,

Probatur, 1. Quia Syllogismus est progressus mentis ab uno iudicio ad aliud: At progressus iste essentialiter includit terminum à quo, qui in præmissis consistit, & terminum ad quem, qui est conclusio.

2. Quia nec præmissæ sine conclusione, nec conclusio sine præmissis, est modus sciendi discursivus. Nec enim hæc, nec illæ, seorsim, ignotam veritatem, per aliam notioem, manifestant, sed ambæ simul.

3. Artificium Syllogismi non consistit in sola conclusione, aut in modo eam inferendi, sed etiam in dispositione præmissarum.

4. Syllogismus est compositum quid: cujus materia, adæquate spectata, præmissas & conclusionem continet: Forma vero consistit in consequentia conclusionis ex præmissis. Hæc autem & præmissas & conclusionem, ut materiam adæquatam afficit. Consequentia enim tum vim illativam præmissarum, tum dependentiam conclusionis, quoad evidentiam, à præmissis, denotat. Omnia igitur ista tria, præmissæ, conclusio, & consequentia, Syllogismo intrinseca sunt, & Essentialia.

Qui Syllogismum in solis præmissis constituunt, *Obiiciunt*, I. Syllogismus parit Scientiam, opinionem, vel fidem. At conclusio nullam ex his parit, sed est ipsa Scientia, Opinio vel Fides, quam pariunt præmissæ. Solæ igitur præmissæ sunt Syllogismus: & conclusio non est pars syllogismi, sed effectus.

Resp. Syllogismus dicitur parere Scientiam, Opinionem, vel Fidem, per denominationem ex altera illius parte, nempe inferente, seu ex præmissis, desumptam. Ut Homo intelligere dicitur, eò quod mens intelligit.

Obj. II Remota conclusione, præmissæ manent in aliquo modo, & Figura. Syllogismus igitur consistit in solis præmissis.

Resp.

Resp. I. Remota conclusione, præmissæ sunt in modo & figura, incomplete, seu quatenus modus & figura illas afficiunt: sed non complete. Ad hoc enim requiritur, ut conclusio inferatur; ut majus extremum in ea de minore prædicetur; ut nihil sit in illa quod non fuit in præmissis, et ne medium eam ingrediatur.

II. Remota conclusione, præmissæ non faciunt scire. Non igitur sunt syllogismus.

Obj. III. Conclusio nec est Materia Syllogismi (Materia enim sunt tres termini, et duæ præmissæ): Nec forma; quia hæc in modo & figura consistit. Modus autem & figura est dispositio medii termini cum extremis, quæ in solis præmissis locum habet. Medium enim non ingreditur conclusionem.

Resp. Conclusio est pars materiæ Syllogismi: Adeoque forma ex parte illam afficit, scilicet quatenus forma in modo consistit, ut supra ostensum est.

Qui Syllogismum in sola conclusione situm esse contendunt, sic obijciunt.

I. Syllogismus est cognitio unius veritatis per & post aliam, ut ait Aquinas. Aristoteles etiam 1 Poster. cap. I. ait, omnem cognitionem Dianoeticam, id est, discursivam, ex præexistente esse cognitione. At Syllogismus consistit in cognitione illa Dianoetica, quæ habetur per & post aliam, seu dependenter ab alia: Hæc autem est ipsa conclusio.

Resp. Disting. Anteced. Syllogismus ex parte est cognitio unius veritatis, per & post aliam, & ex præexistente oritur cognitione, nempe ratione conclusionis: Non autem secundum se totam. Sic enim est Aggregatum ex præmissis inferentibus, & conclusione illata. Unde non minus verum est, esse cognitionem inferentem, quam illatam. Dicitur autem autem cognitio illata, vel deducta, quia conclusio præcipue, & quasi propter se, intenditur; & propter eam intenduntur præmissæ.

Obj.

Obj. II. Syllogismus est simplex qualitas. Non igitur triplicem actum iudicii continet, sed unum tantum, qui est de conclusione.

Resp. Syllogismum esse simplicem qualitatem temere dicitur. Et longe evidentius est, esse complexum quid. extrinso iudicio, duplici inferente, & uno illato.

Obj. III. Si syllogismus non consistit in sola conclusione, quatuor erunt modi sciendi; *Definitio, Divisio, Conclusio* syllogismi, & *aggregatum ex præmissis & conclusione*. Est enim conclusio syllogismi modus sciendi, quia manifestat ignotum, id scilicet quod obscure continebatur in præmissis. Et ex sententia nostra, aggregatum ex præmissis & conclusione est modus sciendi, quia est ipse syllogismus. Sic *Comptonus*, contra gravitatem tanti viri.

Resp. I. Retorquendo Argumentum. Præmissæ multo magis sunt modus seu medium sciendi, quam conclusio. Illæ enim efficienter manifestant ignotum, nempe veritatem conclusionis prius absconditæ. Hæc autem formaliter tantum ignotum manifestat. Si igitur Syllogismus in sola conclusione consistit, quatuor erunt modi sciendi.

II. Utrunque igitur dicendum est, præmissas & conclusionem simul, unum modum sciendi conficere. Nec enim præmissæ sine conclusione, nec conclusio sine præmissis, ignotum discursive manifestant.

Obj. IV. Syllogismus dicitur à *sylogízesthai*. quæ vox significat plurium rationum summam colligere, ut in Arithmetica fit. Quæ enim sparsa sunt in præmissis, in unum colligit. Hoc autem præstat per solam conclusionem.

Resp. Nihil sequitur, nisi Syllogismum ita vocari à præcipua sui parte, per Synecdochen. Quemadmodum *Homo* dicitur ab *Humo*, (ut multi volunt) licet præter corpus, mentem essentialiter includat. Absolute enim, ut *Operatio Additionis* in Arithmetica,

tica, non tantum in summa conficienda consistit, sed etiam in numerorum observatione, ex quibus illa conficitur, ita etiam Syllogismus in assensu, non tantum præmissarum, sed etiam conclusionis.

Quæst. II. *An mens per assensum præmissarum, necessario determinetur, ad assensum conclusionis, ita ut non possit ei non assentiri?*

Resp. Hic nulla fere est controversia. Sed ad naturam discursus perfectius intelligendam, utilis est Quæstionis ventilatio.

Thef. 1. *Intellectus, si semel assentiat præmissis & consequentia videatur satis bona, determinatur ad assentiendum conclusioni, quoad speciem actus, seu specificative: Hoc est ita, ut si ullum actum iudicii, vi assensus præmissarum, eliciat, necessario sit actus assensus, contrarium autem actum elicere nequeat, nempe dissensum. Ut si assentiat his præmissis, omne curvens movetur; Petrus nunc currit, si ullum actum iudicii ex iis eliciat, non potest esse alius quam hic; Ergo Petrus nunc movetur. Ratio est quia conclusio continetur in præmissis, ut effectus in causa: & præmissæ eam intellectui exhibent; Intellectus autem non potest dissentiri veritati evidenter propositæ.*

Obj. Possumus, si ita velimus, sic arguere, *Petrus currit, ergo non movetur.* Sic enim nunc arguo. Et Phrenetici ac ideotæ quidlibet inferunt ex quolibet.

Resp. Possumus, voce tenus, sic arguere, non etiam mente. Phrenetici autem quidlibet inferunt ex quolibet, non per discursum, aut vi illativa præmissarum, sed ex mente & phantasia turbata, & vitiata, huc illuc cursitante.

Inst. Cum sic arguo, *Petrus currit, ergo non movetur; vel, ergo baculus est in angulo,* intelligo quid dico. Ergo mente sic arguo.

Resp. Intelligo simplici apprehensione, conclusionem

onem & significationes vocum : sed non iudicio. Id est non assentior conclusioni propter illud antecedens, ejusve assensum.

Thef. II. Per Assensum præmissarum intellectus non ita determinatur ad assensum conclusionis, quoad exercitium, quin possit. eum suspendere.

1. Quia impedimenta quædam intervenire possunt quibus intellectus, postquam assensum præbuit præmissis, diverti possit à conclusione inferenda. Ut si sensum externum, objectum aliquod vehementius feriat, aut affectus aliquis, iræ, timoris, doloris, &c. subito oboriatur, aut phantasia alio vehementius abripiatur.

2. Potest is qui præmissas admittere cogitur, ita esse affectus, ut nolit ad consequentiam attendere, & conclusioni assentiri : scilicet, si consilio, & studio suo, directe adversari videatur.

3. Potest etiam conclusio esse in se paradoxa, & miranda, aut opinioni alicui præ conceptæ, & radicatæ, contraria ; ut intellectus non statim ei assentiri possit.

4. Fieri etiam potest, ut qui præmissis assentitur, de consequentia conclusionis dubitet. Dubitatio autem ista assensum conclusionis necessario impedit.

Thef. III. Sed posito assensu præmissarum, si quis bonitatem consequentia primo intuitu percipere possit, & nihil adsit impediendi, ad intra, vel ad extra, intellectus non potest assensum conclusionis suspendere.

Patet, Quia intellectus in eo casu agit ad modum causæ naturalis, quæ positis requisitis ad agendum, semper agit, si nihil impediat. Et certe si in casu facto, quidquam impedire possit ne intellectus conclusioni assentiat, illud maxime esset voluntas. At voluntas impedire nequit : hæc enim nihil impedire potest intellectui nisi sub ratione boni apparentis. At manifestæ veritati non assentiri, aut dissentire,

sentire, non potest induere speciem boni.

Obj. I. Voluntas habet potestatem *despoticam*, ut loquuntur, in intellectum, sicut in omnes fere alias potentias hominis. Ergo, posito licet assensu præmissarum, potest ei imperare, ne conclusioni assentiatur.

Resp. Voluntas potestatem illam non in omni casu exercet. Et exercere nequit in casu facto. Nulla enim est ratio quæ eam inducat ut faciat. Sicut non potest imperare oculis ne videant objectum propositum, aut ne intellectus de eo omnino cogitet, sed ad summum oculos claudere, aut cogitationem aliud vertere, &c.

Obj. II. Potest quis pro libitu, ex iisdem præmissis, conclusionem elicere, vel directam, vel indirectam, Universalem, vel particularem. Præmissæ enim, plures istiusmodi conclusiones virtute continent. Ergo saltem non determinatur intellectus, per assensum præmissarum, ad unam ex his conclusionibus inferendam, magis quam aliam.

Resp. Intellectus per assensum præmissarum, primo & immediate determinatur ad conclusionem directam, & Universalem. si hæc ex præmissis natura sua sequatur, & non nisi his mediantibus, indirectam & particularem elicere potest.

Obj. III. Præmissæ probabiles, cum non sunt causæ necessariae, non possint intellectum necessario trahere ad assensum conclusionis.

Resp. Non possunt eum necessario trahere ad assensum scientificum, & omnino certum, esto: ad probabilem, & opinativum, nego. Omnes enim præmissæ ritè dispositæ necessitant ad conclusionem illo gradu certitudinis inferendam quem ipsæ cum habent.

Obj. IV. Datur Habitus facilitans intellectum ad assensum conclusionis. Per illam igitur determinatur, non autem per assensum præmissarum.

Resp.

Resp. I. Non necessarius est habitus conclusio-
nis inferendæ ab habitu assentiendi præmissis diver-
sus.

II. Et si esset, non determinaret intellectum ad
assensum, nisi extra Syllogismum.

Obj. V. Voluntas determinat alias potentias, pu-
ta Locomotivam, & affectus, ad suas operationes.
Ergo etiam intellectum.

Resp. Dispar est ratio: quia potentia reliquæ
sunt cæcæ: & idcirco ratione & voluntate indigent,
quibus determinentur ad suos actus. At intellectus
est potentia cognoscitiva; & potest per unum ali-
quem actum seipsum ad alium determinare; ut &
sepiissime facit.

Quæst. III. An ex unica præmissa ulla conclusio inferri
possit?

Resp. Negative. Quia inferre conclusionem est,
vi connexionis medii termini cum extremis, colligere
alterum horum alteri convenire, vel non con-
venire. Ad hoc autem necesse est, ut medium cum
utroque extremo conferatur. Quæ collatio duas pro-
positiones constituit.

Obj. I. Ex hoc antecedente, *Judas qui fuit Aposto-
lus, prodidit Dominum suum*, recte inferitur; ergo ali-
quis qui prodidit Dominum suum, fuit Apostolus.

Resp. Antecedens istud duas propositiones conti-
net; nempe *Judas fuit Apostolus, Judas prodidit Domi-
num suum*.

Obj. II. Cum una propositio ex alia elicitor per
conversionem, ut *Omnis avarus eget*; Ergo *quidam e-
gens est avarus*. Ex una præmissa inferitur conclu-
sio.

Resp. Ex una quidem expressa, sed alia subintel-
lecta. Non enim in exemplo dato, sequitur con-
clusio ex antecedente, nisi vi tertiæ propositionis,
quæ subintelligitur, hujus scilicet, *si omnis avarus eget,
quidam egens est avarus*.

Hinc vides, in omni Syllogismo categorico, tres terminos simplices esse necessarios; sed in Hypo-thetico sufficere duos, ut in proximo exemplo.

Quæst. IV. An in eo instanti, quo intellectus assentitur conclusioni, requiritur ut actu intueatur utramq; ex præmissis? Ad hanc difficultatem enodandam, sit

Thef. I. Prima vice qua conclusio infertur ex præmissis, necesse est ut eo ipso instanti, mens intueatur utramq; præmissarum, usq; assentiatur.

Patet; Quia præmissæ sunt causæ objectivæ assensus qui conclusioni adhibetur. Ejusmodi autem causæ non influunt in effectum, nisi cum actu cognoscuntur, seu ut actu objiciuntur cognitioni.

Thef. II. Postquam mens ex præmissis conclusionem intulit, potest assensus illius ab ea exerceri, & facultas, vel proensio, ad ei assentiendum, in ea manere, sine expressa, & clara intuitione præmissarum. Ut cum quis, rationatione aliqua confecta, meminit conclusionis, sed præmissarum oblitus est, & solum recordatur se habuisse præmissas ex quibus conclusio evidenter sequeretur. Ex.g. potest quis assensum propositionis alicujus Geometricæ retinere, eo quod meminit eam sibi ab Euclide evidenter fuisse demonstratam: licet quænam, in particulari, præmissæ fuerint, non recordetur. In quo casu reminiscencia demonstrationis præteritæ, vicem supplet assensus præmissarum expressi, & actualis.

Si excipias, Mentem non posse assentiri conclusioni, vi præmissarum, nisi videat eam in præmissis contineri: quod fieri nequit, ubi earum penitus oblita est. Nullam enim tunc evidentiam habet, qua determinetur ad assentiendum conclusioni.

Resp. Neg. Anteced. quia recordatio confusa, quam diximus, potest mentem ad assensum satis firmum inducere. Ad probationem dicimus, intellectum esse certum, de multis veritatibus, de quibus non habet evidentiam; ut in assensu fidei patet.

Item

Item in actibus scientiæ, cum oblivio rationis in particulari obrepit. Sufficit enim si meminerit se rationem evidentem habuisse.

Thef. III. *Quin potest mens assensum conclusionis prius demonstratæ, aut probatæ, renovare, absque ulla contemplatione actuali rationis qua fuit probata, sive clara, sive confusa, & generali.*

Patet; Quia verisimile non est, cum quis cogitat aut loquitur de Mysteriis Fidei Christianæ, cum semper actu cogitare de Testimonio divino cui hæc innituntur: multo minus ut locos Scripturæ in quibus proponuntur, actu & expresse intueatur. Ratio à priori est, quia intellectus, postquam conclusioni assensum dedit, ob rationem satis manifestam, habitum quendam acquirit ei assentiendi, quoties de ea cogitat; per quem veritas, radices quasi, in mente egit, aut proclivitatem, ad assensum, ipsi im- pressit.

Hinc apparet falsum esse quod asserit *Comptonius*, Disp. Log. 47. Sect. 6. *Conclusionem ne divinitus quidem esse, vel reproduci posse, sine præmissis actu in mente existentibus.* Naturaliter enim sæpe est in intellectu sine præmissis, ut ostendimus. Licet mens semper parata sit rationem aliquam reddere (vel in specie, vel in genere), cur ei assensum præbeat.

Obj. Omnis assensus vel est mediatus, vel immediatus. At assensus conclusionis, sine ullo intuitu præmissarum, non est mediatus. Ergo est immediatus: nec proinde conclusio est, sed principium.

Resp. Assensus conclusioni datus, sine omni intuitu præmissarum, sive in eo instanti quo mens conclusioni assentitur, sive in aliquo priori, est immediatus. Non tamen qui conclusioni datur, sine intuitu præmissarum de præsentī. Sufficit enim quod mens præmissas habuit de præterito. Est igitur assensus istiusmodi, assensui immediato partim similis;

D d 2 quatenus

quatenus sine discursu de præsentī elicitur; partim dissimilis, quia per discursum prius eliciebatur; & in virtute illius reproducitur, seu repetitur. Discursus enim diu ante factus, mentem ita afficere potest, ut determinata maneat ad assensum conclusionis longo post tempore repetendum, sine intuitionē actuali argumenti quo primo productus est.

Quæst. V. *An Assensus conclusionis intrinsece differat ab assensu præmissarum.* Affirmat *Arriaga*, *Log. disp.* 14. n. 24. Nos contra statuimus. Sed loquimur de conclusione quatenus est conclusio. Nam quatenus est propositio quædam, objectum repræsentat diversum, saltem inadæquare, ab objecto præmissarum ex quibus deducitur: Et sic quidem intrinsece differt à præmissis.

Probatur. Quia eadem propositio quæ nunc est conclusio, potuit non esse conclusio, sed præmissa. Seu idem actus iudicii, qui de facto est illatus, potuit esse actus inferens. Per aliquid igitur accidentale, & extrinsecum, est conclusio, seu actus deductus. Ratio à priori est, quia actum mentis esse conclusionem, nihil aliud est quam elici dependenter ab aliis, præcedaneis, qui sunt præmissæ. At elici dependenter, ab aliis, est tantum elici ab intellectu præparato, & determinato, per alios, ad eum eliciendum. Hoc autem extrinsecum est, & accidentale actui qui elicitur, quod mens prius elicit alios, & per illos dispositus, & determinatus fuerit, ad illum eliciendum.

Objicit *Arriaga*. Si conclusio non differret intrinsece ab assensu præmissarum, multi essent Syllogismi in quibus dici non posset quis actus de facto esset conclusio. Ex. g. illi in quibus conclusio potest esse una ex præmissis, & una ex præmissis potest esse conclusio. Ut in hoc, *Petrus est Rex, hic homo est Petrus, Ergo hic homo est Rex.* potest conclusio assumi pro altera præmissarum, & altera præmissarum pro conclusione, hoc modo, *Hic homo est Rex, Hic homo est Petrus, Ergo Petrus est Rex.*

Resp.

Resp. Illa semper est conclusio quæ ex aliis præcedaneis deducitur.

Replicat. Hanc esse difficultatem quid sit unam inferri ex alia : quandoquidem nulla est Entitas physica, aut modus in quo ista illatio unius ex alia consistat.

Resp. Inferri ex alia nulla quidem est Entitas physica : Est tamen Relatio quædam dependentiæ ab actibus præviis, seu processionis à mente per eos determinata.

Quæst. VI. An Conclusio attingat objectum præmissarum ? Multi affirmant, quibus subscribit *Arriaga, Disp. Log. 14. N. 30.* Dicunt enim mentem, cum actum conclusionis elicit, assentiri non tantum identitati, vel diversitati extremorum, sed etiam connexioni eorum cum medio : adeoque attingere rationem motivam ; vel ad modum propositionis conditionalis, ut quidam volunt : ex. g. cum ex his præmissis, *Omne currens movetur, Petrus currit*, insertur *Ergo Petrus movetur*, sensum esse, *Si omne currens movetur, & Petrus currit, Petrus movetur.* Vel ad modum propositionis causalis, *quia omne currens movetur, & Petrus currit, Petrus movetur.* Potest etiam in hac quæstione, esse alia sententia ; scilicet præmissas attingi in conclusione, non per iudicium, sed per solam apprehensionem simplicem. Sensum enim quendam connexionis medii cum extremis manere in mente, & hunc ad conclusionem spectare, ut aliquam illius partem, & quidem distinctivam per quam ab aliis actibus iudicii essentialiter differt. Alii contra affirmant actum conclusionis non attingere rationem motivam cur mens ipsi assentitur, sed solam habitudinem extremorum inter se : licet id faciat dependenter ab assensu prævio præmissarum. Conceditur utrinque aliquam partem objecti præmissarum attingi per actum conclusionis, nempe terminos simplices, seu extrema quorum alterum de altero concluditur. Hæc enim sunt pars quædam objecti præmissarum. Et attinguntur, tum in præmissis, tum

in conclusione, per simplicem Apprehensionem, tanquam objectum commune. Sed quæstio est de objecto præmissarum proprio, nempe connexionem medii cum extremis. In qua fit

Thef. Negans. Conclusio non attingit objectum præmissarum complexum, aut Totale: seu non continet in se Rationem motivam propter quam Mens ei assentitur. Rationes sunt.

I. Quia superflua est Repetitio præmissarum in conclusione. Ad hanc enim inferendam sufficit assensum earum in mente præcessisse, præsertim immediate; aut etiamnum in ea perseverare. Siquidem, per assensum præmissarum semel datum, mens sufficienter illuminatur, ad habitudinem extremorum agnoscendam. Certe concludimus, cum post assensum præmissarum, assentimur alicui propositioni quæ ex illis necessario sequitur, licet earum assensum minime iteremus.

Frustra hic respondet Arriaga, "Non posse ex præmissis elici actum quo mens non assentiat" "objecto præmissarum; quia per præmissas proponuntur intellectui Extrema conclusionis unita cum uno medio, clare, & evidenter. Unde non potest intellectus illi non assentiri. Licet enim mens assentiri nequeat conclusioni ut conclusio est, nisi præextiterit in ea assensus præmissarum, (& hoc solum probat ratio Autoris), facile tamen potest assentiri, de identitate aut diversitate extremorum inter se, dependenter ab assensu præmissarum, licet assensum illarum non renover. Potest enim mens retinere assensum conclusionis, cum casu aliquo de præmissis non cogitat, aut earum oblita est.

II. Si conclusio continet Assensum præmissarum, sequeretur totum Syllogismum in ea contineri. Tum autem superflue essent præmissæ, quod absurdum est.

Respondet Arriaga, "Intellectum procedere paulatim,

latum, à minoribus ad maiora, à notioribus ad ignotiora. Unde à Præmissis incipit, ut obtineat conclusionem, quæ aliquid amplius continet. Vera quidem ista: sed Argumentum nostrum non tangunt. Quia si ipsa conclusio Præmissas, seu earum assensum, continet, ut volunt Adversarii, intellectus in illa sic procederet ut in Responsione dicitur: Ut & sine repetitione præmissarum, sic procedit. Confirmatur Argumentum sic. Totus Syllogismus consistit in assensu præmissarum, & conclusionis. At utrumq; juxta Adversarios habetur in conclusione. Ergo, juxta eos, Totus Syllogismus in conclusione habetur. Vel sic Syllogismus affirmans perfecte conficitur, cum extrema cernuntur esse eadem inter se, quia observantur esse eadem uni tertio: at totum hoc in conclusione præstatur, si vera est Adversariorum sententia. Supervacaneæ igitur sunt præmissæ, nisi in quantum conclusio eas continet.

Alii aliis rationibus utuntur quæ non concludunt. Ut ex sententia opposita, *Medium ingredi conclusionem.* Item ex veris præmissis sequi conclusionem falsam, ut si ex his præmissis *Omnis homo est substantia. Petrus est homo,* conclusio quæ sequitur sit, *quia omnis homo est substantia, & Petrus est homo, Petrus est substantia:* Hæc enim est falsa propositio causalis. Petrus enim non ideo est substantia quia est homo: Cum posset substantia esse, licet non esset homo, sed bestia, vel lapis. Hæc inquam non urgent. Quia dicent Adversarii, ad priorem quidem, medium abesse debere ab ea sola parte conclusionis, in qua alterum extremum de altero concluditur, non autem ab illa in qua ratio motiva attingitur. Ad posteriorem vero dicent, conclusionem non semper contineri in ejusmodi propositione causalis, in qua una pars reddit causam alterius, sed sæpius in illa in qua una pars reddit rationem cur altera agnoscenda sit; ut in exemplo adducto.

Obj. I. Electio mediorum intrinsece attingit finem.

Ut cum quis propter sanitatem vult medicamentis uti. Ergo etiam actus conclusionis, intrinsece attingit præmissas. Quemadmodum enim se habent media ad finem; ita se habet conclusio ad præmissas. Hoc est, sicut media expetuntur propter finem; ita conclusio agnoscitur propter præmissas. Huic Argumento diffidit Arriaga: quia dispar est ratio conclusionis & mediorum. Hæc enim nullam habent experibilitatem propter se, sed tantum propter finem: Conclusio vero per se cognoscibilis est: sed hæc ratio nihili est. Quia sicut media quatenus sunt media non sunt experenda, nisi propter finem, ita neque conclusio quatenus est conclusio, seu propositio deducta, cognoscibilis est, nisi per & propter præmissas. Loquitur autem objecto, de mediis, quatenus sunt media, & de conclusione, quatenus est conclusio.

Aliter igitur respondendum est, negando Electionem mediorum intrinsece attingere finem. Sic enim esset simul *Electio & Intentio*. Verum tantum est Electionem mediorum conjunctum habere, in voluntate, alium actum, per quem amatur, & intenditur Finis. Et similiter assensus conclusionis conjunctum habet, in intellectu, alium actum, per quem assensus præbetur præmissis, vel explicite, vel confuse. Et sicut Electio medii respectum dicit ad intentionem Finis, ut ad causam quæ disponit ad ea eligenda ita etiam assensus conclusionis respectum dicit ad assensum præmissarum, tanquam ad Causam quæ disponit ad veritatem illius agnoscendam. Sicut denique Finis ipse est Causa procatactica actus per quem eliguntur media, ita etiam lumen præmissarum est causa motiva seu inductiva assensus conclusionis. Non autem necesse est ut Effectus intrinsece complectatur suam causam.

Obj II. Si hic actus *credo fuisse Abrahamum*, eo quod Deus qui verax est, ita testatur, revelatio-

ne nititur, ut ratione motiva, utique rationem illam intrinsece attingit. Secus enim non esset actus Fidei Divinæ, magis quam si niteretur Testimonio Humano.

Resp. Negamus connexionem. Potest enim niti ratione motivâ quam intrinsece non attingit. Nam actus ideo hac vel illa ratione niti dicitur, quia nititur alio actu qui rationem illam intrinsece attingit. Sic sufficit actum quo credimus Abrahamum fuisse, esse actum Fidei consequenter, (immediate enim non est actus Fidei, præsertim divinæ) quia intellectus determinatur & inducitur ad eum eliciendum, per actum prævium, qui est immediate & per se actus fidei: Sicut effectus dicitur supernaturalis, quia procedit à causa supernaturali, aut saltem supernaturaliter agente.

Obj. III. Conclusio est intrinsece conclusio, & aliquid speciale, per eam, cognoscitur, ut notæ & phrasæ illativæ, *Ergo igitur, iacirco, propterea, ob hanc rationem, hinc infertur*, & similes, denotant. Hoc autem speciale quod per eam cognoscitur, non potest esse aliud quam objectum præmissarum. Confirmatur. Non possumus inferre conclusionem, nisi per notas illas. At si per eam objectum præmissarum non attingeretur, facile possemus sine illis eam inferre.

Resp. I. Conclusio potest esse intrinsece conclusio, licet objectum præmissarum intrinsece non attingat, sed tantum ab assensu earum prævio pendeat. Ut filius potest dici intrinsece filius, nempe quia filius, ex eo tantum quid sit ab alio qui est Pater, licet eum intrinsece non complectatur, sed tantum extrinsece connotet.

II. Nihil speciale per conclusionem cognoscitur quod non cognoscitur per præmissas. Eademque propositio quæ nunc est conclusio, potest in alio Syllogismo esse præmissa.

III. No-

III. Notæ Illativæ nihil contra nos conficiunt. Quia solum denotant conclusionem ex præmissis innotescere seu assensum illius ex harum assensu pendere. Per illum enim intellectus dicit, *Propter rationem quam nunc intueor, aut jam intuitus sum, video hoc vel illud ita esse.* Ex quo neutiquam sequitur intuitionem rationis motivæ esse partem actus per quem inferitur conclusio.

IV. Non possumus quidem sine notis istiusmodi inferre conclusionem sermone externo; ita ut audiens percipiat nos illam inferre: At de sermone interno non constat. Satis enim est, ut Mente inferamus, si una veritate agnita, aliam ex ea pendentem, seu cum ea connexam, agnoscamus. Et si de actu interno constaret, non sequeretur illum attingere rationem motivam, sed tantum ex alio actu pendere per quem hæc attingitur.

Obj. IV. Assensus conclusionis esset Assensui Principiorum similis.

Resp. Nihil minus. Quia assensus principiorum elicitur independenter à iudicio præcedaneo; assensus conclusionis non ita.

Obj. V. Intellectus dum discurret, nititur illi principio *quæ sunt eadem uni tertio &c.* Ergo illud cognoscit. Sic autem cognoscit seu attingit objectum præmissarum.

Resp. Totum conceditur. Intellectus enim dum discurret principio illi innititur, quatenus illud agnoscit in præmissis, (licet plerumque in actu exercito tantum) indeque in conclusione statuit de extremis. Sed per ipsum actum conclusionis principium illud cognosci, est id quod queritur.

Obj. VI. Si rogetur quis, cur assentiatur huic aut illi propositioni, modo non sit ei per se nota, respondebit quia ita se habent præmissæ. Ergo.

Resp. Nihil sequitur contra nos. Solum enim probat eum qui assentitur conclusioni alicui, vel in-

tueri,

tueri, vel intuitum fuisse rationem quæ ad assensum illum inducit; & sensum quendam rationis istius mente retinere. Sed non probat eum per unum & eundem actum, tum rationi motivæ, tum propositioni quæ cum ea connectitur, assentiri. Satis enim possibile est, ut per diversos actus huic & illi assentiatur.

Quæst. VII. *An possit esse Syllogismus ex præmissis aperte falsis.* Dico autem ex aperte falsis; Quia dubium non est, quin aliquando fiant syllogismi, ex altera vel etiam utraque præmissa quæ falsa sit, modo appareat esse vera.

Resp. I. *Potest esse Syllogismus quoad formam Logicam, ex præmissis aperte falsis.* In his enim dispositio terminorum & propositionum potest esse legitima, seu regularis. Ut in hoc Syllogismo *Omnis homo est arbor, Omnis equus est homo, ergo omnis equus est arbor.*

II. *Ex præmissis aperte falsis, nisi supponantur pro veris, nequit esse syllogismus utilis, aut qui officio suo fungatur.* Ratio est quia finis & officium Syllogismi est, mentem per evidentiam præmissarum ad assensum conclusionis inducere. At ubi præmissæ sunt aperte falsæ, nec supponuntur pro veris, non possunt mentem ad assensum conclusionis inducere. Tunc enim mens plane dissentit à præmissis. Adeoque necesse est ut dissentiat etiam conclusioni quæ ex illis sequitur; Atqui finis Syllogismi est ut verum inveniatur, aut confirmetur. Dicimus autem *nisi præmissæ supponantur pro veris*: tunc enim est Syllogismus ducens ad incommodum, ut vocatur: Cum scilicet arguimus ex falsis principiis adversarii, quæ is pro veris amplectitur. Sicut & ex falsis præmissis, ex suppositione quod essent veræ, vera conclusio inferri potest.

Quæst. VIII. *An. ad assensum conclusionis eliciendum, opus sit ut mens percipiat consequentiam esse bonam?*

Resp.

Resp. Non necesse est ut respiciat ad ullam regulam Logicam quæ bonas consequentias à vitiosis distinguit. Multi enim qui regulas non tenent, satis firmiter assentiuntur conclusionibus. Sed sufficit si videat connexionem extremorum cum medio, in materia particulari. Ex. g. ut quis ex hoc antecedente, *Petrus currit*, inferat *ergo Petrus movetur*, non necesse est ut videat Syllogismum esse in Darii, in quo consequentia semper bona est: Aut ut teneat regulam, à specie ad Genus valet consequentia affirmativa: seu posita specie ponitur Genus; sed tantum ut videat motum in Idea Cursus necessario contineri.

DISPUTATIO XXVI.

De Figuris & Modis Syllogismorum.

Quæst. I.

Quot sint *Figura Syllogismorum simplicium*? Communis sententia, cum Aristotele, tres tantum agnoscit. Sunt tamen qui quartam adjiciunt, quæ *Figura Galeni* dicitur. Is enim tribus Figuris Aristotelicis quartam addidit, ut testatur Averroes: Licet in scriptis Galeni quæ extant nulla ejus sit mentio. In hac questione

Thesis nostra est, Quatuor esse Figuras Syllogismorum simplicium.

Probatur. Pro diversa dispositione medii termini cum partibus quæstionis, *Figuræ Syllogismorum* sunt diversæ, ut omnes fatentur. At quatuor modis disponi potest medius terminus cum partibus quæsti-

onis.

onis. Vel enim medius terminus majori extremo subicitur, & de minori prædicatur ut in prima Figura; vel de utroque prædicatur ut in secunda; vel utrique subicitur ut in tertia; vel denique de majori extremo prædicatur & minori subicitur; quæ dispositio terminorum eodem jure figuram distinctam constituit, ac reliquæ.

Adde nonnullas esse conclusiones quæ in nulla ex tribus figuris receptis directe & immediate ex eisdem præmissis & per idem medium inferri possunt: Ut exempla Syllogismorum quartæ Figuræ, in *Institutionibus* nostris, *parte com. cap. 26. sect. 6.* tradita ostendunt. Utile autem & necessarium est, omnes modos recte concludendi per quodlibet medium idoneum, proponere: Ut & perfectio artis Logicæ postulat. Unde viri docti nonnunquam utuntur Syllogismis quartæ Figuræ, & conditio materiæ ad eam interdum mentem trahit. Excipiunt quartæ Figuræ Adversarii, eam non differre à prima nisi transpositione præmissarum, & inversione conclusionis. Verum si hæc ratio contra quartam figuram valeat, valebit etiam adversus secundam & tertiam; quia per transpositionem & inversionem præmissarum, Syllogismi illarum figurarum, non differunt à Syllogismis primæ. Sic enim ad eam reduci solent. Deinde quidam Syllogismi quartæ Figuræ, neque per transpositionem præmissarum, nec per inversionem conclusionis ad primam reduci possunt: ex. g. hic, *Nullus miser est æquanimus, Quidam æquanimus est pauper, Ergo aliquis pauper non est miser.* Si enim præmissæ transponantur, major erit particularis in prima figura, & minor negans. Nec potest Syllogismus iste fieri in Ferio, nisi utraque præmissarum conversa. Nec in Festino nisi conversa minori; neque in Ferison, nisi conversa majori. Sic autem non erunt eadem præmissæ.

Objiciunt Conimbricenses in Lib. 1. prior. cap. 7. quæst. 1. Art. 1. *Si recte constitutum est illud esse majus extremum in syllogismo, quod de medio prædicatur, fieri omnino repugnat ut medius terminus de majori extremo prædicetur, & minori subjiçiatur: ne minus præstantem locum majori extremo concedamus.*

Resp. Mira est ista argumentatio à tantis viris profecta. An non enim, ut ipsi probe noverant, medius terminus de majori extremo prædicatur in secunda Figura? Dicendum igitur prædicatum quæstionis nullam aliam ob causam majus extremum vocari, quam quia prædicatum propositionis præcipue attenditur, eo quod subjectum cui tribuitur, explicet: Deinde quia difficilius est invenire attributa quam subjecta. Hoc est facilius menti nostræ occurrunt res. (has enim sensus & ratio quotidie suggerunt) quam attributa quibus cognoscantur.

Objiciunt etiam rationem Averrois: "Nihil minus expectat ratio naturalis, quam ut inferetur id quod subjiçiebatur medio termino, de illo quod de eodem medio prædicabatur. Ratio enim naturalis postulat, ut id quod affirmatur aut negatur de aliquo subjecto, affirmetur etiam aut negetur de omnibus sub eo contentis. Quando igitur id quod subjiçitur medio prædicatur de attributo Medii, prædicatio est indirecta, & non naturalis.

Resp. Obscura est ista ratiocinatio. Cui dandum est quartam figuram minus esse naturalem, hoc est, minus facilem & evidentem, minusque menti arri- dere, quam prima. At quid inde? An non id ipsum verum est de secunda & tertia? Ut & ipsi Aristorelici fatentur. Unde falsum est expectationi rationis adversari, quod in ea inferatur id quod subjiçitur medio, de eo quod de eodem medio prædicatur. Cur enim per ejusmodi illationem magis frustratur spes mentis, quam per illas quæ fiunt in secunda figura,

figura, in qua id quod subjicitur medio, concluditur de eo quod eidem subjicitur, aut in tertia in qua id quod prædicatur de medio concluditur de eo quod de eodem prædicatur. Ad confirmationem dicimus, sensum illius regulæ in qua fundantur Syllogismi universales, non esse quasi id quod affirmatur, vel negatur de aliquo subiecto, affirmari vel negari *debeat* de solis illis quæ in extensione illius continentur (ut multa exempla ostendunt) sed tantum quod de iis affirmari vel negari *possit* salva veritate. Nec obtinet illa regula nisi in sola prima figura. Neque etiam in omnibus illis modis; sed in illis tantum in quibus minus extremum in extensione medii termini continetur. Regula autem universalis omnium Syllogismorum, *Quæ necessaria connexa sunt cum eodem tertio, aut ab eo disjuncta, illa etiam connexa aut disjuncta sunt inter se*, in quarta figura locum habet, non minus quam in reliquis.

Quæst. II. *An quatuordecim tantum sunt modi Syllogismorum Universales, directe concludentes, in tribus primis Figuris.*

Resp. Affirmative, juxta regulas enim in *Institutionibus, Part. Com. Cap. 27.* traditus, tot sunt modi boni & utiles, nec plures esse possunt. Hoc ut manifestum fiat observandum est, quatuor esse Genera propositionum ex quibus fiunt Syllogismi Universales; Universalis affirmans, Universalis negans, Particularis affirmans, & Particularis negans, quæ quatuor literis A, E, I, O; indicari solent. Jam vero primo patet tot esse posse modos Syllogismorum, istiusmodi propositionibus constantium, quot modis propositiones istæ, si tres tantum simul sumantur, combinari possunt. Atqui ex doctrina combinationum, quæ in Arithmetica traditur, propositiones illæ A, E, I, O, si tres simul sumantur, 64, modis disponi possunt, nec pluribus, nec paucioribus. Ex his vero excluduntur 54 per regulas supra dictas. Sunt

Sunt igitur decem tantum modi utiles, scilicet, A, A, A; E A, E; A, I, I; E, I, O; A, E, E; A, O, O; A, A, I; E, A, O; I, A, I; O, A, O, Hinc tamen non sequitur decem tantum esse genera Syllogismorum Universalium recte concludentium; quia ex decem plures esse possunt ejusdem speciei, in diversis figuris, ut & revera sunt. Ut AII in prima & tertia, E, I, O, in omnibus tribus, E, A, E, in secunda & tertia. Ex denis illis modis, sex in prima figura excluduntur per regulas, singulorum Syllogismorum proprias, *Instit. part. com. cap. 28.* Scilicet, A, E, E, & A, O, O, per regulam secundam quæ minorem jubet esse affirmativam; I, A, I, & O, A O, per primam, per quam major debet esse Universalis; A, A, I, & E, A, O, Quia si minor Universalis sit in prima figura, minus extremum universaliter in illa distribuitur, adeoque, ut adæquate concludamus, hoc est totum quod ex præmissis directe concludi queat, necesse est conclusionem etiam esse universalem. Restant igitur quatuor tantum modi legitimi in prima Figura. In secunda Figura excluduntur A, A, A; A, A, I, & A, I, I, per regulam tertiam, quæ requirit alteram præmissarum esse negantem: I, A, I; O, A, O, per regulam primam, quæ prohibet ne major sit particularis: E, A, O, deneque propter eandem rationem ob quam rejicitur à prima Figura. Restant igitur quatuor. In tertia Figura, A, A, A; E A, E; A, E, E, rejiciuntur per regulam quartam, quæ conclusionem postulat particularem; A, O, O, per regulam secundam, quæ minorem vult esse affirmantem. Restant igitur sex. Quare modi Universales recte concludentes sunt tantum quatuordecem, quod erat demonstrandum. Eodem modo demonstrare licet per regulas quartæ figuræ proprias quinque tantum esse illius modos recte concludentes.

Obj. I. Plures sunt modi recte concludentes:
Quod

Quod variis instantiis ostendere conatur *Derodon log. contract. cap. 4. sect. 3.*

I. Ex omnibus negantibus, etiam ex minore negante in prima Figura recte concluditur. Primo cum medium est terminus negans vel infinitus. Ut *quod non est animal, non est homo, statua Caesaris non est animal, ergo statua Caesaris non est homo.* Deinde cum medium signo exclusivo afficitur. Ut *solus Deus est adorandus: Imagines Dei non sunt Deus, non igitur sunt adorande.*

II. Item ex omnibus particularibus: Ut *aliquod animal est rationale, aliquod animal est homo, ergo aliquis homo est rationalis.*

III. Ex majori particulari in prima & secunda Figura: Ut *aliquod animal est rationale: omnis homo est animal: ergo aliquis homo est rationalis.*

IV. Ex omnibus affirmantibus in secunda Figura: ut *omne rationale est risibile, omnis homo est risibilis, ergo omnis homo est rationalis. Omne brutum est animal, omnis asinus est animal, ergo omnis asinus est brutum.*

V. Dicit in tertia Figura minorem esse posse negantem, & conclusionem universalem: Sed nullum exemplum affert. Quanquam facile sit exempla adducere iis similia quæ in secunda & tertia instantia exhibentur. Ut *omnis homo est rationalis; nullus homo est bestia; ergo nulla bestia est rationalis.*

VI. Addit rationem cur ex omnibus negantibus, & particularibus in quavis figura, ex particulari in prima & secunda, ex omnibus affirmantibus in secunda, &c. aliquando recte concludere liceat, aliquando non, hanc esse, quia sic aliquando sunt quatuor termini, unus scilicet æquivocus, qui duobus æquipollet; cum non eodem modo significet in omnibus propositionibus, in quibus adhibetur: aliquando vera sunt tantum tres.

Unde regulam statuit, *semper recte concludi, quando in Syllogismo tres tantum sunt termini non æquivoci.*

Respondent quidam Syllogismos istiusmodi concludere vi solius materiæ non autem vi formæ Syllogisticæ.

Replicat Derodon, "Omni formam Syllogisticam. & omnes regulas syllogismorum, nec non reliqua præcepta Logica, nisi experientia reflexa: per quam observatum est omnes syllogismos, in quibus sunt tantum tres termini non æquivoci, recte concludere: hoc est, veram semper inferre conclusionem, modo veræ sint præmissæ. Adeoque Syllogismos istiusmodi concludere vi formæ.

Discursum hunc breviter, exercitationis gratia, Ventilemus. Ad prius exemplum primæ instantiæ respondet ipse Derodon. Minorem non esse negatam, sed affirmatam. Quia affirmatur in illa medium de minori extremo. Medium enim non est animal, sed id quod non est animal. Quod clare patere dicit, si præmissas in propositiones infinitas commutentur, hoc modo, quod est non-animal, est non homo: Statua Caesaris est non animal. Ergo. Sed ex ista responsione, sequetur omnem propositionem negantem dici posse affirmantem. Siquidem in omni negante, negatio attributi negati attribuitur subjecto: ut cum dicimus hominem non esse lapidem negatio lapis tribuitur homini, quod autem medius terminus sit negativus, naturam minoris propositionis immutare nequit. Deinde in minori, nota negandi præficitur copulæ. Quidni igitur negans censenda est?

Dicendum igitur potius est, Majorem esse affirmativam. Aut saltem non concludere nisi virtute affirmativæ, *Omnes homo est animal*, in qua includitur, & quæ ad veritatem ipsius præsupponitur. Si
inflet

instet quis Syllogismum hunc procedere à negatione Generis ad negationem speciei, qui processus legitimus est, adeoque esse bonum, licet utraque præmissarum negante constet.

Resp. Processum illum niti axiomate affirmante, nempe posita specie ponitur Genus, seu speciem necessario includere naturam Genericam.

Ad alterum exemplum primæ instantiæ dicimus, majorem nec esse propositionem simplicem, nec esse pure negativam, duas enim complectitur propositiones nempe *Deus est adorandus, & nihil aliud est adorandum*. At Regulæ Syllogismorum de illis tantum Syllogismis intelligendæ sunt, quæ constant propositionibus simplicibus, aut quæ simplicibus æquipollent. Deinde concludit Syllogismus propositus, vi affirmantis, *Omne adorandum est Deus*, in qua exclusiva includitur.

Reliquæ instantiæ non concludunt vi formæ. Syllogismi enim vi formæ concludere dicuntur, qui in omni materia simili concludunt. Atqui in alia materia simili Syllogismi isti non concludunt. Ut ex omnibus particularibus, *aliquod animal est irrationale, aliquod animal est homo; Ergo aliquis homo est irrationalis*. Et ex majori particulari in prima & secunda figura; *aliquod animal est irrationale, omnis homo est animal, Ergo aliquis homo est irrationalis: & sic de cæteris*. Similis autem est materia, cum propositiones sunt ejusdem formæ, quoad quantitatem & qualitatem.

Inst. Ad formam Syllogismi pertinet regula quod in eo tantum sint tres termini: At Syllogismi illi vi regulæ istius concludunt. Ergo concludunt vi formæ.

Resp. Cum tres termini materia legitima sint boni Syllogismi, ut omnes concedunt, regula illa non præscribit formam, sed materiam indicat. Forma autem consistit in figura & modo; nempe

in ejusmodi dispositione illorum terminorum, & trium propositionum ex eorum combinatione exurgentium, quæ nunquam falsam conclusionem ex veris præmissis infert.

Instabis porro: Modo sint tantum tres termini, perinde est qualisnam sit Figura vel modus. Si enim Syllogismus his solis constiterit, semper recte procedit. Non igitur concludit vi formæ, sed vi materiæ.

Resp. Fatendum est omnes regulas ad modum & figuram spectantes, eo collineare, ut in syllogismo sint tantum tres termini, rite dispositi, hoc est in aliquo modo & figura positi. Hinc tamen non sequitur formam esse plane indifferentem, aut Syllogismum vi illius non concludere. Quia in aliqua forma non possunt esse nisi tres termini, in aliqua alia possunt esse quatuor, seu unus æquivocus. Expediit autem differentiam illam, regulis quibusdam de dispositione terminorum, & quantitate ac qualitate propositionum indicare.

Notandum etiam est, modos illos qui non semper recte concludunt, non esse necessarios. Conclusio enim quæ in illis infertur inferri potest per idem medium in aliis modis qui nunquam fallunt. Et mens, sponte sua, raro aut nunquam illis utitur.

Denique notandum est regulas Syllogismorum, nec sola experientia reflexa, neque ea præcipue, niti, sed principiis quibusdam universalibus per se notis, quæ axiomatis illis & regulis quas in *Instit. parti. com. cap. 27.* tradidimus, continentur. Quibus ostenditur Syllogismos in tali modo & figura non posse esse vitiosos, seu ratio redditur à priori, cur sint recti: & mentem plane convincunt quod in omni materia simili obtineant. Cum per experientiam in paucis tantum individuís, rectitudinem eorum

rum percipiamus. Idem dicendum est de reliquis præceptis Logicæ.

Objiciuntur, II. Nonnulla exempla Syllogismorum, qui juxta regulas communiter receptas formari videntur, falsam tamen conclusionem inferunt, ex veris præmissis. Ut,

1. *Omne individuum alicujus speciei est equus; Omnis homo est individuum alicujus speciei: Omnis igitur homo est equus.*

2. *Omnis planta vel canis latrat; omnis arbor est planta vel canis: Ergo omnis arbor latrat.*

3. *Nullus homo dum sedet ambulat: omnis homo dum sedet est homo: Ergo nullus homo ambulat.*

4. *Omne ridens movetur: Omne ridens est homo: Ergo aliquis homo movetur.* Ponamus autem nullum hominem actu moveri. falsa erit conclusio, cum tamen præmissæ necessariæ sint, et semper veræ.

5. *Omne animal sentit: Quoddam animal est non omne animal; Ergo non omne animal sentit.*

Resp. Ad primum, utramque præmissarum esse particularem. Habent enim hunc sensum, *Quædam species habet omnia individua equina, quædam species habet omnia individua humana.* Unde sunt in Syllogismo quatuor termini.

Ad secundum, major vel est propositio disjunctiva hunc sensum habens, *vel omnis planta latrat, vel omnis canis latrat*, sic autem Syllogismus non est simplex et categoricus, ut loquuntur, sed disjunctivus: qui idcirco procedere debet à positione unius membri ad remotionem alterius; vel contra. Vel non est disjunctiva, sed hoc sensu accipienda, *omne quod est planta vel canis latrat*, ut minor indicat: Sic autem est falsa. Æquipollens enim copulativæ, & *planta & canis latrat.*

Ad tertium, particula *dum sedet*, vel pertinet ad subjectum in majori, vel ad attributum. Si ad subjectum, in hunc sensum, *nullus homo sedens ambulat*,

subsumi debet in minori, *Omnis est homo sedens*: & sic minor erit falsa. Si ad attributum pertinet, hoc sensu, *Nullus homo ambulat dum sedet*, seu eo tempore quo sedet, sic conclusio non erit falsa.

Ad quartum dicimus, minorem duplicem sensum admittere: alium absolutum qui supponit existentiam subiecti, nempe *ridentis*, & absolute affirmat hominem esse idem cum eo: sic autem est falsa. Absolute enim loquendo homo non est idem cum eo quod actu ridet: quia fieri potest ut sit idem cum non ridente: & contraria potest esse vera, *Nullum ridens est homo*, eo tempore quo nullus homo ridet. Alium sensum patitur, qui conditionatus est, ex hypothese scilicet, quod sit aliquod ridens. Unde admissa hypothese quod aliquis homo actu rideat, sequitur conclusio, aliquis homo movetur. Et suppositio facta contradicit minori in eo sensu quo minor est vera.

Ad quintum dicimus, minorem esse negantem in tertia figura. Eundem enim habet sensum, ac quoddam animal non est omne animal: Alii dicunt esse quatuor terminos; scilicet, *Omne animal, quoddam animal, sentit, & non omne animal*.

Quæst. III. Quomodo se habeant figuræ syllogismorum ad invicem: ratione perfectionis & imperfectionis?

Thef. I. Prima figura reliquis perfectior est.

I. Quia omnia genera quæstionum in ea concludi possunt, scilicet Universalia, particularia, affirmantia & negantia. Cum in secunda sola negantia, in tertia & quarta sola particularia concludi possunt.

II. In prima figura medius terminus non tantum officio, sed etiam situ medius est. Est enim subiectum majoris extremi, & Attributum minoris, quod idcirco ipsi subijcitur. Adeo ut dispositio terminorum in prima figura sit maxime naturalis: & ad eam sponte sua recurrant ratiocinantes, nisi conditio materiæ obster. Ex. gr. accipiamus tres illos terminos,

minos, *sentiens, homo, tanquam externa, animal ut medium, mens in prima figura sic arguit: sentiens unitur animali, & animal unitur homini, ergo etiam sentiens & homo sibi invicem uniuntur: ubi ordo terminorum est homo animal sentit, vel sentit, animal, homo. Eo modo quo partes lineæ A, C, cohærent per intermediam B.* $\frac{a}{\text{---}} | \frac{b}{\text{---}} | \frac{c}{\text{---}}$. In

reliquis vero figuris medium est tantum officio medium. Nam in secunda figura, in qua medium utrobique prædicatur, & in tertia, in qua utrobique subjicitur, situ extra est. Nec tamen idcirco inidoneum est ad extrema unienda, hoc est ad unionem eorum nobis indicandam. Ad hoc enim præstandum, sufficit si cum utroque extremo identificari perspiciamus, qualiscunque sit ordo identitatem illam apprehendendi. In quarta vero figura medium quidem situ medium est, sed extrema ordine inverso disponuntur: quia majus extremum sub medio, minus supra locatur.

Addunt plurimi aliam rationem, cur Syllogismi primæ figuræ perfectiores sint; scilicet quia in iis vis consequentiæ, & dictum *de omni & de nullo*, luculentius apparet. Sed hæc ratio nulla est. Nam dictum *de omni & de nullo*, non habet locum in secunda & tertia figura. Quia in secunda majus extremum nec affirmatur nec negatur de medio, sed hoc de illo. Et in tertia licet majus extremum affirmetur vel negetur de medio, minus tamen sub eo non continetur. Nec video cur necessitas consequentiæ in prima figura luculentior sit, nisi quia ordo terminorum in ea magis est naturalis. Omnes enim boni Syllogismi nituntur his principiis per se notis, *Quæ sunt eadem cum eodem tertio sunt eadem inter se: & quorum alterum cum eodem tertio idem est, alterum ab eo diversum, illa sunt diversa inter se.* Hæc autem, si quis, in quovis syllogismo, locum habere perspe-

xerit, fieri non potest quin consequentia ei evidentissima sit. Sed expeditius cerni videntur in prima figura: Et idcirco consequentia in ea facilius percipitur. Hinc Syllogismi reliquarum figurarum ad eam reducuntur, tanquam ad statum perfectiorem.

Corollarium. *Figura quæ prima ab Aristotele statuitur ordine doctrinæ primo proponenda est.* Contra *Ramus*, et *Ramistas*, qui eam figuram, quæ Aristoteli tertia est, primo loco tradendam esse contendunt. Rationes sunt.

1. Quia Figura illa nobilissima est, et ad ratiocinandi usum aptissima.

2. Quia per reductionem ad eam consequentia Syllogismorum reliquarum figurarum declaranda est, si opus sit.

Obj. I. Simplicissima ordine doctrinæ præponenda sunt. At in secunda et tertia Figura dispositio est simplicior: in tertia enim medium antecedit, in secunda sequitur. In prima vero mixta est dispositio, quia medium et antecedit et sequitur. Sic *Dumamius*, in *Rami Dialect. lib. 2. cap. 10.*

Resp. Simpliciora tunc tantum præponi debent, quando mixtorum sunt principia: Quod hic non contingit; secus enim simpliciora sequi debent, cum cognitio eorum à cognitione compositorum pendet.

Obj. II. Ratio methodi postulat ut ab imperfectioribus progrediamur ad perfectiora. Si igitur figura quæ Aristoteli prima dicitur, cæteris perfectior sit, postremo in loco tractanda est.

Resp. Neque ab imperfectioribus, sed à perfectissimis potius incipiendum est, nisi cum cognitio perfectiorum à cognitione imperfectiorum pendet. Ut in doctrina virtutum moralium tradenda, initium recte fit à pietate erga Deum, quæ virtus omnium perfectissima est in se, & hominem maxime decet.

Thesis II. *Perfectio primæ Figure supra reliquas est tantum accidentalis.* Perfectio enim essentialis, quæ

in

in bonitate consequentiæ consistit, communis est omnibus figuris. Quod autem bonitas illa evidentior sit in prima, quam in reliquis, essentiæ boni Syllogismi supervenit, non autem eam constituit. Sicut quod lux intensior sit, non est de ejus essentia.

Obj. Quidam Syllogismi secundæ & tertiæ Figuræ evidētiore sunt quam quidam primæ, ex. g. hic, *nullus equus est risibilis, omnis homo est risibilis, ergo nullus homo est equus*, evidentior est; licet in secunda Figura sit, quam si in prima figura strueretur hoc modo; *nullum risibile est equus, omnis homo est risibilis, ergo*.

Resp. Prior evidentior est & magis placet, ratione prædicationis terminorum in majori; quia in ea illud est attributum, quod natura sua exigit esse attributum, sed non ratione dispositionis syllogisticæ mediæ cum extremis, (quæ in prima Figura magis naturalis est) & evidentia sequelæ quæ in eadem major est.

DISPUTATIO XXVII.

De Divisione Syllogismorum ratione Materiæ.

SYllogismus ratione materiæ spectatus, dividitur in *Verum* et *Fallacem*. Verus dicitur qui parit assensum verum. *Fallax* qui parit errorem. Prior rursus, secundum *Aristotelem*, dividitur in *Dialecticum*, & *Apodicticum*. Posterior, in *Pseudographicum*, & *Sophisticum*. Syllogismus *Dialecticus* communiter definitur, ex *materia* quidem, qui concludit ex probabilibus; ex *effectu* autem, qui opinionem parit.

Apo-

Apodicticus, seu demonstrativus, similitur, per materiam definitur, qui concludit ex loco causæ proximæ, & adæquatæ, vel effectus: per effectum vero, qui Scientiam parit. Syllogismus Pseudographicus dicitur qui ementitur speciem Syllogismi Apodictici. Pseudographicus vero appellatur, propter similitudinem quam gerit ad *Pseudographema*, seu falsam delineationem figuræ in Geometria, quæ videtur continere rationem alicujus Theorematis, aut Problematis, sed eam non continet. Sophisticus denique definitur, qui ementitur speciem Syllogismi Dialectici. Syllogismum Dialecticum aliter *Topicum* vocant, quia vim suam trahere solet, (inquit Derodon. *Log. contract. parte 5. cap. 5.*) ex locis quibusdam argumentorum. De hoc genere Syllogismi dum tractant, annumerant communiter plerosque omnium ratiocinationum locos, ut videre est apud *Burgersdicium*, *Derodonem*, & alios.

Aliter tamen *Burgersdicius* Syllogismum Dialecticum definit, *Qui opinionem generat, aut quemlibet assensum præter scientiam; Instit. lib. 2. cap. 5.* Galtruchius vero *Method. & Instit. Log. Disp. 4. cap. 6.* Syllogismum ratione materiæ dividit, (& se ita facere dicit ex communi doctrina) in *Demonstrativum*, *probabilem*, & *Sophisticum*. Et eodem modo definit probabilem quo alii Dialecticum. Sed *Keckermannus System. Log. lib. 3. cap. 11.* Syllogismum verum dividit in *Contingentem* & *Necessarium*: Et *Necessarium cap. 15.* in *Dicticum* & *Apodicticum*. Dicticum ibidem definit, *qui ex quovis loco necessario probat præter locos efficientes, Finis & effectus.* Apodicticum definit *cap. 22. in quo effectus probatur per causam efficientem, & destinatum per suum finem; & contra, Efficiens ex effectu, & Finis ex Destinato, hoc est ex medio.* Locos etiam Argumentorum distinguit in *Contingentes*, seu *probabiles*, & *necessarios*. Et hos doctrinæ Syllogismi necessarii, illos contingentis subjecit; nec,
ut

ut alii, omnia genera locorum commiscuit, aut solos necessarios tradidit. De his fit.

Quæst. I. Quid de distributionibus Syllogismorum hic traditus sentiendum sit?

Resp. Varie in illis Erratum est. Et.

I. Male Syllogismus ex solis probabilibus differens, sub Syllogismo vero secundum materiam locatur, ut species sub suo genere. Syllogismus enim verus est qui verum assensum parit. Quod autem probabile duntaxat est, potest esse falsum, & nonnunquam actu falsum est. Fieri igitur potest ut pariat assensum falsum.

Rectius igitur Syllogismus secundum materiam spectatus, divideretur in *Necessarium, Probabilem, & Fallacem*. Seu in eum qui omnino certus est, & semper parit verum assensum, & in eum qui omnino certus est, pro vero tamen ut plurimum habetur; & in eum denique qui plane deceptorius est. Nec enim Syllogismus probabilis inter fallaces censendus est, quia nec semper nec plerumque fallit.

II. Male etiam definitur Syllogismus Sophisticus, qui ementitur speciem Syllogismi Dialectici, hoc est, probabilis. Sic enim Divisio Syllogismi in Apodicticum, Dialecticum, Pseudographicum, & Sophisticum, non esset adæquata. Cum præter species illas, ut vulgo accipiuntur, detur quintum membrum, nempe Syllogismus qui ementitur speciem Syllogismi necessarii, nec tamen ex causa aut effectu apparenti probat; sed ex alio loco necessario concludere videtur. Adde quod Fallacia à *non causa pro causa*, inter species Syllogismi Sophistici recensetur. Quæ tamen si causa sit proxima, & adæquata speciem gerit Syllogismi, non probabilis tantum, sed stricte Apodictici. Quin plerique modi Sophismatum extra dictionem, concludere videntur ex medio necessario: eoque facilius imperitos, aut incautos decipiunt. Si enim probabiliter duntaxat concludere

cludere viderentur, præsertim ubi probatio firma et certa expectatur, rarius nos fallere possent.

Syllogismus igitur Sophisticus est, qui concludere videtur ex principiis necessariis aut saltem ex probabilibus, cum revera ex falsis aut æquivocis concludit. Et si ita distinguere libet Sophismata, Pseudographus erit qui concludere videtur ex causa, vel effectû, aut signo necessario, quod non præstat. Unde erunt sophismata non tantum è loco *non-causæ pro causa*, sed etiam è locis *non-effectus pro effectû*, et *non-signi pro signo*, secus ac in Logica vulgari statuitur.

III. Sed capitalis error committitur, cum Syllogismus verus dividitur in Dialecticum et Apodicticum; et Dialecticus ex solis probabilibus, Apodicticus autem, non ex quovis loco necessario, sed solummodo è loco causæ, aut effectus, concludere dicitur. Syllogismus enim qui Dialecticus vocatur, hoc est omnis Syllogismus præter Apodicticum, et Sophisticum, (sub quo Pseudographus continetur) sæpissime concludit ex necessariis. Et plerique loci argumentorum ex quibus differit, Canones continent necessariæ veritatis: Quales sunt loci *Generis, Speciei, Differentiæ, Proprii, Definitionis, Subjecti, Adjuncti, Oppositorum, &c.*

Hoc vidit Burgersdicius, sed minus prudenter vitare conatus est, definiendo Syllogismum Dialecticum, *qui opinionem generat aut quemlibet alium assensum præter scientiam*. Sic enim, pro suo, & aliorum quorundam arbitrio, vocem Scientiæ nimis restrixit. Cum vulgo *Scientia* quemlibet assensum certum & evidentem significet, & contradistingui soleat ab errore, fide, & opinione. Satiùs fuisset aperte dicere, Syllogismum Dialecticum esse qui è quovis loco concludit, præter causam propriam, & adæquatam, vel effectum proprium.

Dicendum igitur est, Syllogismum Dialecticum esse, qui in disputationibus & colloquiis communiter adhibetur, in quibus exquisitæ rationes nec necessariæ

cessariæ sunt, nec plerumque adferuntur. Adeoque qui licet ex necessariis, & quidem è loco causæ proximæ, & effectus proprii interdum differat, ad minimum è probabilibus differere debet: Nec aliud voluisse Aristotelem, cum Syllogismum Dialecticum definivit, qui differit ex probabilibus, apparet, ex toto illo Tractatu satis amplo, qui octo libris Topicorum continetur. Syllogismus igitur Dialecticus à Demonstrativo differt, ut Totum à parte, qua ratione alibi distinguit Aristoteles, inter Scientiam, et Sapientiam. Quivis enim Syllogismus utilis potest esse Dialecticus: sed non omnis Dialecticus, Demonstrativus est. Rectius igitur Keckermannus, Syllogismum verum divisit, primo in *Contingentem*, qui ex solis probabilibus, et *necessarium*, qui ex necessariis differit. Deinde necessarium, in *Diæticum*, et *Apodicticum*: Nisi quod vox *Diæticus* idem significet quod *Apodicticus*; Suntque proinde termini minus idonei. Sed excusare eum debet, quod meliores non occurrerent, nec liberet novos fingere; item quod propositio *apò* nonnunquam significationem intendat. Syllogismus autem qui Apodicticus seu demonstrativus dicitur, est omnium nobilissimus, et veritatem Inculcentissime intellectui exhibet.

IV. Inepte et pueriliter Syllogismus Dialecticus dicitur *Topicus*, à *τόπον*, seu *locis* ex quibus media eruuntur. Propter illam enim rationem omnis Syllogismus Topicus dicendus est. Omnis enim Syllogismus Medium ex aliquo loco arcessit. Perperam etiam Ars Topica Syllogismo Dialectico subjicitur, quasi illius propria foret. Non enim minus, artis requiritur in causis et effectibus germanis rei investigandis, quam in reliquis illius attributis. Aliqua igitur illius pars Syllogismo Apodictico assignari debuit, ut recte à Keckermanno sit.

Quæst.

Quæst. II. *An recte igitur divisus sit Syllogismus ratione Materiæ, in Necessarium, Probabilem, & Sophisticum?*

Resp. Affirmative, Omnis enim Syllogismus concludit ex præmissis quæ vel sunt evidenter veræ, & tum dicitur Syllogismus necessarius; vel non omnino evidenter veræ, & est probabilis; vel evidenter falsæ, aut ambiguæ, si quis mediocriter peritus & attentus fuerit, estque Sophisticus. Deinde omnis Syllogismus vel parit cognitionem certam & evidentem, quæ *Scientia* dicitur; estque idcirco necessarius: vel non omnino certam & evidentem, quæ tamen etiam à peritis & cautissimis non potest jure falsa haberi, & est probabilis: vel errorem parit qui facilius detegitur, estque Sophisticus.

Obj. I. Est etiam Syllogismus ex præmissis prorsus dubiis, conclusionem dubiam pariens.

Resp. Si præmissæ ejusmodi penitus dubiæ apparent, nullam conclusionem aut assensum gignunt. Mens enim nihil inferre potest ex præmissis prorsus dubiis, quamdiu ita apparent. Sin probabiles videantur, aut necessariae, errorem pariunt. Estque Syllogismus, ei cui ita apparent, Sophisticus, aut Pseudographicus.

Obj. II. Datur etiam Syllogismus ex aperte falsis.

Resp. Ex aperte falsis, cognitis ut falsis, nullus potest esse Syllogismus, nisi in simplici apprehensione; aut cum falsa supponantur esse vera. Nec enim aliter ex ejusmodi præmissis, mens quidquam concludere potest.

Obj. III. Duplex tantum est Materia Syllogismi; necessaria, & contingens, sub qua continetur possibilis. Duo igitur tantum genera sunt Syllogismorum ratione materiæ

Resp. Si Materia Syllogismi consideretur in se, & ut est à parte rei, duplex tantum est. At si consideretur

videretur ut cognitioni nostræ subjicitur, (qua ratione hic consideratur) quadruplex est. Vel enim est necessaria, & percipitur esse necessaria; & constituit Syllogismum necessarium: vel est contingens, & intelligitur esse contingens; & constituit Syllogismum probabilem: vel videtur necessaria, aut contingens, seu possibilis, sed non est; & constituit Syllogismum fallacem.

Obj. IV. Syllogismi qui constant ex præmissis necessariis, si solum probabiles putantur, aut ex probabilibus, si putantur necessariæ, ad nullum ex his tribus membris pertinent.

Resp. Qui prioris ordinis sunt, ad Syllogismum contingentem pertinent. In syllogismo enim non tantum spectanda est conditio materiæ in se, sed etiam prout à mente nostra æstimatur: Pro illa enim æstimatione assensum certum aut incertum in nobis gignit. Qui vero ordinis sunt posterioris, constituunt Sophismata.

Obj. V. Syllogismi qui constant altera præmissarum necessaria, altera contingenti; aut altera de Fide divina altera naturali, necessaria vel probabili, mixti videntur, & aliam speciem constituere.

Resp. Qui constant altera præmissarum necessaria, altera contingenti, contingentes sunt. Conclusio enim sequitur deteriorem partem. Qui vero altera de Fide divina, altera naturali, si hæc necessaria sit, Syllogismi sunt necessarii. Si tantum probabilis fuerit, sunt contingentes. Ex. g. *Omnis regentus salvabitur, quidam ex iis qui externa professione Ecclesie Romanæ adherent sunt regenti; Ergo quidam ejusmodi salvabuntur.* Ubi major est de Fide, minor probabilis, aut non plane improbabilis; Unde conclusio non prorsus certa est; quia participat de infirmitate minoris, à qua ex parte pendet, tanquam præmissa debiliori.

Obj.

Obj. VI. Dantur etiam Syllogismi in materia impossibili.

Resp. Syllogismi in materia aperte impossibili nulli sunt, ut ostendimus supra *Disp. 25. quæst. 7.* Si autem materia quæ impossibilis est in se, probabilis aut necessaria videatur, Syllogismi in ea Sophistici sunt.

Obj. VII. Meminit etiam Aristoteles Syllogismorum *peirasticôn*, id est qui alterius tentandi gratia adhibentur.

Resp. Syllogismus ejusmodi, ad quodvis ex membris datis spectare poterit, nisi sit in materia aperte falsa, aut impossibili: Et idcirco accidentaliter tantum ab iis differt, scilicet ratione animi proponentis.

Quæst. III. *An Divisio Syllogismi in Necessarium, Probabilem, & Fallacem, sit Divisio generis in species; An Subjecti in accidentia?*

Resp. Divisio Syllogismi *Doctrinalis*, in necessarium, & Probabilem, est Generis in species. Probatur,

1. Actus mentis sunt specie diversi, qui circa objecta diversa, præsertim dissimilia versantur. At materia circa quam ordines isti Syllogismorum versantur, est diversa; puta necessaria, & contingens.

2. Actus qui diversimode tendunt in sua objecta, sunt specie diversi, etiam in eo casu quo materia eadem est; ut actus quo mens cum certitudine assentitur alicui propositioni, specie diversus est ab eo quo eidem assentitur, cum formidine, & dubitatione aliqua. Atqui Syllogismus necessarius & contingens, diversimode feruntur in sua objecta: prior cum firmo assensu, posterior cum vacillatione aliqua. Sophisticus autem continet assensum erroneum, & versatur circa objectum quod supponitur a se existere, aut posse existere, cum tale non sit. Assensus autem erroneus specie differt à vero. Vel sic; Syllo-

Syllogismi quorum unus nititur principiis certis, & evidentibus, & infert conclusionem certam; & evidentem, alius nititur principiis non plane certis, & evidentibus, & infert conclusionem non omnino certam, & evidentem, illi inquam Syllogismi specie differunt. At tales sunt hi Syllogismi. Ergo. Breviter, Scientia, Fides divina, Opinio, & Fides Humana, specie differunt. At Syllogismi isti, ratione assensus qui conclusioni in iis adhibetur, sunt Scientia actualis, Fides divina, opinio, & Fides Humana.

Obj. I. Esse necessarium, probabilem, vel fallacem, sunt accidentia syllogismi. Divisio igitur est subjecti in accidentia.

Resp. Sunt accidentia syllogismi in Genere, in ratione sua abstracta considerati: Eo modo quo esse hominem, vel bestiam determinate, sunt accidentia Logica animalis. At non sunt accidentia syllogismi necessarii, probabilis, & fallacis.

Inst. Sic esse album & nigrum essent differentiae specificæ hominis. Non enim sunt accidentia hominis albi & nigri.

Resp. Non sunt accidentia hominis albi & nigri, quatenus est albus, aut niger, seu *reduplicative*, esto: qui est albus, aut niger, seu *specificative*, nego.

Jam vero esse necessarium, & probabilem, sunt de essentia Syllogismi, non tantum quatenus est necessarius, aut probabilis, sed etiam qui talis est.

Obj. II. Idem syllogismus potest esse et necessarius et contingens. Necessarius, si præmissæ sint necessariae, et pro necessariis habeantur; Contingens si licet necessariae sint, contingentes tantum videantur, ut nonnunquam fit.

Quidam respondent, eundem syllogismum, prout cognitioni nostræ subjacet, nunc necessarium esse, nunc contingentem; Non autem in se, seu ratione

propositionum ex quibus constat. Sive eundem Syllogismum non esse per se, & necessarium, & contingentem, sed per accidens, propter errorem in eo qui Syllogismum format. Sicut actio per se bona, mala est illi qui putet esse malam. Sed hæc responsio concedit unam speciem posse per accidens fieri aliam; quasi homo per accidens fieret bestia, aut vicissim, quod absurdum est.

Resp. Igitur negando eundem Syllogismum necessarium, unquam esse contingentem, aut vice versa. Impossibile enim est iudicium illatum certum esse incertum, aut vicissim. Solum verum est, de materia necessaria, si contingens per errorem existimetur, fieri posse syllogismum contingentem. Ut enim Syllogismus necessarius sit, non sufficit materiam esse in se necessariam, sed requiritur etiam ut sciamus esse necessariam. Hoc est certitudinem requirit, & objectivam, & subjectivam. Instantia actionis bonæ quæ mala evadit, ex eo quod iudicatur esse mala, non probat unicam per accidens evadere posse duplicem; Quia actio circa materiam licitam, si putetur esse illicita, non est eadem in specie ac quando licita habetur. Agere enim secundum aut contra conscientiam, sunt differentie specificæ actionum moralium.

Obj. III. Artefacta per materiam non distinguuntur specie; ut *Statua Cesaris* marmorea, vel *Anea*, est eadem specie. Quin & in naturalibus, differentie specificæ non à materia, sed à solis formis oriuntur.

Resp. Artefacta intellectualia, quales sunt syllogismi juxta regulas Logicas facti differunt specie per materiam. In his enim objecta sunt materia: actus autem menris specificantur ab objectis. Deinde syllogismus necessarius & probabilis, non tantum materia differunt, sed etiam forma, seu modo quo mens circa materiam exercetur, assentiendo scilicet

licet cum certitudine; vel cum formidine.

Thef. II. Divisio illa quoad tertium membrum, non est generis in species. Hoc est, Syllogismus Fallax non necessario differt specie, à Didactico. Ratio est, quia propositiones veræ & falsæ non semper specie differunt. Ex. g. Propositio quæ affirmat Petrum currere, Petro currente, non differt nisi accidentaliter ab alia quæ idem affirmat, Petro non currente. In illo enim casu, & objectum, & modus quo illud repræsentatur, idem est. Quod autem objectum actu existat cum una elicitur, non autem cum altera, per accidens est ad repræsentationem quæ in illis fit.

Obj. Judicium verum specie differt ab erraneo. At syllogismus didacticus est judicium verum, Fallax est erroneum. Hoc est error & veritas specie differunt.

Resp. Negatur major si universaliter intelligatur. Nec enim in materia contingenti vera est, ut jam ostendimus. Quin neque error differt ab opinione nisi ex accidenti. Potest enim is qui opinatur, errare, & subinde errat, etiam cum omnem diligentiam ordinarie possibilem adhibet. Ut in variis Philosophiæ partibus, quædam sunt opiniones admodum probabiles, & in quibus ne cautissimus & perspicacissimus mortalium majorem certitudinem assequitur, quæ tamen possunt esse falsæ. Syllogismos igitur fallaces nectere dicendus est, qui ex incitiis, aut ex temeritate, vel negligentia, conclusionem infert ex falsis, aut plane dubiis, quæ talia esse perspicui possent.

Ex hac Thefi sequitur, *Syllogismum ratione materia non posse recte dividi in Necessarium, Opinativum, & Fallacem.* Mala enim est divisio in qua duo membra sunt species Totius dividendi, tertium vero est adjunctum accidentale, ut hic contingit. Sed dividendum est primo in Didacticum, & Fallacem :

& deinde in Necessarium & contingentem, seu probabilem; vel, quod idem est, in Scientificum, & opinativum. Ideo autem in Didacticum, & Fallacem, potius quam in Verum, & Fallacem dividendum censeo, quia, ut supra dixi, Syllogismus contingens seu opinativus non recte subjicitur Syllogismo vero; Didactico tamen recte subjicitur. Quia syllogismus contingens aliquid decet, nempe quomodo res plerumque est, aut saltem quomodo esse potest.

Quæst. IV. *An recte ab Aristotele definita sit Propositio probabilis; quæ omnibus, aut plerisque, aut sapientioribus, ii'que vel omnibus, vel plerisque, vel celeberrimis, vera videtur.*

Resp. *Aristoteles* hic non intendit accuratam definitionem. Solum describit propositionem probabilem, per notas & signa quibus dignoscatur: Et varios gradus probabilitatis tradit.

Prima nota quæ supremum gradum indicat, est, *si propositio aliqua omnibus vera videatur, ut matrem amare liberos, animam esse immortalem.* Consensus enim communis signum est, esse rationes aliquas magni ponderis, quæ veritatem propositionis suadeant, licet non necessario concludant.

Secunda est, *si propositio plerisque vera videatur.* Hoc enim signum est validiores esse rationes quæ pro ea facere videntur, quam quæ contra. Verisimilius utique est pauciores errare, cæteris paribus, quam plures.

Tertia nota est, *si sapientioribus vere appareat,* qui in arte aut disciplina ad quam spectat propositio, versantur. Tunc enim putandum est esse aliquas rationes graves, quæ in partrocinium illius adduci possunt. Cum sapientes nihil temere statuere soleant. Hanc notam tribus gradibus gradibus distinxit Philosophus; Quod omnibus, aut plerisque, aut probatissimis, seu celeberrimis videtur. Ex quibus primus maxi-

mus est, proximus est tertius, secundus minimus. Plerique enim non sunt oculatiores: & ingenia sagaciora sunt rariora. Interim tamen, ut notæ illæ recte intelligantur, nonnullis cautionibus opus est, quas in solutione objectionum quæ fiunt aut fieri possunt, subjiciemus.

Obj. I. Si probabile est quod omnibus videtur verum, propositiones necessariae essent probabiles.

Resp. In definitione subintelligendum est *quod non sit certum, & plane evidens.*

Obj. II. Sequeretur, ex illa descriptione, Syllogismum sophisticum esse probabilem. Is enim omnibus speciem, seu apparentiam veritatis offert.

Resp. Duplex est species veritatis; alia quæ ipsos doctos & perspicaces movere posset: alia quæ simplices & incautos fallit. Prior syllogismo probabili, posterior sophistico inest.

Obj. III. Sequeretur probabilitatem auctoritati hominum niti. Et sic discrimen opinionis; & Fidei humanæ, tolleretur.

Resp. quidam, Si probabile esset *quod omnibus, aut plerisque &c. verum videtur*, sine respectu ad rationes quibus moventur, sequeretur quidem quod objicitur. Sed intelligendum est omnibus videri, propter rationes magni ponderis, aut saltem non contemnendas. Sed hæc responsio innuit Fidem Humanam nullum respectum dicere ad rationes testantis, quod falsum est. Nititur enim *auctoritati*, quæ non tantum varacitatem, sed etiam iudicium, & scientiam complectitur. Adeoq; respicit rationes in genere quibus testis movetur, id est, supponit eum rationes habere cur ita testatur. Respondendum igitur est probabilitatem niti ex parte quidem auctoritate hominum, sed de rebus testantium quæ sub sensum & experientiam non cadunt, ut Fides. Hæc enim nititur testimonio de rebus aut factis singularibus; Opinio vero testimonio de universalibus.

Obj. IV. Solent interdum omnes aut plerique in errore aperto consentire ; ut Gentiles in Idololatria ; totus mundus in Bestia adoranda. Pauciores quandoque rectius sentiunt quam plures. Plerique Philosophorum improbables sententias defenderunt. Celeberrimi etiam aperte errarunt ; ut Aristoteles de æternitate mundi, Plato de præexistentia animarum, Pythagoras de *metempsychósei*, id est de animarum transmigratione ex uno corpore in aliud ; & varias tenuerunt opiniones futes. Difficile etiam est decernere quinam sint celeberrimi : Alii enim alios commendant & admirantur. Multo etiam difficilius est certo scire quid omnes aut plerique tenuerunt.

Ad ista sic respondebis, I. Raro aut nunquam omnes gentes, & multo minus omnia individua hominum, in eodem errore aperto consenserunt.

II. Quod autem multæ aut pleræque gentium, in eodem errore qui facile detegi posset, consenserint, non ductu rationis id fecerunt, sed ex affectu pravo, aut malo exemplo : ut in iudicio falso de pluribus Diis fictitiis, & idolis colendis. Quod ad mundum, admiratione Bestiæ fascinatam, attinet, is non fuit totum Genus Humanum, etiam iis temporibus quibus maxime invaluit potestas Antichristi, sed tantum magna pars mundi Christiani, seu totus fere mundus occidentalis : qui, per synecdochen totius, *mundus* dicitur. Unde rationes quibus in erroribus istis tenendis nitebantur ; non fuerunt probabiles, sed sophisticæ. Decipiuntur enim sæpius homines ex affectu pravo & inordinato, qui Sophistices mater est, non minus quam temeritas, & incogitantia : Cum scilicet ita iudicant, ut rem esse velint, potius quam ut vere est, aut esse videtur.

III. E Philosophis nonnulli ; etiam magni suo sæculo nominis, eadem de causa errarunt. Alii auctoritate majorum nimis ducebantur : & maluerunt in

in placitis antecessorum acquiescere, quam laborem investigandæ veritatis suscipere. Nonnullas etiam sententias tenuerunt, quæ nobis, è sacris Literis edoctis, & ad rationem rectius circa eas exercendam admonitis, aperte falsæ sunt, illis vero luminis naturali relictis, non facile ita apparere potuerunt. Qualis fuit sententia Aristotelis de æternitate mundi, ejusque materiæ, Platonis de præexistentia animarum &c.

IV. Quod igitur omnibus, aut plerisque, aut sapientioribus, verum videbatur, tum demum probabile dicendum est, cum illi puræ rationis imperio se permittentes, sepositis affectibus aut studiis malis, ita judicarunt. Qualis est sententia de immortalitate animæ humanæ; & in judiciis opinio de facto ex circumstantiis, & plurimæ ejusmodi. Vel quod omnes, aut plerique, aut sapientiores, omni affectu vituperabili deposito, nunc etiam pro vero potius quam pro falso haberent.

V. Pro celeberrimis habendi sunt, qui de rebus rectius sensisse à plerisque eorum qui judicio valent, inveniuntur. Judicii autem cujusque virtus, ex effectis, dictis scilicet, factis, & scriptis, æstimanda est.

VI. Ad sententiam communem, siue gentium siue sapientiorum agnoscendam, sufficere poterit Testimonium historiæ, & monumenta doctorum.

Quæst. V. Quid igitur sit propositionem esse probabilem, & quanam sint causæ probabilitatis? Varie enim definitur: dum alii dicunt esse, quæ, cum non omnino certa sit, magis videtur esse vera quam falsa; ut Burgerfidius. Alii, quæ ita est vera ut falsa esse possit. Ut Derodon, Log. contract. cap. 5. num. 122. Comptonus vero dicit, actum esse probabilem nihil aliud esse, quam dependere & produci à motivo probabili: Log. Disp. 50. sect. 4. num. 5. Unde etiam quæri potest, sitne probabilitas attributum actuum mentis, an propo-

sitionis objectivæ. De quibus omnibus sic breviter statuimus.

I. *Probabilitas tum rebus extra mentem, tum actibus mentis convenit.* Rebus quidem, quatenus sunt causæ; aut effecta, signa, & adjuncta quædam, quibus existentia rerum innoscatur; ita tamen ut cum iis necessarium connexionem non habeant. Sic *motus leporis* probabilis dicitur, propter vestigia, quæ terræ, aut nivi impressa reliquit. *Actibus* autem, quatenus per ejusmodi rationes, conformitas eorum ad objecta defendi potest.

II. *Actum esse probabilem, non est idem, ac dependere à motivo probabili;* Sunt enim actus probabiles immediati, qui à nullo motivo pendent, sed per se evidentes sunt. Ut *unumquemque amare seipsum.*

III. *Nec rectè propositio probabilis dicitur, quæ ita est vera ut possit esse falsa.* Sic enim innuitur propositionem probabilem semper esse verum actu, quod falsum est. Ut probabile fuit, *foeminam*, quæ in domo sua cervice suspensa reperiatur, sibi ipsi mortem conscivisse; quod tamen falsum esse postea apparuit, ex confessione cujusdam veneficæ, quæ in articulo mortis, factum in se, & alias quasdam criminis socias, recepit. Deinde ex descriptione illa, eadem esset propositio probabilis, & contingens: Quæ tamen distinguuntur; potest enim propositio non solum contingens sed etiam necessaria esse improbabilis, cum scilicet rationes quæ falsam esse suadeant, validiores videntur.

IV. *Nec exacta est definitio à Burgesdicio tradita.* Innuit enim propositionem probabilem, gradu aliquo, falsam videri. At qui sunt quædam propositiones probabiles quæ nullatenus actu falsæ videri possunt; Illæ scilicet omnes quæ maxime probabiles sunt, non tamen necessariae. Ut hanc vel illam *matrem amare liberos.* Fieri enim potest ut nullæ

nullæ sint rationes in oppositum : In quo casu nullo modo falsa uideri poterit. Non igitur secundum rationes præponderantes probabilitas metienda est, ut descriptio ista indicat.

V. *Propositio igitur probabilis censenda est qua cum non omnino necessaria appareat, quemlibet ad assensum inducere apta est.* Seu quæ menti etiam gnaræ, & attentæ, speciem veritatis ingerit. Estque species illa veritatis interdum absoluta; cum nulla species falsitatis occurrit: interdum comparata; cum sunt rationes quædam in utramque partem, sed pondere inæquales. Nec est quod dicas mentem vel plene assentiri propositioni, & sic assensum esse certum subjectivè, vel omnino non assentiri, adeoque nec esse probabilem. Quia licet veritas rei in indivisibili consistat, assensus tamen mentis gradus firmitatis admittit, soletque illa nunc vehementius, nunc languide propositioni adhærere.

VI. *Causa probabilitatis quandoque est in solis rebus, cum scilicet illæ pure contingentes sunt.* Tunc enim impossibile est menti creatæ, etiam Angelicæ, ex nudo rerum ipsarum intuitu, certo scire hoc ne modo an alio sint; licet in alteram partem valde propensa esse possit; & ita quidem ut nullam de ea dubitationem positivam foveat. Ut, sine dubitatione, nonnullos quibuscum diu versati sumus, pro synceris & genuinis Christianis amplectimur, solum tamen probabilis est æstimatio. Novimus enim possibile esse, absolute judicando, ut quis per maximam vitæ partem, omnia signa externa synceritatis ementiatur. Unde propter rei ipsius naturam contingentem, probabilis tantum est assensus. *Interdum causa non est in rebus sed in nobis.* Cum scilicet sunt rationes quæ veritatem necessariam indicare possent, sed nos latent. Ex. g. *Substantia spiritualis in se, necessario extensa est, vel non.* At rationes quæ

quæ alteram partem necessario concludant, & argumenta in oppositam penitus diluant, nobis occultæ sunt.

Quæst. VI. *Quid censendum de quatuor attributis Topici, pro quorum numero distinxit Aristoteles Problemata seu Quæstiones Dialecticos in quatuor ordines? Quæstiones enim istiusmodi docet vel esse Generis, vel Definitionis, vel Proprii, vel Accidentis.* Sunt ex Aristotelicis qui hanc quæstionum, & Attributorum, distributionem, defendere, & demonstrare conantur, hac ratione. Omne Attributum cujusvis Problematis Dialectici, vel reciprocatur cum subjecto suo, vel non, si reciprocetur, vel est essentialiale, vel accidentale. Si prius, est Definitio; si posterius, est proprium. Similiter si non sit reciprocum, vel est essentialiale, nempe Genus, vel accidentale puta accidens. Ergo quatuor tantum sunt attributa Topica.

Resp. Discursus iste variis nominibus peccat. Primo enim quod ad antecedens spectat, non omne attributum reciprocum essentialiale est Definitio, ut hic innuitur, puta differa essentialis. Nec omne proprium est accidens: ut divisibilitas proprium corporis censetur, & risibilitas, & capacitas disciplinarum propria sunt hominis, nec tamen sunt accidentia. Tam enim repugnat corpori esse indivisibile quam esse inextensum. Si igitur extensio sit de essentia corporis, idem de divisibilitate statuendum. Et merito quidem, quia divisibilitas nihil est realiter distinctum ab ipsa corporis extensione. Similiter repugnat, hominem non esse facultate ridendi, & disciplinas aliquas acquirendi instructum, licet illa nonnunquam ex accidenti impediatur, ne in actum secundum promoveatur: Adde etiam esse quædam accidentia reciproca: ut *eversio regni Persici* reciprocatur cum *Alexandro Macedone*: *subjugatio Gallorum* cum *Julio Cæsare*.

De Differentia Essentiali respondent, si consideretur prout respicit speciem quam constituit, esse attributum annexum Definitionis; quia Problema differentiae è locis definitionis examinatur. Sin ut respicit sua inferiora, esse attributum annexum generis. Sed contra primo, Definitio vel considerari potest ut totum quid, quatenus scilicet adaequatam ideam essentiae rei continet: sic autem nec genus, nec differentia ex locis & canonibus definitionis examinantur. Alii enim hujus, alii illorum loci, seu canones sunt. Nam loci & canones definitionis postulant, ut non sit nimis longa, ut verbis claris, & perspicuis offeratur, & imprimis, ut adaequatam ideam rei definienda exhibeat. Locus vero praecipuus primae differentiae est, ut sit attributum essentialia proprium, exhibens aliquid admodum rei adjacentis alteri, & nullum prius in subjecto praesupponat, à quo oriatur, seu dependeat. Si vero definitio secundum partes suas teorice consideretur, cur differentia potius quam Genus attributum annexum definitionis statuitur? Utrumque enim ex æquo ei annectitur. Deinde, cum differentia consideratur prout respicit inferiora, (quod tamen nunquam facit quatenus differentia), non potest esse adaequate attributum annexum generis. Quia differentia speciei infimae, inferiora habet alius ordinis quam Genus. Nec ex iisdem locis definitur quaestio, an rationale sit genus Socratis, & Platonis, ac animal sit genus hominis & bestia. Quin differentia sic considerata, speciei infimae annectitur, non Generi.

Objiciunt sibi etiam, Speciem ad nullum ex his quatuor attributis reduci posse.

Et respondent Speciem esse attributum annexum generis: Quoniam (inquiunt), ex iisdem locis confirmatur Problemata de genere, & specie: Ex. g. Eadem est quaestio, Estne homo species animalis, ac estne animal genus hominis; & utraque ex iisdem locis resolvitur.

vitur. Atque licet vera sint ista de specie ut subji-
cibilis est, de specie tamen prædicabili aliter se res
habet. Cum enim quæstio est an attributum ali-
quod essentiale commune sit genus, an species,
non ex istdem locis utraque pars resolvenda est.
Ex. g. si quæritur, an cognitio linearæ rectæ bipe-
dalis, in communi, sit genus ad duas cognitiones
duarum linearum bidedalium, an vero species in-
fima: Si enim statuatur esse species tantum, ex
aliis locis probatio petenda est, quam si genus:
scilicet è definitione aut proprietate aliqua speciei
infimæ, & individuorum, quatenus hæc illi im-
mediate subjiuntur: nec è locis generis probare
ullo modo licet.

Objiciunt porro, plurimas esse quæstiones Dia-
lecticas, quæ nullo ex his attributis constant: ut
Sintne apes prudentes an non; sintne Angeli corporei? &
infinitæ istiusmodi.

Respondent, distinguendo duo quæstionum ge-
nera: Alas scilicet esse *simplicis inherentiæ*, in quibus
tantum quæritur an attributum conveniat sub-
jecto, ut in exemplis supra datis. Alias esse *inhe-*
rentiæ modificatæ, in quibus quæritur non tantum
an Attributum subjecto conveniat, sed etiam quo-
modo conveniat. Has autem semper esse virtua-
liter duplices. Ut *sitne animal genus proximum ho-*
minis, sitne risibile hominis proprium. In his enim quæ-
ritur, tum an *animal* & *risibile* homini conveniant,
tum etiam an prius ei conveniat ut genus, poste-
rius ut proprium. Rursus aiunt quæstiones *inhe-*
rentiæ modificatæ, aliquando expresse continere noti-
onem aliquam secundam; ut in exemplis proxi-
me adductis; aliquando nullam exprimere, ita ta-
men proponi, ut ex ipsa sermonis formula facile
intelligi aliqua possit. Ut cum quæritur an esse
admirativum omni, soli, & semper, homini con-
veniat, problema facile se prodit esse *proprii*. His
igitur

igitur præmissis, dicunt Quæstiones Inhærentiæ Modificatæ, ad illud Attributum spectare, quod expresse aut virtualiter in ipsis ponitur. Omnes vero quæstiones simplicis inhærentiæ spectare ad attributum accidentis. Mira sane est hæc solutio: per quam in abusum crassum trahitur vox accidentis. Quasi quidem, quæstiones illæ, in quibus attributum est de essentia subjecti, quæstiones accidentis ideo dicendæ essent, quia in iis solum quæritur an subjecto conveniat necne.

Rectius igitur alii distinguunt Quæstiones, in Reales, & Notionales: nisi quod, pro terminis istis, satius fuisset Notiones primas, & secundas sumpsisse: eo quod quæstiones quæ Notionales dicuntur, Reales etiam dici possunt. Quæstio igitur Realis, seu Notionis primæ, est illa ipsa quam alii simplicis Inhærentiæ vocant, ex. g. *an apes prudentes? an pars aliqua divina mentis eis insit?* Ut quidam è veteribus senserunt. Quæstio Notionalis; seu Notionis secundæ, est illa quam *Modificatam* appellant. Ut *sine corvus necessario an contingenter niger.* Cum igitur omne attributum attributum simplex vel sit Genus, vel Differentia essentialis, (prima vel secunda) vel accidens, Manifestum est quæstiones simplicis inhærentiæ, in quibus attributum est incomplexum, ad aliquod ex his tribus necessario spectare, non minus quam quæstiones inhærentiæ modificatæ. Licet cum hoc discrimine, quod in his aliquod ex tribus illis attributis in actu signato, & expresse, in illis solum in actu exercito ponatur. Ex. g. hæc quæstio, *an apes sint prudentes*, est quæstio Accidentis, quia prudentia in rebus creatis est Accidens: & negative resolvenda est, ex canone accidentis in hunc modum; *cui convenit prudentia, ei etiam convenit intelligentia seu ratio; apibus non convenit intelligentia seu ratio; nec ex intelligentia, sed ex sensu, &*

phantasia operantur, ergo non sunt prudentes, nisi metaphorice. Consequentia nititur Canone accidentis, cui convenit *Accidens ei convenit subiectum quod illius capax est.* At si quæras, an Angeli sint animalia, quæstio erit non accidentis, sed Generis, vel Differentiæ. Canones enim Accidentis ad eam definiendam nihil faciunt, ut per se patet. Sed faciunt Canones Differentiæ, & Generis. Resolvenda enim est negative sic. *Omne animal vita corporea, & organis sensoriis materialibus, de essentia sua, præditum est;* adeoque essentialiter convenit cum hominibus, & brutis, quatenus vivunt vitam corpoream, & sensationes exercent: quæ de Angelis non constant. Prior enim probatio nititur huic canoni, *Cui convenit res, ei convenit Differentia essentialis rei.* Posterior huic, *Attributum Genericum est, in quo essentialiter conveniunt plura, quæ aliunde essentiis differunt.*

Denique, cum porro objicitur, quæstiones in quibus quæritur *quotuplex res sit*, vel quot partes comprehendat; an sit *causa efficiens* alterius, aut ei *contraria*, ad nullum ex his quatuor attributis accenseri posse.

Respondent Quæstionem qua quæritur *quotuplex res sit*, sub forma illa non esse quæstionem Dialecticam. Quia ad eadem non potest responderi per *ita* vel *non*. Si vero proponatur sub forma *estne*, & nulla notio secunda expresse vel implicite indicetur, esse quæstionem accidentis; quia sic est quæstio simplicis Inhærentiæ. Quæstiones vero an res sit *Causa Efficiens* alterius, sive contraria, esse Accidentis: quia accidit enti creato esse *Causam Efficientem*, aut contrarium respectu alterius. At,

1. Mirum est quæstionem ideo non esse Dialecticam, ex eo præcise, quod ad eam responderi non possit per *ita* vel *non*. Cur enim quæstio definitionis Dialectica non est, qua quæritur ex g. quænam

quænam sit vera definitio corporis, (ad quam responderi nequit per *ita vel non*) æque ac an *esse substantiam extensam in longum, latum, & profundum*, sit vera illius definitio? Idem de reliquis è quatuor Attributis dicendum.

2. Omnes quæstiones simplicis inhærentiæ esse accidentis, absurde dicitur; ut supra ostendimus.

3. Falsum etiam est Quæstiones an res aliqua sit efficiens alterius, aut ipsi contraria, esse accidentis.

Sunt enim res quæ essentialiter sunt Efficientes: ut cognitio boni sub ratione boni, essentialiter efficit complacentiam aliquam in bono illo, saltem illam quæ simplex dicitur. Impossibile enim est percipere bonitatem rei sine omni istiusmodi complacentia. Emittere etiam lucem est de essentia lucidi, quamdiu tale est. Et albedo, de essentia sua, est contraria nigredini; sic etiam error scientiæ, vitium virtuti, &c.

4. Cum supra omnes quæstiones simplicis inhærentiæ, quæstiones accidentis statuebantur, parum consultata est ratio qua quæstiones præsentis tales dicuntur; scilicet, quia in iis attributum accidit subjecto. Sic enim nullæ quæstiones accidentis esse debent, in quibus attributum subjecto non accidit, quod verissimum est.

Ut igitur quæstionem hanc concludamus, longe plura Attributa Topica, & quæstiones Dialecticas statuere convenit, quam quatuor. Tot scilicet quot sunt genera, vel loci communes attributorum, de quibus an his vel illis subjectis convenient nec ne, inquiri potest, ut patet ex iis quæ diximus in Institutionibus Log. Spec. part. I. cap. 8. Et quæstiones quidem generales inhærentiæ Modificatæ, sunt tantum tres; nempe an aliquid sit pure de essentia alterius, an pure accidens, an mixtum ex utroque. Ubi tertium Genus semper de attributo complexo quærit, cum fieri non possit ut idem attributum simplex

plex partim essentialiale sit, partim accidentale. Sit pro exemplo *an esse substantiam actus cogitantem sit de Essentia mentis*. Affirmant Cartesiani: Hoc est mentem de Essentia sua non tantum substantiam esse volunt, sed etiam actu cogitare. At vera solutio est, mentem essentialiter quidem per se subsistere, & virtute cogitandi instructam esse, accidentaliter vero cogitare actu. Si igitur in generalissimis quæstionum capitibus inhærere velint Logici tria tantum genera erunt quæstionum inhærentiæ modificatæ, seu de notionibus secundis rerum. Atque in tribus illis hærere maxime incommodum est, nec instituto Logicæ respondet, quæ omnia præcepta tradere debet quibus mens in cognitione rerum quærenda promoveatur.

In hunc autem scopum qui recte collimare velit, ad plurima specialiora quæstionum genera descendere debet. Ut an hoc vel illud sit *proprium alteri, an commune ipsi cum aliis*: seu sitne attributum illius genericum an Differentiale; *negativum, an positivum*; *absolutum, an respectivum*; *totum, an pars alterius, unum, an multa*; *subjectum, an adjunctum, objectum, efficiens, materia forma, seu modus, finis consentaneum an dissentaneum, quem ordinem ad aliud servet, &c.* Adeo ut juxta omnes locos attributorum quos in Institutionibus notavimus, & si qui alii ejus generis sint, quæstiones diversæ statui debent.

Quæstiones etiam simplicis inhærentiæ licet infinitæ sint, pro indefinita subjectorum & attributorum multitudine, ad varios ordines reducere expedit; nec licet, nec sufficit, omnes ad quæstionem accidentis referre. Quæstiones enim istiusmodi esse possunt, *an res sit, quid sit, qualis sit, quantâ sit, quotuplex sit, cur sit, unde sit, & si quæ id genus aliæ reperiantur.*

Et præter quæstiones inhærentiæ simplicis & Modi-

Modificatæ, ut vocantur, sunt aliæ tertii ordinis quæ simplicis inquisitionis nuncupare licet. Ex. g. quæ sit pars Logicæ? Unde oriatur fluxus & refluxus maris? & innumeræ istiusmodi: in quibus nullum attributum nominatur, de quo quæstio fit an aut quomodo subjecto conveniat, ut in reliquis duabus; sed aliquid præcise quæritur.

DISPUTATIO XXVIII.

De Syllogismo Demonstrativo.

Quæst. I.

Quid proprie sit Demonstratio, seu Syllogismus Demonstrativus?

Resp. Varie accipitur vox Demonstratio, & varie proinde definitur res per eam significata.

Primo accipitur pro quovis Syllogismo necessario, oppositè ad Syllogismum probabilem. Et sic designatur ab Aristotele, *Syllogismus concludens ex præmissis necessariis*. Ubi quod major est necessitas veritatis præmissarum, eo præstantior est Syllogismus. Notandum tamen hic est, non sufficere ad syllogismum necessarium quod præmissæ sint necessariæ in se, sed requiri etiam ut esse talis à nobis percipiantur.

Secundo, sumitur Demonstratio pro quovis syllogismo certo, & evidenti: id est qui concludit ex præmissis certis, & evidentibus. Et sic differt à syllogismo non tantum contingenti, sed etiam à Theologico, cujus altera præmissarum est de Fide: adeoque licet certissima, non tamen evidens scilicet, evidentia intrinseca, per quam intelligimus attributū in idea subjecti contineri,

aut eam necessario comitari, vel denique eidem repugnare. Vide quæ diximus in *Instit. part. com. cap. 22. sect. 11, 12.* Hujusmodi discursus menti nostræ magis arrident. Rogabis forte hic, cur Aristoteles Demonstrationem, non per evidentiam, sed per certitudinem definiverit?

Resp. Non quia nullam certitudinem agnovit ab evidentia intrinseca sejunctam; (non enim verisimile est eum revelationes divinas, aut quæ pro divinis inter Ethnicos habitæ sunt, penitus ignorasse, aut incertas, existimasse, ex. g. responsa Apollinis, aut alius cujusdam ex iis qui Dii habiti sunt;) sed potius quia certitudo subjectiva Evidentiam includit, aut præsupponit. De nulla enim re certi naturaliter esse possumus, sine evidentia intrinseca.

Tertio, Demonstratio ejusmodi Syllogismus denotat, *qui ex causa, vel effectû, aut signo necessario concludit.* Et idcirco definitur *Syllogismus scientificus*, seu pariens scientiam. Scientiam enim stricte, accipit Aristoteles, pro cognitione ex ejusmodi mediis deducta. Parit autem Demonstratio, secundum se tota (ut præmissas & conclusionem simul complectitur) Scientiam *habitalem*: Quia omnes actus, qui non sunt pure naturales, sæpius repetiti, habitum progignunt: Secundum præmissas tantum, *actuales* parit, nempe cognitionem conclusionis, quæ est ipsa scientia actualis. Improperie autem loquuntur qui dicunt Demonstrationem, non tantum efficienter, sed etiam formaliter, parere scientiam. Nihil enim seipsam parit. Demonstratio autem quoad conclusionem est ipsa Scientia actualis. Solum igitur formaliter reddit mentem scientem, ut albedo reddit subjectum album.

Hinc patet esse Demonstrationes, seu Syllogismos demonstrativos, contra *Lodivicum Vivem*, & *P. Rammum* qui cum, in Logica Aristotelis arrorenda, secutus

cutus est. Et mirum sane est, viros tanti ingenii & eruditionis, totam illam de syllogismo Demonstrativo doctrinam contempsisse; nullum proferri posse illius exemplum clamitasse; & vulgare illud, quod homo demonstratur esse risibilis, quia ratione praeditus est, risisse. Vel enim rem ipsam negarunt, vel voci qua appellatur succensuerunt. Si prius, seipsum potius ridendos omnibus exposuerunt, quam Aristotelem, aut ejus hac ex parte sequaces. Omnes enim vident esse Syllogismos, qui ex causis effectis, & signis necessariis, concludunt. Suntque eorum exempla non pauca in scriptis Rami, & Rameorum. Si posterius veram speciem Syllogismi, & nobilissimam quidem, sub alio nomine retinere, & docere, ac systematis suis inserere potius conveniebat, quam vel rei vel voci adeo impotenter insultasse.

Immerito tamen sugillantur *Socrates* & *Plato*, cum Academicis, à Comptono, (*Log. Disp. 48. in initio*) & aliis quasi omnem Demonstrationem negassent. *Socrates* enim & *Academici*, cum omnia incerta esse pronunciabant, rhetorice loquuti sunt. Nec credibile est aliud intellexisse, quam pleraque incerta esse, præsertim in inquisitione rerum naturalium. Quis enim sibi persuadebit voluisse illos, omnia quæ in *Ethica*, *Logica*, & *Mathesi* traduntur, esse incerta, & obscura? *Plato* vero licet scire nostrum nihil aliud esse affirmabat quam *reminisci*, non tamen idcirco Demonstrationem sustulit: Si enim mens ante ingressum in corpus demonstrationes fabricavit, quod non (ut opinor) negavit *Plato*, cur non postquam in corpus intruditur, eas recoleret, æque ac multa alia quæ recognoscit?

Quæst. II. *Quanam ante Demonstrationem præcognoscenda, & quanam præcognitiones de iis necessariae sint.*

Resp. Communis Doctrina est, tria præcognoscenda esse, scilicet *Subiectum*, *Affectionem*, & *Causam*.

seu rationem cur hæc illi conveniat, vel non conveniat. Item duas præcognitiones de singulis esse instituendas, nempe *quod sint*, hoc est, vel an actu existant, vel an sint possibilia; Et *quid sint*, id est, quid significant voces quibus appellantur. Sed hic quædam corrigenda sunt.

I. Licet, ante Demonstrationem, necesse sit præcognoscere quid voces Subjecti, Attributi, & Medii significant, (quanquam hic cognitio imperfecta sufficiat, illa scilicet quæ hæc utcumque ab omnibus aliis distinguantur), quia de re incognita nihil potest demonstrari, sicut nec de re cognita demonstrari potest affectio prorsus incognita: Et licet subjectum & affectio præcognita sint, eo quo diximus modo, nequit tamen hæc de illo per medium incognitum demonstrari. Adeo ut necesse sit horum omnium Prævias habere ideas, saltem imperfectas: Præcognitio tamen illa, non ad Demonstrationem tantum, sed ad omnem discursum necessaria est: Quin ad omne iudicium solidum & rationale, necessaria est præcognitio tum subjecti, tum attributi. Mens enim nequit de rebus prorsus ignotis discurrere, aut quocumque modo iudicare. Doctrina igitur illa de præcognitis, non hic, sed in tractatu De Propositione, aut de Syllogismo in genere, fuit tradenda.

II. Non necesse est de his tribus semper præcognoscere *quod sint*, hoc est quod actu existant, vel saltem sint possibilia.

I. Quia etiam de rebus impossibilibus dantur demonstrationes. Sic demonstratur, contra Pontificios, creaturam, præsertim peccatricem, nihil boni apud Deum promereri posse; quia omnia quæcunque habet, aut præstare potest, Deo maxime debet, à quo quicquid est aut agit boni accepit. Item idem corpus secundum se totum, non posse esse in duobus locis eodem tempore; quia sic divideretur à seipso, essetque unum & multiplex in eodem

dem ratione in qua est unum.

2. Quia quod res sit, hoc est quod vel actu existat, vel possibilis sit, sæpenumero per ipsam demonstrationem concluditur: scilicet in omni demonstratione *hóri*.

Obj. I. De re quæ non est, non possunt demonstrari veræ & reales proprietates.

Resp. Si per *veras & reales* proprietates, intelliguntur proprietates actu existentes, aut positivæ, quales sunt proprietates rei positivæ, verum est Antecedens. Sed non necesse est, ut in omni demonstratione, proprietates subjecti tales sint. Sufficit enim quod non sint fictæ à mente nostra. Sunt autem proprietates non entium minimæ fictæ; ut corporis bilocati, *esse divisum à seipso*, *esse unum & plura* in eadem ratione, &c.

Obj. II. De non-ente frustra instituitur Demonstratio.

Resp. De non-ente quidem frustra instituitur longa & operosa tractatio, qualis à quibusdam è Pontificiis instituitur de corpore in pluribus locis posito. Non tamen frustranea est omnis Demonstratio. Utilis enim est illa qua ostenditur esse non-ens, seu impossibile: In eo scilicet casu quo possibile à nonnullis ponitur, in detrimentum veritatis. Ut cum Pontificii ad errores suos contra veritatem S. Coenæ, statuminandos, idem corpus posse esse totum simul in pluribus locis fingunt, & propugnare conantur.

Quæst. III. *An subjectum Demonstrationis*, hoc est res de qua affectio aliqua demonstratur, *debeat esse quid necessarium?* Multi enim docuerunt demonstrationes esse de solis rebus necessariis.

Resp. Negative. De multis enim rebus contingentibus, seu quæ contingenter oriuntur à suis causis, veræ fiunt Demonstrationes. Ut de Syllgismo, & Definitione, in Logica, quæ tamen contin-

genter, ut plurimum, à mente oriuntur. Item, de actibus liberis in Anthropologia, & Ethica, quatenus sunt liberi libertate indifferentiæ.

Obj. De iis solis quæ immutabilia sunt, nec possunt aliter se habere, vel absolute, vel ex hypothesi aliqua possibili, dantur demonstrationes. De his enim solis, mens nostra, certam & evidentem habet notitiam.

Resp. Verum est Antecedens de propositionibus demonstrandis, & de præmissis ex quibus illæ demonstrantur. At non semper verum est de subjecto incompleto; de quo sæpe dantur propositiones necessariae. Ex. g. De Electione mediorum ad finem, quæ plerumque contingens, & mutabilis est, demonstratur, quod intentione finis nitatur: Quia Electio medii natura sua est complacentia efficax in una re propter aliam.

Quæst. IV. *Qualesnam propositiones demonstrari possunt.*

Resp. Communis sententia dicit solas propositiones veras, & quæ rationem suæ veritatis certam habent & immutabilem. Quod ad priorem conditionem attinet, certum est de nulla propositione demonstrari posse quod vera sit, nisi quæ est vera; quod lippis & tonsoribus notum est. Quæ autem vera est, demonstrari nequit esse falsa. Interim tamen propositionis necessario falsæ falsitas facile demonstrabilis est, & communiter demonstratur demonstratione *διὰ' adunάτου*, seu ex absurdo.

Secunda conditio solidam doctrinam continet. Et ex eo apparet, quod discursus, ex ratione incerta, aut mutabili procedens, scientificus esse nequit, qualis est Demonstratio. Certitudo autem hic requisita, debet esse vel Metaphysica, ut vocatur, vel ad minimum physica; nec sufficit moralis. Ex hoc sequitur.

I. Pro-

1. Propositiones per se evidentes demonstrari non posse: Quia nullam rationem à terminis diversam habent, per quam demonstrantur.

2. Nec accidentia contingentia & fortuita. Quia causam fixam & certam non habent, ex qua posita, semper & necessario sequantur.

Nec tamen verum est, quod plerique affirmant, solum Accidens necessarium demonstrari posse. Attributa enim essentialia consequentia, ut vocantur, seu differentiae secundae, demonstrari possunt, & saepe demonstrantur de suis subjectis; nec sola Demonstratione *hóti*, sed etiam *dióti*. Ut de mente Humana demonstratur *quod potentia libera Electionis praedita sit*, ex eo quod sit *rationalis*, cum tamen potentia illa menti essentialis sit, non minus quam Ratio. Quid enim impedit quo minus unum attributum essentialis rei sit ratio alterius?

Obj. Nihil est prius in re quam sua essentia. Nihil igitur quod est de Essentia, demonstrari potest à priori.

Resp. Nihil est prius in re quam tota essentia rei. Unum tamen attributum essentialis potest esse prius, tum natura, tum existendi consecutione, quam aliud. Ut quia prius in creatura rationali est cognitio quam appetitio, seu volitio, prius etiam est virtus cognoscendi, quam virtus appetendi, seu volendi, prioritate rationis, quæ ad Demonstrationem à priori sufficit.

Quæst. V. *An, & quomodo verum sit, Principia Demonstrationis esse proxima, & immediata?* Hic varie distinguunt Logici propositiones immediatas. Primo dicunt propositionem dici posse immediatam, tum respectu conclusionis alicujus quæ ex ea deducitur, cum scilicet rationem immediatam continet, cur hæc vera, vel falsa sit. Tum absolute, & secundum se, cum nullum datur medium, saltem à priori, quo possit probari. Hanc rursus dividun

in eam quæ est immediata secundum se tantum, & in eam quæ est immediata secundum nos, & deniq; in eam quæ est immediata utroque modo.

Primo modo aiunt hanc propositionem, *Dens est æternus*, esse immediatam, quia nullum est medium à priori, quo hæc propositio, *in se* spectata, probari possit. Esse tamen medium *quoad nos*, nempe Immutabilitatem Divinæ Essentiæ.

Secundo modo dicunt hanc, *nix est alba*, esse immediatam. Quia licet ratio sit in ipsa niyis natura, cur albedo communiter eam comitetur, hæc tamen nobis abscondita est.

Tertio modo dicunt principia absolute prima esse immediata, qualia sunt, *nihil potest simul esse & non esse, Quidlibet est vel non est*.

Deinde, propositionem immediatam secundum se, dividunt in eam quæ est immediata ratione *subjecti*: cum scilicet attributum effertur de immediato subjecto: ex. g. *rationalis* aut *visibile* de homine: Et in eam quæ est immediata ratione *causæ*; sub qua comprehendunt tum omnes propositiones in quibus attributum est de Essentia subjecti; tum illas in quibus effectus tribuitur causæ proximæ; ut cum Eclipsis Lunæ ascribitur interpositioni corporis terræ inter eam & corpus solis.

Dicunt igitur, præmissas Demonstrationis *divini* esse immediatas, non solum quoad nos, sed etiam secundum se. Nec tantum ratione subjecti, sed etiam ratione causæ.

Sed hic quædam corrigenda sunt.

I. Non omnis propositio in qua Attributum est de essentia subjecti, est immediata ratione causæ; sed illa tantum quæ causalis est, & in qua causa, seu ratio quæ redditur, est immediata. Improprie enim immediata dicitur ratione causæ, in qua nulla causæ, sive proprie, sive analogicè dictæ, mentio fit. Ut in hac, *homo est substantia*, & similibus. Deinde

nec

nec omnis propositio causalis, in qua attributum est de essentia subjecti, est immediata ratione causæ: illa scilicet in qua causa aut ratio remota redditur. Ex g. hæc quia spiritus perceptivus est, facultate se movendi pollet. Est enim facultas se movendi de essentia spiritus. Virtus autem perceptiva, quæ similiter essentialis est, causam aliquam seu rationem continet, cur se movere debeat; non tamen proximam, & immediatam, sed remotam. Causa enim proxima ex parte spiritus, cur facultate sui ipsius motiva polleat, est, quia appetitivus est. Talis etiam est hæc, *Homo est capax bene & male agendi, quia est rationalis.* Proxima enim ratio cur capacitate illa gaudet, est quia aptus est Deo subijci, seu lege gubernari.

2. Distributio illa propositionis immediatæ secundum se, in immediatam ratione subjecti, & ratione causæ, non est adæquata. Datur enim propositio immediata ratione effectus, non minus quam ratione causæ: Illa scilicet in qua effectui immediato tribuitur sua causa; quæ non est eadem cum illa in qua causæ tribuitur effectus: ut si dicas *neceesse est terram nunc inter solem & lunam interpositam esse, quia luna luce sua privatur.*

3. Nimis stricte sumitur Demonstratio, etiam dióti, cum dicunt oportere constare præmissis immediatis in se, nec unquam sufficere præmissas immediatas quoad nos. Hæ enim sunt veræ Demonstrationes dióti, *ventus flat, ergo, navis sine vemis, in mari movetur: nix est alba; ergo perstringit oculos viatoris, cum totam viam & regionem tegit per quam iter facit.* In utraque autem antecedens est propositio immediata quoad nos tantum. Est enim ratio aliqua, seu causa, cur ventus flare soleat, & cur nix sit alba, licet nobis incognita. Sufficit igitur ad Demonstrationem dióti, quod causa immediata cur affectio subjecto convenit, assignetur, licet

licet causa illa propositione ejusmodi exprimatur, in qua attributum rationem aliquam priorem habet cur subjecto conveniat. Hinc etiam demonstratio dióti sæpe constat præmissis prius demonstratis, quæ sumuntur tanquam essent immediatæ, seu per se notæ.

Objiciuntur hic quædam Sophismata contra propositiones immediatas, quæ breviter diluenda sunt.

Obj. I. Omnia attributa rei, saltem si simplex sit, immediate ei conveniunt, præsertim Essentialia. Socrates enim est immediatum subjectum omnium horum Attributorum, *animal. vivens, corporeum, substantia, Ens*, quia cum illis identificatur. Male igitur dividitur propositio in Mediatam, & immediatam ratione subjecti.

Resp. Omnia attributa rei simplicis essentialia, quatenus sunt illius propria, seu prout ad eam restringuntur, immediate ei conveniunt, esto: Prout absolute spectantur, nego. Sic enim quia quædam ex iis recipiuntur cum re cui tribuuntur, ut *hoc rationale* cum Socrate, alia vero non recipiuntur; & ex iis quæ non recipiuntur, quædam pluribus, quædam paucioribus conveniunt, alia immediata dicuntur, scilicet quæ vel reciproca sunt, vel nulli subjecto communiori conveniunt: alia mediata, cum contra.

Obj. II. Si ulla propositio esset immediata ratione causæ, maxime hæc, *Homo est rationalis*. At falsum posterius: Quia probari potest hæc propositio per causam in hunc modum, *Quod natum est ad beatitudinem, & ad Deum ætèrve glorificandum, necesse est ut sit rationale. At talis est homo*.

Respondent, ut propositio sit immediata ratione causæ, non necesse esse, ut per nullam causam probari possit, sed tantum ut probari nequeat per aliam causam ejusdem generis, cum illa cujus ratione immediata dicitur. Nihil enim vetat per causam ali-

us generis probari posse. Ut in exemplo facto Homo probatur esse rationalis à Causa Finali. Unde hæc propositio immediata est ratione causæ efficientis tantum, non ratione causæ cujusslibet.

Inst. Homo est rationalis quia ita voluit Deus: vel quia eum ita condidit. Hæc igitur propositio demonstrari potest à priori, per causam efficientem, & sic de reliquis.

Respondent quidam negando consequentiam. Quia propositio demonstratur à priori, assignando, non causam qualemcunque cur attributum subjecto insit, sed internam, ab ipsa natura subjecti, vel attributi desumptam.

Sed responsio ista potius distinguit consequens quam consequentiam negat. Concedit enim propositionem illam probari posse per causam externam, sed non per internam: & idcirco non demonstrari à priori. Vera igitur responsio est, negandam esse consequentiam; quia ratio illa à voluntate aut efficientia Dei est communis omnibus rebus creatis: nec proinde magis ostendit cur homo sit rationalis, quam cur quælibet alia res sit talis qualis est. Demonstrationes autem à priori fiunt, assignando causam propriam. Deinde in propositionibus essentialibus demonstrandis à priori, adhibenda est semper ratio interna: nec sufficit externa, nisi ubi affectio demonstranda est accidens subjecti: Ex. g. Eclipsis, respectu Lunæ, aut Solis.

Obj. III. In præmissis Demonstrationis, Termini non temere conjunguntur. Ergo, propter aliquam causam.

Resp. Negando sequelam. Quia inter temere conjungi, & propter aliquam causam, datur medium, nempe conjungi per seipsos, quod in præmissis essentialibus immediatis obtinet. In his enim termini nec temere

temere cohærent, nec ob causam internam aut propriam aliquam rei, sed per seipsos.

Quæstio. VI. *Quodnam sit medium Demonstrationis præstantissimum. Consentiunt omnes, (inquiunt Conimbricenses in lib. 2. poster. quæst. unica art. 1.) Demonstrationis propter quid, medium esse causam connexionis inter subiectum, & assertionem qua de ea demonstratur. Plerique etiam ut iidem Doctores testantur, consentiunt definitionem extremorum esse medium præstantissimum. Sed dissentiunt de extremis in specie, dum alii pro definitione affectionis, alii pro definitione subiecti, alii pro conflatu ex utraque contendunt. Conimbricenses ipsi, supra art. 2. omnes illas sententias probabiles esse censent. Quæstionem vero sic resolvunt; Si de medio quocunque connexionis sermo sit, præstantissimum medium est complexum ex definitione utriusque extremi: sin de medio simplici, præferenda est definitio subiecti.*

Thesis. *Præstantissimum medium internum Demonstrationis dioti, est prima Differentia essentialis subiecti, non autem differentia prima affectionis, illiusve definitio; multo minus complexum ex utraque. Præstantissimum autem medium externum est causa efficiens affectionis propria, & proxima.*

Prima pars sic ostenditur: Quia à sola differentia prima pendent omnes proprietates necessariae, & reciprocae subiecti, tanquam à prima causa, seu ratione interna.

Patet etiam exemplis demonstrationum potissimarum, quæ menti maxime arrident. Illæ enim semper procedunt à prima differentia essentiali subiecti, aut in eam ultimò resolvuntur. Ut, cum de spiritu demonstratur appetens, per virtutem ejus percipientiam, quæ prima illius differentia est: Et de mentibus, quod facultate libera electionis polleant, quia intelligentia, seu ratione prædita sunt, &c.

Dices,

Dices, etiam ex attributis genericis fieri demonstrationes non minus præstantes; ut mentem humanam esse liberæ electionis quia est rationalis. Ratio enim communis est ei cum Natura Angelica.

Resp. Negatur Antecedens. Quia in ejusmodi probationibus, affectio non demonstratur de subiecto reciproco, ut in potissima Demonstratione fit.

Secunda pars hinc elucet. Quia præstantissimum medium Demonstrationis est causa cur affectio demonstranda subiecto conveniat, aut aliquid causæ Analogum. At prima Differentia, seu Definitio ipsius affectionis, nec est causa cur hæc subiecto convenit, nec causæ analogum. Non enim distinguitur ab affectione, nisi penes conceptum explicatum, & implicitum: quæ distinctio non sufficit ut aliquid sit aut dicatur causa alterius. Prima autem Differentia subiecti, licet non sit realiter distincta ab affectione demonstranda, magis tamen ab ea distinguitur, quam Definitum & Definitio, seu quam id quod obscure, ab eo quod clare concipitur. Sunt enim attributa subiecti adæquate diversa secundum rationes suas formales. Cum definitio & definitum solum inadæquate distinguantur. Adde quod probatio à definitione affectionis, parum aut nihil differt à petitione principii. Ut si probes omnem partem materiæ esse divisibilem, quia omnis pars materiæ constat partibus quæ separari à se invicem possunt. Nec acquiescit mens in ejusmodi discursu, sed quærere persistit probationem minoris. Definitio enim affectionis, naturam illius explicat, seu significationem nominis aperit, sed non ostendit cur subiecto conveniat.

Tertia pars sic ostenditur: Si definitio, tum subiecti, tum affectionis, præstantissimum medium Demonstrationis constituunt, vel id faciunt in uno processu,

cessu, vel in pluribus. Si in pluribus, ita ut prius concludatur affectio per definitionem suam, deinde, alio syllogismo, per definitionem, aut primam differentiam subjecti; vel (ut quidam volunt) ita ut prius demonstretur definitio affectionis per definitionem subjecti, et deinde de subjecto concludatur, patet illam esse potissimam probationem, quæ fit per definitionem subjecti, ex iis quæ in confirmationem secundæ partis adduximus. Si in uno processu utraque definitio unum medium conficiat, probatio erit ejusdem per seipsum, seu petitio quæsitæ. Ut si probes *hominem esse risibilem*, per definitiones *hominis*, et *risibilis*, in unum medium conflatas, hunc in modum; *Omne animal rationale potentia videndi præditum*, (seu quod ex objecto Ludicro ita titillari animo potest, ut moveat Labra et buccas, eo modo ut in risu sit) *est risibile*. At *homo est tale animal*; quis istiusmodi Demonstrationem merito non rideat, et probationem minoris non deponat, tanquam æquæ ignoræ, ac conclusio? Definitio igitur affectionis Demonstrationi præmittenda est; sed medium esse, sive sola, sive cum definitione subjecti, haud potest.

Quarta denique pars ab omnibus conceditur. Et ex eo patet, quod causa connexionis inter accidens extrinsecus adveniens, et subjectum quod eo afficitur alia esse nequit quam causa efficiens ipsius accidentis. Hic autem ulterius urgeri possunt Autores illius sententiæ, quam in parte præcedenti confutavimus. Si enim definitiones affectionis, et subjecti simul, præstantissimum medium demonstrandi conficiunt, cur non pariter definitio affectionis, et causa externa, quæ tamen nec de affectione demonstranda prædicari, nec eidem subjici patitur? Quod si cum definitione affectionis concurrere velint in obliquo, contra istud etiam facient rationes in confirmatione tertiæ partis.

Obj. I. Optimum demonstrandi principium, est prox-

proxima et præcipua causa connexionis inter affectionem et subjectum : At hæc est definitio affectionis potius quam subjecti. Unio enim seu connexio affectionis cum subjecto, ex natura ipsius affectionis oritur.

Resp. Retorquetur Argumentum. Quod subjectum talem affectionem exigit, oritur à natura ipsius subjecti : Ergo definitio subjecti est causa connexionis inter ipsum et affectionem. Absolute autem respondebis, ex utriusque, tam subjecti quam affectionis natura, oriri eorum connexionem, quæ est utriusque identitas inadæquata ; Causam tamen esse attributum aliquod subjecti, quod prius natura ei convenit quam affectio demonstranda.

Obj. II. Sæpe demonstratur secunda affectio subjecti per primam, et tertia per secundam, quæ tamen nec sunt illius differentię primæ, nec ad definitionem pertinent, sed ad eam consequuntur. Ut cum probamus *hominem, agendo id quod vetat Deus, esse culpabilem* ; quia *est liber in agendo*.

Resp. Demonstrationes istiusmodi, non esse præcipuas, adeoque nec medium in iis esse præstantissimum. Altera enim præmissarum est demonstrabilis à priori. At ubi medium est prima Differentia subjecti, istud non contingit.

Obj. III. Optimum demonstrandi medium est causa adæquata cur affectio convenit subjecto. At hæc est utriusque definitio. Sicut enim subjectum, de natura sua, annexam habet affectionem, eamque exigit, ita etiam affectio, de natura sua, annectitur subjecto, & ab eo exigitur. Definitio igitur subjecti, per se, est causa tantum inadæquata.

Resp. Neg. Minorem. Definitio enim affectionis causam non exhibet cur affectio subjecto conveniat, ut supra ostensum est ; Probationem distinguo. Natura utriusque, tam subjecti, quam affectionis, est causa formalis, cur hæc illi conveniat : at prima
dif-

differentia subjecti, aut attributum aliquod natura prius affectione demonstranda, est causa efficiens analogica, non autem definitio affectionis.

Hinc patet infirmitas rationis qua utitur *Comptonus* ad probandum, assumi aliquando posse definitionem affectionis pro medio demonstrationis; scilicet quia *affectio non minorem habet connexionem cum subjecto, quam subjectum cum affectione. Log. disp. 48. sect. 3. n. 1.* Ut enim aliquid sit medium Demonstrationis, non sufficit quod connexionem habeat necessariam, & maximam cum attributo demonstrando: Sic enim omnis Syllogismus necessarius esset demonstratio, quod falsum est, & communiter negatur. Sed requiritur ut medium vel sit radix attributi demonstrandi, ut in Demonstratione *dióti*, vel consequens necessario arguens, ut in Demonstratione *hóti*.

Definitio autem affectionis nec radix ejus est nec consequens, sed affectio ipsa cum connotatis suis propriis.

Quæst. VII. *An præmissa in Demonstratione certiores sint conclusione?* Negat absolute *Hurtado*. *Arriaga* vero alteram ex præmissis admittit esse certiolem, non utramque *Comptonus* utramque certiolem pronunciat. *Disp. 49. Sect. 2.* Nos sic statuimus.

I. *Præmissæ non sunt certiores quam conclusio, certitudine objectiva.* Certitudo enim objectiva propositionis nihil aliud est nisi veritas ipsius necessaria, seu immutabilis. At præmissæ non possunt esse magis necessariæ quam conclusio quæ ex iis necessario sequitur, & cum iis necessario connectitur.

II. *Utraque præmissa est æque certa in se, & evidens quoad nos, ac conclusio quæ inde deducitur:* Ratio prioris partis, est quia præmissæ necessario connexæ sunt cum conclusione quoad veritatem, seu certitudinem in se. Non possunt igitur esse minus certæ in se. Posterioris vero, quia præmissæ sunt causæ motivæ assensus qui conclusioni adhibetur. Non igitur

igitur majorem evidentiam, aut certitudinem quoad nos ei conciliare possunt, quam in se habent. Deinde conclusio sequitur debiliorem partem, ut supra ostensum.

III. *Præmissæ nonnunquam certiores sunt conclusionē certitudine subjectiva*, quæ in majori firmitate assensus nostri consistit.

Primo cum altera aut utraque præmissarum est de fide certiores enim sumus, id quod Deus testatur esse verum, quam id quod per ratiocinationem ex eo deducitur. Non enim repugnat ratiocinationem nostram hallucinari: At simpliciter repugnat id quod Deus testatur esse falsum. Hinc tamen non sequitur deductiones rationis nostræ, ex principiis fidei, esse incertas: sed tantum non esse in eodem gradu certitudinis cum ipsa fide. Si enim de alterutro dubitandum foret; aut dubitare liceret, citius eligeremus de conclusionibus Fidei, quam de principiis dubitare.

Secundo, præmissæ sunt certiores certitudinē subjectiva, quando sunt prima principia, aut quocunque modo per se notæ.

1. Quia in illo casu evidentiores sunt. Ubi enim est major evidentia major etiam est certitudo subjectiva, & vicissim; (licet hanc reciprocationem negat *Comptonus*.) Ideo enim certiores sumus de veritate aliqua, quia veritas illius apertior est menti nostræ, sive ex se, ut in principiis lumine naturali notis, sive extrinsecus, ut in iis quæ novimus Deum testari: Adeo ut quod quis evidenter videt, nullis rationibus ab eo divelli possit.

2. Assensus principiorum est lumen intellectus naturale, & propius accedit ad notitiam intuitivam, & Angelicam, quam assensus conclusionum, qui est lumen acquisitum, seu adventitium. Ergo est certior.

Qui præmissas semper æque certas esse volunt ac est conclusio, sic præcipue arguunt.

I. Præmissæ semper sunt causæ necessariæ conclusionis: Ergo agunt quantum possunt: & proinde certitudinem sibi parem conclusioni conciliant. Si autem non sint principia sed aliunde demonstrabiles, conclusio pluribus rationibus probari potest: scilicet tum ipsis præmissis, tum omnibus rationibus quibus hæc possunt probari.

Resp. Ad priorem partem Argumenti, non sequitur præmissas eo quod agant quantum possunt, totam certitudinem suam in conclusionem transfundere. Non enim transfundunt totam, aut parem evidentiam: id est, nunquam efficiunt, ut conclusio sit per se evidens. Sicut Sol licet agat quantum potest in corpora circumjecta, nunquam efficit ut æque secum lucida sint, aut (si flamma sit) ut æque caleant. Posterior autem pars nimium probat, nempe conclusionem ex præmissis prius demonstratis deductam, esse certiolem, & clariorem ipsis principiis ex quibus immediate inferitur, quod nemo dabit. Absolute igitur respondemus majorem vel minorem certitudinem aut evidentiam, non penes numerum majorem vel minorem rationum, esse metiendam, (prima enim principia nullis rationibus probari possunt, quæ tamen certissima sunt) sed secundum majorem vel minorem evidentiam.

Arguunt. II. Intellectus, lumine naturæ, novit ea quæ sunt eadem uni tertio, esse eadem inter se: Ergo non potest esse certior de veritate unius quam alterius, cum sint plane eadem quæ in præmissis cognoscuntur uniri eidem tertio, cum illis quæ in conclusione cognoscuntur uniri inter se.

Resp. Licet, sint plane eadem, non tantum re, sed ratione, unio tamen eorum cum eodem tertio, non est eadem cum unione eorundem inter se;

Quia

Quia extrema unita non sunt utrobique adæquate eadem. Potest igitur mens clarius percipere, & certius agnoscere unionem eorum cum eodem tertio, quam inter se, propter rationes supra allatas.

IV. *Premissa non semper sunt certiores conclusione.* Scilicet extra casus Theſi tertia memoratos.

Probatur unica ratione satis efficaci. Eædem propositiones quæ nunc sunt præmissæ, possunt esse conclusiones, respectu aliarum quæ conclusiones fuerunt. Scilicet cum reciproce unam propositionem ex alia, & hanc rursus ex illa, inferimus. Ut si arguas *aliquis homo est albus*, indeque inferas, Ergo *aliquod album est homo*: & deinde *aliquod album est homo*, Ergo *aliquis homo est albus*. In illo autem casu, propositio quæ nunc est antecedens, non potest esse certior quam in priori instanti in quo fuit consequens: Respectus enim iste, nullam vel evidentiam, vel certitudinem, ei conciliare potest. Quin potius, si in certitudine ulla esset inæqualitas, certior esset in statu illato, quam inferente: quia, in eo statu, per antecedens confirmatur. Argumentum factum in ipsis Syllogismis Demonstrativis locum habet; ut frustra objiciatur quæstionem esse de his solis. Solemus enim aliquando probare effectum per causam, aliquando eandem causam per eundem effectum. Ex. g. cum primo dicimus, *terra interposita est inter solem & lunam*, Ergo *luna patitur Eclipsin*: deinde *luna patitur Eclipsin*; Ergo *terra interposita est inter solem & lunam*. At hæc propositio, *luna patitur Eclipsin*, non potest esse certior cum est præmissa; quam cum locum conclusionis sortitur. Nulla enim ratio istius disparitatis cogitari potest.

Objicit *Comptonus*, I. In omni discursu, præmissa in hoc superat conclusionem, quod sit cognitio immediata, seu ex alia cognitione, hic & nunc non deducta; cujus contrarium in conclusionibus sem-

per reperitur: Ergo præmissa semper certior est.

Resp. Præmissa rarius est cognitio immediata secundum se. Quod autem aliquando, ex habitu assentiendi, sine medio particulari, assumi soleat: non exinde certior est. Sæpe enim in mente est habitus assentiendi conclusioni non minus firmus. Nec proinde minus certa est conclusio, ex eo præcise quod hic & nunc aliunde deducatur.

Objicit II. Præmissæ semper viciniore sunt lumen naturali intellectus, & plus de illo participant. Ergo certiores sunt.

Resp. Antecedens est aperte falsum. Quandoque enim remotiores sunt: Sive per lumen naturale mentis, facultatem assentiendi principiis universalibus intelligamus: Ut in hoc discursu, *manus est major quovis ex digitis suis: Ergo quoddam totum est majus sua parte. Ubi conclusio proxima est principio universali, omne totum est majus sua parte: Sive facultatem experimentalem: Ut si arguas vice versa, omne totum est majus sua parte, Ergo manus major est digito: hic enim conclusio per experientiam ex sensu immediate intelligitur. Fatemur præmissas quæ tales similiore esse principiis; quia hic & nunc non deducuntur ex aliis propositionibus. At non idcirco certiores sunt.*

Objicit III. Præmissæ sunt causæ æquivocæ conclusionis, ergo.

Resp. Consequentia nulla est; Quia causa, sive univoca, sive æquivoca, non semper est nobilior suo effectu, sed tantum æqualis.

Objicit IV. Illud axioma Aristotelis, *propter quod unumquodque est tale, illud magis tale est.*

Respondent quidam effectum istud in sola causa finali veritatem obtinere.

Replicat Comptonus, adjectis quibusdam conditionibus, verum esse universaliter. Quatuor autem conditiones enumerat.

Prima est, ut id in quo fit comparatio, conveniat utrique

utriusque extremo. Cujus defectu non recte inferitur, *Homo est miser propter peccatum: Ergo ipsum peccatum miserius est.*

Secunda est, ut id in quo fit comparatio suscipiat magis, & minus. Cujus defectu non sequitur, *Petrus est homo propter patrem; ergo Pater est magis homo.*

Tertia est ut comparatio fiat inter extrema realiter distincta: Cujus defectu mala est illatio, *homo discit currere quia est animal rationale, ergo animal rationale magis discit currere.*

Quartam vix intelligo. Addit, *semper tenere in causa per se motiva, & non in voluntate magis quam in intellectu.* Sicut enim, inquit, quia media amantur propter finem, ideo finis magis amatur, & majorem habet bonitatem, sicut ut apprehenditur, ita etiam quia premissæ movent ad assensum conclusionis, ideo majorem habent similitudinem & evidentiam.

Resp. I. Sed neq; cum omnibus istis limitationibus, dictum illud universaliter verum est. Male enim inferitur, *propter flumen movetur asser injectus: Ergo ipsum flumen magis movetur.* Motus enim in quo fit comparatio, convenit utrique; magis & minus suscipit, estque diversus realiter in aqua fluminis & asseri; fieri tamen potest, & sæpe fit, ut asser eadem velocitate feratur ac flumen. Recte igitur sentiunt qui in sola causa finali tenere pronunciant. Quamvis non in omni istiusmodi causa obtineat. Non enim sequitur, *propter sanitatem conciones sacra sunt expetibiles*, quidam enim concionatores alleviationem morbi ex iis senserunt; & mulier quædam piensissima, in hac ipsa villa, quæ difficultate spirandi vehementi laborabat, nullam ex ea molestiam, per totos dies dominicos sensit, quamdiu publico cultui interfuit, non, inquam sequitur, ergo ipsa sanitas est magis expetibilis. Verum igitur est cum finis unicus, aut principalis est. Nec proinde tenet in omni causa motiva.

Finis enim secundarius movet voluntatem, ad media eligenda, & prosequenda; in quo tamen non tenet. Unde tandem apparet, nullum esse consequentiam hanc, *propter præmissas assentimur conclusioni*; Ergo *magis assentimur præmissis*: Possumus enim propter præmissas assentiri conclusioni, quia videmus in præmissis conclusionem contineri, seu cum illis necessariam habere connexionem; non autem quia magis iis assentimur.

Quæst. VIII. *An Divisio Demonstrationis in Demonstrationem hōi, & diōi sit adæquata?*

Resp. *Affirmative*. Sive enim accipiamus Demonstrationem late, pro omni Syllogismo necessario, sive stricte, pro eo solo qui concludit à causa necessaria, vel ab effectu, aut signo necessario, vel tantum probat Attributum convenire vel non convenire subjecto, estq; Demonstratio hōi, vel etiam ostendit causam, aut rationem causæ analogam, cur conveniat, vel non conveniat, estq; Demonstratio diōi; nec inter membra ista datur Syllogismus necessarius medius.

Objiciuntur quidam Syllogismi necessarii, qui ad neutrum membrum spectare videntur. Ut Syllogismus concludens ex Testimonio Divino; Syllogismus ex absurdo, seu ducens ad impossibile; Syllogismus ex causa adæquata & proxima, qui ex sola causa remota & inadæquata concludere putatur.

Respondemus ad primum. Syllogismum ex Testimonio Divino concludentem, esse Demonstrationem hōi, quia solum probat conclusionem esse veram; sed causam veritatis non ostendit, nisi Deo placeat causas rerum de quibus testatur nobis exponere, in quo casu est Demonstratio diōi. Ad secundum respondent quidam Divisionem de qua agimus, esse solius Demonstrationis ostensivæ. Sic enim appellant Logici Demonstrationes illas quæ ex alio medio, quam absurdo concludunt. *Conimbricenses vero in lib. 1. post. cap. 10. quæst. 1. art. 2. dicunt Syllogismum* ducentem

ducentem ad impossibile sub utroque membro contineri: Scilicet cum in Syllogismo Hypothetico, consequens est aliquid impossibile, & continet causam destructionis Antecedentis, esse *Demonstrationem dióti*; sin minus, esse *Demonstrationem hóti*. Exemplum prioris quod adferunt est, *si homo non esset aptus ad capeffendas disciplinas, non esset particeps rationis; sed est particeps rationis: Ergo, Posterioris vero, si homo non esset particeps rationis, non esset aptus ad capeffendas disciplinas; at est aptus; Ergo.*

Fatendum quidem est, quamlibet Demonstrationem posse forma hypothetica, ad impossibile ducente, proponi. Ut in exemplis proxime factis. Sed quæstio est de syllogismis quæ non possunt facile ad formam ostensivam & Categoricalam reduci. Scilicet ubi quatuor sunt termini complexi, seu quatuor propositiones. Ut in hoc; *Si iustitia est ex lege, Christus frustra mortuus est; at impossibile est Christum frustra mortuum esse: Ergo.* De his autem palam est, non esse alios quam *Demonstrationes hóti*. Nec enim ex eo, quod si propositio aliqua esset falsa, sequeretur aliquid aliud esse falsum, quod necessario verum est, aut contra, plus concluditur, quam illam propositionem esse veram, vel falsam. Nam quod, aliquid, quod actu existit vel possibile est, esset impossibile, nunquam exhibet causam cur aliquid actu existat, vel possibile sit; sed tantum est signum quod actu sit, vel esse possit. Syllogismus igitur ducens ad impossibile, quatenus ad illud ducit, est tantum *Demonstratio hóti*.

Ad tertium respondent Syllogismum concludentem ex causa adæquata, quæ inadæquata ex accidenti putatur, in se quidem esse *Demonstrationem dióti*, sed quoad nos esse tantum *Demonstrationem hóti*. Hic concedimus materiam aptam esse ut Syllogismus sit *Demonstratio dióti*. Sed cum omnis *Demonstratio* sit actus mentis, vel oratio qua is significatur,

dicendum est vera demonstratio fit, (de quo statim), esse tantum *bóni*, etiam in se.

Objicitur porro, eundem discursum diversis vicibus esse Demonstrationem & *bóni*, & *díoti*. Ut si quis prius cognoscat rem per causam, non sub ratione causæ, sed medii cujuspiam alius necessarij, habet tantum Demonstrationem *bóni*: postea vero cum agnoscit causam esse causam, habet Demonstrationem *díoti*. Deinde duæ illæ Demonstrationes ex iisdem terminis confici possunt. Ut si ex his tribus terminis, *rationale*, *homo*, *visibile*, duo fiant Syllogismi, & medium in altero sit *rationale*, in altero *visibile* prior erit Demonstratio *díoti*, posterior *bóni*.

Resp. Ad prius, Discursum in his casibus, non fore eundem ne quidem specie. Quia in posteriori diversum est objectum, nempe causalitas medij in majus extremum: adeoque diversa specie cognitio quæ ad eam terminatur. Cognitio enim pro diversitate objecti formalis specie diversa est. Ad posterius dicimus, ex iisdem quidem tribus terminis utramq; Demonstrationem confici posse, diversimode tamen dispositis & consideratis, ita ut diversas propositiones conficiunt.

Objicitur denique, discursum in quo solum ostenditur aliquid esse, non esse Demonstrationem. Non enim generat Scientiam. Siquidem Scientia est notitia in qua mens acquiescit. At per discursum illum, non acquiritur notitia in qua mens acquiescit. Avert enim porro mens causam scire cur res sit.

Resp. Neg. primum & secundum Antecedens. Ad probationem dicimus, per discursum de quo agitur, acquiritur notitia in qua, quoad certitudinem, & evidentiam de esse rei, mens acquiescit, (quo ad rationem Scientiæ sufficit): licet ulterius scire efflagitet causam propter quam res sit. Unde Scientia per Demonstrationem *bóni* acquisita, vera quidem est, sed non potissima.

Quæst.

Quæst. IX. *An Demonstratio per causam remotam, sit hōti, an diōti?* Communis sententia dicit esse tantum hōti. Nos sic definimus.

I. *Probatio per causam remotam affirmativa, in eo casu quo reliqua non sunt in actu, aut remotam non necessario sequuntur; non est Demonstratio omnino; sed Discursus ad summum probabilis.* Posita enim sola causa remota, non sequitur effectus. Et cognita causa remota, nisi intelligantur poni causæ intermediæ, non intelligitur effectus necessario sequi. Sequi enim nequit nisi positis omnibus requisitis ad illius existentiam: Ad hanc autem requiruntur causæ proximæ.

II. *Ex negatione causæ, etiam remotæ, demonstratur conclusio negativa, in qua effectus negatur de subjecto.* Ut morbum non posse sanari, quia nullus est qui remedia applicet. Est enim medicus, vel quicumque remedia adhibet, causa tantum remota curationis. Sic *Anacharsis*, Scythæ, & Philosophus, cum interrogaretur cur in Scythia non essent tibicinæ, ut in Græcia, respondit per causam remotam, quia ibi non sunt vites. Quo innuebat tibicinas esse ex ebrietate; neminem autem Scytharum se inebriare, quia nulla inter eos est vitis, ex qua fiat vinum. Exemplum autem quod ex Aristotele vulgo adducitur, *plantas non respirare, quia non sunt animalia*, minus aptum est. Quia vita sensitiva non est proprie causa remota respirandi, magis quam homo est causa remota homicidii. Utraque enim est causa principalis, animal quidem per pulmones, ut instrumentum, & homo per gladium, aut aliquod aliud instrumentum mortis. Causa autem principalis, respectu instrumenti, non dicitur remota.

III. *Probatio per causam remotam, non est Demonstratio hōti, sed imperfecta diōti.* Ratio est manifesta; quia non tantum ostendit effectum esse, sed etiam cur sit, licet non adæquate, sed ex parte tantum. Ut si quis, ignoranti causam cur horologium movetur, ostendat pondus

pondus, sed de rotis quæ eo circumaguntur, nihil doceant, non tantum indicat horologium moveri, sed etiam partem aliquam causæ cur movetur. Deinde, probatio per causam proximam inadæquatam, non est Demonstratio *hósi*, sed imperfecta *diósi*; ut si ostendas malleum horologii moveri per rotam quæ ei proxima est, & nihil indicaveris de pondere quo hæc circumducitur. Ergo similiter probatio per causam remotam, erit *diósi*, licet imperfecta. Dico autem utramque esse imperfectam, quia ad perfectam notitiam effectus, per causas, requiritur ut omnes quæ sibi invicem subordinantur teheamus. Si enim remotam tantum percipimus, statim quærere incipimus intermedias, dum ad proximam perveniamus: Et cum solam proximam invenimus, non acquiescimus, dum remotas etiam detegamus, usque ad primam. Nec aliter perfecte scimus unde res sit.

Objicit *Burgesdicus Instit. lib. 2. cap. 24. ad Theor. 3.* Demonstratio à causa remota non affert eam causam in qua animus acquiescat. Non igitur solvit quæstionem cur res sit.

Resp. Disting. Conseq. non solvit perfecte quæstionem illam. Sicut nec demonstratio à sola causa proxima, quando aliæ sunt remotæ. Et in neutra mens acquiescit. Solvit tamen ex parte. Est enim causa remota una è causis cur res sit, ut omnibus notum est.

Quæst. X. An circulariter demonstrare licet effectum per causam, & causam rursus per effectum?

Respondent communiter Logici, cum distinctione; Duobus modis fieri posse circulum in Demonstrando. Prior est cum effectus probatur per causam; & deinde causa, sine ulteriori ejus notitia, per effectum. Ut si prius dicas *Homo est rationalis, ergo est risibilis*, & deinde (si quis postulet probationem antecedentis) *homo est risibilis ergo est rationalis*.

Et

Et circulum illum vitiosum esse fatentur: quia in eo idem usurpatur ut notius simul, & ignotius; & ex consequenti, idem probatur per seipsum. Ut si A sit causa tou B, & B rursus causa tou A, erit etiam A causa suiipfius. Nam in causis subordinatis, quod est causa per se causa. est causa etiam causati. Posterior modus est, cum primo ex effectu noto, colligitur esse res quæ est illius causa, non tamen percipitur esse causa; & deinde postquam talis esse intelligitur, effectus propter eam esse concluditur. Et huiusmodi circulum aiunt esse licitum, ac utilem, & Regressum vocari. Sic *Compt. Disp. 48. sect. 3. Burgerdicius*, capite proxime citato. Addit etiam inibi *Comptonus*, sæpe per effectum causam probari, & effectum vicissim per causam, non quidem eundem numero, sed diversum, ejusdem tamen rationis. Ut ex abundantia vaporum, demonstrare possumus pluviam futuram; deinde ex pluvia abundantiam vaporum futuram, non quidem eorundem, sed aliorum. *Ubi enim natura circulum facit in essendo, ibi etiam nobis licet circulum facere in cognoscendo.* *Reckermannus* tamen paulo aliter circulum vitiosum describit: scilicet, cum primo per causam proximam probamus effectum, & deinde causam proximam per eum tanquam per causam, *Syst. Log. lib. 3. cap. 15.* Consentunt vero omnes, circulum vitiosum incipere à causa ad effectum, & procedere ab effectu ad causam. Varia hic occurrunt errata.

I. Solutio *Comptoni* & *Burgerdicii* ex parte obscura est. Non enim declarat, utrum cum ex effectu sensibili colligitur causa indistincte, ut res aliqua, sed non ut causa, effectus percipiatur distincte, ut effectus, an solum confuse, ut res aliqua. Et si ut effectus, utrum ut tantum effectus alicujus causæ indeterminatæ, an certæ, & determinatæ.

II. Deinde assumit pro vero quod falsum est: scilicet demonstrari posse causam per effectum, cum
interim

interim causa non intelligitur esse causa. Illud autem falsum esse hinc constat. Demonstrari non potest existentia unius rei, per existentiam alterius, nisi mens percipiat connexionem necessariam alterius cum altera. Cum igitur mens, ex effectu colligit causam vel actu existere, vel saltem extitisse, videt ea esse connexa. Atqui vel videt connexa esse ut causam & effectum, vel in aliquo alio genere. Si posterius; Demonstratio erit erronea, finget enim habitudinem inter res quæ non est. Si prius, quandoque colligit causam ex effectu, necesse est ut percipiat causam esse causam. Ut cum ex intuitu hujus universi, colligitur esse Deus, qui ejus autor sit.

Dices forte, sufficere si meas videat res quæ sunt causa & effectus, esse in aliquo genere connexas, licet qualem connexionem, in specie habeant, non percipiat. Tunc enim facile ex unius existentia, colliget existentiam alterius.

Resp. Nego Antecedens. Quia mens non aliter cernere potest connexionem rerum, quam percipiendo, in specie, earum naturas, & qualem habitudinem ad se invicem gerant; scilicet causæ & causati, vel subjecti & adjuncti, vel totius & partis, aut aliquam aliam ejusmodi. Nemo enim ex existentia mundi concludere potest esse Deum, nisi percipiat simul esse aliquod ens quod maximæ potentiz & sapientiz sit. Hoc est nisi concipiat Deum talem esse ut potuerit mundum creare, seu esse illius causam.

Instabis. Mentem nostram sæpius cernere connexionem necessariam attributorum, & proprietatum quas in rebus invenit, percipere tamen qualis sit habitudo, in specie, unius ad aliud. Ex g. plerique, primo intuitu, agnoscent simplicitatem connexam esse cum indivisibilitate, & vicissim: pauci tamen ostendere possunt quam habitudinem altera gerit ad alteram.

Resp. Pauci ostendere possunt verbis, & in actu signato. Omnes tamen quæ ea percipiunt, inveni-

unt

unt mente, saltem in actu exercito, habitudinem aliquam, in specie. Impossibile enim est connexionem illam percipere, nisi videat mens indivisibilitatem esse, per quam res divisionem partium respuit; Simpliciter vero, per quam partibus, aut pluralitate componentium, vacat. Cum igitur mens, ex eo quod res sit indivisibilis, colligit esse simplicem, videt eam nullis partibus constare in quas dividi possit: quod in re idem est, ac simplicitatem esse rationem, seu causam indivisibilitatis; licet non semper verbis istud ostendere queat, eo quod nesciat quibus verbis exprimendum sit.

Ex his etiam manifestum est, effectum, cum per eum innotescit causa, cognosci ut effectus est, seu ut quid dependens ex eo quod indigitat. Secus enim cerni nequireret causa ut cum eo necessario connexa, quoad existentiam, presentem, vel præteritam. Ut qui videt lunam obscurari, & inde colligit corpus aliquod opacum, lucem solis, quia illustrari solet, intercepte, per illum ipsum actum mentis percipit obscurationem esse ex lucis interceptione. Qui enim aliter percipere posset lucis interceptionem cum obscuratione Lunæ connexam esse, ita ut si hæc sit, oporteat etiam illam esse?

Objiciet forte quispiam, hinc sequi nullam esse Demonstrationem per effectum, sine Scientia, & Demonstratione effectus per causam. Et Scientiam quæ habetur à posteriori includere Scientiam à priori, quod absurdum videtur.

Resp. Sequitur quidem nullam esse Demonstrationem ex effectu, sine Scientia & Demonstratione indirecta effectus per causam, quod verissimum est. Si enim percipio effectum esse effectum hujus vel illius causæ, consequenter & indirecte percipio causam esse causam illius effectus. Probe enim novi causam & effectum esse Relata, & reciprocari.

interim causa non intelligitur esse causa. Illud autem falsum esse hinc constat. Demonstrari non potest existentia unius rei, per existentiam alterius, nisi mens percipiat connexionem necessariam alterius cum altera. Cum igitur mens, ex effectu colligit causam vel actu existere, vel saltem extitisse, videt ea esse connexa. Atqui vel videt connexa esse ut causam & effectum, vel in aliquo alio genere. Si posterius; Demonstratio erit erronea, finget enim habitudinem inter res quæ non est. Si prius, quandoque colligit causam ex effectu, necesse est ut percipiat causam esse causam. Ut cum ex intuitu hujus universi, colligitur esse Deus, qui ejus autor sit.

Dices forte, sufficere si mens videat res quæ sunt causa & effectus, esse in aliquo genere connexas; licet qualem connexionem, in specie habeant, non percipiat. Tunc enim facile ex unius existentia, colliget existentiam alterius.

Resp. Nego Antecedens. Quia mens non aliter cernere potest connexionem rerum, quam percipiendo, in specie, earum naturas, & qualem habitudinem ad se invicem gerant; scilicet causæ & causati, vel subjecti & adjuncti, vel totius & partis, aut aliquam aliam ejusmodi. Nemo enim ex existentia mundi concludere potest esse Deum, nisi percipiat simul esse aliquod ens quod maximæ potentiae & sapientiae sit. Hoc est nisi concipiat Deum talem esse ut potuerit mundum creare, seu esse illius causam.

Instabis, Mentem nostram sæpius cernere connexionem necessariam attributorum, & proprietatum quas in rebus invenit, nescire tamen qualis sit habitudo, in specie, unius ad aliud. Ex. g. plerique, primo intuitu, agnoscent simplicitatem connexam esse cum indivisibilitate, & vicissim: pauci tamen ostendere possunt quam habitudinem altera gerit ad alteram.

Resp. Pauci ostendere possunt verbis, & in actu signato. Omnes tamen quæ ea percipiunt, inveniunt

unt mente, saltem in actu exercito, habitudinem aliquam, in specie. Impossibile enim est connexionem illam percipere, nisi videat mens indivisibilitatem esse, per quam res divisionem partium respuit; Simpliciter vero, per quam partibus, aut pluralitate componentium, vacat. Cum igitur mens, ex eo quod res sit indivisibilis, colligit esse simplicem, videt eam nullis partibus constare in quas dividi possit: quod in re idem est, ac simplicitatem esse rationem, seu causam indivisibilitatis; licet non semper verbis istud ostendere queat, eo quod nesciat quibus verbis exprimendum sit.

Ex his etiam manifestum est, effectum, cum per eum innotescit causa, cognosci ut effectus est, seu ut quid dependens ex eo quod indigitat. Secus enim cerni nequireret causa ut cum eo necessario connexa, quoad existentiam, præsentem, vel præteritam. Ut qui videt lunam obscurari, & inde colligit corpus aliquod opacum, lucem solis; quia illustrari solet, intercepte, per illum ipsum actum mentis percipit obscurationem esse ex lucis interceptione. Qui enim aliter percipere posset lucis interceptionem cum obscuratione Lunæ connexam esse, ita ut si hæc sit, oporteat etiam illam esse?

Objiciet forte quispiam, hinc sequi nullam esse Demonstrationem per effectum, sine Scientia, & Demonstratione effectus per causam. Et Scientiam quæ habetur à posteriori includere Scientiam à priori, quod absurdum videtur.

Resp. Sequitur quidem nullam esse Demonstrationem ex effectu, sine Scientia & Demonstratione indirecta effectus per causam, quod verissimum est. Si enim percipio effectum esse effectum hujus vel illius causæ, consequenter & indirecte percipio causam esse causam illius effectus. Probe enim novi causam & effectum esse Relata, & reciprocari.

Pro Solutione igitur quæstionis dicimus,

I. Postquam ex effectu demonstratur causa, institui potest novus discursus, quo per eandem causam effectus demonstretur. Nec probatio istiusmodi reciproca erit circulus vitiosus: non quia causa tum distincte cognoscitur, seu esse causa, aut quia aliquid de ea detegitur, quod novum medium sit, sed quia causa & effectus, licet assumantur ad se mutuo probanda, non tamen idem, aut eodem modo probant. Effectus enim probat Causam esse, vel fuisse in actu, & qualisnam illius indoles sit: at causa probat non tantum effectum esse, sed etiam ostendit cur, & unde sit. Circulus autem vitiosus est, cum duo usurpantur ad eandem, sive plane similem quæstionem, de se mutuo probandam: ut si concluderes *Petrum esse doctum quia didicit*, & rursus *didicisse quia est doctus*. *Ecclesiam esse infallibilem, quia sic testatur Scriptura*; & *Scriptura credendum esse, quia de ejus veritate testatur Ecclesia*, quemadmodum arguunt Pontificii, contra intrinsecam Evidentiam divinitatis Scripturæ.

II. Interim tamen nullus est usus istiusmodi reciprocationis, nisi ad eum instruendum qui non evidenter capit probationem causæ per effectum. Tunc enim commodum erit dicere, *res illa quam alia esse ostendit est causa ejus quam esse ostendit*. Sed qui ex effectu clare percipit esse causam, simul etiam percipit propter causam existere effectum.

DISPU.

DISPUTATIO XXIX.

De Syllogismo Sophistico, seu Fallaci.

SYllogismus fallax dividitur communiter, in *Pseudographicum* & *Sophisticum*. Prior est qui videtur ex media necessario concludere, sed non concludit. *Pseudographicus* autem vocatur, per allusionem ad *Pseudographemata*, hoc est ad fallas delineationes figurarum in Geometria, quæ incautos & imperitos fallunt. Semper enim assumit principium vel falsum, ex quo falsam conclusionem infert; ut cum Pontificis sic arguunt, *Extrema Unctio est Sacramentum, seu sacrum signum ab Apostolis institutum; Ergo gratiam obsignat, & confert. Est ignis purgatorius; Ergo etiam vere credentibus, in Christum post mortem timendum est.* Vel veram conclusionem quidem infert, sed ex ratione inepta, seu ex eo quod veram causam non continet. Ut cum Cardanus rationem reddit, cur *femina citius adolescant quam mares, quia scilicet calidiores sunt*, cum vera ratio sit, quia temperamento humidiori constant. Unde discursus istiusmodi errorem, & habitum erroneum gignit, quem Aristoteles *Ignorantiam prava dispositionis* appellat, per quam mens habitu quodam male sentiendi inficitur: Cui opponitur *ignorantia pura negationis*, cum scilicet nec recte de re sentit, nec male; qualis est ignorantia in pueris, & idiotis.

Medium in ejusmodi discursu fallaci sæpius artificiale est, ut in exemplis proxime adductis. Aliquando inartificiale.

1. A Testimonio sensum erroneo; ut cum quis putat baculum in aqua esse fractum, aut curvum, quia sic videtur.

2. A Testimonio divino male intellecto. Ut cum Pontificii ex verbis Christi, *Hoc est corpus meum* in institutione S. Coenæ, inferunt corpus illius esse in ea præsens.

3. Cum Testimonium Humanum, vel etiam Diabolicum, pro Divino habetur. Ethnici enim oculis Cacodæmonum fidem adhibuerunt, tanquam divinis. Et multi Pontificii Decreta Pontificum & Conciliorum, seu sententiam definitivam Ecclesiæ Romanæ, pro voce Dei venerantur.

Syllogismus Sophisticus est, qui videtur probabiliter concludere, sed non ita concludit. *Sophisticus* dicitur à *Sophista*, quæ vox olim honoris nomen fuit, & *Sapientem*, vel *Doctum* significabat. Postquam vero quidam Sapientum æmuli, sed vera sapientia destitui, captiosis ratiociniis aliis illuderent, & discipulos, lucri gratia, artem decipiendi, & cavillandi docerent, in malum sensum verti cæpit.

Quæst. I. *An utilis & necessaria sit doctrina de Syllogismo fallaci?*

Resp. Affirmative. Ejus enim beneficio, nostras aut aliorum in ratiocinando hallucinationes, & fallacias, detegimus; earum rationes & causas percipimus: adeoque instructiores sumus ad veritatem contra adversariorum strophas tuendam. Turpe etiam Logico esset, si, Sophisma peritiæ tentandæ gratia, ab alio propositum, diluere nesciret. Expedi igitur ut non tantum bonarum, sed etiam vitiosarum ratiocinationum formulas, & locos, aliquatim teneamus. Quanquam nihil hic opus sit longa & operosa tractatione, qualis à nonnullis instituitur.

Obj. I. *Ars Sophisticandi est illicita & noxia. At talis est doctrina de Syllogismo fallaci.*

Resp.

Resp. Ars Sophisticandi eo fine tradita, ut fallamus est illicita & noxia. At doctrina hæc non in eum finem traditur, ut fallamus, sed ut à fallaciis caveamus. Unde ars Sophisticandi dici non debet, sed potius ars cavendi à fallaciis.

Inst. At doctrina illa instructiores homines reddit ad fallendum.

Resp. Per accidens id facit, (ut gladius instructiorem reddit latronem ad nocendum) & quatenus in abusum trahitur, non per se, & ex fine suo.

Obj. II. Cum finis omnis artis bonum sit, in nulla debet quidquam tradi vitiosum.

Resp. Non debet vitium tradi ut sequamur, verum est; ut caveamus negatur. Tradit enim Ethica vitia moralia, ut ea fugiamus; Medicina morbos ut sanentur.

Obj. III. Omne vitium Syllogismi vel est in materia, vel in forma. Si in materia, sufficit, ad eam detegendam, doctrina de Syllogismo Apodictico, & Dialectico; præcipue vero cognitio naturæ rerum de quibus agitur. Si in forma, facile deprehenditur ex regulis quæ legitimam structuram Syllogismorum præscribunt. Nihil igitur opus est peculiari doctrina de Syllogismo fallaci.

Resp. Vitium quidem in forma facile deprehenditur, ex regulis de bona forma. Sed in Syllogismo fallaci, de quo nunc agimus, vitium est in materia. Vel enim altera aut utraque præmissarum est falsa: vel ambigua; vel alia propositio ac esse præsumitur, ut in Sophismate à non causa, pro causa, & ab imperfecta enumeratione partium; vel conclusio alia est quam esse debet, ut in ignoratione Elenchi. Unde licet doctrina de Syllogismo necessario, & contingenti, multum conducat ad vitia ista detegenda, & multo magis notitia rerum, & vocabulorum quibus res exprimuntur, opus tamen est locos communes vitiorum novisse, ut facilius evitentur. Quemadmodum in Ethica, non sufficit naturam cujusque
li
virtu-

virtutis describere, sed necessarium etiam est vitia opposita, & quibus in casibus contingant, notare, ut facilius caveantur. Sic etiam multum refert dignoscere, quibus præcipue modis mens nostra, in ratiocinando, hallucinari solet.

Quæst. II. *An recte dividantur Sophismata in ea que sunt in dictione, & in ea quæ sunt extra dictionem?*

Resp. Divisio illa communiter probatur: & plerique eam confirmant, & explicant, ut sequitur. In singulis Sophismatis duo, inquirunt, sunt notanda; *causa apparentiæ*, & *causa non-existentiæ*. *Causa apparentiæ* est quæ efficit ut syllogismus videatur verus & bonus, movetque imperitos, aut incautos, ad falsa pro veris amplectenda, *Causa non-existentiæ* est ratio propter quam non vere concludit. *Causa* autem *apparentiæ* vel est in *vocibus*, vel in *rebus*. In vocibus, cum vox, aut oratio, una & eadem apparet in præmissis, & conclusionem, quæ tamen diversa est secundum significationem, vel etiam quoad materiam. In rebus est, aliqua convenientia, vel diversitas, propter quam putantur ita eadem aut diversæ esse, ut vere de invicem affirmari, aut negari possint. Ergo omnis Sophisma oritur vel à vocibus, vel à rebus.

Objiciunt autem quædam quorum solutione rem ulterius declarant.

Obj. I. *Causa fallaciæ* est in eo qui fallitur: Et ex imperitia illius oritur. Ergo, saltem non semper est vel in vocibus, vel in rebus. Deinde res sunt causæ veritatis. Ideo enim actus mentis nostræ veri sunt, quia rebus, tanquam ad suum exemplar, conformantur. Et si in vocibus sit causa fallaciæ, sequetur primos linguarum Authores, & Deum ipsum qui linguarum primarum autor fuit, esse, in earum institutione, causas erroris.

Resp. I. *Causa interna errandi*, est imperitia, aut incogitantia, seu negligentia ejus qui fallitur. Sunt tamen aliæ externæ, quæ movent vel inducunt ad male

male judicandum: illæ autem vel sunt in vocibus, vel in rebus. Nihil enim aliud est in quo esse possint; Dices possunt mali Genii hominibus imponere.

Resp. Verum: Sed istud non aliter præstant, quam efficiendo ut vel a vocibus, vel à rebus, occasionem errandi arripiamus.

II. Res, si recte apprehendantur, sunt causæ obiectivæ veritatis, in actibus mentis nostræ. Cum autem male apprehenduntur, causæ errandi evadunt. Rectius respondebis, esse causas per se quidem veritatis, per accidens tamen, propter imperitiam aut negligentiam nostram, causas errandi fieri. Idem de vocibus dicendum: Ideo enim occasionem errandi præbent, quia non satis intelliguntur; aut quia minus intenti sumus ad circumstantias, quæ veram earum significationem exhibeant.

Inst. At saltem voces ambiguæ significationis sunt causæ per se deceptionis. Adeoque & earum primi Authores.

Resp. Non sequitur. Quia voces illæ ita usurpari possunt, ut nunquam per eas fallamur, nisi vel ex inscitia, vel negligentia. Et primi earum Autores, ut infirmitati nostræ consuluerunt in una voce ad plures res diversas. Significandas instituenda, (sic enim lingua paucioribus vocibus constat, & citius addiscitur) ita etiam voluerunt semper eo modo usurpari, ut intelligeretur in quo sensu accipiantur.

Obj. II. Unum & idem Sophisma est & à voce, & à re. Exg. *Canis est animal latrans. Quoddam signum cæleste est canis: quoddam igitur signum cæleste est animal latrans, est Sophisma Homonymiæ, ex ambigua significatione vocis canis. Atqui est etiam Sophisma accidentis. Ex accidenti enim est quod signum cæleste vocetur canis. Membra igitur hujus divisionis coincidunt,*

Respondent, quamvis idem Sophisma & à voce, & à re ortum ducat, quoad materiam, habet tamen diversas rationes formales, nempe diversas causas apparentiæ, unam in dictione. aliam in re, ut in exemplo facto. Deinde non omne Sophisma tale est. Quæ duo sufficiunt ad membra divisionis distinguenda.

Obj III. Sunt etiam Sophismata ex affectu inordinato. Cum homines de rebus arguunt eo modo ac esse velint, nec student eas percipere, & explicare ut vere sunt.

Resp. Sophismata illa, quatenus ab iis quæ supra diximus, distinguuntur, non regulis logicis, sed præceptis Ethicis, & bono animo indigent, ut caveantur, aut corrigantur. Adeoque sufficit in Logica ea in genere memorasse.

Quæst III. *An sex tantum sint genera Sophismatum in dictione?*

Resp. Communiter affirmatur, ex Aristotele, qui ea omnia ad sex locos revocavit.

Primus locus est *Homonymia* seu ambiguitas in unica voce: Ut *omnis vox est sonus, homo est vox*; Ergo *homo est sonus*. Vel in termino complexo; ut quod caret principio & fine est æternum; quicquid est rotundum caret principio & fine: Ergo quicquid est rotundum est æternum. Hic dicunt causam apparentia esse formalem unitatem unius termini, cui unitas significationis subesse videtur. Causam vero non-existentia esse realem diversitatem significationum. Et unitatem formalem sumunt pro unitate in aliis accidentibus præter significationem, puta in genere, casu, quantitate, accentu.

Secundus locus est *Amphibolia*, seu ambiguitas integre sententiæ. Ubi causam apparentia aiunt esse unitatem formalem orationis: Non-existentiæ vero, multiplicem illius significationem. Ut *Aio te Æacida*

Romanos

Romanos vincere posse. Ego feci te servum existentem liberum.

Tertius est *compositio* eorum quæ dividenda sunt.

Quartus contra, *divisio* eorum quæ conjungenda. Ubi causa *apparentiæ* est unitas materialis orationis. Causa *non existentia* est quod partes aliud significant, si conjunctim accipiantur, aliud si divisim. Ut duo & tria sunt par & impar; quinque sunt duo & tria: Ergo quinque sunt par & impar. Impossibile est *sedentem stare*; Socrates sedet: Ergo impossibile est Socratem stare.

Quintus locus est *Prosodia*; cum ex similitudine soni identitas significationis in vocibus colligitur. Ut *omnis populus est cæsus hominum*: quædam arbor est populus: Ergo quædam arbor est cæsus hominum.

Sextus denique est *figura dictionis*, cum propter similitudinem terminationis, colligit quis, voces similiter significare, aut eadem accidentia grammatica iis convenire. Ut *Poetam & Planetam* esse foeminini generis, quia *moneta* est foeminini generis: *ardere, stare, quiescere* significare actiones, quia *urere, flare*, actiones significant.

Obi. Sunt etiam Sophismata è vocibus *Tropicis*, & orationibus figuratis. Ut cum *Anthropomorphia*, ex eo quod Deo in sacris literis, manus, oculi, os, facies, tribuuntur, inferunt eum esse corporeum. Aut cum ex verbis Christi sacram cœnam instituentis, *Hoc est corpus meum*, inferunt Pontificii, panem post consecrationem transmutari in Substantiam corporis Christi.

Respondent Sophismata ista ad locos *Homonymiæ & Amphiboliæ* spectare. Et de Sophismatis quidem ex tropo dici istud potest. Sed de iis quæ sunt ex oratione figurata, non concederem. Sic enim sequetur in ipsa Scriptura sacra multas esse formas loquendi vitiosas, quales sunt omnes *Amphiboliæ*, utpote ex natura sua, & usu, plane ambiguae.

Sunt igitur Sophismata ex oratione figurata. Ut, si servus, cum ab hero, verbis Terentianis, *heus, bone vir curasti probe*, increparetur, responderet, idem male factum denuo faciendum esse. Sed parvi refert sintne plura an pauciora Sophismata ex vocibus, & oratione. Nulla enim ejusmodi sunt, quæ regulas quibus caveri & solvi possint, merentur, præter ea quæ ex homonymia, aut oratione tropica & figurata oriuntur.

Notandum etiam est, Sophismata ex compositione, & divisione, non esse in sola dictione, sed etiam in rebus. Pro harum enim compositione, aut divisione, in conceptu & sermone nostro, ex ambiguis præmissis inferri potest conclusio aperte falsa. Ut patet in exemplo trito, *duo & tria sunt duo numeri. quorum prior est par, posterior impar. Quinque sunt duo & tria: Ergo. Ubi sensus majoris est, duæ res, & tres res sunt duo numeri.* Et causa fallaciæ non est in vocibus, sed in rebus, non minus quam in Sophismate accidentis, vel à dicto secundum quid ad dictum simpliciter.

Septem vulgo statuuntur genera Sophismatum extra dictionem: scilicet Sophisma Accidentis, dicti simpliciter & secundum quid, Ignoratio Elenchi, Sophisma consequentis, petitio quasiti, non causa pro causa, & multiplex interrogatio. Quæ ab Ignorantia Elenchi, petitione quasiti, & dicto secundum quid oriuntur, definivimus in *Inst. part. com. cap. 31*. Multiplicem autem interrogationem prætermisimus, in qua plures quæstiones instar unius proponuntur, (ut desistne furari an non? amisistne cornua an non?) quia raro aut nunquam in errorem inducit. Et de his quidem nulla potest esse controversia. Sed de reliquis dissentit Logici. Sit igitur

Quæst. IV. Quid sit Sophisma accidentis; & an semper in forma peccet? Quod ad priorem partem attinet, *Aristoteles de Sophist. Elench. cap. 5.* dicit Sophisma

phisma accidentis esse, cum quidvis putatur æque rei, ac accidenti suo inesse. Sed exempla quæ adfert aliena videntur à definitione, aut non nisi obscure, & per vim quandam, ei conveniunt. Sunt enim ista: si *Coriscus sit diversus ab homine, erit etiam diversus à seipso, quoniam ipse homo est.* Vel, si *diversus sit à Socrate, diversus erit ab homine, eo quod Socrates est homo.* At intelligi nequit quomodo esse diversum à Socrate, vel ab homine, sit accidens *Corisci*, nisi quatenus nomine *Corisci* appellatur. Hinc struit *Burgesdicius* definitionem Sophismatis ab accidenti: "Cum subjecto convenire colligitur quicquid de prædicato dicitur. Et inniti dicit regulæ lib. 3. *Categor. traditæ*, "Quæcunq; dicuntur de Attributo rei, illa de re ipsa etiam dicuntur, sed latius extensæ quam veritas patitur: Fallit enim regula, inquit, cum de attributo dicitur aliquid per accidens. Duos hujus Sophismatis modos ponit. Alterum cum aliquid de Attributo dicitur per accidens. Ut *Homo est Species: Socrates est homo, Ergo, Socrates est species.* Alterum cum ipsum attributum dicitur de subjecto per accidens. Ut *Mus rodit caseum: Mus est Syllaba. Ergo, Syllaba rodit caseum.* Similiter fere *Galtruchius, de Argumentatione cap. 8.* "Fallacia accidentis est quando infertur aliquid rei convenire, ex eo quod accidenti ejus conveniat. Ut *Homo est Animal: Atqui animal est genus; Ergo Homo est genus.* Vel, *Petrus est homo: Homo est tertiæ declinationis; Ergo Petrus est tertiæ declinationis.* Cum modo illo secundo coincidit definitio ab aliis tradita, scilicet cum arguitur ex eo quod rei convenit per accidens. Ut *Evangelium bellum ciēt, vinum inebriat, Ergo sunt mala, neque in republica ferenda.*

Keckermannus deniq; *System. Log. lib. 3. cap. 3. sect. 3.* Dicit Sophisma accidentis, priori modo sumptum, in forma peccare: & idcirco inter syllogismos viciosos ratione materiæ, non esse connumerandum.

Posteriori vero modo revocat ad Sophisma à dicto secundum quid. Idem facit Autor *Artis Cogitandi part. 3. cap. 9.* dum Sophisma accidentis fieri dicit, “quando ex eo quod verum tantum est per accidens, deducitur conclusio absoluta, simplex & sine restrictione.

Hic reprehendimus in *Burgersdicio*.

I. Quod definitionem hujus Sophismatis non ita tradiderit, ut ambos illius modos quos postea recenseret, complecteretur. Secundus enim modus, in quo ipsum attributum de subiecto dicitur per accidens, sub ea non continetur, ut ex comparatione facile liquet.

II. Exempla quæ adducit sunt inepta.

Primum enim, *Homo est species, Socrates est homo, &c.* supponit tanquam verum, *speciem esse*. Accidens Hominis, ex nostro modo cogitandi ortum. Cum sit affectio necessaria omnium hominum, quatenus conveniunt in natura humana.

Secundum vero, *Mus rodit caseum, &c.* innuit *syllabam* esse accidens muris. Atqui nec est accidens vocis *Muris*, sed de ejus essentia. Nequeunt enim tres illæ literæ *Mus*, prout in lingua Latina usurpantur, plures syllabas conficere. Nec est accidens *bestia* quæ dicitur *Mus*. De ea enim nullo modo affirmari potest, ut per se patet. Nec cum dicitur *Mus est syllaba*; *Mus* sumitur pro bestia, sed pro sola voce. Idem dicendum est de exemplis *Galtruchii*.

In Keckermanno reprehendimus,

I. Quod Sophisma accidentis semper in forma peccare docuerit. Licet enim exempla quæ apud Burgersdiciū & Galtruchium vidimus, sic peccent, sunt tamen alia quæ in sola materia deficiunt. Quale est illud ab Aristotele traditum, cujus etiam memorat Keckermannus; *Qui est diversus à Socrate, est diversus ab Homine. Coriscus est diversus à Socrate, Ergo. Cujus vitium est quod major propositio falsa sit, aut saltem ambigua. Est enim propositio negans quoad sensum,*

sensum, & idem valet ac *qui non est Socrates non est Homo*, hoc est *non est ullus homo*. Et quatenus non est adæquate falsa, ambiguum sensum habet. Vel enim significat eum qui est diversus à Socrate, esse diversum ab omni homine, vel ab aliquo tantum. At non omnis Syllogismus cujus aliqua propositio ambigua est, in forma peccare censetur. Quin nec sophismata Homonymiæ; licet in iis reipsa quatuor sunt termini. Sufficere enim statuitur ad formam bonam, si Syllogismus in aliqua figura aut modo utili struatur. Dico autem ita *estimari* à Logicis, quia, an ubicunque est terminus qui diversimode accipitur, & sic realiter duplex sit, Syllogismus in forma vitiosus dicendus sit, est quæstio de voce *forma syllogistica*, in qua communi acceptioni standum est.

II. In eodem, & Autore Artis cogitandi, etiam reprehendi debet, quod Sophisma accidentis posteriori modo sumptum, revocent ad dictum secundum quid. Sic enim Sophisma illud, *Evangelium bella ciot, ergo est malum*, solvendum esset dicendo, *Evangelium esse quidem malum secundum quid, non autem simpliciter*. At quis Evangelii amicus solutionem istam feret? Evangelium enim licet ex accidenti bella cieat, nullatenus est malum. Et Autor artis cogitandi Sophisma à dicto secundum quid, distinctum ponit à sophismate Accidentis; ut & distingui debet.

Nec mala semper est illatio ex eo quod rei convenit per accidens. Ex attributo enim accidentali, recte infertur quicquid ei per se, aut Universaliter convenit. Inferre autem aliquid quod Attributo per accidens, aut in parte convenit, sive sit accidentale, sive essentiale, est in formam Syllogisticam impingere. Ut si dicas *Socrates est Philosophus: quidam Philosophus est Musicus, Ergo Socrates est Musicus*. Aut *Socrates est homo, quidam homo est cæcus, Ergo, Socrates est cæcus*.

Si

Si igitur per Sophisma accidentis intelligamus Syllogismum in materia defectuosum, nullus alius eo nomine venire debet, præter illum in quo, ex eo quod aliquid alicui per accidens convenit, colligitur de eo aliquid aliud tanquam per se conveniret. Ut, ex lectione scriptura nascuntur hæreses. Ergo lectio Scriptura laicis non est permittenda.

Quæst. V. Quid sit Sophisma consequentis?

Respondet *Burgersdicius Instit. lib. 2. cap. 27.* "Cum aliqua enuntiatio ex alia colligitur, ex qua non sequitur. *Keckermannus* vero, *Syst. Log. lib. 3. sect. 3. cap. 3.* dicit esse, "quando vitiosa est connexio medii cum majori extremo, in propositione majori. Verum utraque Definitio est latior definitio. Prior enim complectitur omnem discursum vitiosum ratione consequentiæ. Posterior omnem illum qui vitiosus est, ob maiorem propositionem falsam, vel ambiguum.

Sophisma igitur consequentis est, cum ex consequente inferatur antecedens; aut ex opposito Antecedentis oppositum consequentis. Antecedens autem hic dicitur, non propositio aliqua, sed terminus alium inferens, ut Species suum genus, Causa in actu suum effectum. Consequens vero qui ex alio sequitur, seu ex eo inferri aptus est. Ex. g. est blandus. Ergo, est adulator. Nocturno ambulat: Ergo est fur. Blande enim se gerere est consequens adulatoris: & nocturno ambulare, furis quia latius patent. Oppositum autem antecedentis ad oppositum consequentis rationem consequentis obtinet. Ut, Angelus non est animal, Ergo nullos habet affectus.

Quæst. VI. Quid sit Sophisma non causæ pro causa?

Respondet *Burgersdicius*, loco proxime citato, esse vel cum, in Syllogismo ducente ad incommodum, falsitas conclusionis absurdæ, propositioni alicui imputatur, quæ causa falsitatis non est, indeque inferatur propositionem illam esse falsam. Ut omne

immortale est aeternum? anima humana est immortalis; Ergo est aeterna: At conclusio est falsa, ergo aliqua ex praemissis; Non major, ergo minor. Anima igitur Humana est mortalis. Vel cum in Syllogismo directo causa per accidens, sumitur tanquam esset causa per se. Ut vinum inebriat. Ergo in Republica non est ferendum. Keckermannus vero, Sophisma non causae inter syllogismos in forma peccantes recenset.

Nos breviter sic statuimus.

1. Duo illi modi Sophismatis non causae, quos tradit *Burgersdicius*, defendi possunt. Et prior ab *Aristotele* adducitur.

2. Sophisma non causae non peccat in forma: ut patet ex exemplis adductis.

3. Sunt alia Sophismata, quae non minus recte non-causae dici possunt. Illa scilicet in quibus pro Causa per se venditur, quod nullo in genere causa est. Sic multi decipiuntur, putantes se causas rerum invenisse quas non invenerunt: Aut cum ex causis remotis effecta probant.

Obicit *Keckermannus*, eadem ratione statui debent Sophismata *non-Generis* pro genere, *non subjecti* pro subjecto, *non-proprii* pro proprio &c. Et tot erunt Sophismata quot sunt loci inventionis.

Resp. Non sequitur. Quia in reliquis locis inventionis, non attenditur qualitas medii; ex. g. sitne Genus, an subjectum, aut proprium; sed sufficit si conclusio vere sequi ex praemissis percipiat: At in loco causae requiritur ut sciamus medium esse causam: alioqui cognitio de conclusione non erit Scientia dioti.

Quaest. VII. An bonus unquam processus sit, in discurrendo, à dicto secundum quid, ad dictum simpliciter?

Pro solutione notandum est, Dictum simpliciter esse id quod sine adiectione effertur; ut *Homo, albus. Secundum quid* vero, quod cum adiectione aliqua; ut *Homo mortuus, albus dentes. Deinde triplicem asse-*
adjectio-

adjectionem; *determinantem, alterantem, & repugnantem.* Adjectio determinans est, quæ limitat id cui adjicitur, salva illius significatione. Estque vel *contrahens*, quæ determinat ad certam speciem, locum, aut tempus; vel *diminuens*, quæ determinat ad aliquam partem, vel respectum. Adjectio alterans est quæ significationem ejus cui adjicitur, immutat & variat. Ut in hoc complexo, *probus futor*, vox *futor* alterat significationem vocis *probi*, ut nihil aliud nisi *peritum* significet. Denique adjectio repugnans est, quæ significationem ejus cui adjicitur plane destruit. Ut in hoc complexo *Homo mortuus*, vox *mortuus* plane destruit & evertit significationem *hominis*, qui proprie significat aliquid corporeum vivens. His præmissis fit.

Thesis. A dicto secundum quid per Adjectionem contrahentem, ad dictum simpliciter bonus est processus. Ut *Socrates heri disputavit. Ergo disputavit. Sedit hic, ergo sedet. Est animal rationale, ergo est animal.* Sed si adjectio sit *diminuens, alterans, aut repugnans, processus est fallax.* Ut *Æthiops est albus dentes, ergo est albus.* Hic *homo est probus futor, ergo est probus.* Cadaver est *homo mortuus, ergo est homo.*

Obj. I. Bene sequitur Petrus est homo mortuus, est mortuus.

Resp. Processus iste est à dicto cum adjecto repugnante, non ad dictum simpliciter, sed ad adjectum repugnans quod per adjectionem non mutatur. Et idcirco legitimus est. In iis vero quæ per adjectum mutantur vitiosus est processus.

Obj. II. Valet hæc consecutio Homo est simus naso, Ergo est simus: Est crispus capillis, ergo est crispus.

Resp. Processus istiusmodi non sunt à dicto secundum quid, ad dictum simpliciter. Quia adjecta, significationem eorum quibus adjiciuntur, nullo modo immutant. Idem enim significat *simus*
nas

naſo ac ſimus ſimpliciter, criſpus capillis & criſpus ſimpliciter. Siquidem ſimitas ſoli naſo convenit, & criſpitie ſolis capillis. Unde adjecta iſtiusmodi ſunt ſupervacua, nec uſurpari ſolent niſi à poetis ad verſus explendos, aut per Pleonaſmum, & Emphaſin. Secus vero ſe habent reliqua Adjecta.

Quæſt. VIII. An ſunt Sophiſmata à dicto ſimpliciter ad dictum ſecundum quid? Communiter affirmant. Exempla adferunt, Dextra non eſt abſcindenda, Ergo ne quidem cum gangræna inſicitur. Homo eſt mortalis, Ergo etiam anima morti obnoxia eſt. Deposited eſt reddendum, Ergo gladius reddendus eſt Domino etiam furioſo. Addi poſſunt Æthiops eſt niger: Ergo nigros habet dentes. Chriſtus eſt ubique, ergo corpus ejus ubique eſt.

Respondendum tamen eſt cum diſtinctione. Quando dictum ſecundum quid continetur in dicto ſimpliciter recte ab hoc ad illud proceditur. Poſito enim toto ponuntur partes: At dictum ſimpliciter, cum continet dictum ſecundum quid, habet ſe ad illud ut totum ad partem; Ut ignis eſt calidus, Ergo quævis illius pars viſibilis eſt calida. Ideo autem exempla ſupra memorata non concludunt, quia dictum ſimpliciter eo ſenſu quo verum eſt, non continet dictum ſecundum quid. Ut non ſequitur, Homo eſt mortalis. Ergo anima hominis eſt mortalis; quia ſenſus dicti ſimpliciter eſt, homo eſt mortalis ſecundum corpus. Corpus autem non continet animam ut ullo modo eandem cum ſeipſo. Similiter deposited eſt reddendum, non eſt verum in quibuſlibet circumſtantiis, ſed tantum cum Dominus eſt compos mentis, extra quem caſum ceſſat eſſe Dominus. Idem de reliquis ſentiendum eſt.

Quæſt. IX. An recte omnia Sophiſmata extra diſtinctionem ſeptem ordinibus ſupra recensitis contineantur?

Reſpon-

Respondemus negative. Sunt enim præter septem illa genera,

1. *Argumentatio circularis*, de qua Disputatione præcedenti.

2. *Imperfecta enumeratio*, de qua in *Instit. part. com. cap. 31*.

3. *Argumentatio à divisis ad conjuncta*, & contra. De hac autem quæri potest quo in casu sit legitima, & quando vitiosa? Regulas aliquot de ea tradit *Deron. Log. contract. parte 5. cap. 2. num. 41*. Dicit autem licere argumentari à conjunctis ad divisa.

Primo in Enunciatione cujus prædicatum est compositum ex substantivo & adjectivo. Ut *Petrus est animal rationale*, Ergo *est animal*, Ergo *est rationalis*. *Est Homo doctus*, Ergo *est homo*, Ergo *est doctus*.

Secundo in Enunciatione cujus subjectum est compositum ex substantivo & adjectivo procedere licet à conjunctis ad divisum, secundum illam partem subjecti ratione cujus prædicatum convenit toti subjecto. Ut *animal risibile est homo*, Ergo *risibile est homo*. Quia prædicatum *homo* convenit toti subjecto ratione risibilis. Verum prima regula non tenet. Non enim sequitur, *Petrus est homo mortuus*, Ergo *est Homo*. *Appelles est bonus pictor*, Ergo *est bonus*.

Dicendum igitur tunc legitimam esse consecutionem à conjunctis ad divisum, & vicissim quando termini in utroque statu idem significant, nec per divisionem latius extenduntur, ut sæpe fit. Sin per Divisionem mutantur, aut latius extendantur, esse vitiosam.

DISPUTATIO XXX.

De Methodo, & Praxi Logicæ.

Quæst. I.

Quorundam ordo sit Methodus? Rerumne qua cognoscuntur, an conceptuum, & partium orationis externa? Burgesfæcius enim dicit Methodum esse ordinem rerum eodem pertinentium, &c. De ratione vero, juxta sua principia de modis differendi objectivis. (de quibus supra Disp. I.) dicere tenetur, Methodum de qua agitur in Logica, esse res quatenus certo modo à mente ordinantur; sumendo quatenus, non pro ratione formali, sed pro conditione requisita, ut sint Methodus vel ordo objectivus ut ipse explicat Proæmio Logicæ num. 19.

Thesis. Soli conceptus mentis nostra, & voces, ac sermones vocales, & scripti quibus conceptus significamus, sunt Materia Methodi.

Patet. Quia Materia Methodi sunt illa quæ in differendo à nobis ordinantur, per prius, & posterius. At soli conceptus, voces, & sermones, ita ordinantur. Res enim nullum ordinem à nostris ratiocinationibus acquirunt. Verum five recte five vitiose procedamus, eundem ordinem servant. Adde quod earundem rerum est Methodus ordinata, & ataxia. At hæc est conceptuum duntaxat, & sermonis. Nec ex in ordinatione in differendo ulla in rebus turbatio contingit.

Obj. Methodus est ordo rerum in mente. Ergo non consistit in solo ordine conceptuum, & sermonis.

Resp.

Resp. Cum res non alio modo in mente sint, quam per ideas, & conceptus qui eas repræsentant, ideo dicuntur in illa ordinari, quia conceptus in ea ordinantur: seu quia res tali ordine concipiuntur. Ex quo tamen nullus ordo aut mutatio in rebus obtingit. Similiter qui leges veræ Methodi non observant, dicuntur res confundere, quia conceptus aut orationem inordinate exercent.

Quæst. II. *An Methodus sit instrumentum Logicum à reliquis distinctum; puta à definitione, divisione & Syllogismo?*

Resp. I. *Methodus est instrumentum sciendi* Quia per Methodum multum promovetur Scientia nostra. Et defectus methodi Scientiæ officit. Multum enim refert quo ordine in rebus investigandis procedamus.

II. *Est etiam Instrumentum distinctum à reliquis.*

Patet, I. Quia distincta habet præcepta quibus dirigitur.

II. Quia à reliquis Instrumentis separari potest. Recte enim procedere potest Definitio, aut Divisio juxta præcepta propria definiendi, & dividendi, ubi deest Methodus, seu ordo debitus. Ut si prius definias speciem, & postea genus ejus divides. Aut si definitio rei definitioni nominis præmittatur.

Obj. I. Per Methodum nulla rerum notitia acquiritur, distincta ab ea quam per reliqua Instrumenta consequimur, scilicet per Enunciationem, Definitionem, Divisionem & Syllogismum. Non igitur est instrumentum ab iis distinctum.

Resp. Non sequitur. Ut enim Instrumentum sit sciendi, hoc est, medium Scientiæ acquirendæ distinctum, sufficit quod per eam facilius & perfectius notitiam quæ per reliqua acquiritur, assequamur. At manifestum est facilius & perfectius, per definitiones, divisiones, argumentationes notitiam rerum

rerum acquiri, cum illæ ordinate procedunt, quam cum temere fiunt.

Obj. II. Methodus nihil aliud est nisi habitudo, seu modus prioris, & posterioris, in reliquis instrumentis Sciendi. Hoc ipso enim quod unum ex iis præcedat, aliud sequatur, aut una ejusdem pars prius eliciatur, alia posterius, existit Methodus. Ergo non est instrumentum distinctum.

Resp. Distinguo consequens. Non distinguitur realiter à reliquis, ut hæc distinguuntur à se invicem. Non enim est actus aliquis mentis ab iis diversus. Distinguitur tamen modaliter. Est enim modus reliquorum, et partium eorum. Habetque se ad illa, ut Acies instructa ad milites dispersos, aut temere concurrentes.

Quæst. III. An Methodus Didascalica institui debet secundum naturas rerum, an secundum faciliorem nostram cognitionem. Prius tenet Piccolominæus, posterius Zabarella. Sed contentio facile, una vel altera distinctione, componitur: Dicimus igitur

I. Ad qualemcunque rerum notitiam rudioribus & captu infirmis ingenerandam, procedendum est ab iis quæ facilius cognoscuntur cognitione minus distincta, & imperfecta. Ut à particularibus ad universalia, ab effectis ad causas, ab accidentibus sensibilibus rerum ad essentias, ab exemplis ad regulas. Unde Aristoteles in lib. Categor. Summa genera rerum definit hos in typo, (ut ipse ait), per exempla. Ut Substantia est veluti homo, equus: Quantitas veluti tricubitum, &c. Ratio est quia finis omnis Methodi est faciliior cognitio. At per hanc Methodum rudes et mente infirmi facilius acquirunt cognitionem illam cujus sunt capaces.

II. Ubi vero cognitionem perfectam & distinctam ingenerare volumus, & si res nobis sit cum iis qui notitiâ prævectiores, et ingenio acutiores sunt, observandus est, quantum fieri potest, ordo rerum ipsarum, qui ordo natura dicitur.

Unde progrediendum est ab Universalibus ad particularia, à causis ad ea quæ ex iis oriuntur. A partibus ad tota, à simplicibus ad composita, ab essentiis ad accidentia, &c. Ratio est quia finis Methodi, est non tantum ut facile sciamus, sed etiam ut perfectam & distinctam Scientiam acquiramus, aut communicemus. At procedendo juxta naturas & ordinem rerum, ejusmodi cognitio acquiritur. Et docti ac intelligentes ubiq; hanc Methodum postulant, eaq; dilectantur. Sicut igitur veritas in definiendo, dividendo, & quocunque modo explicando, est conformitas conceptuum & sermonis ad naturas rerum, ita etiam rectitudo & perfectio Methodi est conformitas ipsius ad ordinem, seu habitudinem prioris & posterioris, quam res ad se invicem sortiuntur.

Ex his manifestum est ordinem naturæ, ordini facilioris cognitionis nostræ, si cognitionem perfectam intelligamus, non esse oppositum. Nec enim aliter cognitionem istiusmodi assequimur, nisi ordinem naturæ, seu rerum ipsarum observantes.

Communitè dividitur Methodus in *Syntheticam*, & *Analyticam*. Prior dicitur quæ procedit à principiis intrinsecis rei, ad ea quæ ex illis constituuntur. Eaque tradendas, aiunt, *Disciplinas Theoreticas*; puta *Metaphysicam*, *Physicam* & *Mathematicam*. Posterior est, quæ factò initio à fine, progreditur ad media quibus finis obtinetur. Et propriam esse affirmant *Disciplinarum practicarum*. De his sit

Quæst. IV. Quid de hac divisione: & definitionibus membrorum in qua facta est, sentiendum sit?

Resp. I. Definitiones illæ reprehensioni obnoxie sunt.

Primo enim, male dicitur Methodus Analytica quæ procedit à fine ad media. Methodus enim Analytica est quæ totum aliquod in partes resolvit, ut vox *'analysis'* indicat. At Methodus quæ procedit à fine ad media, istud semper non præstat. Siquidem

dem Finis non habet se ad omnia Media sua, ut totum ad partes: nec omnia media sunt partes constituentes finis: ut in arte ædificatoria actiones ædificandi non constituunt domum quæ finis illius artis est. Deinde ex una parte, Methodus quæ Synthetica dicitur non minus Analytice procedit quam illa quæ Analytica vocatur. Incipit enim à re tractanda, quam ut unum quid, investigandam proponit: deinde procedit ad principia illius constituentia, & partes varias. Incipit à genere quod est totum quoddam, & inde procedit ad species, quæ sunt veluti partes in eo contentæ. Ut patet in tribus Disciplinis supra dictis. Metaphysica enim incipit ab Ente in commune, & procedit ad ea quæ principia illius vulgo appellantur, Essentiam & Existentiam. Deinde progreditur ad affectiones illius communes & varias species. Physica ut vulgo traditur, incipit à substantia corporea in genere, cujus deinde principia communia, & species contemplatur. Mathesis incipit à Quantitate in genere, aut eam in Physica jam investigatam præsupponit: deinde in species dividit. Et de singulis agit, primo in genere, deinde principia, affectiones & species considerat. Methodus igitur quæ Synthetica dicitur resolvit objectum suum in principia, affectiones, & species.

Ex altera parte, Methodus Analytica procedit à simplicioribus ad composita quæ ex iis constituuntur, non minus quam Synthetica. Postquam enim Finem proposuit, quem etiam si opus sit, latius explicat, incipit semper à mediis simplicioribus, & facillioribus, si modo ulla sint simpliciora reliquis, & facilliora. Ut Grammatica à literis, & syllabis, à quibus procedit primo ad voces, deinde ad orationem. Logica similiter progreditur à Terminis simplicibus, ad Judicium, & inde ad Discursum. Nulum igitur est discrimen inter illas Methodos, nisi quod id à quo Analytica incipit, sit Finis sequen-

tium, id vero à quo Synthetica incipit, Genus. Adde quod finis sit unum è principiis in Disciplinis practicis. Movet enim ad media eligenda & exequenda. Et intentio finis, expresse, vel virtualiter, ingreditur, & constituit omnes actiones circa media. Sicut igitur Disciplinæ practicæ resolvunt finem in sua media, quatenus partes illius sunt, (ut Ethica Beatitudinem in varias virtutes ex quarum habitibus & actibus constituitur) ita etiam Disciplinæ speculativæ, res compositas resolvunt in suas partes, seu principia; ut Anthropologia Hominem, in corpus, & mentem; & mentem in suas facultates, corpus in sua membra, & organa.

Quin magis dicendæ sunt analyticè procedere quam Practicæ. Semper enim resolvunt Subjectum in sua principia componentia. Ut patet imprimis in Physica & Mathematica. Practicæ autem non semper resolvunt Finem in sua media. Plurima enim in iis tradunt media quæ Finem nullatenus ingrediuntur.

Dices Disciplinas Speculativas procedere à simplicioribus ad composita, ut à generibus ad species, à partibus minoribus ad majores.

Resp. Verum quidem: At idipsum præstant practicæ. Ut patet in Grammatica & Logica. Quin Ethica, postquam finis ultimus proposuit, primum generice tractat media, deinde ad species descendit. Ut primum agit de actionibus Humanis in genere, easque resolvit in sua principia, deinde ad species progreditur, actiones scilicet spontaneas & invitas, bonas, malas, & indifferentes &c.

Concludimus igitur utramque Methodum, tam illam qua speculativæ Disciplinæ, quam illam qua Practicæ traduntur, & Analyticam, & Syntheticam, diversa ratione, dici posse. Quæ enim incipit à Fine, Analytica dici potest, quatenus Finem resolvit in Media illa quæ in eo continentur. Quatenus
vero

vero procedit à simplicioribus, ad illa quæ magis complexa sunt, Synthetica vocari meretur, similiter illa quæ incipit à Genere & procedit ad illius species; Analytica est, quatenus resolvit & dilatat in species quæ in eo continentur. Synthetica vero, quatenus à simplicioribus ad composita progreditur.

II. Si genuinam horum vocabulorum significationem recte attendamus, Methodus Synthetica dicenda est, per quam veritatem invenimus. Analytica autem, per quam inventam resolvimus in suas partes. Adeoque prior erit illa pars Praxis Logicæ quæ *Genesis* dicitur; posterior illa quæ *Analysis*.

Autor Artis Cogitandi, *part. 4. cap. 2.* Methodum definit "Artem disponendi seriem multarum cogitationum, sive id fiat ad veritatem ignotam investigandam, sive ad cognitam aliis demonstrandam. "Methodus itaq; inquit, duplex est. Vel enim veritatem invenit, estq; Analysis, sive Methodus Resolutionis: Vel inventam docet, et est Synthesis; sive "Methodus compositionis; quæ & appellari potest "Methodus Doctrinæ tradendæ. De his sit

Quæst. V. *Quam recte tradita sint?*

Resp. I. Recte quidem Methodus dicitur *Ars per quam disponimus seriem Cogitationum, &c.* Nisi quod addi debuit, et *sermonum externorum*. Quanquam series sermonum, seriem cogitationum imitari soleat.

II. Sed mirum videri potest quod Methodum Analyticam, seu resolutivam, Methodum Inventionis appellet Autor; Syntheticam vero, Methodum docendi. Resolvimus enim res cognoscendas in sua principia, causas, partes, species, affectiones &c. non minus cum alios docemus, quam cū ipsi veritatem exquirimus, et invenimus. In neutro autē ex his exercitiis proprie loquendo cōponimus, nisi quod notitiā notitiæ in mentibus vel nostris, vel alienis adjicimus. Hoc autē utroq; in casu facimus. Est igitur methodus quam Autor prædictus Analysis vocat, nihil aliud quā *Genesis*. Quæ vero Synthesin nuncupat, est *Didactica*.

III.

III. Cum Analysis cogitationum & Termonum aliorum ad Methodum inventionis apte reduci vix possit, volueritque Autor, (ut ex definitionibus istis apparet) partes Praxis Logicæ exprimere, in hoc etiam deficit quod Divisionem tradiderit inadæquatam. Nam præter Methodum inveniendi & docendi, datur tertia, scilicet Methodus resolvendi ea quæ alii invenerunt, & docuerunt.

IV. Minus etiam recte partes illæ Artis Logicæ, Methodi nomine vocantur. Quia Methodus proprie loquendo nihil aliud est nisi ordo procedendi.

At in exercitiis illis præcipue æstimandæ sunt operationes Logicæ, definitiones scilicet, divisiones, argumentationes &c. Quarum omnium Methodus est tantum modus quidam, ut supra ostendimus. Quod si Methodi nomine quamlibet viam præstandi aut efficiendi aliquod opus, intelligat Autor, (ut, nonnunquam accipitur) sic non quarta pars Logicæ, (ut ipse vult) sed tota Methodus dici potest. Et distinguenda esset Logica in Methodum enunciandi, Definiendi, Dividendi, Argumentandi, & Ordinandi.

Quæst. VI. *An utilis sit Doctrina de locis ex quibus argumenta probantia eruntur?* Negat Autor Artis cogitandi part. 3. c. 17. Quæstio ista, ut ab eo agitur, ad disputationem de syllogismo pertinet. Verum quum ibi omissa sit, possitque ad omnes locos inventionis tam explicantes, quam probantes, extendi, non abs re erit quæstionibus de Methodo illam subicere.

Thes. I. *Ad argumenta sive explicantia, sive probantia inveniendâ, media præcipua sunt bonum ingenium, sedula & attenta materia propositæ scrutatio, & pensatio, una cum exercitatione, seu praxi.* Parum autem refert locos inventionis omnesque eorum Canones & regulas tenuisse, si ad ista conferantur. Unde Arriaga in Proæmio Summularum, seu Introductionis in Logi-

cam,

eam, "Omittam, inquit, Artem inveniendi Medium. Nullam enim aliam video commodiorem, nisi felix ingenium, studium continuum, frequentem disputandi, & respondendi usum, ac bonam memoriam, retinentem quæ in simili occasione ab aliis audita, aut à se cogitata aliquando fuere. Hinc plurimi qui Artem illam vel non didicerunt, vel oblivioni tradiderunt, facilius, citius, & rectius, Argumenta inveniunt, quam alii qui eam ad unguem callent. Non igitur putandum est eum qui ingenio tardo, aut materiæ propositæ ignarus est, posse ope locorum communium, in inveniendis argumentis, sive explicantibus, sive probantibus, aliquid insigne præstare. Et hoc proculdubio Autori supra laudato concedendum est.

Thes. II. Est tamen hujus Artis utilitas quadam non assernanda.

Prima utilitas est, quod per eam facilius sciamus habitudinem, in actu signato, Medii ad partes quæstionis. Hoc autem licet ad assensum veritati adhibendum necessarium non sit, (ad hunc enim sufficit connexionem terminorum percipere) aliquam tamen evidentiam veritati conciliat.

Secunda est, quod ad adversarium pertinacem convincendum conducit. Vehementius enim pungit Argumentum, si locum ostendimus unde deducitur, & canonem cui consequentia innititur. Tunc enim obistere nequit adversarius nisi habitudinem medii ad Terminos quæstionis, aut canonem communiter receptum negaverit, & sic novis disceptationibus & difficultatibus se implicet.

Tertia utilitas est, quod is qui facultate insigni inventionis non pollet, locis illis admonitus, plura argumenta, quæ ceteroquin non occurrerent, detegere possit. Quin utilis esse poterit locorum intuitio, si tempus permittat, ut cogitationi etiam acutissimi

cujusque media obveniant. Adde si utilis est doctrina de locis explicantibus ut de rebus definiendis, dividendis, &c. neque illa quæ de mediis invenientis plane inutilis æstimanda est. Si autem prior prorsus inutilis sit, necesse esset maximam Logicæ partem tanquam inutilem rejicere.

Obj. I. Experientia omnium qui doctrinam illam Inventionis didicerunt, testatur neminem, cum quæstio discutienda occurrit, ad locos illos respicere, sed recta omnes in materiam oculos intendere.

Resp. Fatemur quidem paucos aut nullos solere locos illos in argumentis excogitandis respicere: In prosequendis tamen et confirmandis, multi id faciunt. Ut omnium fere scripta testantur, præsertim eorum qui controversias tractant. In his enim locorum et canonum ad eos spectantium frequens occurrit mentio.

Obj. II. Natura ipsa, perpensio diligens rei tractandæ, et variarum veritatum præcognitio, nos ad probationes deducunt. Non igitur loci inventionis.

Resp. Hinc tamen non sequitur locos illos esse prorsus inutiles. Quia postquam argumenta invenimus, utiles esse possent, iis quos jam diximus modis.

Deinde licet natura ipsa, diligens rei tractandæ consideratio &c. præcipua media sint inventionis, possunt tamen loci illi occasionem multa invenienti præbere, quæ absque eorum notitia nunquam in mentes nostras venient.

Obj. III. Per Methodum Inventionis non alia argumenta quærentur, quam quæ Generalia, communia, et aliena sunt, et vim judicandi corrumpunt magis quam juvant.

Resp. Bona verba quæso: Si quis quærens argumenta ad gravitatem peccati contra Deum demonstrandam, oculos conjiciat in naturam et essentiam peccati, in causam efficientem, et Finalem ejus qui peccat,

peccat, &c. indeq; inveniret materiam quæ malum illud quam maxime horrendum ostenderet, an rationibus solum generalibus et alienis uteretur? Hocci-ne est argumentum generale, et alienum? *Peccatum est violatio legis, & contemptus voluntatis, & autoritatis Dei.* Aut si dicat *Homo habet à Deo quod sit, & quicquid boni possidet; conditus etiam est in honorem Creatoris sui.* Loci enim generales, cum ad hanc vel illam materiam applicantur, media specialia suggerunt. Autor igitur Artis Cogitandi, licet Logica ejus *mirabilis à nonnullis prædicetur*, et multa exhibeat quæ in prioribus Systematibus non occurrunt, quæstionem presentem non satis dextre tractavit.

Sunt etiam quæ de Praxi Logicæ disceptari possent. Verum cum Tractatus ultra magnitudinem in principio destinatum jam excreveris, et satis superque controversiarum complexus sit, hîc tandem Finis esto.

I

A

1

Ex

ELEMENTA LOGICÆ

PAUCIS
APHORISMIS
Comprehensa.

Per eundem Autorem.



DUBLINII,

Excudebat *Jos. Ray*, sumptibus ejusdem; prostant
Londini apud *Awnsham Churchill*, Bibliopol. ad
Insigne Nigri Cygni, in vico vulgò dicto
Pater noster-Row. 1683.

PRÆFATIO.

INstitutum Tractatiunculae sequentis
est, ut ea perlecta, & quantum fieri
potest, intellecta, instructiones accedant
Tyrones ad Systema integrum, quod Ar-
tem Sciendi appellavimus. Sic enim sta-
tim ab initio exerceri possunt in definiti-
onibus, divisionibus, & ratiociniis, in eo
traditis, juxta pauca illa præcepta hic
congesta resolvendis. Debuit quidem hæc
prælibatio Logicae, una cum Integro Sy-
stematico, in publicum prodire, & compin-
gi. Verum cum occasionem illam amise-
rit, satius fuit, ut hic in fine Elenctico-
rum, quam nullibi, publicaretur. Eam
igitur cum reliquis de re Logica scriptis
nostris, boni consulat vel secus Lector
quisque, prout ratio incorrupta, & æqui-
tas postulaverit.

ELE-

ELEMENTA LOGICÆ.

I. **L**ogica est Ars, per quam dirigimur, ad operationes mentis recte formandas, in cognitione rerum quærenda.

II. Quatuor sunt operationes Mentis nostræ; *simplex Apprehensio, Judicium, Discursus, et Methodus.*

III. *Simplex Apprehensio* est, per quam res, simplici modo, intuemur, nihil expresse de illis affirmando, aut negando: ut cum cogitamus de *sole*, aut *luce* sigillatim.

IV. *Judicium* est, quo statuimus aliquid de aliquo affirmando, vel negando; ut cum dicimus *Sol lucet, Sol non vivit.*

V. *Discursus* est, per quem inferimus unam veritatem, vel falsitatem, ex alia; ut cum arguimus, *Sol non vivit; Ergo nec mori potest.*

VI. *Methodus* est, per quam judicia, & Discursus nostros recte ordinamus.

VII. Ad operationes illas mentis recte formandas, ut postulat Logica, quædam cognoscenda sunt de rebus, eorumque attributis, & affectionibus communibus; quædam de vocibus, quæ res significant; quædam denique de ipsis mentis operationibus; earumque modis variis.

VIII. Ordines rerum simplicium duo sunt, *Substantia* & *Modus*. Substantia est res per se subsistens; ut *Mens Humana, Angelus, Anima, Planta, Lapis*. Modus est res substantiam afficiens, & ab ea ita dependens, ut citra eam existere nequeat: ut *cogitatio, appetitio, figura, motus, unio actio, &c.*

IX. Res aliæ *universales* dicuntur, quæ in pluribus omnino similes sunt: ut *Humanitas* in omnibus hominibus: Aliæ *singulares*, quæ pluribus vel non insunt; ut *Socrates, Bucephalus*; vel non per similitudinem, sed per identitatem; ut *Deitas, & perfectiones divinæ*, in tribus personis S. S. Trinitatis.

X. Hinc singularia *individua* vocantur, quia dividi nequeunt in plura ejusdem rationis; ex. g. *Socrates* dividi nequit in plures Socrates, ut *homo* dividitur in plures homines.

XI. *Attributum* Rei est, quicquid de ea vere enunciari potest. Estq; vel *positivum*, quod aliquid rei concedit; ut cum *animatum* dicitur de Homine, vitam ei tribuit. Vel *Negativum* quod aliquid à re tollit; ut cum *inanimatum* dicitur de lapide, aut cadavere;

XII. *Attributum negativum* aliud est quod *privam carentiam* denotat: ut cum *invisibile* dicitur de mente nostra. Aliud *privativum*, quod præter carentiam rei, capacitatem in subiecto connotat ad rem illam habendam. Ut cum *ignarus* & *cæcus* de homine dicuntur.

XIII. Aliud est *commune*, quod pluribus rebus convenit; ut *animal* homini, & bestię: Aliud *proprium*, quod uni soli convenit; ut *spiritui percipere*, & *se movere*. Homini esse *animal capax disciplinarum*.

XIV. Deinde aliud est *essentiale*, quod negari nequit de re sine contradictione; ut esse *rationis particeps* est *Attributum essenziale* Hominis; quia si de eo negetur, sequetur hominem non esse hominem. Aliud *accidentale*, quod contra; ut esse *divitem*, aut *doctum* est *Attributum hominis accidentale*; quia eo negato, non sequitur hominem non esse hominem.

XV. *Essentia* Rei est totum illud per quod res est id quod est; seu quod rem intrinsece constituit. Ut *mens, corpus*, & utriusque *unio* sunt *Essentia* Hominis. *Accidens* vero, quod rei in *Essentia* jam constitutæ, superadditur; & idcirco *adjunctum* dicitur. Ut *Grammatica* est *Accidens*, seu *adjunctum* hominis.

XVI. *Attributum Essentiale* vel est *Genus*, vel *Differentia*. *Genus* est *Attributum Essentiale*, habens se ad modum rei per se stantis, commune pluribus quæ essentis differunt: ut *Animal* ad *Hominem* & *Bestiam*; *Virtus* ad *justitiam* & *fortitudinem*. Unde *Genus* nomine *Substantivo* semper exprimitur.

XVII. *Differentia* est *Attributum* *essentiale*, habens se ad modum rei alteri adjacentis; & si perfecta & adæquata sit, rei cuius est *Differentia* *Propria* est. Unde nomine *Adjectivo*, aut voce æquivalente, sicut & *Attributa* *accidentalia*, semper exprimitur. Sic *rationati*, & *ea desitui*, sunt *Differentiæ* *hominis*, & *bestiæ*; *tribuere* *cuique quod suum est*; et *sustinere* *res adversas*, sunt *Differentiæ* *Iustitiæ* et *fortitudinis*.

XVIII. Plura illa quibus *Genus* commune est, *Species* vocantur: et *Differentiæ* eorum *essentiales* *specificæ* dicuntur; ut in exemplis jam datis.

XIX. Porro ex his duobus *Attributis*, alia sunt *Proxima*, alia *Remota*. Ut *Genus* proximum *Hominis* est *animal perfectum terrestre*; *Differentia* proxima est esse *ratione præditum*. *Genera* vero remota sunt, *vivens*, *corporeum*, *substantia*, *Ens*. *Differentiæ* remotæ sunt, *sensu* et *vitâ præditum esse*, *per se subsistere*, &c.

XX. Ex his vides omnia *Attributa* rerum simplicia, esse *Genus*, *Differentiam*, et *Accidens*. Et quæ ex illis combinantur *Attributa* sunt *complexa*: ut cum *animal rationale* dicitur de *Homine*, est *Attributum* *complexum* ex *Genere* et *Differentia*: cum *animal bipes* de eodem dicitur, est *complexum* ex *Genere* et *Accidente*.

XXI. Ex *Attributis* seu *affectionibus* rerum communissimis, quæ omnibus fere rebus convenire possunt, pauca in præsentī breviter notanda sunt.

XXII. Primum sit, *Distinctum* esse ab omni alia re. *Distincta* autem sunt quorum unum non est alterum, ut in *Homine* *mens* et *corpus*, *sensus* et *ratio*.

XXIII. Secundum sit *respicere aliquam aliam*, seu esse *Relatum* ad aliam. Sic *Pater* refertur ad *filiū* *Dominus* ad *servum*, *simile* ad aliud *simile* &c. et vice versa.

XXIV. Tertium sit esse *unum*. Unum autem dicitur quod non est plura in illa ratione in qua est unum. Estque vel *simplex*, quod pluribus non constat; vel *compositum*, quod contra.

XXV. Componitur autem Res vel ex pluribus *Substantiis*, ut homo ex corpore et mente. Vel è pluribus *modis* ut pulchritudo ex figura et colore, vel ex *subjecto et modo*, ut doctus, ex homine et doctrina. Eiusmodi autem compositum *concretum* dicitur. Forma autem per se considerata *abstractum* vocatur.

XXVI. Quantum sit *esse originem alius*. Ad locum autem originis pertinent *Subjectum, Signum, Causa, Objectum, et Conditio*, quæ sigillatim explicanda sunt.

XXVII. *Subjectum* rei dicitur, quod eam recipit, vel sustentat. Sic *lapis* projectus est subjectum impulsus, qui ei imprimitur, *Mens* est subjectum Scientiæ, *Miles* armorum. Quæ autem à Subjecto recipiuntur, & sustentantur, *modi, accidentia, et adjuncta* vocantur.

XXVIII. *Signum* est quod aliquid potentiæ cognoscitivæ percipiendum offert. Illud autem aliquid *signatum* vocatur. Sic *fumus* est signum ignis; *coactio nubium* pluviae futuræ.

XXIX. *Causa* in genere, definiiri solet cujus vi res est. Estque vel *materia vel forma, vel efficiens vel finis*. *Materia* est ex qua res fit, aut constat. *Forma* vero, per quam materia determinatur ad certum statum, et una cum ea, rem intrinsece constituit. Ut *lignum* est *materia* statuæ, *figuratio* varia est ejusdem forma.

XXX. *Efficiens* est quæ vera actione causat producendo, vel conservando. Ut *efficiens* statuæ est *Statuarius*.

XXXI. *Finis* est id cujus gratia res est. Ut, *finis* statuæ est memoriam conservare personæ quam representat.

XXXII. *Objectum* est id circa quod potentia vitalis, cognoscitiva scilicet, appetitiva, vel aversativa, exercetur. Sic *figuræ et colores* sunt objecta visus; *omnes res* sunt objectum mentis; *bonum et malum* sunt objectum appetitionis, & fugæ.

XXXIII. *Conditio* est quod aliquid confert ad esse rei,

rei; non tamen ut reliqua supra dicta, quæ ad originem illius pertinent. Ut *approximatio* ignis ad materiam idoneam, est conditio requisita ad comburendum: *Fides* in Christum est conditio novi foederis.

XXXIV. Quintum Attributum commune sit, *convenire cum aliquo*, & *ab aliquo differre*. *Convenientia* alia est in *voce*, alia in *re*. Quæ in voce conveniunt sunt vel *Homonyma* vel *Synonyma*.

XXXV. *Homonyma* dicuntur, quæ in voce quidem conveniunt, sed in nulla natura quæ voce illa significetur. Seu quorum nomen tantum est commune, ratio vero essentiae, nomine illo significata, plane diversa. Et vox istiusmodi *equivoca* dicitur, hoc est ambigua. Sic *canis latrans*, *canis piscis* & *signum coeleste* quod *canis* dicitur, sunt *Homonyma* respectu vocis *Canis*; estque vox illa ambigua.

XXXVI. *Synonyma* sunt, quæ non tantum in nomine conveniunt, sed etiam in natura quæ eo significatur. Sic *homo* & *bestia*, respectu vocis *animal*, *albedo* & *nigredo* respectu *coloris*.

XXXVII. *Convenientia* in re vel est in *essentiis*, vel in *accidentibus*. *Convenientia* in *essentiis* vel est *Generica* cum res in parte tantum essentiae conveniunt; ut *homo* & *bestia* in natura *sensitiva*: vel *specificata* cum in tota essentia conveniunt: ut *Socrates* & *Plato* in natura *humana*.

XXXVIII. *Convenientia* in *accidentibus*, cum in quantitate reperitur, *paritas* dicitur, si in aliis accidentibus, præsertim in modis, & qualitatibus, *similitudo* vocatur.

XXXIX. Sextum Attributum commune, sit *oppositum esse alicui*. *Opposita* autem dicuntur quæ pugnant inter se. Suntque vel *disparata*, nempe omnes species rerum; ut *homo*, & *bestia*, *equus*, & *asinus*: vel *contraria*; ut *album* & *nigrum*, *probus*, & *improbus*; vel *privative opposita*; ut *cæcus*, & *videns*; vel denique *contradictoria*, ut *homo*, non-*homo*.

XL. Septimum denique attributum commune, (ut cætera in præsentī mittamus) est *ordo*, per quem res dicuntur priores, posteriores & simul. Hoc autem quinque modis fit, tempore, natura, dignitate, dispositione & cognitione.

XLI. *Prius natura* dicitur, quicquid ad aliud requiritur, licet simul tempore cum eo sit. Sic *Sol* est prior *sua luce*, *cognitio* est prior *volitione*. *Prius cognitione* dicitur, quod noscibilius est, seu à cujus cognitione pendet cognitio aliorum. Sic priora sunt quæ sensibus obvia: priora sunt partes toto, Universalialia singularibus. Reliqua definitionibus vix indigent.

XLII. Hactenus de rebus earumq; Attributis, sequitur *Propositio*, quæ ex rei & sui Attributi complexione oritur, estque iudicii objectum, & prout ore effertur signum.

XLIII. Est igitur *Propositio* in qua aliquid de aliquo vere vel falso, affirmatur vel negatur. Ut *Deus est omniscius*, *creatura est mutabilis*.

XLIV. *Propositio* alia *simplex* est, quæ constat unico subjecto, & unico Attributo: ut in exemplis proxime allatis; alia *composita*, quæ pluribus subjectis, aut pluribus attributis, aut utrisque simul constat.

XLV. In propositione simplici, consideranda sunt *subjectum* de quo aliquid, & *Attributum* quod de aliquo effertur, quæ materia illius sunt, seu termini; & horum conjunctio, seu connexio, in propositione affirmante; separatio vero, in negante, quæ forma.

XLVI. *Connexio* interdum verbo *substantivo* sum, es, est, fuit, erit, & similibus designatur: ut *Socrates est doctus*: interdum verbo *adjectivo* includitur: ut *Socrates disputat*. Verbum enim *Adjectivum* *disputat*, idem significat ac *est disputans*: adeoque Attributum & copulam simul significat.

XLVII. *Separatio* Attributi à subjecto, in propositione negante, nota negandi indicatur: ut *Deus nunquam*

nunquam deliberat ; nihil impurum ingreditur regnum calor-
rum.

XLVIII. Propositio simplex vel est *Universalis*,
vel *particularis*, vel *singularis*.

XLIX. *Universalis* est, ubi Attributum affirmatur
vel negatur de omnibus quæ in subjecto continen-
tur : ut *omnis homo est mortalis* : *Nemo sine crimine vi-
vit* : *Particularis* ubi de parte tantum : ut *aliquis ho-
mo est expers peccati*. *Singularis*, ubi subjectum est
singulare, ut *Alexander Magnus regnum Persicum delevis*.

L. Propositionum simplicium, quædam *oppositæ*
sunt ; scilicet cum idem de eodem, in una affirma-
tur, in altera negatur. Ut tamen duæ propositio-
nes vere oppositæ sint, Termini utrobique eodem
modo accipi debent, & idem tempus intelligendum
est.

LI. Propositiones oppositæ vel sunt *contrariæ*, nem-
pe quæ non possunt esse simul veræ, possunt tamen
esse simul falsæ. Ut *omnis homo est iustus* ; *nullus ho-
mo est iustus*. Vel *contradictentes*, quarum altera sem-
per vera, altera falsa : ut *omnis homo est iustus* ; *aliquis
homo non est iustus*.

LII. Ex propositionibus compositis, alia est *Co-
pulativa* ; ut, *Et prodesse volunt & delectare poetæ* ; *Nec
sibi nec aliis prodest*. Alia *Disjunctiva* ; ut, *vel arbor est
bona, & fructus bonus, vel arbor est mala, & fructus ma-
lus*. Alia *Adversativa* ; ut *Coronæ regum sunt splendida,
sed graves*. Alia *Comparativa* ; ut *Beatius est dare, quam
accipere* : *Ubi est cadaver ibi congregabuntur aquila*. Alia
Exclusiva ; ut *solus Deus est immutabilis*. Alia *Causalis* ;
ut *quia ego vivo vos etiam vivetis, &c.*

LIII. Est etiam Propositio alia *Absoluta*, ut in pri-
oribus exemplis : Alia *Hypothetica*, seu *Conditionalis*,
in qua aliquid effertur sub conditione ; ut *si vivatis
secundum carnem moriemini*.

LIV. Sunt denique duo Genera Propositionum
imprimis notanda, *Definitio* & *Divisio*.

LV. *Definitio alia est nominis ; ut philargyria est amor pecunia ; Alia rei, eaque vel essentialis, quæ traditur per Genus proximum, & Differentiam essentialem proximam : ut homo est Animal rationis particeps. Deus est Ens perfectissimum : Alia Descriptiva, quæ traditur per omnia aut aliqua Attributa accidentalia : Ut Alexander magnus fuit filius Philippi Macedonis, Regni Persici everfor, Imperii Græci Rex primus.*

LVI. *Divisio alia est nominis ; quæ distinctio vocis, aut phrasis ambiguae ; ut canis vel est animal latrans, vel signum caeleste. Alia rei ; eaque vel Generis in species, quæ absolute Divisio dicitur ; ut Substantia vel est materialis, vel immaterialis : vel subjecti in accidentia ; ut Philosophorum alii fuerunt Ethnici alii Christiani.*

LVII. Sequitur *Discursus*, seu *Syllogismus*, in quo è duabus propositionibus, quæ præmissæ vocantur, tertiam colligimus, quæ conclusio dicitur. Ut *Quicquid currit movetur, Petrus currit ; Ergo Petrus movetur.*

LVIII. In Syllogismo *simplici* sunt tres termini, quorum duo vocantur *extrema*, nempe subjectum, & Attributum Conclusionis ; tertius *Medius*, seu medium, appellatur. Ut in exemplo adducto, *Petrus & movetur* sunt extrema ; id quod *currit* est medium. Et subjectum quidem conclusionis *Minus* extremum, Attributum seu prædicatum *Majus* vocatur.

LIX. *Præmissæ* fiunt ex medio & termino, & extremis combinatis ; & illa quidem quæ ex medio & majori extremo constat, *Major* propositio ; quæ vero ex eodem & minori extremo, *Minor* nuncupatur. Ut in exemplo prædicto, *Quicquid currit movetur*, est *Major* propositio ; *Petrus currit*, est *Minor*.

LX. Tres sunt *figurae* Syllogismorum. *Prima* est, in qua medium majori Extremo subjicitur, in majori propositione, & prædicatur de minori, in Assumptione.

sumptione. Ejus modi sunt quatuor, & his vocibus indicantur *Barbara, Celarent, Darii, Ferio*.

LXI. *Secunda*. Figura est, in qua medium utrobique prædicatur. Modi ejus sunt itidem quatuor, *Cæsare, Camestres, Festino, Baroco*,

LXII. *Tertia* est, in qua medium utrobique sub-jicitur: Et modi illius sunt sex, *Darapti, Felapton, Disamis; Datifi, Bocardo, Ferison*.

LXIII. In his vocibus memorialibus quæ modos designant, quatuor vocales sunt notande, A, E, I, O. Ex quibus, A denotat propositionem Universalem affirmantem; E, Universalem negantem; I, Particularem affirmantem; O, particularem negantem.

Exempla Modorum Primæ Figuræ.

Bar- Quicquid percipit etiam appetit:

ba- Omnis Spiritus percipit:

ra. Omnis igitur Spiritus appetit.

Ce- Nullus irrogenitus salvatur:

la- Omnis qui à Christo alienus, irrogenitus est:

rent. Nullus igitur qui à Christo alienus est salvatur.

Da- Omnis vere Christianus seipsum abnegat:

ri- Quidam homines sunt vere Christiani:

i. Ergo, Sunt quidam homines qui se abnegant.

Fe- Nihil inhonestum appeti debet:

ri- Quædam voluptas est inhonesta:

o. Quædam igitur voluptas appeti non debet.

Exempla Secundæ Figuræ.

Cæf. Nullus mendax est fide dignus:

a- Omnis pius est fide dignus:

re. Ergo, Nullus pius est mendax.

Ca- Quicquid se movet, vivit :
 mef- Nulla pars materia vivit :
 tres. Ergo nulla pars materiæ se movet.

Fef- Nulla virtus veritati est iniqua :
 ti- Quidam amor pacis veritati est iniquus :
 no. Ergo quidam amor pacis non est virtus.

Ba- Omnis virtus cum prudentia conjuncta est :
 ro- Quidam zelus cum prudentia non est conjunctus :
 co. Ergo quidam zelus non est virtus.

Exempla Tertiæ Figuræ.

Da- Omnis virtus est ardua :
 rap- Omnis virtus est sectanda :
 ti. Quoddam igitur quod est sectandum, arduum est.

Fe- Nullus potest seipsum deserere :
 lap- Omnis improbus est suiipsius hostis :
 ton. Est igitur aliquis hostis quem homo non potest deserere.

Di- Quidam impii divitiis affluunt :
 fa- Omnes impii sunt miseri :
 mis. Quidam igitur miseri divitiis affluunt.

Da- Omnes filii Dei sunt Reges :
 ti- Quidam filii Dei sunt egeni :
 fi. Quidam igitur egeni sunt Reges.

Bo- Quædam ira non est vituperanda :
 car- Omnis ira est passio :
 do. Ergo quædam passio non est vituperanda.

Fe- Nihil materiæ est spiritus :
 ri- Aliquid materia est invisibile :
 fon. Ergo aliquid quod est invisibile, non est spiritus.

LXIV. Ex his modis videre licet, in prima & secunda figura, majorem propositionem semper esse Universalem: in prima & tertia minorem esse affirmantem: in secunda alteram præmissarum esse negantem; in tertia conclusionem esse particularem. Item in omni Syllogismo, præsertim simplici, debent esse tres tantum termini, non æquivoci.

LXV. Et hi quidem sunt modi Syllogismorum *Universalium*, uti vocantur; illorum scilicet, in quibus altera præmissarum est propositio Universalis. Ex utraque enim particulari, nihil recte concluditur, vi formæ Syllogisticæ.

LXVI. Sunt præterea Syllogismi quidam *singulares*, in quibus utraque præmissarum est propositio singularis; possuntque fieri in omnibus figuris; sed commodissime in tertia. Ut

Judas prodidit Christum:

Judas fuit Apostolus:

Aliquis igitur Apostolus prodidit Christum.

David incidit in Adulterium:

David non fuit impius:

Aliquis igitur qui non fuit impius in adulterium incidit.

LXVII. Licet ad recte concludendum duæ præmissæ semper necessariæ sint, altera tamen in discursu sæpe supprimitur, seu intelligenda relinquitur. Et tum Syllogismus *Enthymema* vocatur. Ut, *avarus eget, Ergo non est dives: concupiscit; Ergo angitur, & est miser.*

LXVIII. Est & Syllogismi Genus, quod *Hypotheticus* dicitur: in quo scilicet altera vel utraq; præmissarum Hypothetica est. Ut, *si lapides vivunt, nutriuntur: at non nutriuntur; Ergo nec vivunt. Si Deus est, mundus regitur providentia; at Deus est; Ergo, &c.*

LXIX. Hastenus de Syllogismo ratione formæ. Ratione materiæ vel est *Verus* vel *Fallax*. Verus rursus, vel est *necessarius*, vel *probabilis* tantum, seu *contingens*.

LXX.

LXX. Syllogismus *necessarius* est, cujus præmissæ sunt necessario veræ; id est, quæ nequeunt esse falsæ, seu semper sunt veræ, vel absolute, vel ex conditione aliqua. Et si aliqua ex iis per se evidens sit, *Axioma* vocatur. Ut *Totum est majus sua parte*. Ergo *Respublica major est Rege*.

LXXI. Si ejusmodi Syllogismus concludat ex causa, vocatur *Demonstratio dióti*: Ut *omne rationale est capax disciplinæ; omnis homo est rationalis, Omnis igitur homo est capax disciplinæ*. Ubi medius terminus, nempe *rationale*, est causa cur *homo* capax sit disciplinæ. Sin ex signo vel effecto necessario, *Demonstratio hóti* dicitur: ut *Luna obscuratur; ergo inter eam, & solem à quo lumen mutuatur, terra è diametro interposita est*.

LXXII. Ad Syllogismum etiam necessarium pertinent *Discurfus ex absurdo*, seu *dia tou adynátou* ex impossibili: ut, *si Deus quidquam optat, quod commodè assequi non potest, non esset summe beatus: at est summe beatus: Ergo nihil optat quod assequi non potest; sed semper est voti compos*.

LXXIII. Syllogismus *contingens* seu probabilis dicitur, in quo altera vel utraque præmissarum, est duntaxat probabilis: hoc est quæ cum non omnino certa sit, magis videtur esse vera, quam falsa. Ut, *Mater amat liberos: hæc mulier est hujus infansis mater; ergo*

LXXIV. Syllogismus *Fallax* seu *Sophisticus*, alius est qui aliud probat quam probandum est, & *Ignoratio Elenchi* dicitur. Alius qui assumit tanquam verum quod probandum est, & *Petitia principii* vocatur. Et in his mutari solent voces ad fallaciam occultandam.

LXXV. Alius ex præmissis ambiguis falsam conclusionem infert. Ut, *Canis latrat: quoddam signum caeleste est canis: Ergo quoddam signum caeleste latrat*. Reliqua ex Institutionibus petenda differimus.

FINIS.

